






11

12

13



# CORIO LANIDOS

LIBRI XII.

EPOS

GREGORII JANNUGCELLI SUBLAQUEENSIS

PRAEFECTI BIBLIOTHECAE PIANAE

IN PATRIO SEMINARIO



ROMAE

EXCUDERANT FRATRES CONTEBINI

MDCCCLII.

Auctor omnia sibi reservat literarii domini jura a Summis Pontificibus,  
et a reliquis Principibus et Magistratibus concessa, qui hac de re  
foedus inierunt.

## OPERIS RATIO

---

Cum sese animo repraesentat iracundiae illius imago, qua Roma pene corrui armis C. Marci Coriolani, solet mens multorum tetra civilis belli cogitatione obnubilata nullum in eo detegere splendorem virtutis, imo potius omnem illam historiam scatentem criminibus judicare. Hinc aliqui etiam ex illorum ordine, qui caeteris doctrina praefulgent, factum illud exhorrent, et poemate prorsus indignum rejiciunt; eam etenim esse praedicant illius naturam et indolem, ut animos hominum potius ad nefarias actiones quam ad virtutes inflammet; quamobrem arbitrantur illud respondere non posse altissimo fini poeseos, quae est eximia omnis politicae et civilis disciplinae pars, et sibi proponit civium felicitatem per jucundam morum institutionem. Absit ut ego minimi scriptor pretii clarissimorum virorum sententiam contemnendam putem, imo eorum auctoritatem plurimum valere debere confiteor; attamen omissis auctoritatibus ipsa re et ratione exquirere possumus veritatem. Ego equidem arbitror non jam ex candoris inopia neque e vitio ingenii illorum opinionem ortam esse; verum quod omnis civilis belli facies vix sese offert, odium et abominationem excitat in animo, illumque perturbat et removel ab investigatione veritatis; tum etiam quod gravissimis illi viri occupationibus distenti satis otii non habuerint, ut ad plenam accuratamque factorum considerationem animum intenderent. Jam vero ut ordine res procedat, primum Coriolani facinus breviter intimeque undique inspicientes, nullo, ni fallor, negotio dignoscemus, an illud suppeditet satis aptam poemati materiam; deinde expen-



demus, an aliquid veri insit in virorum illorum objectis, quorum reveremur sapientiam, sed non censem opinionem anteponendam esse veritati; denique diligenter investigabimus, an hoc, quodcumque demum sit, poema illos errores contineat, quos nonnulli in eo reprehendendos arbitrantur.

1. Sed antequam initium disserendi faciam, a benignis lectoribus efflagito, si quam opinionem jam suis mentibus comprehenderint, quoties eam ratio convellet, quoties veritas extorquebit, ne repugnent, eamque animis suis aut libentibus aut aequis remittant. Jam vero confugiamus statim velut in portum ad artis poeticae principia, et ad ea revocemus actionem illius imperatoris, qui quamvis multorum populorum victor, patriae tamen injuriis concessit; breviter videamus, an praecipuae poematis dotes huic facto convenient. Primum per se patet illud unitatem habere tantopere necessariam, ut vehementioribus motibus exagitentur auditorum animi, et numquam langueat vis attentionis. Deinde illustre est tam ratione personarum, quam ratione sui; agitur enim inter volscos, romanosque duces et senatum de libertate aut de servitute populi romani principis, ita ut omnium animos, sed praesertim nobilitatis ad praecleara facta possit impellere, et ad ea quasi viam sternere. Praeterea multorum spatio saeculorum remotum, et inter vetustatis nebulas translucens praebet ansam plura fingendi verisimilia, quae majorem excitent in animis delectationem; magnam demum habet utilitatem, cum omnes admoneat populos et magistratus, non esse injuria lacessendos egregios duces inclytosque viros, et damna etiam gravissima et contumelias esse denique oblivioni dandas. Hic mihi videre videor ingeniosos lectores silentium imperare; jam enim cernunt hoc facinus habere praecipua poematis ornamenta, et aptissimum esse ad epicum carmen condendum. Sed



perscrutemur studiosius, quatenus sit Epopaeiae natura et indoles, ut veritas clarius elucescat.

2. Celebratissima parisiensis Encyclopedia sub vocabulo Epopaeiae tradit, eam nihil aliud esse nisi Tragoediam, cuius actio in mente poetae evolvitur; hinc Aristotelis docet poetica, unum idemque fundamentum subesse Dramati et Epopaeiae, et hanc a Tragoedia non differre quoad naturam, sed tantum ob maiorem poematis explicationem diversamque carminum formam. At ira et pietas Coriolani optimae Tragoediae suppeditavit argumentum tum clarissimis vatibus anglis Shakespeario et Thompsonio, tum etiam La Harpe, Goujonio, Chapotonio, Segurio aliisque eximiis Galliae poetis (*Biograph. Univers. Vocab. Chapotonius*), tum demum Zannottio et aliis praeclaris Italiae vatibus; praeteream vero, huiusmodi historiam a famigerato Poussinio aliisque optimae notae pictoribus ad vivum espressam esse coloribus, et immortalitati consecratam, ita ut in ea ornanda poesis et pictura contendere visae fuerint. Eritne igitur aliquis justus rerum aestimator, qui doceat, Coriolani historiam, moventis arma in Urbem eique tandem ignoscentis, epico tractatam carmine nitescere non posse ac proinde relinquendam?

3. Quod si quis incerto adhuc fluctuat animo, supracitatum illud opus parisiense rursum consulat, et optimas poeticae institutiones. Nullam sane humanam actionem, quae proxima poeseos materies est, ab epico carmine excludi docemur; hinc laudata tradit Encyclopedia, et res ipsae per se loquuntur, ex itinere, ex consilio, ex affectu, e bello civili, ex irruptione in aliquod regnum pulchra orta esse poemata, licet singula haec valde inter se differant. Jam vero si quaelibet ex his rebus aptissima est poemati condendo, quo magis historia Coriolani, in qua una simul continentur consilium extenuandi romanam potentiam, vehemens ira,

vehementior pietas, iter exercitus volsi, pugnae cum Romae sociis, irruptio intra fines romanae reipublicae?

4. Neque leve nobis argumentum suppeditat caesianum illud bellum, quod quamquam multa civium caede et sanguine foedum sit, plura tamen offert exempla magnanimitatis, fortitudinis, vigilantiae, et prudentiae; hinc illud Epopaeja dignum celebratur a praeclaro viro Blairio (Lect. tom. 3. l. 7.), a Marmontelio, ab Encyclopediae scriptoribus et ab aliis bene multis. Quo potiori ergo jure epicum promeretur carmen C. Marcius, qui non jam patriam in servitutem redegit uti Dictator, sed postquam Urbem terrore sui gladii corripuit, oblitus injuriarum ei donavit iterum libertatem. Neque aliquis objiciat, Caesarem fuisse maximum ductorem; Marcius enim summus quoque aetatis suae exstitit imperator, de quo testantur annales, si romanae praefuisset aciei, ipsum plures gentes subjecturum fuisse, quam caeteri duces ipso antiquiores superare potuerant; sic tradit universalis historia ab anglorum Scriptorum Societate elucubrata.

5. Coronidis loco referre juvat omnium aetatum consensum, qui Achillis iram et pietatem in Patroclum judicavit praeclarum esse divinae Iliadis fundamentum; non tantum igitur artis poeticae ignarus, sed plane fatuus et amens esset quicumque temere jactitaret ab Epopaejae finibus ejiciendum esse Coriolani facinus. Praesertim cum levis omnino causa, rapta scilicet captiva puella furorem graeci ducis accendat; gravissima exilii perpetui injuria suscitet iram romani; suis ille in puppibus cum Myrmidonibus absconditus cessat ab omni praeclaro facinore; hic vero semper adest lectorum oculis, et magnanimitatem, fortitudinem, vigilantiam assidue exercet; ferrum ille tandem distingit non amore suorum, non refraenatione vindictae, imo acerrimo vindictae deside-

rio, ut necem ulciscatur sodalis; hic ponit arma omnemque iram eximia erga suos cives patriamque pietate inflammatus. Neque vero omni crimine solvit Pelidem, quod gladium graeco sanguine non polluerit; foedus enim graecis cum principibus contra Teucros ipse inierat; viderat suum brachium et suorum agmen Myrmidonum esse totius exercitus clypeum et salutem; atqui dum salus suorum in discrimen veniret, ille graecas acies orbavit suo robore, et indecoras fudit preces divae parenti, ut Jovem adiret, ac incitaret in Achaeos (Iliad. L. 4.); dumque hi non procul ab eo ruebant in praelia, stans ille in puppi, cytharamque pulsans et canens caedi suorum insultabat. Achilles igitur non suis ipse armis confodit, sed a se remoto omni labore et periculo suos Graecos tradidit armis Teucrorum mactandos, et inter huiusmodi caedes gaudio exultavit, quo nihil atrocius non dicam referri, sed ne excogitari quidem potest (Iliad. L. 9.). Tota praeterea Iliadis fabula continet vehementes populorum tam graecorum quam phrygum iracundias, seditiones, fraudes, libidines, uno verbo scelera; hoc equidem de illa tradit vir acerrimus in iudicando Horatius Lib. 1. Epist. 2. Ad Lollium:

Fabula, qua Paridis propter narratur amorem  
 Graecia Barbariae lento collisa duello,  
 Stultorum regum et populorum continet aestus.  
 Antenor censet belli praecidere causam,  
 Quid Paris? Ut salvus regnet vivatque beatus,  
 Cogi posse negat. Nestor componere lites  
 Inter Peliden festinat et inter Atriden,  
 Hunc amor, ira quidem communiter urit utrumque.  
 Quidquid delirant reges, plectuntur Achivi;  
 Seditione, dolis, scelere, atque libidine et ira  
 Iliacos intra muros peccatur et extra.

Hi tamen animorum aestus, haec flagitia epico quidem tractanda carmine Horatii ipsius et omnium iudicio censentur; quo magis facta in hoc poemate descripta, quae sunt plerumque aut Coriolani praeclara facinora, aut ducum volscorum et romanorum? Cum igitur Achillis iracundia omnium consensu sit felix argumentum, quo prima pulcherrima Epopaeja condita est, cum teterrimum bellum civile Caesaris a laudatissimis artis magistris iudicetur epico canendum carmine; cum nullum humanum facinus forte et ingens a finibus poematis sit rejiciendum; cum docente Philosopho Epopaeja sit vera omnino Tragoedia, multaque illustria dramata ex hac historia Coriolani prodierint in lucem; cum denique hoc romani imperatoris factum unitate, splendore, vetustate, utilitate praecipuis poematis dotibus ornatum refulgeat; reperietur aliquis qui contendat hoc argumentum per se obscurum et poemate indignum esse relinquendum? Atque is ita contendens poteritne unquam in animum cordatorum virorum inducere se ingenio et doctrina praeditum esse, et ex intimo animi sensu, nulloque praeiudicio irretitum res denegare extra dubitationis aleam positas? Arbitrarer sane tempus incassum terere, et lectorum ingeniis dissidere viderer, si in re tam perspicua immorarer diutius, et non converterem potius attentionem ad illa objecta, quae mihi secundo loco proposueram enodanda.

6. Haec duplicis sunt generis; aliqua argumentum poematis in genere, alia vero hoc ipsum singillatim poema respiciunt; de utroque genere breviter. Et primum in illa romani ducis actione nihil magnanimitatis, nihilque virtutis admirandae quidam inesse putant, quod si procul a vero non esset, jure merito inferrent, illam ad Epopaejae dignitatem assurgere non posse. At sedulo adnotandum, eam actionem duas habere partes, romanam potentiam in discrimen adducendi, tum demum

ignoscendi patriae ; utrumque autem eximium esse ac singulare ipsa edocet ratio. Nam per se sane admirabile est ac singulare, unum eundemque ducem valde elevare fortunam gloriamque praeclari populi, eamque suo arbitrio deprimere ac ferme delere ; hoc equidem facinus magnam requirit virtutem et mirificum usum in re militari et apud milites auctoritatem ; huiusmodi vir praeditus esse debet animo constanti et recto, qui aerumnarum pondere non frangatur, imo magis magisque assurgat ; hinc omnibus admirationi est illa Napoleonis actio, qui regno pulsus adversaque fortuna dejectus in Ilvam, incredibili fortitudine ad Galliarum imperium remeavit. Ultro tamen ingenueque fatemur in illa magnanimitate et virtute desiderium vindictae immisceri. At observandum diligenter in primis, illum ducem nusquam non magnanimum apparuisse, et virtute praeditum, sin minus sapientum, certe vulgi iudicio, a quo non abhorrent poetae, fuisse ; testatur historia Coriolani apud Plutarchum = Ingens erat ejus per totam Italiam nomen, atque immensa laus virtutis, quae unius migratione corporis rerum conversionem tam novam effecisset. = Deinde tradunt artis poeticae institutiones, et in primis laudatum parisiense Lexicon, argumenta poematis aut esse exemplum virtutis jugiter constantis, qualis ostenditur Ulysses in Odysea, aut virtutis, quae quandoque deficit, ut apparet Achilles in Iliade ; at huiusmodi virtutis et infirmitatis immixtio non jam sua dignitate suoque splendore despoliat poema, imo potius illud reddit humanis moribus et naturae magis consonum, magisque alliciens ad attentionem et imitationem, cum quisque censeat se facilius imitari posse heroem qui tamen aliquam patitur humanam infirmitatem, quam virum undique perfectum qui supra conditionem hominum longe assurgat ; hinc Lib. 21. 22. et tota ferme Iliade Achilles describitur, qua-

lis ab Horatio depingitur in Arte poetica „Honoratum si forte reponis Achillem-Impiger, iracundus, inexorabilis, acer-Jura neget sibi nata, nihil non arroget armis, „. At quam diligenter in hoc toto poemate cautum est, ut Marcius culpam seditionis repararet multarum virtutum exercitio, hoc cuique legenti patet, et mirifice consonat cum ejus historia; ille enim ex Dionysio L. 8. Antiquitatum rom. §. 60. = „omnes aetatis suae homines virtute bellica superavit, maxime temperantia et justitia praefulgens, et inter praeclaros viros antiquitatis a gravissimo illo philosopho et historico Plutarcho meruit adnumerari, qui ejusdem etiam politicas commendat virtutes, innocentiam, temperantiam, consilium, eloquentiam, fidem, humanitatem. Tullius vero eum cum Themistocle confert pluribus in locis; et primum Lib. De claris Oratorib. N. 10. = Nam bellum Volscorum illud gravissimum, cui Coriolanus exul interfuit, eodem fere tempore, quo Persarum bellum fuit, similisque fortuna clarorum virorum =. Et Lib. de Amicitia N. 42. = Quis clarius in Graecia Themistocle? Quis potentior? Qui cum imperator bello persico servitute Graeciam liberasset, propterque invidiam in exilium missus esset, ingratae patriae injuriam non tulit, quam ferre debuit. Fecit idem, quod viginti annis ante apud nos fecerat Coriolanus =. Multum igitur magnanimitatis et virtutis inest in adducenda in discrimen romana republica Volscorum armis, quae multoties victa a Romanis fuerant, et illa singularis virtus circumdata iracundiae nube longe pulchrior et optabilior refulget, uti fuscam super arcem niveus magis emicat color. Non minus autem, imo multo magis Coriolani magnanimitas et virtus eminet in parcendo; cuique enim patet eam animo vim subesse debere, quae rebelles affectus, et seipsum vincat; haec est gloria quam cum militibus non dividit imperator, Tullius ait pro Marcello, unde virum

hujusmodi simillimum Deo judicat. Quod si res aequali lance perpendantur, a Coriolani virtute gloria Themistoclis superata deprehendetur; ex commemorato enim Ciceronis testimonio Coriolanus viginti annis ante graecum ducem, primus scilicet „ingratae patriae injuriam non tulit quam ferre debuit. „Non igitur alterius impulsus exemplo, non similis laudis desiderio illectus, sed patria tantum caritate inflammatus Romae pepercit. Quis ergo non fateatur Coriolani facinus, sive spectetur in infirmenda Romae virtute, sive in ignoscendo patriae, singulari magnanimitate et vi mentis refulgere, ac proinde illud habere granditatem, dignitatem, et splendorem, ut epico tractari carmine laudabiliter possit?

7. Sed aggeret fortasse quispiam, injustam omnino fuisse iracundiam Coriolani, illumque jure exilio damnatum fuisse; superbus enim patritius senatui consulebat, carius vendendum esse frumentum populo, ut famis tormento coactus ejuraret ille magistratum tribunatus a patribus extortum, et jura sua ordini redderet senatorio. At hoc alterum, ut primum illud, non difficili negotio evincitur alienum esse a veritate. Nemini enim obscurum esse arbitror, togatos patres in senatu, ut omnes regnorum procures in publicis consiliis, plena dicendae sententiae libertate fuisse donatos. Si igitur Coriolanus consuluit juxta Plutarchum „ut extorquerent plebi tribunatum, qui consulatus erat eversio, et divisio civitatis „nullum plane jus violavit, ac nulla poena subjici poterat. Deinde juxta laudatum historicum et Dionys. Halic. l. 7. c. 25. juniores patres et locupletes pene omnes in C. Marcii sententiam abierunt; quidam tantum ex majoribus natu id improbabant. Aut igitur plerique rei ex patribus, aut nemo in judicium vocandus et puniendus erat; atqui nemo praeter Marcium vocatus et poena multatus fuit; dubitabit ergo

aliquis illum ob invidiam et odium fuisse damnatum ? Denique liquet ex Plutarcho, damnationis causam fuisse triticum praedamque in agro volsco collectam et a Marcio militibus distributam ; vehementer igitur hallucinantur ii qui contendunt illum ejectum fuisse , quod immitte contra populum consilium dabat. Sed attente perpendendum est, hoc ipsum, quod Marcio objiciebatur ut flagitium, fuisse fictum crimen et velamen veteris odii. Irruebant enim frequenter in agrum romanum Volsci ; Respublica et socii grave patiebantur detrimentum et dedecus ; maxima plebis pars vetusta contra senatum simultate renuebat arma sumere et repellere a finibus hostes. In hoc rerum discrimine patres cum C. Marcio duce sunt populum vehementer ad arma cohortati , et pauperior pars plebis nomen in foro dedit , iisque laetus senatus cum reliquo populo cessit omnem quam collecturi essent ex eo bello praedam ; aequum enim visum fuit , ab illis potius praedam accipi , qui egenis domibus relictis eam sibi sanguine comparaverant, quam ab iis qui renuerant periculi et laborum esse participes. Nihil igitur suo Marte et arbitrio , nihil contra leges ausus est dux Coriolanus , qui nihil sibi praedae reservans, passus est eam integram inter victores dividi ut pactum fuerat. Sed esto ; aliquid contra leges egerit Marcius. An aequum erat hanc praedae partitionem inter victores solum permittente duce severissima exilii perpetui poena multari ? An parta ab ejus virtute victoria tali praemio et corona digna erat ? An tot ejus politicae virtutes , tam impensum erga patriam studium , et amor , tot in rempublicam promerita non debebant a generoso populo indulgentiam omnem impetrare ? Horatius victoriam de Curiatiis parricidio foedavit ; citavere leges nefas , sed abstulit virtus parricidium , inquit Florus. Hic ergo quia semel patriam periculo liberavit , iudicio populi absolutus est ; ille vero qui toties Urbem



servavit et mirifice ejus auxit gloriam, ne poenam quidem levio- rem humanioremque impetrare debebat? Nullo ergo jure ad severissimum supplicium damnatum fuisse patet Coriolanum. Caeterum sive attendatur nefarius conatus praecipitandi Marcium e rupe Tarpeja, sive crebri tumultus a tribunis contra illum excitati, sive insolita et iniqua illius judicii forma, sive accusationes in eum conflatae, quarum una rejecta temere confingebatur et altera, sive demum singula illius damnationis adjuncta; cujusque judicis conscientiae patebit Marcium vi fuisse oppressum, et odium invidiamque in eum triumphasse. Hoc autem mirifice confirmat gravissimum Tullii testimonium (L. de cl. or.) = Siquidem uterque (Coriolanus nempe ac Themistocles) cum civis egregius fuisset, populi ingrati pulsus injuria se ad hostes contulit. =

Satis mihi multa verba fecisse videor ut ostenderem et Coriolani actionem esse poemate dignissimam, et ducem illum de patria optime meritum summa injuria in perpetuum exilium fuisse damnatum; perpendamus ea modo quae contra hoc quodcumque sit poema singillatim a quibusdam solent objici. Fatear primum oportet ine horrentem fluctus mergique timentem parva quidem vela pandisse vasto pelago. Sed profitebor etiam prout res est, me multis annis reliquisse studia delectationis, ludum, jocum, convivium, sermonem pene familiare deservisse; me clarissimorum monitis atque praeceptis contendisse pro viribus, ut hujus poematis structura juxta Horatium Sat. 4.<sup>a</sup> exquisita esset ac magnifica. Non una vero causa me ad carmen elucubrandum excitabat. Hoc in primis argumentum visum est caeteris aptius ad poeseos finem assequendum, jucundam scilicet morum institutionem, ut supra dictum est; praebetque ansam describendi frequenter scenas amoris, amicitiae, benevolentiae, gaudii, fiduciae, misericordiae, terroris. Inter italias autem res oculos potissimum de-

fixi in Romanorum historia, ut admirationis, obsequii et reverentiae signum aliquod pro modulo meo praeberem romano populo, qui Urbem incolit catholici Orbis Reginam, totque elapsis casibus et aetatibus miram servat adhuc majorum suorum magnanimitatem, pietatem, constantiam et sapientiam; honoris praeterea causa commemorare volui praecipuos Latii populos Apostolicae Sedis Auctoritati tantopere devotos, quibus ecclesiasticae ditionis princeps constat provincia. Illa vero, quae respiciunt antiquos Italorum mores, ex veteribus Scriptoribus deprompta sunt, et praesertim ex historia antiquorum populorum Italiae auctore Josepho Micalio. Grati autem animi sensus me impellit ad hoc quaecumque carmen Genti Gallorum inscribendum, quae multum sanguinis circa romana moenia effudit, multumque insumpsit argenti, ut Latio rursus pacem donaret, quam etiam nunc servat militum suorum fortitudine et vigilantia. Vernaculae vero linguae latinam anteponendam putavi ob reverentiam sanctae Matri Ecclesiae debitam, quae latine loquitur orbi, tum ob illius majestatem sermonis dignam victorum orbis, aptamque Epopaeiae, et ob facti ipsius naturam, agitur enim de Latinorum historia. Hac denique mente argumentum hujusmodi elegi, quod in eo exprimi fuse poterant nobilissimi pietatis sensus erga matrem; a pueritia enim hos animi motus expertus sum erga dulcem parentem, quae multis ornata virtutibus me in primis amavit, quam senem multis annis alui laborum meorum fructu, cujus mortem acerbissimam etiam nunc defleo, quam tamen in caelesti beatitate me iterum spero visurum. Haec animo insita vis pietatis me urgebat assidue, ut verbis egererem hujusmodi sensus, eosdemque in aliorum animis excitarem.

8. Haec sunt, de quibus monitos primum volo benignos lectores; alterius modo generis objecta audiamus.

In hoc poemate ajunt, ut in Lucani Pharsalia, jejunaum et siccam facti historiam reperiri, et nihil arte adinventum, et adjectum esse ad ornamentum. Illud praecipue destituitur supernaturalibus Deorum actionibus, quae admirationis alunt affectus in Epopaeja, ac tam magnifice occurrunt in Homeri, et Virgilii Poematibus.

Haec quidem tam evidenter factis et veritati contraria oggeri ab eo non posse opinor, qui hoc poema attento animo perlegerit. Duo hic reprehenduntur singillatim refellenda, nimirum inventionis inopia, et defectus actionis Deorum. Quoad primum, ut ab ipsa epici carminis natura et partibus ducamus exordium, Epos tria complectitur, dispositionem scilicet, mores, et stylum; breviter de singulis. In dispositione distinguitur apparatus, nexus, et solutio. Status et conditiones personarum tam volscae, quam romanae gentis eo tempore, quo incipit actio poematis, oppositorum studiorum prospectus, ex quibus oritur inde nexus, consilia et causae proximae belli volsci suscipiendi initium hujus Epopaejae constituunt, et primo libro simpliciter, ni fallor, et non ignobiliter exposita sunt. Effectus autem oppositarum conditionum et studiorum, consequentia ex consiliis, et iracundia Coriolani, pugnae nempe, caedes, moerores, et e converso laetitiae, et caetera, quae describuntur, augent gradatim in Marcii corde difficultates parcendi, ejusque vehementer exagitant animum, et in varias rapiunt partes ob desiderium ultionis, et magnanimitatis. Haec sunt in nexu. Preces matronarum, et praesertim Veturiae, quibus Coriolanus, seipsum vincit, patriaeque parcit, in solutione sunt, in qua heros ab affectuum tumultu, et a misero iracundiae statu transit ad felicitatem, et ad ineffabile parcendi gaudium. Omnis autem cura adhibita est, ut veluti per gradus periculum augetur, et a praecedenti sequens oriretur

factum, a statu alicujus personae deflueret altera ipsius conditio, et sic omnes simul partes haerent apte, et conjungerentur, et constituerent unius poematis membra. In hoc insuper juxta artis praecepta subest quasi fundus historiae; et Coriolani iracundia victa a pietate in patriam est certe quidem illustre historicum factum, et quasi operis materia, quae potissimum selecta est, quia ceteris aptior visa est ad affectus ciendos, ut superius innuimus N. 7. In ea tamen actione ornanda magis verisimilitudini, quam veritati studere visum fuit. Nam non infrequenter opportunis locis additi sunt rerum lapsus in contrarium statum, agnitiones personarum inter se, episodica, sententiae, caeteraque ornamenta, ut poema delectaret, instrueret, et moveret affectus. Recte autem existimo cum artis institutoribus, eum qui scribit Epos ad puerorum, leviumque hominum delectationem, omne opus contexere singularibus casibus et heroicis facinoribus, quae ne veritati quidem proxima sint, negligere vero picturas indolis, morumque personarum. At cum nobis propositum sit elucubrare carmen ad cordatorum hominum voluptatem simul et utilitatem, omni contendimus industria, ut tam Volscorum, quam Romanorum apte pingerentur mores, ac proinde retulimus facta, dicta, gestus, et varios personarum status; addidimus colloquia, et disceptationes inter duces, legatos, et senatores de rebus publicis et politicis, ut toto operis decursu videre est. Iam benevolos obsecramus lectores, ut justum ex animo iudicium ferant, num vere dici possit in hoc poemate jejunam tantum facti historiam contineri. De stylo postremo loco dicemus; nunc de admirabili, quod hoc in carmine desiderari, affirmant; ajunt enim, cum in eo deficiat actio Deorum, illud excitare nequire admirationis affectum, ut veterum Epicorum carmina. Admirabile vero, quod in Epopaeja spectatur in primis, duplex esse tra-

dit laudata Encyclopedia, omnesque artis institutiones, naturale nimirum et supernaturale. Primum, mirabilia scilicet facta et eventus videntur in singulis libris occurrere. Nam praeterquamquod ipsum Coriolani facinus admirabile prorsus est, cum ejus virtus, ut ait Plutarchus, rerum conversionem tam novam effecerit, ac demum patriae pepercerit, ille ipse imperator in caeteris suis actionibus describitur divina quadam vi et efficientia afflatus, ut supra hominem et sapere et posse videatur, crebro etiam pinguntur miranda facta et dicta romanorum volscorumque ducum et patrum, adduntur quoque picturae mirabilium naturae phoenomenorum etc. Sed neque deesse dicendum est admirabile supernaturale in primo, octavo, et duodecimo libro, in quibus explicatur non jam fabulosa Deorum vis, sed vera divinae providentiae actio res humanas praeordinantis, et gubernantis; Deus enim, ut ait Plutarchus in Coriolani vita, actionem non efficit invitis nobis, verum praebet liberae voluntati exordium et fiduciam, vel spem addit. Neque enim ullae Epopaeiae leges prohibere valent, quominus vates non veteribus sed hodiernis populis poema conscribens, antiquorum omittat commenta, et poetice describat divinam providentiam, quae reapse adstitit, et omnia ordinavit facti illius adjuncta, circa quod poema versatur; haec autem inter se omnino non discrepare, sed sibi constare et apte cohaerere patet; licet simul etiam exponantur veterum Romanorum sacrificia, ritus, et falsa religio, quae sunt pars morum in epico carmine praecipue notanda. Quod si describatur ibidem Deus, suos mittens ministros iussa per orbem ferentes, hoc etiam non excedit humanae rationis limites, ut Metaphysica docet. Caeterum ratio suadet, et experientia confirmat, admirabile veteris Mythologiae non esse tam necessarium Epopaeiae, ut ejus naturam vitamque constituat, et sine eo

poema esse non possit. Ex his breviter perpensis plane liquet, ut arbitror, hanc Epopaejam non laborare vitio Pharsaliae, cujus auctor secutus est historiae ac temporum ordinem, et ferme omnino neglexit inventionis gloriam, ut fatetur ipse Lucani eximius laudator Marmontelius; constat enim in hoc poemate reperiri admirabile tam naturale, quam supernaturale, quod tantopere in Epopaeja delectat.

9. Aliud autem reperit eximius censor hoc in poemate reprehendendum; occurrit enim frequens praeliorum narratio iisdem ferme subadjunctis. Tam absona est, et opposita factis haec objectio, ut jure suspicari liceat eum, qui haec effutiat, vix unum, vel alterum poematis locum, quo describuntur pugnae, oscitanter legisse. Non enim pauca addita esse patet cuique attento lectori ad poematis varietatem, ut superiori numero adnotatum est. Hae autem sunt praeliorum narrationes. In secundo libro Setiae occurrit expugnatio superatis insidiis in nemore positis; in libro quinto refertur certamen, et Volscorninascensu sin Lavinii moenia; breviter autem innuitur agrestium conflictus et caedes in sexto libro; in octavo nocturna pugna describitur Romanos inter et Volscos; decimo tandem libro dux Marcus refert navale praelium ostiense; de caeteris autem oppidis victis reperitur brevis tantum enunciatio, cui plerumque innectitur eximium aliquod factum imitatione dignum. Haec certamina, quae cum vitam herois adumbrent, locum prorsus habent in Epopaeja, sub diversis adjunctis exposita esse patet cuique legenti, uti exemplis docuerunt poetarum principes Homerus, Virgilius, Tassus. Ut clarius suis rem oculis videat benevolus lector, aut integrum quaeso poema perlegat attente, aut saltem cujuscumque libri argumenta consideret. Temere igitur affirmatur in hac Epopaeja pugnarum descriptiones ad fastidium usque et ad satie-

tatem ingestas esse, et nihil in illa varietatis occurrere, quae tantopere animos reficit, ac reparat, ut ait Quintilianus.

Reliquum est, ut pauca de stylo verba faciamus, qui videtur alicui pluribus in locis humilis et abjectus. Ingenue primum fatear necesse est, me in hoc ut in reliquis proposuisse mihi ad imitandum aetatis aureae scriptores, praecipue vero Virgilium, et Horatium, nec fastidivisse unquam limae laborem, et moram. Deinde noverit obsecro benignus lector, me subjecisse hos libros iudicio unius et alterius ex philologis et poetis primae notae, quorum non referam nomina, quod cum de clarissimis viris agatur, grati quoque animi significatio inanis ostentatio videri potest. Si quid autem in his libris frigide ac jejune, si quid durum in carminibus, si quid parum numerose, atque etiam parum latine taedio affecerit lectorem, quod non semel occurret in opere longo et difficili, ipsius deprecor indulgentiam, non quia potueram melius, et hunc vel illum locum neglexerim, quod falsissimum esse conscientia teneo; sed quia gravi et valde laborioso instituendae juventutis muneri ab adolescentia addictus, et metuens ne quid privatis studiis de opera publica detraherem, ad singula ut cupiebam perpolienda non satis otii habui. Deinde carmina, quae ab Ovidio animo nonnisi sereno deducta pervenire dicuntur, elucubravi domesticis assiduisque jactatus tempestatibus, animoque anxio et sollicito, praesertim ob frequentes, longas, gravesque valetudines, seniumque parentum.

Atque haec sunt, quae hoc in sermone mihi constitueram dicenda, de optimo scilicet Coriolanidos argumento ad epicum carmen condendum, de facili obsectorum, quae generatim hanc spectant historiam, solutione; demum de iis, quae in hoc poemate singillatim censura digna aliquibus visa sunt. Caeterum si

quid hoc in opere non indignum laude doctus invenerit lector, primum Datori donorum omnium Deo, tum illi gratias agam, cujus agnoscam in me benignitatem; sin autem videbitur hoc poema parum habere varietatis, splendoris, motusque animorum, ut homines a vitiis deterreat, inflammet ad virtutes, primum me ipsum contemnam ac despiciam, tum exorabo benevolum lectorem, ut libenter saltem excipiat diuturnos bonae voluntatis adnitus ad opus jucundum simul et utile perficiendum.





## LIBER PRIMUS

## A R G U M E N T U M

*Divina Providentia omnia fortiter et suaviter praeordinat, ut Roma poenas luat ob injustum Coriolani exilium. Causarum belli volsci expositio, cui dux praeficitur Marcius. Arma gens volsca comparat, mittitque Alcanorem et Haemonidem legatos ad Etruscos, Ausones, et alios populos, ut foedus ineant contra Romam. Volsce Senatus amplectitur belli administrandi rationem a Coriolano propositam. Convivium, et dona Marcio oblata a Tullo, et Cumilla, dum filium Grajum eo sub duce mittunt ad bellum. Ob Graji discessum perturbatur Amata Anxuris filia juveni desponsata, quam parentes rus ducunt, ubi quoque ejus cor amore agitur. Pars exercitus volsci Circaeum occupat, et incolae romanae originis cum duce Numitore Romam commigrant, ubi Senatus miseris fert opem, armisque pubem instruit, quæ dux Numitor hortatur ad bellum. Volumnia Jovem precatur, ne quid triste inter arma contingat Coriolano.*

**C**aelicolae, memorem ductoris promite cantu  
 Iram, quæ volscas rapiens in bella cohortes  
 Prostravit Latii populos, et luctibus Urbem  
 Incendit (superum movit pater omnia vertens  
 In commune bonum virtutem et crimina); pulchram  
 Exulis hinc pugnam durumque monete laborem,  
 Quo se subjiciens patriam non obruit armis.  
**O** studiis belli et pacis celebrata per orbem  
 Gallica gens, decus Europae, quæ sternere Martes  
 Elatos gaudes, subjectis parcere, servas  
 Quæ Latio partam generoso sanguine pacem,  
 Victoris mitisque ducis ne sperne canenda  
 Facta, tibi puro ac memori quæ corde dicamus.

Tuque nepos olli, Europae qui fata regebat,  
 Gallorum Lodoix Praeses, vos Curia celsa  
 Ingentis populi Patres, a pondere pressae  
 Curarum modicam requiem concedite menti,  
 Pandite et incompitis attentam versibus aurem,  
 Unde sonat pietas, sapientia, robur in armis.

Qua rex astrorum roseo diffundit eoo

In terras radios, caeli regione suprema  
 Se pandit nubes, lumen torrentis et instar  
 Rumpit in immensum sese per caerula fundens;  
 Heic autem stabilis radiantibus intus et extra  
 Electri veluti flammis crystallinus orbis  
 Apparet, cujus limbos it fulgida circum  
 Fascia purpureo et glauco saturata colore,  
 Roscida ceu sole adverso depingitur Iris.  
 Tollitur in medio par monti regia sedes,  
 Ad quam mille gradus auro gemmisque micantes  
 Ducunt, innumera et circum velut astra coruscant  
 Agmina Spirituum. Fundunt hi carmen ab ore  
 Summe tibi Genitor, non jam cui Graecia quondam,  
 Romaque combussit super aras impia thura;  
 At tibi cui celsae naturae propria vitam  
 Vis dat alitque; tibi qui non mutabilis aevo,  
 E nihilo ducis mutabile quidquid ubique est;  
 Quem resonat tellus, immensi et machina caeli,  
 Quo domus et pagus, surgentia regna reguntur,  
 Ac ea quae terra fumant, commercia, bella,  
 Et sortes hominum quovis subsidere, primo  
 Temporis a cursu postremi ad lumina solis.  
 Illius e vultu jugis nam labitur imas  
 Ad terras radius; sed qui non permeat intus  
 Innumeras vitas, quae pennis aethera, pontum  
 Aut pinnis tranant, pratis aut montibus errant.  
 Mens hominum ante alias caelo dilecta creantem  
 Servantemque manum non solum cernit, at isto

Virtutis verique notas splendore; voluntas  
 His ardens radiis ad rectum fertur, et horret  
 Omnigenas scelerum facies; hinc fulget in orbe  
 Inter diversas habitu quam vestis et armis  
 Tam linguis gentes mirabilis ordo, fruuntur  
 Libertate licet. Qui vero morte carentem  
 Destinatus ad vitam mortales, juris amator  
 Innocuas solet ille domos circumdare luce  
 Atque opibus. Contra suescit potare veneno  
 Crimina dira suo, longoque agitare dolore  
 Improbata corda; famem his addit morbosque luemque.  
 Cum vero in saevam populi mens conscia fraudem  
 Conjurat, reliquas a noxa ut terreat urbes,  
 Clara dat aeternus vilescere nomina Rector,  
 Et rerum dominis certatim illudere victa  
 Oppida, bellorumque premit feritate superbas  
 Gentes; sic populum torquet, qui jura refringit  
 Naturae in terris, cui sub nigra tartara servat  
 Infandos luctus, immortalesque furores.

Ille videt celso e solio, dum prima Quiritum  
 Saecla revolvuntur, jam libertate ruentem  
 Inque suos Urbem diram; nam quatuor annos  
 Injustis positus iris non brachia tendit  
 Extorri Coriollano, qui sanguine famam  
 Et patriae produxit opes. Tunc ille latenti  
 Omnia consilio versans, jubet ire ministros  
 Qui vigilant, rectus ne terris corruat ordo.  
 Olli per stellas immensi ac aethera caeli  
 Auratis pennis labuntur ad itala regna  
 Geu lucis radii. Pars oras numine complens  
 Antiacas, procerum mentes, ut jussa facessant  
 Exulis egregii, flectit; prius agmina contra  
 Romulidum rapiant socios, et caerula claudant,  
 Atque alias cogant acies; tum denique totis  
 Viribus oppugnent Urbem. Pars exulis ori

Insuetum inspirat lumen sonitumque metumque  
 Ingentesque duci sensus motusque ministrat;  
 Suggestit et Volsco virtutem, ut vincere turpe  
 Terroris discat, pulchram et per vulnera mortem  
 Oppetere. At dubios pars vellit corde timores  
 Finitimo populo Romani nominis hosti,  
 Ut conjuratas jungant in foedera dextras.

Pars contra saevos concussam mittit in Urbem  
 Dissensus, aliqui ut certent se effundere portis,  
 At renuant plures committere praelia campo.  
 Jamque furor belli succendit ad horrida mentes  
 Arma, ut se fundant acies e moenibus, omni  
 Et certent nisu romanum exscindere nomen.

Cuncta manu forti ac suavi sic ordine ponit  
 Aeternae legis Vindex, ac promere clara  
 A noxae semper tenebris miracula gaudet;  
 Quaeque superba putat rerum ignorantia ferri  
 A coeco casu, sapienti a mente moventur,  
 Cui non tam orbis iners, quam libera pectora parent.

Gens fuit, ob cujus studium durosque labores  
 Exsiccata palus flavas pomptina ferebat  
 Foecundis fruges agris, atque oppida donis  
 Plusquam ter septem veluti viridaria laeta,  
 Ceu pulchras baccis oleas ad flumen alebat.  
 Ordo sacerdotum procerumque micabat ut astrum,  
 Cujus erat populis veneranda oracula legum  
 Edere, nunc lituum, nunc ferrum stringere, donis  
 Virtutes, artes ornare, incendere, poenis  
 Infrenare scelus; rerum cui summa potestas  
 Atque magisterium populi (sic prisca docebat  
 Religio) divum donatum a numine. Felix  
 Gens libertatis vindex et munere glebae  
 Et ponti dives Volscorum nomine laetos  
 Incoluit campos circaeo a vertice ad oras  
 Antiacas, tuscum quas circum fluctibus aequor

Ausoniaeque sonant urbes. Vix arcibus Anti  
 Sublatum belli signum; vix aere canoro  
 Increpnuere tubae, fremitusque auditus equorum est,  
 Protinus ut paleae jactantur turbine, volscae  
 Turbantur gentes, litus sonat omne tumultu:  
 Rastros et nitidas falces lugentibus arvis  
 Effera moerentes agnos vitulosque relinquens  
 Antiquosque lares curvosque aetate parentes,  
 Frenat equos pubes, agitatque in littore currus,  
 Exultatque fremens accincta micantibus armis;  
 Ductores primi, juvenis nullique secundus  
 Audaci ingenio Grajus, seniorque sagaci  
 Mente armisque potens Anthaejus. Robora pubis  
 Tres supra viginti urbes in praelia mittunt  
 Florentes olim immensi miracula laboris,  
 Nunc ubi teter odor coeno respirat aquarum,  
 Avertitque palus morbis pomptina colonos.  
 Oppida praeterea circaeo a culmine ad Anti  
 Littora, collectum certant educere ad arma  
 Agmen; ceu quando redeunt florentibus agris  
 Tranquillo volucres hyblaeae vespere, murmur  
 Undique fit, dulci dum stipant nectare cellas;  
 Sic dum fervet opus Martis, peditesque equitesque  
 Antiacos currunt ad muros; omnia late  
 Armorum resonant strepitu fremituque viarum.  
 Impiger Antiacae jam fert e limine portae  
 Aequorum versus surgentia moenia silvis  
 Alcanor gressus, fudit quem lucis ad auras  
 Altum Praeneste, exaequans vir corde sagaci  
 Canitiem. Volucris transmittit pinus ad aulam  
 Etruscam Clytium, clara qui Caerite natus  
 Resque sciens Italum, Cereris Triviaeque sacerdos  
 Praecingit galeam ramo frondentis olivae.  
 Eloquio pollens passus in calle latino  
 Haemonides celerat, peperit quem mater Aletri

Divitis et populo et campis ; erectus ut infans  
 Constitit in plantas , palmas oneravit acutis  
 Telis ; tunc agmen volscum ducebat. Ad acres  
 Hic populos tendit , quibus Auson natus Ulyssei  
 ( Ut fert fama ) domos posuit ; qui vomere campos  
 Samnites findunt ; rastris duroque bidente  
 Qui montes subigunt auruncos ; hernica saxa  
 Vestinosque colunt colles ; qui marsica rura  
 Exercent , noruntque manu bellare , colubrum  
 Atque sopire truces herbis et carmine dentes.  
 Jamque dies optata aderat , qua exercitus omnis  
 Antiacis sese portis fundebat ad arva ;  
 Et Tulli generosa sequens praecepta parentis  
 Jam volscum Grajus thoraca indutus ahenis  
 Horrebat squamis laterique accinxerat ensem ,  
 Et non expertus metuenda pericula Martis  
 Exultans animis vacua spe praecipit hostem.  
 At genitor claram prisca de gente Camillam  
 Uxorem aggreditur Tullus , famulasque parare  
 Accelerans mandat laetis convivia mensis.  
 Ipse autem armamenta petit , quem pone secutus  
 It Grajus comes , et Rufus fidissimus. Olli  
 Ut circum volvere oculos , ubi fulgida latis  
 Pendebant arma e muris , capit impiger heros  
 Ingentem gladium gemmis auroque micantem ;  
 Mandat et horrissonos arcus pharetramque nitentem  
 A Grajo ferri ; capitis cava tegmina claro  
 Perfecta argento dat Rufo. Haec dona ferentes  
 Hinc Veturiadem petiere , cui ore sereno  
 Sic Tullus. Fortis tibi vix lanugine sparso  
 Malas arrisit ductor fortuna secunda ;  
 Dumque decem et septem magnos sol aureus orbes  
 Perfecit , nunquam plura inter praelia claro  
 Serto et muneribus non te victoria constans  
 Ornavit. Faciles jam nunc ita Juppiter aequus ,

Ut gens volsca rogat, tibi palmas annuat. Ecce  
 Ex opibus quaecumque meis in sedibus adsunt,  
 Arcum, fulgentem gladium, gravidamque pharetram  
 Dona cape et laetare potitus. Tuscus habenda  
 Tradidit ipse manu mihi rex, cum fervidus aevo  
 Visendi studio pandebam lintea ventis  
 Ad Pyrgi ripas et ubi Populonia surgit,  
 Ac dites portus, tuskas mirabar et artes,  
 Et regum moles clusinaque moenia, vastos  
 Et varios labyrinthi orbes fraudesque viarum.  
 Quid moror? Hoc ferrum diram dux fortis in Urbem  
 Corripe, et ingentem factis fer ad aethera famam  
 Volscorum. Tulli conjux nec cedit honori,  
 Textilibusque onerat donis, et gestat amictum  
 Auro intertextum, decorant cui laurea sarta.  
 Limbos. In medio ante focos sacrosque penates  
 Nudantem vultus subitaque in luce nitentem  
 Cajum fidenti similem, similemque precanti  
 Aspiceres, Tullum tendentem brachia forti,  
 Magnanimumque duci figentem lumina Grajum,  
 Cujus succendit malas amor, aemula virtus,  
 Atque stupor, mira quem mater finxerat arte:  
 O Tulli, uxoris, volscae spes gloria gentis,  
 Hospes, ait, cape et haec manuum monumenta mearum,  
 Hisque artus praecinge. Vale o mihi laetus et hostes  
 Funde. Hilares oculos volvitur per singula Cajus,  
 Et gratum loquitur. Postquam dux arma requires  
 Iduit, ipsa humeris clamydem suspendit ab altis;  
 Hinc alacres ad tecta vocat, deducit et ultro  
 Tullus, ubi soliis circumsedere paratis  
 Marcius armipotens, et Moenas fidus, et acer  
 Grajus, datque cavis manibus formosa puella  
 Limphas; ast agili mantilia candida mensis  
 Insternunt aliae gressu gestuque modesto,  
 Et calathis cererem expediunt, et lancibus exta

Tosta boum gestant fumantia ; Tullus et ipse  
 Et conjux pateras statuunt et vina coronant  
 Ille duci claro, haec nato. Mora nulla ; secatas  
 Dente avido vellunt escas, et gutture pleno  
 Vina bibunt. Ardor postquam compressus edendi est,  
 Tullus, cujus amor patriam consistere mentem  
 Haud sinit, e solio surgens pictisque tapetis  
 Turbatis oculis et voce haec fatur : ab annis  
 Corpus languescens, aliam vis dura legendi  
 Ad bellum pubem aegrum me divellit alumni  
 Dulci complexu. Ergo animae, dux inclyte, serves  
 Dimidium oro meae, spemque et solatia volscae  
 Gentis. Martis opus grave te tolerare magistro,  
 Et tua mirari teneris consuescat ab annis  
 Facta ; geras patris curam puerumque parenti  
 Victorem reddas, ut morti lumina laetus  
 Claudam. Si contra quid laevum fata minantur,  
 Si quid triste manet puerum inter praelia ; summe  
 O hominum genitor, precibus qui flecteris aequis  
 Juppiter, absolve hanc animam inter brachia nati,  
 Nec me tot lacrimis serves longoque dolori.  
 Multa gemens genitor miscebat talia Tullus  
 Et Graji haerebat complexu. Sed tremefacta  
 Digressu mater, vicini et imagine belli,  
 Oro per has lacrimas, miserae si cura Camillae  
 Cor tangit, puerum nondum discrimina dura  
 Expertum pugnae, columen requiemque senectae  
 Defende hunc puerum, dux optime. Quomodo mater  
 Cara tibi ante omnes, uxor dilectaque pro te  
 Oraret, supplex pro nato exoro ; peribit  
 Mater, si natus pereat. Sic illa ; sed ingens  
 Dux gemit et pallet, vix conjugis atque parentis  
 Auribus insonuit nomen ; tum farier orsus :  
 Ipsa prius juveni virtus sat ferreus umbo ;  
 Posterius nostrum forti inter saeva pericla



Pectus erit scutum ; vobis persolvere partim  
 Sic dabitur grates ; semper mihi frater amore  
 Hic erit , et simul ut fratres in bella ruemus ;  
 Extollens clarum sic Grajus nomen ad astra ,  
 Lux erit auxiliumque patrum. Sapientia vero  
 Vestra labat ; certas etenim mens aegra ruinas  
 Ante tubam fingit , cum spes resplendeat ingens ,  
 Nam juvenem flos Ausoniae viresque tuentur.  
 Et non insuetus dux bellis. Pellite luctus ,  
 Et pulchras sperate dies. Ita Juppiter altus ,  
 Qui nube horrida sidens pia respicit aequis  
 Facta oculis , omen firmet ! Quae talia fatus  
 Marcius os clausit ; sed claro sanguine Amata  
 Anxuris exoriens virgo formosa , petebat  
 Quam Grajus , limen subit inter utrumque parentem ;  
 Et juvenis cernens os imo e pectore crebros .  
 Dat gemitus , ignis calefacta per ossa cucurrit ,  
 Atque fluunt lacrimae , roris ceu depluit imber.  
 Nam pavet ausonios ne provocet ense leones ,  
 Et ferat immanes sponsus male providus iras ;  
 Pulchra licet moerens tum vertit verba Camillae ,  
 Crebraque commiscens virgo suspiria voce  
 Exorat , natum moneat , ne in saeva pericla  
 Irruat audacter. Sed territa pectore mater  
 Ceu virgo verbis , oculis , et fletibus instat ,  
 Haereat ut Marci lateri , quando ingruit horror  
 Armorum ; caedes inter vigilantia mentis  
 Dirigat illius gressus ; pudibunda puella  
 Incipit atque rubet , mediaque in voce resistit ,  
 Et tandem lacrimans : ardorem comprime belli ,  
 Nec subeas praeceps graviora pericula ; namque  
 Qui te cumque manent ista inter praelia casus ,  
 Me dilecte manent Grai. Sed protinus ille  
 Ore refert : tantum duxerunt numina certe  
 Fausta virum nostros ad muros ; numina primum

Hunc hostem volscum, belli volscumque crearunt  
 Rectorem; certe modo numina fortiter urgent,  
 Hoc duce praeclaras discamus Martis ut artes.  
 Divorum jussus alacres sectemur, et astris  
 Ferte manus, claros ut mox ad templa triumphos  
 Ducamus; lacrimis non jam nos mittite contra  
 Hostes Ausoniae. Generoso pectore volscus  
 Haec ductor fudit; respondent agmina voce  
 Horrisona; fortis pertentant gaudia pectus  
 Tulli, quod crescat virtutis splendidus haeres  
 Majorum Grajus. Sed contra pulchra puella,  
 Atque parens pallet, rubet, aestuat, et tremit artus;  
 Hinc trepidans pietas, hinc gaudia spesque serena,  
 Hinc amor ignescens, hinc cura; hinc pallidus horror  
 Illarum jactant pectus, ceu caerula venti.  
 Tum festinantes discessum Marcius acer  
 Et fidus Moenas et Grajus limina linquunt,  
 Atque suos Anxur ducens bonus alta revisit  
 Tecta. Sed infelix virgo lenire dolorem  
 Haud potis est. Pavitans ceu dira cuspidе cerva  
 Laesa latus queritur, silvis et montibus errans;  
 Sic miseras complet virgo plangoribus aedes,  
 Intextae vestes auro et velamina terra  
 Sparsa jacent. Pater haec cernens atque anxia mater  
 Confusae reddunt menti solatia verbis,  
 Hortanturque modum flagranti ponat amorі,  
 Non tenuem spem addunt, animosque medentur anhelae  
 Ruris deliciis, ubi laetis otia fundis  
 Ac secura quies. Ferventem ardore puellam  
 Sed cari juvenis circumvolat undique forma,  
 Et ludos inter stat, flet, suspiria ducit.  
 O quoties nimio praeceps optavit amore  
 Ire comes Grajo dilecto, et sola movere  
 Incepit gressus! Subito sed victa pavore  
 Constitit, indoluit, quod non optata secundet

Vis animi ac robur membrorum. Nocte silente  
 Lumina si tandem claudat defessa sopore ,  
 Exaudit sonitumque pedum generosaeque verba  
 Magnanimi , seu cernit equo volitare per arma ,  
 Seu scalas illum scandentem prendere celsa  
 Tecta manu; haud placidam membris dat cura quietem.

At populo coram medioque in lumine templi  
 Thure vaporati ductor summusque sacerdos  
 Jam tulerat Tullus Fortunae sacra diisque  
 Auspiciis coeptorum operum , quos vana colebat  
 Relligio. Et patriae jam libertatis amore  
 Volscæ acies sese portis effundit apertis.  
 Nequa manus vero tollat se infensa repente  
 A tergo , armorum partem rapit inclytus exul  
 Contra Circaeos Moenæ Grajorque secutus ;  
 Nam ferrum renuunt in Romam stringere , crebro  
 Et volsci rapiunt messes et munera campi.  
 At super Antiacos agros se caetera pubes  
 Armis exercet , reduces ac tempora lauro  
 Cinctos expectat. Vir princeps Urbe catervas  
 Ornatas donis tyrrheni ad littora fluctus  
 Tarquinius misit bellorum doctus et artes  
 Pacis. Romanis tum Volscum turba colonis  
 Sese conjungens aprico in culmine montis  
 Circaeum posuit. Celerans peditesque equitesque  
 Cajus agit. Coeni , volscae navalia gentis ,  
 Arva prius calcant acies ; clangore tubarum  
 Atque virum laetis resonat clamoribus unda  
 Et litus ; jamque Asturæ sinuosa fluentia  
 Primorum tardant cursum. Praetervolat omnia  
 Agmina , praecipitique jactat se Grajus in amnem  
 Saltu , spumantes et palmis dividit undas ,  
 Oppositasque tenet ripas , alacerque phalanges  
 Voce vocat. Tranant illae clamore secundo  
 Certatim raucum fluvium , madidaque gravatae

Vestē licet, pariter Nymphaei flumina pulchra  
 Trajiciunt; collem hinc superant, semperque virentes  
 E lauro et myrto silvas, ubi filia solis  
 Circe habuisse domum niveo de marmore fertur,  
 Inque feras vertisse homines, moresque ferarum  
 Incautis animis magicam inseruisse per artem.  
 Jamque iter emensae sinuoso e tramite primam  
 Suspiciunt urbem. Tyrreni ad littoris oram  
 Mons apennino compar super aequora praeceps  
 Circuitu vastus se attollit; plurimus umbra  
 Hunc cingit lucus, tibi quem Feronia sacrum  
 Cum templo ingenti gemmis auroque referto  
 Coeca superstitio fecit. Sed vertice summo  
 Vasta et laeta jacet tellus; Elpenoris urna,  
 Qui comes Aeolidis fuit, heic de marmore fulget.  
 Ille domus cecidit celso de culmine praeceps,  
 Ossibus et fractis humero collapsa pependit  
 Cervix. Hinc oculis aequor patet; insula multa  
 Surgit aquis; Lybiae lustrantur littora longe,  
 Et vastus pomptinus ager, collesque latini,  
 Impositaeque jugis arces, atque oppida centum.  
 Convalle e media Circaeī a nomine Circes  
 Tolluntur turres et propugnacula tuta  
 Bellis. Emenso cursu cum conderet undis  
 Sol rutilos currus, ductor reparare jubebat  
 Militibus vires, terra et requiescere fessos,  
 Atque artus escis mollique levare sopore.  
 Sollicito volvens sub pectore multa silensque  
 Ipse sed incedit turres portasque superbas,  
 Quas armis volscentū prospectis clauserat hostis,  
 Explorans; fidus Moenas comitatur euntem,  
 Moenas qui dulcem patrios liquisse penates  
 Auribus accipiens dominum, sponte exul et ipse  
 Egressus portis fuit aspera fata secutus  
 Illius; in bellis acer, cui maxima rerum

Verborumque fides, hominum cultorque deorum.  
 Vix autem Marci properantis rumor ad aures  
 Pervenit, advigilans Numitor dux altus in urbe  
 Belligeros omnes romano sanguine cretos  
 Et quotquot pugnare parant, vocat, injicit ignem  
 Pectoribus; supra turres, super ardua ponit  
 Murorum pubem; supra pomeria ferri  
 Praecipit omne genus telorum. At origine volsca  
 Maxima Circaeï populi pars infremat ore,  
 Et luxisse putans solem, quo insurgere stratos  
 In Romam liceat Volscos, permulta latenter  
 Moliri; plures Romanis scandere muros  
 Immixti; verbis odium simulare cohortes  
 In volscas; coeptum quo perficiatur, in urbe  
 Versari multi. Jamque unda marina rubebat  
 Aurorae radiis; cum bello rauca cruentum  
 Buccina dat signum; properant atque agmina Volscum,  
 Quo mage murorum moles et porta resistunt;  
 Nam Veturiadis contendit ad ardua virtus.  
 Discurrit fortis Numitor per moenia. Cajus  
 Et Grajus, Moenasque ad pugnam voce juvenam  
 Inflammant; volscum cum protinus irruiat agmen,  
 Telorumque strues complectens dejicit altis  
 E muris, fidum sociis portasque recludit.  
 Quas manibus rapiant incassum lumine torvo  
 Romulidae inquirunt hastas; praetendit olivae  
 Pars populi ramos, et Cajo occurrit et orat  
 Magnanimum morem ne ponat; et agmine septus  
 Ingrediatur ovans limen. Tum maximus armis  
 Marciades, laeto resonant dum cornua cantu,  
 Arces ingressus, populorum munera volscum  
 Auratam galeam et gladium, cui lucidus ardet  
 Ex auro capulus, totumque nitens elephanto  
 Includit vagina, argenti pondera et auri  
 Accipit; Aeneadas et Circes urbe colonos

Degere dat placidus. Verum generosa juvenus  
 Et constans animus Numitoris pellier orco  
 Servitio Volscum praeponebat. Fervidus ira  
 Includi fastum Grajus jubet arcibus. Ingens  
 At ductor coecas victorum temperat iras,  
 Et placidus victis pubem dimittit inermem,  
 Quotque migrare parant; deditaque repellit ab urbe  
 Bellorum clades. Tum celso e vertice saxi,  
 Unde oculis Latium, camporum et lata patescunt,  
 Dux sublimis equo, Martis ceu stella refulgens,  
 Protendit dextram, digito signatque superbam  
 Confertis Urbem Volscis, et fulmina belli  
 Congeminare jubet romanis arcibus, acres  
 Succendens iras, veteres refricatque dolores;  
 Attollit dextram vocemque, et jurat in Urbem  
 Volscus. At ille ruit collis de vertice septus  
 Armis, ceu nubes suspensa in monte nigranti  
 Si lapsu ad valles descendat grandinis imbre  
 Fulminibusque gravis, pallescens arva colonus,  
 Pastor oves linquit, fugit ad cava saxa viator.  
 At gens quae constans Circes ad littora Volscum  
 Jussa pati renuit, Romae jam moenia cernit.  
 Ante fores ludunt pueri, et festiva juvenus;  
 Pars acres curvant arcus, et spicula torquent,  
 Et certant ictu et cursu; pars aequore campi  
 Ardentes exercet equos, se immittere saltu  
 Et fossas transire docet fluviosque minaces,  
 Currere, stare loco, partes se vertere in omnes.  
 Ast ad gramineum ludit prope moenia campum  
 Pubes; pars nudis exercet membra palaestris,  
 Injicit aut sese praeceps in flumina (circumque  
 Exiliunt stillae) gaudetque agitare per undas  
 Brachia mille modis; pugnae simulacra sub armis  
 Pars ciet, ac rapidis gradibus confertur in hostem,  
 Tela vel ad metam resonanti vibrat ab arcu,

Aut stringens gladios exstructum ex abiete secta  
 Saltu scandit equum et celeres moderatur habenas ;  
 Moenia , vicini colles , et Tibridis undae  
 Festiva resonant ludentis voce juventae.  
 At portas intrat puerum matrumque senumque  
 Turba gemens fatum Circaeï raptaque tela ;  
 Arma fremit pubes ira flammantia pandens  
 Lumina. Circumfusa ruit studiosa videndi  
 Plebs Romae , saevo vindictae ac igne rebelles  
 In Volscos ardet , simul et suspiria ducit  
 Extorrem miserans turbam , cui linquitur ultra  
 Nil vitam praeter ; fessos hinc excipit ultro  
 Hospitio , recreatque epulis et munere bacchi ;  
 At procul aspiciens tenues insurgere nubes  
 Patrum consilio et fatis innixa secundis ,  
 Fulmina non Romae lapsura veretur ad arces.  
 Mens patrum ast alacris communi intenta saluti  
 Telis accingit juvenes , quos acer in armis  
 Ordinibus Numitor certis discernit et omnes  
 Instruit ad bellum , veluti si moenibus hostis  
 Ingrueret ; gravibus tum dictis urget ad arma :  
 Romani , meminisse decet nunc crimina volscae  
 Perfidiae , Circes quae in muris ocyus arma  
 Nobis eripuit. Cupidis opus imminet ingens  
 Nunc Martis. Vestrum in diras nunc promite robur  
 Gentes , et placitas alacres invadite pugnās.  
 Antea Circaeï pro muris spicula fortes  
 Corripuistis ; adest nunc Urbs praeclara tuenda  
 Patria Roma , parens antiqua. Domate rebelles  
 Et victos toties populos ; ad limina portae ,  
 Ad vallos , supra turres , quocumque vocabit  
 Sors belli , ducibus parentes currite ; serto  
 Ornati paucis elapsis solibus urbem  
 Circaeï , et cultos iterum calcabitis agros ;  
 Sic ait atque virum succendit corda furore.

Occiderat Phoebus ; caelo non lumen amicum  
Astrorum , pulchram velabant nubila lunam ;  
Conticet Urbe fragor ; somno dant corpora fessa  
Romulidae. Saevo turbata at pectora bello  
In tacitis umbris , malefido picta timore  
Aegra mente volat cum tetrrior omnis imago ,  
Pro dulci metuit formosa Volumnia Cajo ,  
Ipsius atque sinus gemitu velut unda tumescit ,  
Hinc puerum placidum subiens penetrare , jacentes  
Excitat e strato. Dumque illis brachia somno  
Palpebraeque cadunt , voces ad sidera jactat :  
Omnipotens genitor Divorum , maxime custos  
Juppiter Aeneadam , votis si flecteris ullis ,  
Marci membra mei ne tangant spicula ; fortem  
Serves , ne mater senio meritisque colenda ,  
Exulis et conjux insons , tenerique puelli  
In jugi jaceant luctu. Si pulsus ab Urbe  
Dux sine labe tuis aris imponit honorem ,  
Respice dive pium , miserere indigna ferentis ;  
Horum qui tendunt puras a crimine palmas  
Aure preces hauri , miseris et redde parentem.  
Sic fatur lacrimis gemebunda Volumnia obortis ,  
Ac teneros lecto pueros amplexa reponit ,  
Villosoque foveat frigentia tegmine membra ,  
Atque facem velans hortatur denuo dulcem  
Ut requiem capiant , et verbis oscula miscet ;  
Cum tandem somno claudentes lumina cernit ,  
Incumbens strato membris dat fessa quietem.

---



## LIBER SECUNDUS

## A R G U M E N T U M

*Romae Senatus fruges in horrea colligit, mandat Marco Ostiam defendendam, et gentes Romae socias hortatur ad arma. Torquatus dux romanus Setiam ingreditur, Albinus Lavinium, Carbo Laurentum, unde Teucer fastum deponit; aliique ductores properant ad alia oppida regenda. Redux a Circaeo Marcius sese jungit cum acie reliqua, cujus enumerantur duces; et mittit Usentem ad castra ante Romam ponenda, et ad ligna caedenda, ut condantur belli machinae. Volsci procures, Tullus, et Amata cum parentibus spectant a turri acies per campos pomplinios gradientes. Setiae expugnatio describitur, ubi Graji, Marii, Volusi, Corae, et Itali eminent fortitudo. In ea pugna vulneratur Moenas. Coriolani pietas erga Gilippum, et magnanimitas erga Torquatum, qui Coriolanum hortatur ad ignoscendum patriae. Marcii pietas erga milites defunctos, et vulneratos. Romae Senatus bellum intra moenia expectandum discernit, et quinos mittit legatos Coriolano, qui denegans pacem Sulmonem debellat; Cora ponit arma; Excetra vero vi capitur. Legati Romam redeunt; at patres triste populo nuncium reticent, novamque meditantur legationem. Veturia Jovem pro patria deprecatur.*

**F**luctisonis Antè a ripis ad Tibridis oras  
 Jam conjuratas in Romam tela novare  
 Non paucas urbes patrum sapientia spectat;  
 Solliciti firmique simul tum more parentis  
 Nil non expertum linquit, ne diruat Urbem  
 Turbo. Refert aeris multum laetusque talenta  
 Argenti belli nervos, et limina portae  
 Quaestor equis intrat, Romam quae ditia dona  
 Magnanimum mittit Latium pietasque sabella.

Undique colligitur certatim copia frugum,  
 Ut procul a muris vicini pallida belli  
 Nata fames absit. Procedit multa sabinis,  
 Multa ceres tuscis, Cumarum multaque ab oris,  
 Fluctivagis vectam quam puppibus Ostia portu  
 Accipit; hinc portas subeunt longo ordine currus,  
 Nutantique gradu mediam illabuntur in Urbem  
 Ingentique gemunt sub pondere. Murmure laeto  
 Undique plebs collecta cicer frumentaue flava,  
 Pallentesque fabas, ciceras et vile phaselum,  
 Et pelusiacam lentem, robustaque farra  
 Effundi plaudens inspectat in horrea nubes  
 Pulvereas inter. Curat mens alta Senatus,  
 Ut si quis rapiat casus, disponat ad arma  
 Vulgus; nec temere metuit, ne fraude Tribuni  
 Civilis belli flagrent in moenibus ignes,  
 Tum cum volsca furit tempestas. Currit ad Urbis  
 Tutandos ductor portus; et fortibus ausis  
 Praeclarum Marcum, multas qui compulit orco  
 Volscorum fortes animas, capit Ostia muris  
 Aequorea; hunc ultro natus Lucilius armis  
 Clarus, magnanimum genitorem ut numen adorans,  
 Subsequitur. Patrum quoniam mens cauta veretur,  
 Ne classis tusci festinet ad ostia Tiberis  
 Antiaco portu erumpens, et claudat opimum  
 Pontum Romulidis: hinc si quis ab aequore turbo  
 Ingruat, insignem belli rerumque magistrum  
 Dant patres; sequitur conjux ad limina Romae  
 Martia, complectensque gemit, lacrimansque, valete,  
 Exclamat. Patrum pectus nec inane movetur,  
 Ne Romae socias primum labatur in urbes  
 Armorum nimbus; dives tum Setia robur  
 Spirantem recipit Torquatum; moenia clara  
 Lavini Albinus doctus disponere celsis  
 In muris pedites intrat, quem filia virgo

Et florens aevo Veneri non cedere digna  
 Ore verecundo sequitur cum matre. Cruento  
 Aeratas Mutio portas arx algida pandit,  
 A quo divelli frater, genitorque senecta  
 Lentulus oppressus nequeunt. Se porta recludit  
 Laurenti resonans Carboni, turbaque forti  
 Obvia dat plausus; illo nam frena regente  
 Urbis praecipitat Teucer, qui sanguine clarus  
 Dives agris, dives positus in foenore nummis,  
 Sicut vile luti spernebat vulgus, et ipse  
 Despectus cunctis. Tua versus moenia, Bola  
 Nixa jugo viridi, florens et pube virorum,  
 Urget equum volucrem Titus dux impiger armis.  
 Romanus castella Corae conscendit, et alter  
 Ad vos bellipotens, Coriollum, Sulmo, Bovillae,  
 Dux venit; et socium reliquas mittuntur ad urbes,  
 Ut desueta diu populi accendantur ad arma  
 In Volscum gentem. Circaeis tempora lauris  
 Interea sese jungit redimita juvenus  
 Agminibus laetos Anti linquentibus agros,  
 Et propero gressu, festis clamoribus omnis  
 Dives equis legio procedit, milite dives;  
 Pulsa sonat tellus; colles camposque patentes  
 Finitimae gentes obducunt. Oppida servans  
 Agmen protendit collum de moenibus altis,  
 Lucida scuta teuens, hastas, galeasque micantes,  
 Invidet ac turbis, saeculis narranda futuris  
 Quas ad facta rapit dux ingens. Grajus in arma  
 Tulliades, forma insignis viridique juvena,  
 Pulcræ spe famae succensus, et ore sereno  
 Agmina prima movet; senior postrema coercet  
 Solerti mente Anthaeus, quem Setia misit;  
 Magnanimusque Dolon, Frusino quem divite gleba  
 Nutriit, et Marius qui Caeni litora linquit.  
 Frento ferentinas acer domitorque ferarum

Prosequitur ; juvenem villosi contegit ursi  
 Pellis , et in galeae radiantis vertice penna  
 Multicolor nutat. Signinis Silvius arvis  
 Editus in lucem , clypeoque insignis et armis  
 Umbro veliternus graditur , cui proximus Ufens  
 Montosis ortus Nursis , hominumque deumque  
 Interpret Volusus privernas. Pulcher in armis  
 Pometiae incedit proles , cui carmina cordi  
 Et dulces citharae , Elpenor ; nec distat ab illis  
 Italus et Palmus quos dives Anagnia vidit  
 Nascentes , juvenes , quibus haud praestantior alter  
 Intorquere graves hastas et spicula cornu ;  
 Subsequiturque Coras feriendo concitus ense  
 Corpore procero , ingenti metuendus et hasta ,  
 Quem Cora nutrit. Magnos et maximus inter  
 Arinis et laena praeclarus Marcius , ostro  
 Instratus quem portat equus spumantia mandens  
 Frena ; ducem fidus Moenas comitatur euntem.  
 Vix stetit , atque oculis volsca agmina circumspexit  
 Impiger armipotens , ad sese protinus acrem  
 Advocat Ufentem , praecurrat ut agmine septus ,  
 Atque in conspectu Romae tentoria tollat ,  
 Quo saevus tumulo tendebat Claelius olim ;  
 Tum petat albanos lucos ac transferat intra  
 Vallos annosas pinus et robora , celsae  
 Ut belli moles trabibus ferroque struantur ;  
 Cum rapidis aciem sociis praetervolat Ufens.  
 Jamque ad pomptinos properans pervenerat agros  
 Luce nova radians dux Volscum , et lumina gentis  
 Belligeram et pubem festiva voce vocabat.  
 Fulgentem linquunt ipsi tellure lignonem  
 Agricolae ; a campis certatim , a moenibus ingens  
 Turba ruit plaudens victori haud sanguine foedo.  
 Armipotens Tullus cum clara conjuge , volsce  
 Et procures auro fulgentes celsa tenebant

Moenia , turris ubi se caeli attollit ad auras ,  
 Ardua prospectans campos , gaudentque tuendo  
 Aere renidentes acies. Pulcherrima rure  
 Corde micante redux subito huc ascendit Amata ,  
 Anxia quam mater genitorque sequuntur. At illam  
 Voce vocat Tullus : propius me accede , sedeque  
 Heic mecum , spectes ut carum filia sponsum  
 Praeclarosque duces. Cui virgo : dulce , decorum  
 Sidere te propius , pater ; inquit , lumina vertens  
 Huc illuc , quaeritque nitentis frontis honorem.  
 Ut juvenem reperit , primis cui vixit ab annis ,  
 Assurgit dextram tendens facieque rubente ,  
 En , ait , en Grajus Moenae magnoque propinquus  
 Cajo ; quae circum nova gloria fulget ! Et alto  
 Corde trahit gemitum , lacrimaeque per ora volutae.  
 Finitimi at subita populi formidine capti  
 Marciadi occurrunt pia verba et dona ferentes ,  
 Lanigeras pecudes , elata et fronte juvencos ,  
 Setigerosque sues , et vina liquentia. Ductor  
 Circum convertens oculos nil pectore toto  
 Romulidas praeter vestigat in aequore campi ;  
 Obscuro esuriens veluti digressus ab antro  
 Infrendensque leo stimulat se verberare caudae ,  
 Et torvo circum scrutatur lumine praedas.  
 Nulla sed apparent fulgentia cominus arma ,  
 NecproculinVolscumproperant.Jamque arva premebant  
 Et curvos luci calles , ubi moenia surgunt  
 Celso imposta jugo , imperio devota Quiritum ;  
 Atque oriebatur collis de vertice pendens  
 Setia , quae forti narratur condita prole  
 Alcimenaë ; circum florebant caecuba vitis ,  
 Palladiae frondes , artes bellicae togaeque ;  
 Exspirans vultu spem , non hostilia circum  
 Agmina respiciens , Volscorum laeta caterva  
 Scandebat colles ; convexo en tramite silvae

Insidiis subito urgetur ; nam callidus hostis ,  
 Haud mora, saxa, sudes torquet ; celeresque sagittae  
 Undique ceu grando fugiuntque sonantque per auras.  
 Praecipue pharetram vacuat dux agminis Almon  
 Cujus germanum lethali cuspide fratrem  
 Marcius, in volscam gentem cum tela moveret ,  
 Straverat, atque Dolon primus jam cedere retro  
 Incipit ; arma cruenta solo, generosaque passim  
 Corpora fusa virum cernuntur. Turbida circum  
 Lumina fert Cajus, nec quo sese inferat ense  
 Repperit ; huc illuc currit, seque objicit ardens  
 Certae saepe neci, sed frustra ; perfidus hostis  
 Coeca sub arboreis pro scuto vulnera truncis  
 Ingeminat tectus ; Volscos via nulla salutis.  
 Quo Veturiades quo vertet lumina ductor ?  
 Haud lethi facies terret me, Juppiter, ulla ;  
 Turpe mori refugit mens ; fortia praelia da me  
 Hac tentare manu, multosque absumere primum  
 Ferro ; tum si fert ita inexorabile fatum,  
 Occumbam laetus, quia non inglorius ; inquit,  
 Et diverticulum nactus, Silvique secutus  
 Et Moenae gladiis, malecauto intervenit hosti  
 Terribilis visu. Sese pars condere densae  
 In latebris silvae ; pars ferre ad moenia gressus  
 Projectis telis. Trepidantes ocyor euro  
 Marcius insequitur, celeres cui suggerit hastas  
 Moenas. Par nocti atrae turbidus ille patentem  
 Irruit in portam fugienti cum agmine ; flamma  
 Stant acres oculi, fulgent arma aerea longe  
 Horrendum ; ut fulmen gladius micat ; obviis ire  
 Non audet quisquam. Volscum tum versus ad agmen  
 Hortatur, victam clamans se immittat in urbem.  
 Marciadis dicto redit in praecordia virtus.  
 Vi tenet apprehensum peditem accenditque trahitque  
 Ad pugnam laeva Grajus, dextraque coruscans

Mucronem ante alios primus procurrit in hostem ;  
 Ac ensis capulo sociorum terga prementes  
 Urgent ad bellum Marius Volususque Corasque ;  
 Districtis gladiis in portas irruit asper  
 Volscus. Sed latitans Almon librabat ab aure  
 Hastam suspiciens caelum : Pater inclyte Romae ,  
 Da belli o Numen , pestem procul arceat Urbe  
 Hoc telum ; nobis facti sat gloria. Pauca  
 Sic orans jaculum vi torquet ; sibilat aura  
 Horrendum. Moenas prospexit ab aethere ferrum ,  
 Et sese opponens scuto protexit amicos  
 Artus ; tum cuspis clypei solida aera resolvit ,  
 Atque femur Moenae non alto vulnere laesit ;  
 Infremuit viso dilecti sanguine ductor :  
 Tun' pro me pateris plagas ? Ille ore sereno :  
 Integer es ; propera ; victorum praemia palmas  
 Carpe novas. Furiis incensus fulminat armis .  
 Cari dux ultor capitis ; resupinus et Almon  
 Exanimisque ruit , qua frater cuspide , saevo  
 Ultori exemplum. Multam sine nomine sternit  
 Marciades pubem. Nec multum distat ab illo  
 Antiacus ductor denso circumdatus hoste ,  
 Qui rursum in Volscum faciem vertebat et arma.  
 Nec mora nec requies ; partes cunctatur in omnes  
 Grajus ; procumbunt multi ; sed fervidus ille  
 Perfurit , ut tauros inter getula leaena.  
 Parte alia muros miseranda caede replebat  
 Italus invictus , romanae infensus at urbi ,  
 Jamque diu librans stridentem jecerat hastam  
 Eminus ; et dextram transfixerat illa Gilippo  
 Egregio forma juveni , virtute decoro ,  
 Et celerans tardum plaga properabat in hostem  
 Educto gladio. Moriturum territa natum  
 E speculis cernens mater ( non illa pericli  
 Armorumque memor ) saeva inter tela ruebat

Voce, Gilippe! vocans iterumque iterumque Gilippe!  
 Atque illum lacrimis pro scuto amplexa tegebat  
 Dans iterum nato vitam suavissimo. Ab imo  
 Corde trahit gemitum Cajus, qui forte fugaces  
 Ferro urgens hostes illuc advenerat; ortae  
 Sunt oculis lacrimae; pectus perstrinxit imago  
 Maternae pietatis; amans ruit ocyor euro;  
 Itale, ne ferias, ne caedas, Itale, clamat.  
 Ast ingens Volsci complet reverentia mentem,  
 Sublatumque alte suspendit in aere telum  
 Italus; et laetis servatum morte Gilippum  
 Marcius ostendens oculis ita voce secutus:  
 En tibi cara parens puerum; puer en tibi matrem:  
 Mi quoque cara parens, pueri dulcissimi et uxor  
 Sunt mihi. Sic fatur Cajus; generosaque laudans  
 Facta parens, tergit lacrymas atque oscula figit  
 Marciadis dextrae, natumque ad tecta reducit.  
 In plateae medio servabat milite multo  
 Congestas praedas auri argentique talenta  
 Anthaejus senio sollers cautusque futuri;  
 Huc illuc tollunt os inter caedis acervos  
 Victores, hastamque manu gladiumve coruscant;  
 Ceu rudibus diri pagis de nube cometae  
 Nunc subito exorti fulgent ferale, recondunt  
 Sanguineos multam radios nunc nubis in umbram.  
 Acer Tulliades sparsas per moenia agebat  
 Turbas, quae turpi accipiunt aut vulnera tergo,  
 Aut actae terrore ruunt a moenibus altis.  
 At vero Aeneadum Torquatus sanguine cretus,  
 Cujus ab imperiis pendebat Setia, cernens  
 Hostibus impletos muros, nullamque salutis  
 Spem superesse, parat praeclarae occurrere morti;  
 Hinc in confertos se quamvis saucius hostes  
 Inmittit; veluti venantum septa coronâ  
 Non dat terga tigris, sed contra spicula pugnat.



Nec mora nec requies ; non unam demetit ille  
 Volscorum vitam ; succendunt conscia pectus  
 Virtus , laudis amor , spectantia et agmina circum.  
 Forte superveniens oculis prospexit acutis  
 Clari nota senis Cajus non immemor ora  
 Illius , insanae vulgi qui restitit irae ,  
 Ne clarus rueret ferro dux criminis expers ;  
 Ingemit et vocem intendit , ne spicula caros  
 Confodiant artus ; et Volscus continet arma ,  
 Ut nati gressus reprimit reverentia patris.  
 Ast infracta malis mens alto in culmine surgit ,  
 Et Cajum inflammans majoris laudis amore  
 Exorat victus victorem more paterno ,  
 Ut patriam servet. Premit altum corde dolorem  
 Magnanimo eloquio , Romaeque it flamma per ossa ;  
 Sed nil haec contra dux acer , et ore sereno  
 Dat veniam victo , et dictis solatur amicis  
 In mentem revocans , quoties exceperit illum  
 Urbs domitis plaudens tuscis populisque latinis.  
 Praecipit hinc sociis murum ne a culmine sternant ,  
 Utque ducis coeant plagae medicamine ; dum cor  
 Curis torquetur crudelibus , ipse quod Urbis  
 Irruat in socios. Tum stant densa agmina circum  
 Vulneribusque aegrum longoque labore videntes  
 Orant ut requiem capiat. Languescere non est  
 Victoris , reddit sic protinus ille , dolensque  
 Convertit curas ad turbam funere mersam.  
 Cum doceat resonans imo sub pectore vera  
 Vox populos , hominum post mortem vivere mentes ,  
 Et sceleri poenas , et reddier aequa labori  
 Praemia ; dux mandat , caesis solvantur honores  
 Aeternumque vale clametur. Fletus in urbe  
 Ingens exoritur , dum corpora quisque suorum  
 Agnoscit. Gressum tum fert ad limina moerens  
 Cajus , ubi longa sustentat membra cruentus

Cuspide acerba fremens Moenas, quod plaga retardet,  
 Nec sinat ut domini vestigia cara sequatur.  
 Inwictus sed enim dux ut nota aspicit ora,  
 Brachia circumdans collo complexibus haeret,  
 Aegro solamen fert, laetaque verba salutis;  
 Tum Japigi accelerans se vertit in arte medendi  
 Ante alios docto, vulnus qui forte fovebat  
 Fumanti lymphæ, succos herbasque salubres  
 Apponens, Phoeboque senem compellat amicum,  
 Allicit et dulci laude, et spe muneris urget,  
 Atque viam Moenæ auxilio quæ proxima poscit.  
 Acrius hinc instat pietas, ut tecta dolorum  
 Ocyus ipse petat, resident ubi vulnera passi;  
 It comes Anthæjus generosus, Grajus et acer,  
 Et pia solliciti contingunt limina. Longi  
 Hinc gemitus audiri, et tristia verba sonare  
 Foemineæ turbæ, in fletus quæ lumina solvit  
 Corpora fusa videns, diversa tot ora malorum.  
 His pede, vel brachio, vel pectore vulnus apertum  
 Cernitur; ast illi cervices cuspide laesas,  
 Aut latus, aut faciem monstrant, aut pharmaca tristi  
 Singultu implorant; alii auras pectore anhelò  
 Vix carpunt, animasque efflant. Stetit acer in armis  
 Marciades (cor enim facies miseranda malorum  
 Perstrinxit), gemitumque alto de pectore rupit,  
 Quod Mars tot pestes mortalibus inferat aegris;  
 Tum sic solamen miseris fert ora serenans:  
 Macti animo fortes Volsci, sociique laborum  
 Pro libertate Ausoniae, non turpe tulistis  
 Conversis humeris, firmo sed pectore vulnus,  
 Ferte alacres duos casus; vos gloria luce  
 Induet, aeternumque ibit per saecula nomen.  
 Sic ait accensus, sociisque juvantibus omni  
 Languenti dextram tendens de fronte fluentes  
 Tergit sudores; patientem accommodat aurem

Questubus, argenti dono dat pondera multa,  
 Et toto emittit lucem pietatis ab ore,  
 Ut laetas reddat sedes moeroris. At aegri  
 Attollunt tremulas palmas, illumque salutant  
 Ut patrem, et lugent, nequeant quod surgere stratis,  
 Et duce sub tanto rursus concurrere campo.  
 Parte alia matres, quae supra corpora caesa  
 Natorum plorant, verbis solantur amicis  
 Frento ferentinas, signinus Silvius, Umbro,  
 Privernas Volusus, Marius, ductorque coranus,  
 Et certant lenire trucidis tormenta doloris.

At varia patres curarum mole gravati  
 Tarpeji sidunt alta intra limina montis.  
 Aeterna vastus tollit se collis in Urbe,  
 Exhorret latus erumpentibus undique saxis,  
 Arduus intuitu, atque ingens, abscissus in imum,  
 Unde alii colles, et flavae Tibridis undae,  
 Et campi late spectari. Educta sub astra  
 Viribus heic nullis, nulla expugnabilis arte  
 Arx servabatur vastis a turribus ingens,  
 Unde Urbs aequa Diis mittebat fulmina terris.  
 Si quid fama sonat veri, fundamina primum  
 Cum jacerent, Oli caput imo colle resectum  
 Huic nomen dederat Capitoli. In vertice summo  
 Mirandum signis centum, sublime columnis  
 Pometia rapti devicta prodigus auri  
 Tarquinius fastu templum sacraverat alto  
 Caelicolum regi, supremo numine molenti  
 Majestate loci, romano et nomine dignam.  
 Vestibulo effigies veterum ex ordine avorum  
 Adstabant, Urbis fundator, sacra sabinus  
 Rex tradens, Tullus bellandi conditor artis,  
 Tarquinius Latium Graecorum moribus ornans,  
 Marcus aedificans, libertatisque severus  
 Vindex, desertusque tuus, Lucretia, conjux,

Mutius igne, Cocles praeclarus ponte, triumphoque  
 Albanos contra tres fratres natus Horati;  
 Praetera multi generosa ab origine patres,  
 Quorum ceu sidus fulget per saecula nomen.  
 Desuper arma tholis pendent affixa superbis,  
 Captivi currus, portarum ingentia claustra,  
 Loricae, clypei, tyrrhena, latina trophaea.  
 Heic, quoniam saevis agitur romula fati  
 Urbs, media patres templi testudine sidunt  
 Nautius et Furius qui res expendit, at ambos  
 Fortunae nimium perturbant ora severa;  
 Queis praetexta togam extremam bene purpura cingit,  
 Sceptra eboris manibus gestant insigne decoris,  
 Luna pedi argento fulget, nigrique cothurni;  
 Appius et fastu tumidus, laetumque Minuci  
 Os, et pontifices inter Virginius ingens,  
 Optima cui dedit eloquium natura suave;  
 Posthumius bello fortissimus, Urbis amator,  
 Lartius atque cavis oculis, cui plurima mentum  
 Canities velat, simul ora benigna Valeri,  
 Sempronius justus, Pinarius acer, et agmen,  
 Intenti ora tenent, et fantis ab ore silentes  
 Dependunt omnes Furii; formidine capta  
 Mens ejus replet attentam sermonibus aulam,  
 Romulidum certas clades Urbisque ruinas  
 Laturum bellum, cui praesidet inclytus armis  
 Ductor, et hinc patriae nil tutius esse saluti,  
 Quam subito positis armis deposcere Volscos  
 Foedus amicitiae. Legum morisque vetusti  
 Cultor, multa manu forti qui proelia gessit,  
 Lartius haec audit, saevis et vocibus infit:  
 Roma petet pacem, deponet spicula Roma,  
 Dum pulsat portas armis, dum moenia scandit  
 Volscus? Turpe nefas; populus consurget et alter,  
 Inde alius rursumque alius, devictaque multo

Vulnere libertas extremum congemet ; ingens  
 Tum cadet antiquae Romae constantia , virtus ,  
 Si toties victo cum Volscis foedus initur.  
 Haec fuit antiquae Romae prudentia , numquam  
 Cedere quid strictis telis ; haec nescia flecti  
 Mens aequas acies domuit , gentesque latinas ;  
 Hinc multos constat frustra infremuisse feroces  
 In Romam populos ferme tria saecula. Curis  
 Nec vacuus , claususque domo torpebo , sed acer  
 Missilibus complebo manus ; mihi namque juventa  
 Districtis coram gladiis renovatur ; ad iras  
 Aeternas moriens cives hortabor in hostes ;  
 Atque utinam solus peream , civesque triumphent  
 Incolumes ! Dignam si pacem quaerimus Urbe ,  
 Quisque paret bellum. Contra Sempronius usu  
 Edoctus longo , cuius sunt aure molesti  
 Imperii sonitus nec non violentia Lartii ,  
 Haec animo reddit firmo : res tanta priusquam ,  
 Cui vita et splendor seu mors innectitur Urbis ,  
 Sit lex Romulidis , pigeat ne cernere Volscis  
 Sese juncturas gentes , quas fudimus armis ,  
 Quasque facit laetas libertas. Namque priores  
 Vincula frangendi compellet dira cupido ;  
 Postremas metus urgebit , ne compede vinctae  
 Amisum plorent muus. Jam tempus oriri  
 Optatis faustum cernunt ; cum Marcius ingens  
 Excurrit Latii campos victricibus armis  
 Et gladium tollens Urbi minitatur. An unquam  
 Quis putet Ausoniae segnes non foedus inire  
 Cum Volscis populos tanto ductore regendos ,  
 Cujus tantopere adnitus fortuna secundat ?  
 Quod si concurrant plures in foedera gentes ,  
 Non numero forsitan cadet obruta Roma ? Saluti  
 Tunc esset patriae non ira armisque cavendum ,  
 Non profundendo romano sanguine , sed non

Indecorem pacem poscendo. Numina justa  
 An non a nobis repetent irata cruorem  
 Romani populi, temere si Curia fundat?  
 Haud nostra aeterno damnabit nomina probro  
 Posteritas, fatuo si bello Roma feratur  
 In praeceps? Ineant quae foedus cernere primum  
 Est gentes; demum num ponere praestet, an arma  
 Stringere, discutitur melius. Sed dicta refellit  
 Posthumius Lartì firmans effata: verendum  
 Non est, ne coeant plures in foedera gentes.  
 Praeclari et multi dudum peperere triumphi,  
 Ne Romam spectans reverenter sumere tela  
 Audeat urbs Latii circum populique propinqui;  
 Sed nec longinqui, fortem quia bella gerentem  
 Formidant Urbem, et casus pugnaeque remotae  
 Illorum pectus non tangunt. Vidimus ipsi  
 Regibus ejectis tuscam vim surgere Romae  
 Infestam; reliquos populos sibi quemque timentem  
 Non extra muros densas misisse cohortes,  
 Non junxisse simul vires. Hinc fudimus arma  
 Tusca, dehinc Latium, quamvis infirmior esset  
 Hic oriens populus. Primaevae flore juventae  
 Ac tot palmarum radiis nunc Roma refulgens  
 A se jungendo Volscis non terreat urbes?  
 Errore aut fati ita captae (credite) gentes  
 Non opibus Volsco succurrent, atque relinquent.  
 Casibus edocti nunc vos, audacia volsca  
 Quo mat, aspicitis, nam contra quomodo stabit  
 Hostis virtuti Romae, gladiisque tremendis,  
 Artibus atque ducum? Forsan semel insuper armis  
 Pugnavit, forsan cessit semel hostibus, omnis  
 Aut saltem caesae permultae robora pubis  
 Urbs plorat? Sed nil horum. Cur indecor ergo  
 Viribus infractis cedit? Cur territa verbis  
 Ante tubam gladium ponet? Tum vocibus aula

Magnanimis resonat ferro suadere rebelli  
 Volscos, ne toties juratum denuo rumpat  
 Foedus; et hinc vario patres sermone requirunt,  
 An praestet portis armatam educere pubem,  
 Pellere seu belli nubem, dum detonet, omnem  
 Protectos muris. Ast alta mente Senatus,  
 Nobile concilium regum quem jure vocabant,  
 Claudier haud acres animos sub pectore cernit  
 Consulis; atque feros vulgo inspirasse tribunos  
 Aversam mentem patribus belloque; revolvit  
 Hinc animo placido non fulminis esse ruendum  
 More, dies dandos, Marci ut deferbeat ira,  
 Qui victor palmis opibusque repleverat olim  
 Urbem; nec mites sociali foedere bellum  
 Finire exciderant memori de pectore mores;  
 Nam sapiens laetum didicit praeponere olivum  
 Sanguineae palmae, tum tandem stringere ferrum,  
 Saevi cum fati vis insuperabilis urget;  
 Hinc multo statuunt tutari milite patres  
 Urbem, non extra muros urgere phalanges;  
 Si vero in patriam bellorum fluctibus hostis  
 Irrumpat, gentem reputant concurrere in arma,  
 Antiquos tegat ut patres sanctosque penates;  
 Celsa mente viri ingentes et fortibus ausis  
 Excedunt portis generoso pectore; quorum  
 Explorare labor Volscos, et jungere foedus  
 Gentis honore tamen servato. Verba salutis  
 Discedens dabat interea dux inclutus aegro  
 Moenae; sed mordax male conditur ore sereno  
 Cura; velut frater vultu male gaudia fingit,  
 Cum dulcem linquit fratrem. Tum fortiter ille  
 Haerens proposito turmas educit apertis  
 Campis setina praeda gazisque refertas,  
 Quae quassant hastas, atque hostes voce lacessunt  
 Magnanimos hostes sub tectis bella parantes;

Ingrediturque vias quibus est a gente latina  
 Nomen. Sed tumidis uti torrens irruit undis  
 Nunc dextram superans ripam, nunc arva sinistra ;  
 Sic acies Volscum, ceu fert ducis impetus, arma  
 Et cursum vertunt huc illuc. Strenua bello  
 Agmina caesa jacent, quae clausit Sulmo vetustis  
 Muris ; atque tibi dulci pietate calenti  
 Marcius, o Silvì, dederat ne compede vincta  
 Sulmonis generet pubes. Super arva corana  
 Tum properat Volscus. Foecundi vertice collis  
 Cernere erat structas veteri urbe molaribus arces,  
 Quas solidas nondum saeculorum diruit ira ;  
 Spectat ad occasum urbs celsi navalia Caeni,  
 Arva Velitrarum, Laurenti moenia, turres  
 Anti, silvarum tractus, ingentia rura,  
 Inter quae radiat Nymphaei fluminis unda,  
 Velivolique errans Tyrrheni tendit ad oras ;  
 Gens aliam sequitur pacem ; sed dextera bello  
 Frigida non languet ; cernens haec frangere Volscum  
 Haud fas esse sibi, portis excepit apertis,  
 Eripuitque sagax saevis a cladibus urbem.  
 Contra clara malo committens omine pugnam  
 Excetra flens cernit foedatos sanguine muros ;  
 Victa lubens sequitur victoris signa juvenus.  
 Et jam nox magna terras involverat umbra,  
 Cum tristes Urbis portae panduntur, et altum  
 Legati calcant limen ; non molle cor hostis,  
 Non lenem precibus ductorem, patribus ajunt.  
 Audiit haec alto secura a culmine mentis  
 Curia ; sed sapiens tenebris vult tecta jacere,  
 Ne media subitus conflagret in Urbe tumultus,  
 Et votis iterum ducis iras vincere certat.  
 Ast adventantem Volscum Veturia mater  
 Novit ; enim prisco domui conjunctus amore  
 Appius innuerat ; sed mentem animunque virilem



Illa gerens nurui tacuit non suavia facta ;  
 Sola novo scandit Tarpeji culmina sole  
 Dum fumant arae , tellusque cruore recenti  
 Spargitur , et variis florescunt limina sertis ;  
 Sacrosque ante focos media inter numina divum  
 Orat pauca Jovem manibus Romana supinis :  
 Summe parens hominum , Aeneadam fidissime custos,  
 Quid precer oppositis curis lacerata ? Triumphum  
 Urbis ? At invictus natus cadet ; anne salutem  
 Victoris Marci ? Tum patria corruet ; anne  
 Volscùm Romulidumque neces ? A patre deorum ,  
 Qui servat gentes , me cladem poscere gentis ?  
 Haec tantum supplex. Primaevo flore juventae  
 His natum vovi templis , ut cresceret Urbi  
 Has cumulans aras donis. Tu sidera nutu  
 Atque animos versas hominum ; de turbine belli  
 Prome jubar pacis. Te saecula cuncta sonabunt ;  
 Si patriam natumque haud tangat dedecus. Agmen  
 Pontificum , templi custodes , turbaque vulgi  
 Vocibus attoniti fixerunt lumina in illa  
 Mirati fortem civem fortemque parentem.



## LIBER TERTIUS

## A R G U M E N T U M

*Ufens ad Fossas Cloelias castra locat, quae spectaturi Romani ascendunt moenia et turres. Cloelia nutrix natorum Coriolani nunciat proximum adventum heri; hinc pueri plaudunt; turbatur Veturia, Volumnia deflet. Egreditur portis decem patrum legatio, unde multum spei Roma concipit; sed Tribuni dant operam ut excitent turbas. Cossus eques iratus ob decretum Senatus non educendi acies e muris multorum animos disponit ad seditionem; Legati redeuntes Romam nunciant inducias in triginta dies, quae laeta patres populo statim referunt, et animos exhilarant solemnitibus ludis. Valeria, et Sabina domum Veturiae properant, et verba faciunt de induciarum munere. Marius interea vincit Bovillas; Silvius frangit bipeuni portam Politorii; Aricianam territam a Cora ingreditur Cajus, qui postea infert acies campis Laurenti, ubi turpes rejicit conditiones a Tencro propositas, quibus urbe potiretur. Reversus autem in tentoria ductorum rogatu damnationis suae adjuncta, et seriem exponit.*

**F**estivos inter cantus operumque fragorem  
 Castra locans Urbem contra jam strenua Volscum  
 Dextera saxoso muniverat aggere vallum;  
 Acris et Ufentis pertentant gaudia pectus,  
 Ardua vallorum quod cernat tuta furore  
 Hostis. Jam procul apparent tentoria velis  
 Ut celsae turres varios induta colores.  
 Undique sollicitis implentur lata viarum  
 Et plateae turbis, resonat caecumque per Urbem  
 Murmur; at Aeneadum fortuna et conscia virtus  
 Frangi animis vetat; e tanto vix unus et alter  
 Vociferat populo: qui vos stupor occupat? Hostis

Ingruit ; an vigilant patres ? Exscindere gentes  
 Romuleas alter melior Porsenna minatur ,  
 Qui dux , quae sociae vires , quae bellica pubes ,  
 Nam quod consilium nobis ? An cedere praestat ,  
 Aut saevi Martis ruere in discrimina ? Vanos  
 Ast agitat juvenes arrecta cupido videndi  
 Hostiles acies ; portae pars limina transit  
 Hac ; illac alii tecti fastigia scandunt ;  
 Hac alii aerias ascendunt pectore anhelò  
 Turres , unde oculis Volscùm tentoria lustrent.  
 Tum Marci conjux atro jungebat amictus  
 Dilectae sobolis filo , lenibat et acres  
 Clausa domi curas extollens lumina saepe  
 Ad pueros pavidum agnum per conclave sequentes ,  
 Quem pinguem de more tulit longaevus ovili  
 Ad dulces Faustus dominas. Jamque aeger ab annis  
 Sustentans baculo gressus linquebat amata  
 Hospitia upilio , secum crudelia volvens  
 Fata domus ; animo cum victus limine portae  
 Restitit , et moestas dominas respexit , et ortae  
 Sunt oculis lacrimae gemuitque. Sed anxia nutrix  
 Cloelia , quam parvis Curibus sub luminis auras  
 Emisit mater , circum per flexa viarum  
 Urbis it interea , tortoque e vimine textam  
 Fert manibus cistam ; nam sobria mensa paranda est ;  
 Ecce repente sonant laud tristes illius aure  
 De domino monitus. Mensae non amplius illa  
 Tum memor accelerans gressus ad tecta reducit ,  
 Et trepidans inter lacrimas et gaudia dulcis  
 Nunciat adventum domini ; exsultare videres  
 Innocuos pueros , procurrere , tendere palmas ,  
 Ad patrem , lacrimans quem mater saepe vocabat ,  
 Poscere discessum. Contra rugosa parentis  
 Marciadis facies , nimbis contextus ut aether ,  
 Fit tristis ; pueris ingrata silentia mandat

Objurgans, figitque solo cava lumina secum  
 Multa movens animo. Sed moesta Volumnia vultum  
 Demisit, gemitumque alto de pectore traxit;  
 Forfex, fila, glomi calathique dedere cadendo  
 Excussi manibus strepitus; explere querelis  
 Infelix curam cuperet, quae infixa profundo  
 Corde hiat; at prohibet tantae reverentia matri  
 Debita; tum dulces natos compellat, et ipsis  
 Hinc atque hinc collo circumdat brachia et haeret;  
 Ora rigant tacitae lacrimae ceu jugis aquae fons.

Haud capit interea requiem sapientia patrum,  
 Atque studet molles aditus tentare, priusquam  
 Currat ad arma fremens, et inevitabile tractet  
 Bellum. Legati claro jam sanguine lecti  
 Excedunt portis ostroque togaque decori,  
 Eloquio et patriae succensi pectus amore,  
 Et gressus vertunt ad castra. Sed ante Capenam  
 Circumfusa manus extollit turba Quiritum:  
 Vestris in labiis omnis fiducia Romae,  
 Res et fortunae; vobis et sacra Deorum,  
 Et magnae florens commissa est gloria gentis;  
 Emollite ducis Volscorum pectora. Fatur;  
 At celso e curru blandae sonuere Minuci  
 Voces: o Marti, et divo gens sacra Quirino,  
 O queis nec metas rerum nec tempora ponunt  
 Numina, qui torquet vos error? Bella moveri,  
 Hos ruat ut muros, a Volscis creditis? Urbem  
 Invictam toties victus non milite multo  
 Aggreditur, saevit dum frigidus annus? Et hosti,  
 Cujus confodit gladius tot millia, Cajo  
 Committit facinus? Non haec prudentia genti;  
 Illa sub egregio duce praelia dira minatur,  
 Ut firmum feriat cum Roma foedus; et ipsi  
 Pignus amicitiae ferimus; nec respuet. Aure  
 Ante aras sonuit nuper vox laeta salutis:

Certa salus Urbis, Phoebus repletus haruspex  
 Exclamat, volucrum dum ritu consulit exta.  
 Fortunae vestrae, cives, mentique Senatus  
 Romuleisque diis melius confidite. Vocem  
 Tum premit; at properans verbo, sonitque flagello  
 Auriga, atque strepens vasto volat aequore currus;  
 Laetitiae tollunt voces palmasque catervae,  
 Et campi circum resonant arcusque Capenae;  
 His etenim pacis donum his quinque virorum  
 Splendor, nonnullis conjunctio spondet amoris  
 Cum forti Cajo; multos quoque copia fandi,  
 Qua pollent patres, in spes adducit; at omnes  
 Erigit auxilium divum; nam jugiter altos  
 In superos multa micuit pietate, regique  
 Vi summa immensam credebat Roma catenam  
 Rerum; tum veluti belli si terror abesset  
 A Latio, tollunt animos ad sidera; quisque  
 Ingreditur laetum tectum, laetamque salutem  
 Uxorem, atque vocat dulces ad gaudia natos.  
 Obscuris laribus gens ad praeclara creata  
 Angustis gaudet mensis accumbere, tostas  
 Fruges, et late fundentes brachia betas  
 Aut olus, ut regum mensas, aut vilia poma  
 Dente premit, modicum bacchi tum gutture sorbet,  
 Recreat et vires; ad membra labore terenda  
 Impiger hinc remeat curvo seu vomere terram  
 Vellens, sive ciens pugnae simulacra sub armis.  
 Haec inter graviter sermone silentia patres  
 Romulidum rumpunt hostiles ante cohortes,  
 Et pacis donum faustis praeponere bellis  
 Insinuant; dociles at non dat Marcius aures  
 Verbis. Interea torquet pax illa tribuni  
 Corda; videbat enim vulgi restinguier iram  
 Praeclaras contra sedes; tum pectoris imo,  
 Quo cieant astu sopita incendia,volvunt.

Ante Fori fauces diversa ex parte ruentes  
 Bellutus, Decius, turbato lumine Brutus,  
 Rugaque conveniunt; Brutusque ita farier orsus:  
 Execranda quies! Factis contraria nostris  
 Facta patrum! Vulgus quae habeat fiducia rerum,  
 Quae nostro immineant capiti discrimina, Romae  
 Si diuturna sedet concordia, cernitis ipsi;  
 Vis inimica patrum populo concrescet amico;  
 Imperium nostrum cadet; illius ira, superbam  
 Cujus cervicem depressimus, irruet armis  
 Volscis in nostrum caput. Haud est deside tutum  
 Nunc languere mora. Arte nova conflare tumultus  
 Tempus. Cui Decius: Cossi violentia vobis  
 Perspecta in patres; si taedam turbidus ille  
 Praeseferat, bello totam spectabitis Urbem  
 Ardentem. Juveni confestim occurrere, laude,  
 Promissis mulcere aures, superaddere flammam  
 Flammi est opus. His plaudunt, torvasque serenant  
 Frontes, et celerant simul omnes. Multa per Urbem  
 It volvens lento Cossus pede; Cossus equester  
 Sanguis, quem nimium quaerendi nominis ardor  
 Urgebat; locuples, sed prodigus, impiger, audax,  
 A primis annis turbas exercitus inter  
 Civiles, cujus tenuis sapientia menti,  
 Ori vis fandi, quae vulgi corda cieret.  
 Infremit hic leges in patrum bella vetantes  
 Extra murorum clypeum; nam pectore volvit,  
 Aequare si campi committat praelia, multa  
 Cingere luce caput, primas se scandere Romae  
 Sedes, et non pauca domum vectare talenta  
 Argenti; mens hinc barbarum fervet amore.  
 Huic sub Aventino flagrantem ora tribuni  
 Ad monumentum Numae occurrunt; sine fine furorem  
 Injiciunt; urgent, disponat ad arma latenter  
 Patribus infensam pubem. Jam protinus omnes

Huc illuc sese immittunt, placidamque peragrant  
 Urbem, ceu venti pacata per acquora. Cossus  
 Primum divitiis vacuas intrare clientum  
 Sollicitus sedes, alienoque aere gravatis  
 Et vitio servis proscriptas spondet opimas  
 Aedes, atque novas tabulas. Invadit equestres  
 Tum famae cupidos animos, promittit et ingens  
 Pontificum munus, fasces, sedesque curules;  
 Iras accendens cunctorum dedecus auget,  
 Si fremat incassum generosa diutius Urbe  
 Pubes clausa; parent animos hortatur, ut extra  
 Muros bella gerant, aptum labentibus horis  
 Vix tempus veniet; socios clam quisquis ad ausum  
 Interea succendat. Equos mercarier, arma,  
 Venatuque canes suetos et naribus acres,  
 Parcere nec gazae, ferre et sua dona cuique,  
 Ex aetate velut studium sub pectore flagrat.  
 Nunc sociis sacri collectis vertice montis  
 Ceu vates fatis recludens ora futuris  
 Igneus effatur; ducit nunc agmen in oras  
 Queis Anio Tibri vitreus sua flumina jungit,  
 Et fractos hostes et latum nomen ad astra  
 Nunciat Aeneadam, cum portis Roma cohortes  
 Eduxit. Dubiis, tepidis, languentibus addit  
 Pectoribus flammam, spem, vim, passusque repulsam  
 Non lassus victusque sedet; festinat et instat,  
 Succenset, gaudet, laudat, dolet, increpat, orat;  
 Inque dies laetus sociorum respicit agmen  
 Crescens. Jam violare patrum decreta voluntas  
 Longino, Salio, Figulo, queis ire per altos  
 Vallis aricinae lucos, agitare frementes  
 Et delectat equos; audax pars infima plebis  
 Se comitem jungens, maledictis increpat aulam.  
 At Numitor refugit constans, et crimen abhorret;  
 Et plures equites et vulgi maxima turba

Illecebris obstant, nec recta a mente moventur  
 Ullis muneribus. Sic digerit omnia Cossus,  
 Ut tandem rapiens plures in bella maniplos  
 Erumpat portis, Volscosque in praelia poscat.

Ast hi setinis sternentes corpora terra

In muris laeto proflabant pectore somnum.  
 Ingratus magnis ducibus non mollis habebat  
 Cristatum somnus Cajum; nam mente revolvit,  
 Quam primum gentem, quam postea vincere praestet;  
 Quomodo sint celsis postremum molibus arces  
 Romuleae terra aequandae statuebat, et omnem  
 Venturi seriem belli sub pectore versat.

Nec non ad Moenam crudeli vulnere laesum  
 Mens volat, et caros respersos sanguine cernit  
 Artus, et longi patitur tormenta doloris,  
 Qui furit in Moenam. Pallantis filia, ductor,  
 Te vocat hinc animo, ingentes ut pectore motus  
 Concepti populos sternant, vertantque latinae  
 Fortunam gentis, pateatque an reddita dulci  
 Corporis integritas sit Moenae. Mole gravatus  
 Tot rerum tandem, terra quod forte jacebat,  
 Languidus insedit saxo; vix ulla cohaerent  
 Jam sibi, quae menti subeunt, phantasmata; languet  
 Vis libertatis, discrimen bruta virosque  
 Inter; magnanimus tum supra pectora ductor  
 Consortis somno dat lumina victa lacertis.  
 Jamque nitens primo fulgebat lucifer ortu  
 Multiplices pecudum revocans hominumque labores,  
 Et campi et colles setini albescere circum,  
 Et nebulae vento motae fluitare per agros,  
 Jam rauco clangore vigil tuba frangere mutas  
 Auras, cui lati campi murique resultant;  
 Et primi ad caelum hinnitus tolluntur equorum,  
 Qui croceam laeto auroram clamore salutant;  
 Miles protendens artus oculosque recludens



Sublustri circum quaerit nova lumina caelo ,  
 Circumfertque manus inquirens spicula et arcus.  
 Nec mora ; signa canunt ; procedunt ordine volscae  
 Confisae virtute ducis , palmisque relatis  
 In populos alios laturae bella catervae.  
 Haec inter reduces moerenti Curia gressu  
 Excepit patres referentes foeda reposci  
 A Volscum fastu ; soles concedier Urbi  
 Triginta , castris ut Marcî certa remittat  
 Consilii. Audiri murmur , flagrare tumultus  
 Incipit in vulgi gremio ; quae cuncta notantes  
 Hand fracti patres aerumnae pondere priscis  
 Exemplis haerent , et primum vincere lites  
 Sancti vi monitus , armorum turbine demum ,  
 Et lenire rudis sensim fera pectora vulgi ;  
 Hinc augere spei causas , tenuare timoris ;  
 Quod Veturiades proavi vestigia calcans ,  
 Cum Latium contra fortis rex bella moveret ,  
 Lunae curriculo non urgeat agmen in Urbem ;  
 Interea pompam ludorum gaudia gentis  
 Consilio patrum , arma simul bellumque parari.  
 Tibridis ad raucas ripas , quas ligneus Anci  
 Pons jungit , surgunt atra fuligine tecti  
 Muri , quos inter fornacibus ignis anhelat ,  
 Et caelum vasto circumtonat omne fragore.  
 Incudes circum procero corpore centum  
 Attollunt multa vi duri brachia fabri ,  
 Et scintillantes informant ictibus aeris  
 Et ferri massas , antiqui colle tremente  
 Jani. Ferratos ingenti mole lacertos  
 Haec balistarum cudunt ; stridentia tingunt  
 Illinc aera lacu ; poliunt hinc aegida ; telum  
 Illinc omnigenum conflant. Est cernere matres  
 Praebentes manibus natorum spicula et hastas  
 Magnanimo hortatu : prosternere discite Romae

Hostes his, pueri, telis. Clamore parentum  
 Ac ferri strepitu gladiisque micantibus olli  
 Subrident, patriae columnen splendorque futuri.  
 Vomere certatim curvoque ligone profundas  
 Effodiunt fossas, et firmant aggere denso  
 Moenia. Collinam clavis et robore secto  
 Pars reparat portam; Carmentis nomine nimphae  
 Dictam vecte alii firmant et cardine ahenos;  
 Trigeminae pilis alii supponere saxa;  
 Arcus Exquiliae pars rursum ducere, rimis  
 Atque fatiscentes iterum pars tollere muros.  
 Et jam sol medium cursu trajecerat axem  
 Aethereo, viresque cibus potusque refecit;  
 Plenis turba viis fluit undique tecta relinquens,  
 Ut pubem cursu certantem spectet equestri,  
 Quem docuit morem Julius, cum conderet Albam;  
 Hinc Roma accipiens patrium servavit honorem.  
 Inter Aventinum, mediaque in valle Palati  
 Haud Urbe indignum Circum construxerat ingens  
 Regifico Priscus luxu; quem spina secabat  
 Pyramide et signis medium decorata superbis:  
 Compositae multis sunt sedes millibus intus,  
 Atque gradus varii, magnos ubi Roma videbat  
 Ludos aut celeres circum volitare quadrigas,  
 Ire vel alipedes cursu rapidoque recursu.  
 Plurima clamosa platea jam turba sedebat,  
 Commixtique patres, equites, vulgusque superbum:  
 Ornato similem templo rutilare videres  
 Undique foemineam formam, cupidaeque juventae  
 Lumina pellicere, et laeto superaddere Circo  
 Splendorem. Apparet gravitas in fronte senili,  
 Et jocus et risus puerorum fulget in ore.  
 Jam conscendit equos exardens laudis amore  
 Lecta manus; metus et spes exsultantia jactat  
 Pectora. Quadrupedes spumantia frena frementes

Mandunt, aure micant, indignatique morarum  
 Tellurem pedibus fodiunt. Intenta juvenus  
 Sublimes equites admirans scinditur inter  
 Oppositas partes; digito hic monstratur, et ille  
 Victor. Cum cornu frangens clangoribus auras  
 Dat signum cursus; deniussa catena repente  
 Aequora pandit equis levibus; jam finibus omnes  
 Raud mora prosiliunt; juvenum ferit aethera clamor.  
 Aequatis puncto sed temporis ire videntur  
 Frontibus alipedes; nam prisca e gente sabina  
 Spartacus antevolat, sequitur Murranus ab Alba  
 Robore fretus equi; vasto sed tardior ibat  
 Corpore post illos aequo discrimine Sucro  
 Montibus e rutulis, et tuscis Lucagus oris.  
 Acrius hi lentos manibus, pede, voce, flagello  
 Quadrupedes stimulant; alternis ira, voluptas,  
 Spes, formido, stupor turbae spectantis in ore  
 Pingitur; oppositis studiis et murmure vocum,  
 Atque pedum pulsu curvi tremit area Circi,  
 Atque alte muri Romae collesque resultant,  
 Ut resonant vento convulsa per aequora fluctus.  
 Nunc exsultat equo spumanti Spartacus omnes  
 Praecurrens; victum adnissus nunc praeterit ardens  
 Murranus; juncta nunc ambo fronte feruntur  
 Iratis animis. Post hos se tarda movebat  
 Diverso spatio multis irrisa caterva  
 Quae superest equitum; sic sparsi pulvere, anhelique  
 Instaurant alios cursus, aliosque recursus:  
 Septeno tandem expleto prior insilit orbe  
 Murranus victor metas, plausuque resultat  
 Circus, Aventini culmen, collisque Palati,  
 Desiliensque ab equo saltu se immittit in altam  
 Victor ovans Circi spinam spectandus ab omni  
 Coetu; tum praeco Murrani nunciat ingens  
 Nomen, et extollit Murrani nomen ad astra

Vis populi, meritoque argenti dona feruntur.  
 Sic mens docta patrum ludi dulcedine sensim  
 Nigrantem clara depellit ab Urbe procellam.  
 Dumque inter strepitus festivos vulgus inane  
 Oblitum famae melioris plaudit ovatque,  
 Pars equitum patrumque volant ad moenia celsa,  
 Hostis ut inspiciant motus, an spicula fessus  
 Ponat, et in tuto mens sit requiescere vallo,  
 An struat insidias; mittunt, qui cuncta notantes  
 Accedant propius castris, et visa reportent.  
 Sed non obscuro generata Valeria patre  
 Publicolae gerinana soror, qui dispulit Urbe  
 Tarquinius, mentis vi clara, et lecta Sabina  
 Appi uxor, Marci vertunt ad limina gressus,  
 Tristitiae dulci domui bona verba loquentes,  
 Verba spei, magnas lunae componere cursu  
 Lites, atque iterum complecti colla lacertis  
 Marciadi; toto diffundunt lumen ab ore  
 Laetitiae, patriae tunc omnia fausta canentes  
 Complexu pueros retinent, atque oscula figunt;  
 Sic autem ex oculis formosa Volumnia tergit  
 Fletus, exultant pueri, Veturia secum:  
 Dum mensis currunt soles, alterna revisens  
 In solido forsam Romam fortuna locabit.

At Veturiades moderandis doctus in armis,  
 Ne caperent animos hostes, si poneret hastam  
 Volscus iners castris, rapiebat in oppida Romae  
 Foedere conjuncta insuperabile strenuus agmen.  
 Jamque cohors, muris quam concludere Bovillae,  
 Spicula projecit, vix primum vidit in arces  
 Scandentem Marium stricto mucrone secutum  
 Agmine; jam nigris lucis circumdata, postquam  
 Hostiles inter muros tua lancea mortem  
 Intulit atque metum, ductor praeclare corane,  
 Marciadi trepidas reserarat Aricia valvas,

Ara ubi Latonae fragranti thure calebat ;  
 Jam durum limen Politori ruperat audax  
 Silvius arrepta Cajo exhortante bipenni ,  
 Et ruerat Volscus per vulsas cardine portas .  
 Tum vocī parens fortunae praepes amicae  
 Marcius impulerat Laurenti ad moenia bellum ,  
 Teucer ubi summo belli rerumque magistro  
 Aemulus , ac odiis magis inflammatus acerbis  
 Quod minime justis . Volscūm vix agmina crevit ,  
 Hic sibi propitiū solem fulsisse putabat ,  
 Consiliumque fero versabat pectore fortem  
 Sternere clam ferro Carbonem , flectere clavum  
 Urbis subsidio Volscūm , torquere superbo  
 Servitio populos . Quo non mortalia corda  
 Proripis ambitio ? Tusci prope litora ponti  
 Turribus aeriis sedet urbs domitoris equorum ,  
 Et clari auguriis , ut fama est , regia Pici ;  
 Laurenti nomen , viridi quod cingitur umbra  
 Phoebeae lauri ; turres et moenia bello  
 Firma , sed armisoni populi inage fortia corda ;  
 Gens ultro hospitia exercet generosa , viaque  
 Advocat ad tectum fessos , et corpora curat .  
 Noctifer occiduo surgebat lumine vesper ;  
 Cum fidens animi Volscūm tentoria Teucer  
 Ingressus lecta juvenum stipante caterva  
 Sic Veturiadi generoso voce superba ;  
 Urbes jam Latii frustra contendere forti  
 Cum duce Volscorum ; hinc patriae se velle salutem ,  
 Quā possit , ferre , et Volsco sub nocte silenti  
 Pansurum portas ; hoc lectam poscere pubem  
 Laurenti , hoc tantum patriae superesse ; talenta  
 Argenti , et multum telorum praemia Volsco .  
 Exequar haec , subdit Teucer , caesusque repente  
 Nocturno Volscūm non exorabilis hostis  
 Carbo cadet telo , tua si me dextera rursus

Urbis ad imperium tollat. Quae foeda reposcis?  
 Illum torva tuens cristatus Marcius infit;  
 Tantane te incendit dominandi caeca libido,  
 Ut reputes palmas a Volscis fraude parandas  
 Me duce? Meve auri argentique movere talenta?  
 I, gazas probrumque refer. Fremuere cohortes  
 Concordi assensu; coenae tum dulcia gustant.

Sub Veturiadis tecto jam nocte silente

Laeta caterva ducum baccho mensisque remotis  
 Circumsidebat stratis. Tum fortis in armis  
 Grajus et impatiens pubes, quae pectore lentos  
 Processus odit belli Romaeque morantes  
 Aggressus, instat multis, ut nobilis exul  
 Ordine declaret de magno pauca labore,  
 Sicque furens saevo refricato vulnere in Urbem  
 Irruat indignans sociorum funera. Cautus  
 Ardor ne lectae pubis deferbeat erga  
 Ductorem, celso e solio sic ille: dolorem  
 Infandum, socii, renovare rogatis, ut atrox  
 Ultio Marciadem pressit. Quis comprimet iras  
 Haec memorans? Nostros at si perpendere casus  
 Tantus amor, paucis doceam, dum longa silentes  
 Nox condit terras. In sacro ut lucifer ortus  
 Monte magistratus fuerat tutela malorum,  
 Plebis amor; modicum sed fundens lumen amicum  
 Romulidum muris est aversatus ut orcum  
 Imperium pacis, Titanque horrendus in Urbis  
 Cervices clavam tollebat. Juppiter aureo  
 Subnixus solio medio splendore deorum  
 Ejus suspendit noxas benefactaque librae;  
 Et lancem noxae pellebant pondere deorsum;  
 Hinc super Aeneadam mentes pater optimus almam  
 Consilii lucem fundebat; mascula corda  
 Inflammabantur studiis, ut protinus atrum  
 In praeceps rueret monstrum, cum splendet ab ortu

Laeta dies. Multam Romae clamore petitam  
 A siculis oris ventosa per aequora pinus  
 Attulerant cererem. Capto sapientia patrum  
 Tempore quam facile male praebita munere frugum  
 Dona redemisset! Torvo clamabat in aula  
 Ore tribunorum nil motus Marcius, igne  
 Succensus patrio. Veri fulgore togati  
 Assensu patres, pubes, et ditior agris  
 Infremuit populus. Scissa Discordia palla  
 Et Furiae geminos tollentes crinibus angues  
 Tunc stygiis antris evadunt, luceque nigra  
 Fumantes vibrant, figuntque in corde tribuni  
 Taedas; erumpunt oculis ardentibus olli,  
 Atque, coite simul, clamant, protendite dextram  
 Conjugibus, pueris, vobis; en Marcius atrox,  
 Occumbat, fatur, patribus parere recusans  
 Turba fame. Circum jaciuntur verba minarum  
 Atque irae fremitus; paulatim attollitur aequor  
 Et spumat; tumidi augusta intra limina patrum  
 Sunt irrupturi fluctus; et naufragus undas  
 Marmoris immensas pellens haud viribus aequis,  
 Aestu Marciades rapitur. Pars optima plebis  
 Patres atque equites generosa pectus ab ira  
 Accensi demum insurgunt, et brachia tollunt.  
 Aura sonat crepitu plagarum; livida turgent  
 Ora; fluit sanguis, civilis et acrius ardet  
 Pugna; sed extinguit caecos nox atra tumultus.  
 Tum dux setinus, quae tellus immemor, ora  
 Solvit, digne quidem fatis melioribus heros  
 Te genuit, cujus pietas pensatur acerba  
 Ira? Marciades premit altum corde dolorem,  
 Oreque prosequitur placido: sol fulget ab ortu;  
 Sedibus ecce suis Urbs ingens tota movetur,  
 Ceu quaterent hostes muros, collesque resultant  
 Horrendo strepitu; tetrus in fontibus irae

Ignescunt. Veluti nigra inter nubila lunae  
 Splendor, sic patrum resplendet gratia, parvo  
 Aere domum cererem mendica a plebe ferendam  
 Promittens, strepitusque silent; ast ira tribuni  
 Injicit in Cajum civilis crimina motus;  
 Turpes ille dolos reteggit, repletque pudore  
 Infensas frontes; et patres lectaque pubes  
 Et bona pars vulgi jucundis ora serenant  
 Sensibus; at resonat civilis buccina belli  
 Bellutus clamans: quin tollite, tollite pestem,  
 Ferte citi Cajum, tarpeja e caute tyrannum  
 Praecipitate. Necem spirans incurrit in illum  
 Torva cohors; plaudens ascendit turba severum  
 Collem, lethales ut lapsus spectet, et artus  
 Discissos saxis, atque ossa immixta cerebro.  
 At vim nobilibus manibus lectaeque catervae  
 Incutiens superum pietas, quae saepe resistit  
 Immani sceleri, accurrit repulitque furores.  
 Ad crimen turbas tunc cogere docta Megaera,  
 Improba Tisiphone et nutrix Discordia belli  
 Invisae cunctis, circum tacitaeque volantes  
 Aure sonant scelerum, ne supra culmina cautis  
 Tarpejae Cajum rapiant, sed ut ante tribunal  
 Inque Fori lucem misso in suffragia vulgo.  
 Nec mora; tartarei resonant super ora tribuni  
 Sensus, et caeco vulgi mactanda furore  
 Victima servatur venturi ad lumina solis:  
 Immanes pereant, exclamat fervidus ira  
 Volscus Tulliades; nigra jam nube sedentem  
 Caelorum regem cerno, volscasque cohortes  
 Hortantem, ut Romam celerent evertere. Cajus  
 Nil contra; at voces intentis omnibus unus  
 Has iterum rumpit: vulgi mens acta furore,  
 Quam saevi rapiunt venti in contraria, nunquam  
 Consistit. Ceu sons trahitur dux ante tribunal...



Turbarum ; primum quaesiti crimina regni  
 Affigit ; nota nulla docet ; regumque maniplos  
 Ille armis fudit ; pro libertate tonantem  
 Jugiter aula ducem , campusque exaudit. Hydrae  
 Ceu capite abscisso surgebat protinus anguis ,  
 Obtrudunt aliud sic criminis : arbiter ille  
 Antiacae rapuit jejunis tritica praedae  
 Romulidis , ditans aciem solosque suarum  
 Culparum socios ; sed raptum Marcius addit  
 Non sibi vellus ovis , non culmum ; sanguine fruges  
 Emptas ; consensu pactas populi patrumque  
 Victorum natis impastis esse relictas.  
 Tunc ergo patres hortantur , crimine purus  
 Ut conclametur Cajus ; sed murmure vulgus  
 Flagitat iusueto suffragia more tributim  
 Non per centurias , ut perdat tutius. Urgent  
 Patres ut ductor solvatur crimine ; rursus  
 Succlamat vulgus suffragia. Curia quaerit ,  
 Innocuamne parent vitam sic plectere ? At acres  
 Afferri turbae rursus suffragia clamant ;  
 Et magis increscunt horrendum murmura. Navem  
 Ut servet , rabidis parendum praecipit euris  
 Mitis pars aulae , primusque Valerius ingens  
 Consilio hanc veniam suadet , quae temperet iras ,  
 Aut sine consilio , aut Marcì sic fata ferebant.  
 At quorum melior menti sententia , valde  
 Obstandum clamant populo exitiosa roganti ;  
 Appius et primus : Miseri quae insania patres ?  
 Nunquid parva petunt ? Ruet Urbs , fatalia dona  
 Si vulgus referat ; fatur , pluresque fremebant  
 Concordi assensu. Spes contra infida refulget  
 Multis , nil damni generosa a plebe verendum ;  
 Eumenides dirae certatim e pectore patrum  
 Terroris vellunt causas , augentque furorem  
 In vulgi gremio. Vix tandem saeva potestas

Plebejas armat dextras, ignobile vulgus  
 In caput invisum contorquet fulmina; et ille  
 Qui patriam toties servarat ab hoste, perenni  
 Plectitur exilio. Multi quos terruit audax  
 Seditio, Romae pars servans candida rectum,  
 Occultis iris arserunt corde sub imo.  
 Tunc canos manibus divellunt vertice crines  
 Patres, et sero taedet quod perfida vota  
 Audierint. Spectans genitrix Veturia celsis  
 A tectis animum diro transfixa dolore,  
 Tollit saepe pios oculos ad sidera; conjux  
 Dat gemitus niveosque sinus irrorat obortis  
 Fletibus, et pueri miserantes brachia matri  
 Tendunt, et cum flente gemunt. Sed nulla canenda  
 Tanto succendit fastu victoria turbam,  
 Quae sese jactans e septis prosilit amens  
 Laetitiae plausu; tam dira superbia culpae  
 Pectora corrumpit! Volscorum concitus ira  
 Excutiens coetus caput infremit; ora momordit  
 Grajus, sed tibi, vociferans, non Ilia mater,  
 Non Venus, aut Mavors, generis non Romulus auctor  
 Gens, quae servata invictam depellis ab Urbe  
 Marciadis dextram; Apenninus cautibus horrens  
 Te genuit, saevaeque admorunt ubera tigres.  
 O si Volscorum gens bella gerenda dedisset  
 Nobis luce nova, crudeles agmina ferro  
 In muros ruerent! Sapiens dux nulla reponit;  
 Majestate gravis solio sed surgit ab alto,  
 Annuit atque oculis; concussae vertice cristae  
 Sanguineae. Nutu nemo sedet; hiscere nemo  
 Est audax; omnes tacitis at gressibus ire  
 Ad limen cernas. Tanto servabat honore  
 Volscus consilio Cajum belloque potentem!



## LIBER QUARTUS

## A R G U M E N T U M

*Marcus victo Laurento acies removet ab oppugnanda statim Roma; hinc mittit Antium opimas praedas, alique duces suis propinquis munera offerunt. Palmus cum donis Antium petit, et hortatur Tullum, ut quamprimum classis ad Ostiam feratur. Cajus Ardeam expugnat, ad quam improviso adveniens Moenas summa laetitia afficit Marcium, qui denuo movet arma contra alia oppida. Romae Senatus nuncios mittit, et jubet, ut si quod oppidum oppugnetur, vicinus populus ferat auxilium. Ufens in luco albano caedit arbores; ex quo Thyrrus agricola irascitur, et cum rustica turba decernit machinas belli comburere, vix conditae fuerint. Romae perturbatio ob victorias Coriolani; Antii primum commercia describuntur, tum gaudium, et ludorum celebratio. Legati a tusco litore redeuntes Tullo referunt dissensum Regis a sociandis copiis; Tullus vero constanter parat bellum, et urget egressum classis a portu Ostiam versus. Cajus contra Lavinium profecturus Palmum recipit ab Antio redeuntem.*

**E**xtulerat signum Laurenti victor ab arce;  
 Ingressas cum fama tuum sonat, Ostia, portum,  
 Et remis vectas averso flumine Romam  
 Messe graves pinus. Rumore accensus amaro  
 Infremit armipotens ductor, quod caerulea ponti  
 Romulidis pateant; cum falsis vocibus aurem  
 Fama replet, Romae portis erumpere turbam,  
 Opprimat ut subito Volscos in praelia poscens.  
 Elpenor Mariusque doli fabricator adaugent  
 Eloquii fervore fidem, milesque ducesque  
 Marciadis circum tectum funduntur, et Urbi  
 Vertendos clamant gressus, jam castra latina

Linqnendi tempus. Sed niss fictaque verba  
 Marciades noscit, species quem non capit ulla,  
 Cujus adest menti bellorum lucidus usque  
 Ordo. Tum gressus effert e limine, turbis  
 Et circumfusus tacitisque ita farier orsus:  
 Quatenam jactatis temere? Haud vos fallere dicam,  
 Ast equidem falli. Celsis erumperet hostis  
 Si muris, somno nursinus lumina ductor  
 Victa daret? Volucris non huc praemissus adesset  
 Vectus equo miles? Mentem spes ludrica fallit,  
 O fortes juvenes. Num non munimina Romae  
 Sunt oculis? Immotas ferro frangere portas,  
 Belligeras acies et dudum vincere suetas,  
 Murorum moles solidas et sternere turres  
 Tantane vis nostris armis? Nonne agmine primum  
 Augendae Volscum vires, et certa paranda  
 Auxiliis multis victoria? Robora, scalas,  
 Ariete cum crebro balistas numina vobis  
 E caelo mittent? Vesania! Vincere fortem  
 Nam quis confidat belli sine molibus Urbem?  
 Condendae hae prius e silvis, cogendaque pubes,  
 Et multae gazae; conjunctae foedere Romae  
 Fundendae gentes, terrendus fortiter hostis.  
 An demum bellum sine mente feretis in Urbem,  
 Cum queat a tergo vobis insurgere fortis  
 Ardea? Jam primum telis hanc sternite; tandem  
 Irruite in Romam; scalas exposcite; primus  
 Celsa ego murorum scandam. Sic maximus heros;  
 Hinc subdit sapiens Anthaeus: volscia juvenus,  
 Desine tela virum frangi sperare furendo.  
 Nec virtute teres Romam, nec classe, nec ulla  
 Dexteritate loci vel temporis, arma magistra  
 Ni ducis ars moveat. (Memorando frendeo); nonne  
 Hactenus Aeneadam jacuerunt cuspidem fortes  
 Volscum, quibus excelsa ducis sapientia deerat?

Tu quoque tellurem morderes dente cruento,  
 Et versis Volscum lugerent moenia fatis,  
 Ni tibi Marciades, cujus quid prosit in armis  
 Explorare labor, tibi jussa capessere fas est.  
 Pro veris ergo non jam speciosa sequare  
 Somnia, neu rue torrentis vel fulminis instar  
 Quo te cumque trahit juvenilis fervor; et armis  
 Cum multum valeas, ne te quoque luce decoram  
 Consilii credas, quod multis crescit ab annis.  
 Illius ad voces, cui Di volscusque Senatus  
 Imperium dederunt, facilis vel spicula ponas,  
 Vel jacias; et quaeque dies tibi tempora lauro  
 Cinget; nec certe procul est lux aurea, quando  
 Romanas portas intrabit volsca triumphans  
 Pubes, et dabitur magnos haurire laborum  
 Fructus. His dictis Cajus fortissimus armis,  
 Anthaeusque pari studio contendit, ut ardor  
 Incautae sensim pubis deferbeat, acres  
 Atque animos mulcet dictis flectitque monendo;  
 Tum jubet arma parent, nec non vicina petatur  
 Ardea luce nova. Sed ductor mente revolvens  
 Principis hospitium generosum et munera Tulli,  
 Quatuor alipedes capite et cervicibus altis  
 Belligeros nitidos ostro pictisque tapetis  
 Instratos freno aurato rutiloque monili,  
 Et pictum pugnae Laurentis praemia currum  
 Et clypeum auratum pulcherrima dona remittit.  
 At reliquum praedae Volscum jubet oppida laetis  
 Accipiant portis. Generosi dextera Marci  
 Omnia festivo largitur pectore, plura  
 Et cupit, ut volsci populi sub corde voluptas  
 Crescat in immensum. Complentur castra stupore,  
 Et dux setinus: nam quid tibi, magne, relinquis?  
 Reddit at ille: mihi pulchri sat gloria facti.  
 Attonita his dictis siluerunt ora parumper;

Tolluntur tandem castris ad sidera voces ,  
 Et dux divino dignus celebratur honore  
 Aversatus opes , ad quas persaepe parandas  
 Mens hominum facies haud ullas criminis horret.  
 At Veturiades , ceu virgo pudica rubescens ,  
 Ora premit digito , mandatque silentia linguis.  
 Necnon Tulliadis pietas sua dona verendo  
 Crateras magnos argenti lumine claros ,  
 Aurato capulo gladium patrique pharetram  
 Offert ; ac torquem gemmis auroque micantem ,  
 Et niveum donat peplum tuscumque laborem  
 Purpureas chlamydes matri pulchraeque puellae.  
 Tegmina contra hyemes praebet villosa parenti  
 Antiquae ductor Caeni ; dat Silvius acer  
 Formosae uxori peplum ; puerisque tenellis  
 Umbro , Coras dulci fratri , proavoque recurvo  
 Aetate exultans Volusus sua munera mittunt.  
 Marcius hinc Palmum , felix cui copia fandi ,  
 Advocat , et mandat , subito contendat ut Anti  
 Ad muros referens laudes pugnatque bella  
 Volscum , palmarum testes et portet opimas  
 Praedas ; tum jubeat ventosa per aequora classis  
 Advolet ad fauces Tiberis , ne Roma carinis  
 Excipiat fruges , viresque superba resummat.  
 Nec mora ; certatim surgunt et jussa facessunt  
 Agmina. Pomptinos incedit longus equorum  
 Per campos ordo , qui dorso pondera iniqua  
 Pugnarum portant argenti multa talenta  
 Exuviasque ducum , quae Volscum aeraria ditant  
 Aut divum decorant aedes ; fulgentibus hastis  
 Circumeunt vigiles equites , ne rustica turba  
 Diripiens gazas , effossis celet in arvis ;  
 Tum sublimis equo festivis saltibus acer  
 Consequitur turmam Palmus resonantibus armis.  
 At postquam vires repararunt agmina somno ,

Marciades primus surrexit. Jamque fugata  
 Stelligera nocte eois aurora rubebat  
 Oris ; jam volscae procedunt ordine longo  
 In campis acies ; Laurenti armata juvenus ,  
 Quae versa est ultro Volscorum ad jura tuenda ,  
 Aequis consequitur gradibus ; dant gutture cantum  
 Omnes ; laetitia in vultu , spes pectore fervet.  
 Jamque in conspectu Volscum prope caerulea tusca  
 Surgebat muris ac turribus Ardea fortis ,  
 Ardea quam rapidis fertur delata carinis  
 Acrisium fugiens Danae fundasse colonis  
 Argivis , rutulique tori regnique vocasse  
 In partem genitum Pylum patre deorum.  
 Urbs fortis Turni memorans et robur avorum  
 Non se continuit muris ; ast impete caeco  
 Educens acies campis commisit apertis.  
 Nec mora ; ceu tenuis pulvis seu stramina rapta  
 Vento , romani metuendos exulis ante  
 Arcus diffugiunt acies , et vectibus aeris  
 Et portis fractis panduntur moenia ; tamquam  
 Vis tempestatis ruit ille rugitque tenetque  
 Praedam. Sed Moenas setina egressus ab arce  
 Moenia vectus equo volucris ardeatina petebat ,  
 Cujus non tantum torquebant vulnera pectus ,  
 Quantum Marciadis magni discessus amarus.  
 Vix notos autem vultus et pallida fuso  
 Sanguine viderunt custodes liminis ora ,  
 Antevolant summo ductori fausta ferentes.  
 Forte recensebat gnavus cujusque manipuli  
 Tum Veturiades numerum. Vix auribus haurit  
 Dilecti reditum Moenae , mox cuncta relinquit ;  
 Igne micant oculi , tremit artus ; fortius urget  
 Pectora cor laetum. Occurrens Volscum Rutulumque  
 Densa inter , voces et palmas tendit amico  
 Vix portam ingresso ; gaudetque videre serena

Illius e fronte erumpens fideique speique  
 Lumen, et ex oculis robur mentemque sagacem;  
 Aspicit intrepidum pectus dextramque benignam,  
 Quae toties Cajum hostili a cuspide textit.  
 Haec Veturiades memori sub pectore versat,  
 Luminibus Moenam tacitis totumque pererrat.  
 Tum lentis vadunt cum turba passibus ambo;  
 Hinc atque hinc tollunt palmas magnoque salutant  
 Agmina Volscorum sonitu, plauditque tubarum  
 Clangor. Dilectum celsas comitatur ad arces,  
 Inceditque pio Moenam prope Marcius ore  
 Multa rogans. Laeta vix vulneris ora coire  
 Aure capit, tendit memores ad sidera palmas;  
 Tum snperum regi media testudine templi  
 Stipatus turbis aris imponit honorem,  
 Et meritas reddit Moena pro sospite grates;  
 Volscorum vires hinc copia recreat escae  
 Et somni munus. Nondum praenuncia solis  
 Stella renidebat caelo; sed castra pererrat  
 Voce vocans celeransque egressum Marcius; arcet  
 Impiger et repetens, effuso sanguine Moenam  
 Orat adhuc fractum, domita consistat in urbe.  
 Terrores inter belli sed relinquere carum  
 Marciadem Moenas constanti denegat ore,  
 Laetus, quod multa rursus vi torqueat hastam,  
 Utque ducem servet, praeclarae occurrere morti  
 Possit; primus equi ac tergo consueta reponit  
 Membra manu saevas hastas atque aegida stringens.  
 Tum Cajus stimulos Volscum sub pectore versat  
 Ad magnos nisus, ad pulchrae praemia famae,  
 Armaque et immensum caepit fervere vulgus.  
 Ac veluti supra densas cum spirat aristas  
 Euris, sese urgent undanti vertice spicae,  
 Sic tot densa premunt se millia. Clamor ad astra  
 Ac multa pulvis caligine tollitur; aura



Hortatu resonat ; fluitant vexilla notorum  
 Flamine. Continuo metuendo murmure fama  
 In Romae socios a Volsco tela moveri  
 Per Latii volitat campos et pectora turbat.  
 Sed veluti pinus rector stridente procella ,  
 Spem pacis contra patrum sapientia spectat  
 Surgentes fluctus , quo latius arma triumphant  
 Marciadis , majorque malis superaddere curat  
 Vim domitis nondum sociis ; hinc moenia linquunt  
 Purpurei cristis equites mandata ferentes ,  
 Ut si quae Volscum tempestas fulminet armis  
 Oppida , vicinum concurrat protinus agmen ,  
 Erigat atque animos , hostes ac opprimat ; euri  
 Ast vis discerpit vacuas mandata per auras.

Haec inter socios hortatus ad apta paranda  
 Instrumenta , quibus frangantur moenia Romae ,  
 Dux educebat castrorum limine turbas  
 Fabrorum cuneos Ufens nitidamque bipennem  
 Tollentes humeris , et circum mille septas ;  
 Inconcinna caunt festiva carmina voce  
 Agmina , dum properant ad densos arbore lucos  
 Albae. Producens Martis mons usibus aptum  
 Multum silvarum vicinis vertice supra est  
 Clivis ; piscosi radices profluit unda  
 Stagni ; foecundum quondam latus Alba premebat ,  
 Ausa trium fratrum gladiis imponere Romae  
 Leges ; Albanus quare collisque lacusque.  
 Ecce autem Volscus resonantis turbinis instar  
 Invadit vastam silvam lucosque silentes ;  
 Jam sese verbis hortantur ; fulgurat alta  
 Horrendumque sonat recidens impacta bipennis ,  
 Terra tremit ; saliunt hinc illinc fragmina ad auras.  
 Ingeminant ictus ; arbos haec vertice nutat ,  
 Extremumque gemit ; collapsa repente ruinam  
 Cum sonitu illa trahit ; malecautus pallidus ore

Vix refugit sector ; ceu vasta mole gigantes  
 Procumbunt quercus annosae , fraxinus alta ,  
 Castaneae , nodosa ilex , et nigra cupressus.  
 Instat dux acer celerans , et saepe micantem  
 Ipse manu vibrans in robora dura securim.  
 Hinc cuneis lignum pars findit ; ab arbore vanos  
 Pars resecat ramos ; alii de montibus altis  
 Devolvunt truncos ; pars tardi tigna trahentis  
 Terga bovis stimulat ; speluncis diffugit alto  
 Bellua pulsa sono , nidum liquere volucres.  
 At celsis praeceps muris egressa tribuni  
 Ira in Marciadem patresque agrestia corda  
 In patriam simulans pietatem accenderat , Albae  
 Vastatumque nemus turbis monstraverat , inter  
 Quas durus Thyrrus , cui late credita campi  
 Posthumio a claro custodia , lumine torvo  
 Spectabat caesos lucos ; nam pectore fervet  
 Urbis amor. Campis vocat hic , et colligit intra  
 Rustica tecta manus , queis sic e corde furorem  
 Conceptum promit : sacros Dis ergo secari  
 Lucos , hisque Urbis patiemur moenia scandi ,  
 Et nostros agros populari ? Bella , rapinae ,  
 Queis hos vastavit tam cultos impius hostis  
 Campos , non explent fera pectora ? Barbarus ergo  
 Confringet nostris portas et moenia Romae  
 Silvis ? Haud equidem , si prisca est pectore virtus ;  
 Ingens discrimen , non parva at gloria ; quisque  
 Tela animumque paret ; moliri et fortia ferre est  
 Romani. Demus , Volscus struat horrida martis  
 Instrumenta trabes jungens ; tuin cuncta repente  
 Nocturnus nostris inmissus devoret ignis  
 Dextris custode occiso ; dux Thyrrus. Habebat  
 Hos vultu accenso , villosus et pectore anhelus  
 Sermones , saevusque suas rapiebat in iras  
 Turbam. Tunc olli tollunt ad sidera dextram ,

Horrisonaque necem voce atque incendia jurant,  
Et limen linquunt, atque arma facesque requirunt,  
Aptaque corde vocant audaci tempora facto.

At Volsci remeant alacres ad castra ferentes  
Silvas. Concurrit confestum turba fabrorum;  
Jam raucum serrae strident, ac ferrea scalpra  
Effodiunt quercus; dextra libratus ab aure  
Malleus infigit clavos et robora jungit.

Vox sonat interea romanis auribus arma  
Volscorum superasse tuos, vetus Ardea, muros  
Et Laurentanas moles veteresque Bovillas,  
Atque tuas, Politori et fortis Aricia, turres  
Dejecisse. Frequens cursus per flexa viarum  
Et coetus varii huc illuc, irataque verba,  
Sublati ad caelos oculi, atque ardentia vota.  
Tum velut unda minax immurmurat ante procellam,  
Romulei sic ira fremens erumpit. Ab ense  
Aeneadum jaceat campis confossus ad unum  
Volscus; cuncta ruant scelerata a culmine tecta;  
Cunctas praedonum jactatus devoret ignis  
Puppis, qui toties juratae foedera pacis  
Frangentes, Latium sociorum sanguine foedant!  
Sed pugnatuos non semper Marte secundo  
Hostes Trojugenum multi spe corda serenant.

At jam murorum pinnae ac tecta videbat  
Adproperans ductor Palmus; jam longus equorum  
Ordo subit portas Anti. Pia lumina tendens  
Illo forte die romanum pulchra puella  
Ad caelum luctu mentem pascebat Amata.  
Namque videre putat dilectum cuspide laesum  
Crudeli juvenem, nec non trepida accipit aure  
Clamores; videt ora modis pallentia miris,  
Atque preces fundit lacrimasque utrique parenti,  
Ut celeret cursus aliquis qui certa reportet  
De sponso; aequales torquebant corda Camillae

Curae; vix etenim stabant in limine portae  
 Ora virum, currens, an dulci tristitia ferrent  
 De nato, tremulis labiis pallensque rogabat;  
 Nec jam cura memor sub nocte recedit ab illis.  
 Cum pius at laetis caelorum rector amara  
 Temperet, ecce statim nubes fugit atra doloris;  
 Undique turba ruens, dorso miratur equorum  
 Ingentes belli praedas; ac ore diserto  
 Donorum pompam fert Tullo Palmus, et orat  
 Classis ut e portu solvat, volitetque per aequor.  
 Continuo resonat festivam fama per urbem  
 Tulliadiis gladium multum sibi laudis adeptum;  
 Numen adesse quidem quod fortia facta gubernet  
 Ductoris summi; nam Volscus ubique triumphat;  
 Tum laetis manibus capiunt insignia dona.  
 Altam cervicem in primis miratur equorum  
 Tullus, et argutum caput et per colla per armos  
 Ludentes crines, ardentia lumina, latum  
 Pectus et incessus altos graviterque sonantes,  
 Auratas phaleras, clypeiue insigne decorum,  
 Et nitidos auro currus, pateramque micantem.  
 Praecipue celsas complet praeclara Camilla  
 Festivo sedes sonitu, et lacrimis rigat ora  
 Accipiens manibus generosae munera prolis,  
 Atque bonis palmas nato pro sospite Divis  
 Atque oculos tollit; fundens et vota calentes  
 Exornare aras solemnuni munere spondet;  
 Ast iterum juvenis claros audire triumphos  
 Poscit et expleri nequit, et per singula volvit  
 Lucentes oculos, spectando atque ardet Amata;  
 Et modo candenti circumdat tortile collo  
 Aurum, nunc humeris peplum suspendit eburnis,  
 Nunc vestes interque manus et brachia versat,  
 Multa super Grajo rogitat, quae passus in armis,  
 Qua vi circumagat gladium, quo torqueat hastam

Turbine ; nunc risus jucundus ab ore sereno ,  
 Nunc lacrimae dulces erumpunt. Tota moveri  
 En populosa viris urbs et loca puppibus apta ,  
 Atque mare , inque viis plaudentis fluctuat agmen  
 Vulgi ; solemnes jam cura instante Senatus  
 Ludi , propitiis et Divis dona parantur.  
 Anti portus erat media munitus in urbe  
 Classibus et lucri spe ductis navibus aptus.  
 Sollertes veluti frigusque famemque timentes  
 Formicae messem populant, tectoque reponunt ,  
 Itque reditque frequens nigri vis agminis agro ;  
 Sic populus fluit , ac refluit , premiturque viro vir ;  
 Urgetur currus curru ; omnis semita fervet.  
 Hic plenas vacuans pinus descendit ab altis  
 Pontibus ; ascendens vacuas gravat ille carinas.  
 Est inter cantus nautarum cernere puppes  
 Ostia linquentes portus , et pondera ferri  
 Enboicis Cumis portantes. Aere gravatae  
 Ast innant aliae pariter vada salsa secantes  
 Gallorum versus Cereri gratasque Lyaeo  
 Oras. Pars ventis expandit vela vocatis  
 Tyrrhenumque fremens , Syrtes , nimbosque lacessit  
 Litora Iberorum versus generosa metallis ,  
 Aut Libyae ripas ardenti sole perustas ,  
 Quas inter gemmae radiant rubrumque corallum ;  
 Et fert loricas , gladios , galeasque comantes ,  
 Hastas , scuta virum , pharetras , alataque tela  
 Miranda perfecta arte et fulgentia longe.  
 Portubus excedunt plures annosa vehentes  
 Robora , flaventes ceras , campique refertos  
 Divitiis saccos ; et pingua rura Panormi ,  
 Aut riguum quaerunt Paestum redolensque rosetis ,  
 Vitibus aut cultas queis floret Massicus oras ,  
 Messanaeve solum reddens cum foenore fruges ,  
 Sive Syracusas foecundaque fontibus arva ;

Nec Scyllae metuunt rabiem scopulosque sonantes ;  
 Has idola gravant , paterae , sacraeque secures ,  
 Et ferro splendens aut aere decora supellex.  
 Multae ad Brundusii , quo desinit itala tellus ,  
 Moles et dives litus moderamina vertunt ,  
 Partenopeve tuos ad laetos messibus agros ,  
 Sardiniaeve sinus , aut Ilvae aut Corsidis actas ,  
 Aut Adriae ad portus ac aequora crebra procellis ,  
 Fictiliumque gerunt genus omne et lucida vasa ,  
 Quae currente rota seu Volscum dextera finxit ,  
 Seu Caeres miris seu Vulcia picta figuris  
 Insignique dabat forma , quibus artibus olim  
 Edocta immensam fundebat Etruria lucem ,  
 Squallida dum reliquas urbes obduceret umbra.  
 Nativos veluti scopulos nidosque columbae  
 Remigio alarum laeto stridore petentes ,  
 Optatos naves portus intrare videres ,  
 Ditibus et Volscis hispana metalla referre ,  
 Illyricasque pices , et dulcia munera bacchi  
 Campano siculoque solo collecta , rubrique  
 Dona freti pictas gemmas , electraque flava ,  
 Ac indos dentes quaesita insignia colli ,  
 Foemineae ac vestis , procerum ornamenta sepulchri.  
 Haec operosa vigil tractat commercia Volscus  
 Oppida divitiis complens ; ex agmine tanto  
 Dumque sibi studiis conversis quisque labore  
 Assiduo indulget , pariter communia miro  
 Ordine quisque parat totius commoda gentis ;  
 Civilis multis constat sic orbibus ingens  
 Machina , quos jungit , versat communis egestas.  
 Vix sonat heic Volscum victoria , litus et unda  
 Laetitia gestit ; Tyrrhenus navita lauri  
 Serta super pinus imponit carmine laudes  
 Volscorum cantans ; malis dependet ab altis  
 Clari Sulmonis monitu , cui classis obedit ,

Vexillum gentis, laetas fluitatque per auras;  
 Festivos cernas omnique ex aede ruentes  
 Cives. Pars oleo exercet labente palaestras;  
 • Nudata in Circo certando ad littora currus  
 Pars agitat, proni dant lora, et verbere torto  
 Instant aurigae, jam humiles, jam surgere ad auras  
 Cernuntur spuma humentes, flatuque sequentum.  
 Cumque hominum mentes descendens lumen ab alto  
 Ducat, ut aeterni rectoris Numen adorent,  
 Exornans merita victricia tempora lauro  
 In primis princeps Tullus conspectus in auro,  
 Augustusque patrum coetus, claroque creati  
 Sanguine, tum vulgi vis sacras tendit ad aedes;  
 Ante vaporatas aras solemnia patri  
 Caelicolum atque hominum sacrantur vota; supremus  
 Ornatus vittis niveaque in veste sacerdos  
 Adest fronte gravis Tullus, tollitque bipennem  
 Fortunae in templo; taurorum sanguine multo  
 Terra madet, muris figunt hostilia signa,  
 Suspenduntque tholis victorum tegmina et hastas.  
 Nec non ingreditur templum pulcherrima nata  
 Anxuris, e pario quo prostat marmore signum  
 Mirandum Veneris; sequitur formosa caterva  
 Cultas tecta comas velis candentibus; illa  
 At pulchras inter, veluti inter sidera luna,  
 Fulget, cui malis addunt oculisque nitorem  
 Gaudia; mirantes submissa haec dicere voce  
 Antiaci inter se procures coepere: puella  
 Pro tali haud mirum quod tanto flagret amore  
 Tulliadi pectus, pulchro quae morte carentes  
 Ore Deas aequat. Succedunt ordine sacris  
 Virgineum portis agmen; manibusque benignae  
 Offert dona Deae sponso pro sospite Amata,  
 Auro contextum peplum, cui mollis acanthus  
 It circum; mites et lotas lacte columbas

Sistunt ante aras, casto tunc ore puellae;  
 Alma Venus, cordi cui pubes, protege nostras  
 Spes juvenum flores saeva inter praelia. Cypri  
 O pia, forinso avertas a corpore Graji  
 Romani telum praedonis, subdit Amata  
 Attollens palmas; haec inter brachia lauro  
 Ornatus redeat sponsus celebretque hymenaeos.  
 Phoebigenae templum ingreditur stipata Camilla  
 Matribus, haud omni depulso e corde timore,  
 Effunditque preces, ut prolis corpore pellat  
 Omnigenas pestes morborum, sistit et olli  
 Festas ante aras gallos cervicibus altis  
 Et bene cristatos pictos caudaque coruscos.  
 Interea egreditur resonis e moenibus urbis  
 Fama recens, campis et sese fundit apertis.  
 Fit strepitus, ludos volscae solatia gentis  
 Instaurant. Cernas e ramis pendula tigna,  
 Quae super impositi correptis funibus acres  
 Se librant juvenes, dumque huc jactantur et illuc  
 Describunt arcus, lunae ceu cornua; laeto  
 Carmine nunc caelum versus tolluntur, ad imum  
 Nunc delabuntur, signantque superba, vel ima  
 Fata hominum; fixo circumstant lumine turbae.  
 Silvanus dives pecoris, qui forte necandos  
 Urbi quaesitas escas adduxerat agnos,  
 Evadit portis remeans ad rustica tecta.  
 Fiscellas gracili et crates texebat hibisco  
 Pars sobolis; pingues sulcabat caetera campos:  
 Linquite cuncta, inquit, laetumque innectite carmen  
 Magnanimo Cajo. Laudes et munera Marci  
 Tum memorat, laetoque prior sic incipit ore:  
 Ut collis prato decori est, ut collibus arbos,  
 Tu decus his campis; caperet te haec ora priusquam,  
 Infelix lolium, sterilis surgebat avena;  
 Pro cerere in sulcis crescebat carduus horrens;



Nunc sata laeta caput tollunt, nunc omnia rident;  
Et remeat viridi gaudens Feronia luco.

Hunc omnis chorus, et pueri sic voce sequuntur :

Assurgit viridans inter viburna cupressus,

Atque super pontum se tollit saxea Circes

Rupes, et volscas super urbes moenia surgunt

Antì; sed mage ductorum super agmina fortis

Assurgis, Marci; Volscùm jam litora curva,

Murmure jam rigui fontes, jam concava saxa,

Ille Deus nobis, ipsa haec arbusta susurrant.

En tibi, Silvanus subdit, duo pinguis olivi

Pocula, bina feram lactis, niveosque quotannis

Agnos, et violis, et purpureis narcissis,

Atque rosae laurique ornabo frondibus aras;

Cantabunt mihi pastores et Silvia conjux,

Ad numerum salient puerique levesque puellae,

Atque sonum pulsae referent ad litora valles.

Felices Antì resonant his plausibus agri;

Nec minus exsultant acies, quae moenia Volscùm

Servant, Marciadis virtutem et gesta canentes,

Qui spatia exsuperat paucis emensa diebus,

Quae minime saeculis alter percurreret heros;

Jamque efferre pedes ardent ex arcibus, inter

Et belli fluctus laudis pervadere portus

Sub duce praeclaro. Sed jam redolentibus herbis

Repletae pecudes remeant ad ovilia; laeto

Mugituque boves intrant praesepta; namque

Occiduus campis suadet discedere vesper.

Ecce autem revocat clusino a litore gressus

Ad patrias Clytiis sedes, responsaque regis

Haud optata refert: felices divite ponto,

Rex ait, o gentes, felices ubere campo,

Foedus amicitiae tuscas vetus alligat urbes

Cum Volscis; nobis ac nil antiquius, ambos

Ut nexus populos constringeret arctior. Et nos

Aspiciamus, quantum formidinis excitet aucta  
 Vis Urbis sese circumfundentis, ut ignis;  
 Atque volens vestris Etruria jungeret arma  
 Ad restinguendas flammās. Sed maxima regum  
 Cura bonum commune vetat, nos ferre cohortes  
 Regni extra fines. Bis inclementia Divum  
 Tuscos confregit gladios, Urbanique superbo  
 Servius intravit curru. Sat caedis acerbae,  
 Cum pro Tarquiniis male provida sumpsimus arma,  
 Pertulimus. Potior multis pax una triumphis  
 Nunc beat hos populos; immensas divite cornu  
 Atque heic fundit opes; dudum commercia florent  
 Atque artes. Belli tamen haud abjecimus omnem  
 Curam; nam pubis vires atque arma paramus;  
 Et si quis clausos muris invadere ferro  
 Audeat, insurget tunc omnis Tuscia in armis.  
 Jam vero haud nostro Volscum gens indiget ense;  
 Sunt satis, ut lauros martis decerpat in arvo,  
 Et propriae et socium vires et dextera Marci  
 Qui magnae Hesperiae caelis effulget ut astrum.  
 Quare agite, o lecti juvenes, incumbite totis  
 Viribus ad pugnās inceptas omine laeto.  
 Interea sacros aris imponimus ignes,  
 Ut nunquam verso volscas sors aspera vultu  
 Perturbet gentes, quarum victricia signa  
 Vix capitulinis cernemus in arcibus, arnis  
 Tollemus volscis plausus, et dona feremus.  
 Quod regis votum, quae sit sententia bello,  
 Optime dux, audis. Clytius dedit ore loquendi  
 Finem. Diversis agitantur pectora patrum  
 Motibus, et vertens huc illuc lumina ductor  
 Contrahit his frontem, nec fert responsa; sed urget  
 Res belli, atque novam pubem legit; instat, ut armis  
 Quamprimum volucris velis rostrisque paretur  
 Classis, fluctivagasque Tibris mittatur ad oras

Ad Veturiadis monitus. Rapiebat at ille  
 Ad debellandas urbes, ad pulchra pericla  
 Impiger armatam pubem; Volscùmque catervas  
 Accelerare gradum jam viderat omine fausto  
 Tusculi et Albani frondoso vertice collis;  
 Fulgentes armis pedites equitesque superbi  
 Transierant resonas undas et stagna Numici,  
 Et laurentanos nigrantes ilice lucos;  
 Cum ducis ad nutus acies sub moenibus altis  
 Lavini frenat gressus, quod caetera supra  
 Oppida fraterno complectebatur amore  
 Roma, quod et supra reliquos collegerat arma  
 In Volscùm populos, arcesque adjecerat urbi.  
 Ecce autem laetus sese referebat ab Anti  
 Moenibus enarrans solemnia munera templis  
 Oblata, et ludos et volscae gaudia gentis  
 Ob domitos Palmus populos. Tum talia laetus  
 Marciadi: clari nunc tu responsa reposcis,  
 Optime dux, Tulli. Praedas et munera postquam  
 Obtulimus, mitti classem, citiusque docemus  
 Romulidis claudi pontum; sic ille sereno  
 Reddidit auditis: quis digne tollat ad astra  
 Curas Marciadis generosas? Nuncius ergo  
 Laetitiae propera, classem jam poscere ventos,  
 Sulmonemque ducem verbis accendere martem,  
 Res belli reliquas laeto procedere cursu.  
 Vix ea dux Palmus: Volscùm fortuna secundat,  
 Armipotens clamat Cajus, laetasque cohortes  
 Extollunt voces, Lavini et praelia poscunt.



## LIBER QUINTUS

## A R G U M E N T U M

*Lavinii expugnatio describitur, qua caeditur Grajus. Aequorum adventus in Volscorum auxilium. Tullus novas copias colligit ad subitas belli necessitates. Sulmo classis praefectus solvit, sed quassatae procella naves refugiunt ad portus, ut reficiantur. Anagnini rennunt foedus cum Volscis inire. Romae patres aliam legationem animo volentes, prius Appium ire jubent domum Coriolani, ut ejus consilia e matre et e conjuge exploret; sed ob dicti imprudentiam Appius objuratus a Veturia dimittitur. Superatur a Marcio Coriolum, Polusca, et Longula, in qua vulneratur Pomponius. Elpenor occisurus Pomponii filiam cohibetur a Marcio, a quo Pomponius cum uxore et natu Romam honorifice redditur. Romae populus excipit cum plausu Pomponium; sed conturbatur novis Volscorum victoriis, et efflugitat ut Coriolanus revocetur; obstat autem Senatus.*

**L**audata antiquis factis atque ubere glebae  
 Magna parens Albae ac Romae, regina latini  
 Nominis, excisa quam Troja struxerat ingens  
 Aeneas. tusco non longe a litore surgit  
 Graminei urbs medio collis. Lavinia conjux  
 Dardaniidis dederat nomen. Servire togatae  
 Urbs rennens Romae arreptis praefecerat armis  
 Vecilium Spurium; sed ferro victa Quiritum  
 Pro Roma stabat constans. Hanc turribus altis,  
 Praesidiis, vallis Albinus strenua proles  
 Urbis munierat. Vix hostis proxima vidit  
 Signa, alacer lecto erupit dux milite portis  
 Conseruitque manus. Intento lumine turba  
 Spectabat pgnas clivorum summa coronans,

Et quassabantur diverso pectora motu ;  
 Sed nil Marciadis virtuti restitit ; ingens  
 Vis Volscùm vallum superaverat ; hostis at acer  
 Fixit ubi primum plantas , ibi quisque jacebat  
 Nobile démonstrans acceptum pectore vulnus ,  
 Iraque pallenti spirabat militis ore :  
 Progressas inter turbas primosque maniplos  
 Exanimis cecidere duces ; vix limina pauci  
 Cum duce magnanimo calcantes cardine verso  
 Aeratas portas claudebant. Caerula vento  
 Ceu spumant , vastique ruunt ad litora fluctus ,  
 Marciadis nutu in muros sic agmine denso  
 Praecipitant Volsci docti fallente sagitta  
 Italus , et Palmus , lethali cuspidae saevi  
 Elpenor , Frento , nec non Mariusque Corasque.  
 Insilit hinc ferrum , ceu grando corruiat illinc ;  
 Volscæ caede solum tegitur , rivisque cruentis  
 Moenia Lavini tinguntur. Nullus ad auras  
 Arcitenens vanas contorquet spicula volscus ;  
 Fertque Dolon scalas humeris , et moenibus altis  
 Inclinat primus ; sed saxum decidit ingens  
 Pars montis , socios magna dum voce vocabat ,  
 Et confringuntur scalarum robora , ductor  
 Vix manet illaesus. Scandendi moenia primus  
 Optans Frento decus gradibus jam nititur ; hostes  
 Sed longis arcent hastis sudibusque praeustis.  
 Omnibus armipotens ad limina viribus instat  
 Marcus , et scuto circumdans tela retundit  
 Moenas , ne caros aliquod super irruat artus :  
 Marciades Volususque ruunt mucrone cruento  
 In fractas primi perrupto limine portas ,  
 Et primos sternunt transfixo corde ; secutus  
 Umbro veliternus turmas vocat , urget , et altus  
 Caedit equo pedites , rupto velut aggere torrens.  
 Hinc atque hinc secum vortex peditesque equitesque

Volvit et abscondit ; sese turba impedit , urget  
 Angustas inter fauces ; gravis ungula equorum ,  
 Turbaque confundit lapsos ; capita alta frequentes  
 Quadrupedes tollunt , laniant peditesque cruento  
 Vicinos ore , et captant vix aera hiantes.

Certatim in Volscum mittit gens acta furore  
 Ferventes undas , ingentia robora , saxa ,  
 Hastas , omne genus telorum a culmine tecti.  
 Se lentis Volsci propellunt passibus ; acres  
 Lavini populi nam caeco Marte resistunt.

Fortis at incensus famae majoris amore  
 Evolat ex oculis summi ductoris , et armis  
 Se densis Grajus miscens ad saeva pericla  
 Voce vocat Marium , quem nulla pericula terrent ;  
 Atque rapit scalam qua scandat moenia , densum  
 Fulget ubi ferrum. Securis gressibus alta  
 Ille petit , clypeoque levat , quo protegit ora ,  
 Telorum silvam. Post ipsum pectore firmo  
 Dux graditur Caeni. Manibus sublinis at ille  
 Murorum pinnas jam corripit , oraue vertit  
 Nunc animos addens comiti , nunc territat hostem ;  
 Ac tandem voti compos dans corpore saltum ,  
 Ceu turris , juvenis muri super ardua surgit.  
 Nec mora ; vi fretus medios procurrit in hostes ;  
 Cominus et Tmolum claris prosternit Achatae  
 E natis ortum densas ad moenia turbas  
 Ducentem ; caput in medium cui tela ferenti  
 Hastam defigens crudeli vulnere binas  
 Discidit in partes , percussit cuspide ad ipsum  
 Tempus per galeam praeclaro sanguine Capis  
 Lucam pugnacem ante alios ; cui proscidit ictu  
 Os , et foedavit cerebrum. Dum spicula vibrat  
 Gyges Sergesti genus altum , figit adacta  
 Hasta Tulliades pectus ; cadit ille cruorem  
 Ore vomens ; celsa Mnesthei de stirpe Thoantem ,

Qui crebro jaciens resonanti spicula cornu  
 Magnanimum dictis juvenem irritabat amaris,  
 Ceu turbo invadit metuenda turbidus hasta,  
 Ventris et in medio telum configit acutum;  
 Hasta gravis dorsum trajecta cuspide ad imum  
 Exiit; ille animam exhalans immugiit, altum  
 Taurus ut immugit. Formoso corpore clarum  
 Ex atavo Ilioneo transfigens ilia ferro  
 Dejicit Herminium; succiso poplite Buten,  
 Rhamnetem, Fadum, Clytium, Rhoetumque, Remumque;  
 His addit Clonium et praedurum viribus Orsen.  
 Non minus ense ferit dux Caeni; Therea caedit,  
 Harpalicum, Lirim, Pegasus; prosternit Amastrum,  
 Hipptaden, Tanaim, Messapum. Terga pavore  
 Correpti vertunt hostes, quos vulnere constans  
 Infesto insequitur juvenis; cum lumina Cajus  
 Convertens frustra absentem cognovit amicum;  
 Auxilio fortemque Coram Anthaeumque remittit,  
 Qui juvenem florem dura intra praelia quaerant,  
 Atque suam curam, Volscorum, spemque parentum  
 Exitio servant. Olli per saeva pericli  
 Sollicito circum volventes lumina corde  
 Accelerant gressus, tandemque micantia Graji  
 Arma, jubar cernunt, cui nondum cesserat hostis:  
 Voce vocant; notos sonitus vix accipit aure,  
 Volscaque tela videt, gaudens ire obviis ollis  
 Nititur, atque viam ferro sibi pandere Grajus.  
 At contra densas impar consistere turnas  
 Ad terram Anthaeus procumbit pondere vasto,  
 Hostilesque Coras gladio vix continet iras.  
 Dat gemitum Grajus generosus, et irruit armis  
 Pro cano capite in medios. Ceu fulmen ab atris  
 Si ruat in praeceps nimbis, ubi cogitur agmen,  
 Desiliens ignis remeans hos sternit et illos,  
 Et quos non tangit flammis, hos fulgure terret;

Sic quocumque gradus convertit strenuus ense  
 Fulmineo juvenis, lethali vulnere pectus,  
 Ilia, vel jugulum figit. Bisdena virorum  
 Incursu primo prostravit corpora, plures  
 Fulgore armorum convertere terga coegit.  
 At proles Romae Albinus licet omnia versa  
 In pejus videat, non se certamine duro  
 Pro patria retrahit; memor et virtutis avitae  
 Obvius et multa Volscorum caede cruentus  
 Procurrit forti Grajo; desistere pugna  
 Praecipit hinc sociis, qui cedunt aequore. Tulli  
 Tum constans proles ingentem vertit in hostem  
 Iras, laudari cupiens aut sanguine parta  
 Palma, vel claro letho; simul arma movere  
 Incipiunt acres socii Mariusque, Corasque,  
 Anthaeusque, solo qui tandem erexerat artus,  
 Pro juvenis vita trepidi, licet ipse recuset  
 Illorum generosus opem. Romanus in omnes  
 Cunctatur ductor partes; et lumina, dextram,  
 Atque pedem cautum movet; et nunc protegit artus  
 Opposito scuto, subitos nunc dirigit ictus  
 Hostibus infestis, mittit ceu fulgura crebra  
 Huc illuc ventis nubes commota; Coramque  
 Dejicit ad terram transfixo pectore; fortis  
 Ilia sed Marii lethali cuspide figit,  
 Hic autem captans vix auras pectore: laeti  
 Pro patria morimur; nostros tu protege natos,  
 Inclyte dux: fatus vitam cum sanguine fundit.  
 His ardet pietas subitoque extinguitur intus  
 Cor Graji; sensus haud istos tempora poscunt.  
 Quid juvenis, seniorque fero in discrimine? Constans  
 Pro capite incano Grajus, pro sospite Grajo  
 Fulminat Anthaeus; pulcherrima pugna resurgit  
 Summis digna viris. Laceros jam vulnere monstrat  
 Artus Romanus; sed vires vulnere sumit,



Fortius ut quercus ramis orbata resistit  
 Euris. Ast alibi confligens Marcius acer  
 Turbato oculos fert circum multa requirens  
 De cari fato juvenis; cor pectora pulsat  
 Valdius, ut genitoris amor circumvolat, ora  
 Nati inter caedes quaerens. Hostilis at olli  
 Obvius it cuneus, qui cernens omnia versa  
 In pejus, vanas iras deponit et enses  
 Ante pedes Marci; veniam quibus ille rogatus  
 Donat; ubinam Tulliades, tum protinus infit,  
 Grajus ubi? Moestus dudum vestigo. Ferocem  
 At volsca referunt Albinum cuspide stratum  
 Ante fores arcis, socio sed milite tectum  
 Victorem Grajum. Laeto tum lumine ad arcem  
 Dux celerat gressus, atque eminus aspicit hastis  
 Immotis turbam, neque percutit amplius aures  
 Armarum strepitus, gaudensque salutat amica  
 Voce procul Grajum. Noto se dividit agmen  
 Clamori, atque imo gemitus dat pectore; sed quem  
 Dux Veturiades virtutis lumine clarum  
 Dilexit, patrum pietas quem credidit ipsi,  
 Quem ductor toties hostili a cuspide texit,  
 Heu dolor! heu pietas! perfusum sanguine Grajum,  
 Cui furor Albini violarat mollia ferro  
 Pectora, pallentem vicina in morte tuetur:  
 Grai! dux celerans, Grai! pius inquit; at acer  
 Fusus humo juvenis, dextramque oculosque gravatos  
 Marciadi vix extollens et pectore anhelos:  
 Sat famae vixi; lacrimas absterge parentum;  
 Tu miseris Grajus; solare invicte relictam...  
 Coepit Ama emoriens, valuit neque dicere Amatam.  
 Eduxit gemitus imo de pectore ductor:  
 Non mortis durae casum, tuaque optima facta,  
 Non equidem, nec te, juvenis memorande, silebit  
 Ulla aetas. Alio tum praecipit ipse vocatus

Reliquias juvenis miseras ad tecta referri.  
 Surgebat plateis mediis e marmore vastum  
 Fulcrum, cui tuscus conflata ex aere corusco  
 Mira opifex arte imposuit tria signa ferarum.  
 Dentibus exertis paleas et pabula flammae  
 Fert lupus inmanis; volucris saturnia pennas  
 Desuper exagitans optatos suscitatur ignes,  
 Quos mixtos fumo exsultans erumpere spectat.  
 At vulpes caudam quatens, qua spargitur unda,  
 Nititur incassum miras restinguere flammās.  
 Haec portenta ferunt tacitis spectata tenebris,  
 Dum divum jussis Aeneas conderet arces  
 Lavini, solido signata fuisse metallo,  
 Arteque mirifica saeculis monstrata futuris.  
 Jamque ferox miles statuas a sedibus imis  
 Vellens ad terras urgebat. Maximus armis  
 Opportunus adest Cajus: jam parcite signis;  
 Quis furor? exclamat; terrorum et caedis abunde est.  
 Se vertens alio tum dissipat agmen avarum,  
 Quod Collatini fodiebat saxa sepulchri,  
 Ut mos victori priscam servarier aram  
 Et jubet incolumem, patriis qua sacra ferebant  
 Romani reges divis. Hinc limina scandit,  
 Corpus ubi juvenis praeclari moesta caterva  
 Atque manus famulum servabat, et ingemit alte  
 In niveo gremio contemplanus vulnus apertum,  
 Et fatur lacrimans: non haec promissa dedisti  
 Discedens patri; nam cinctum tempora lauro  
 Ille revisurum te patria limina laetum  
 Sperabat; tales spes ipseque corde fovebam.  
 At modo Romulidum percussus cuspide dira,  
 Qui vincla Ausoniae nectunt, miserande, peremptus  
 Ecce jaces; valuit neque te mea dextera tectum  
 Incolumem servare patri. Sed turba inimica  
 Urbibus Italiae, quae terram dente petivit

Armis caesa tuis, etiam sub tartara nigra  
 Est meritas scelerum poenas sine fine datura.  
 At te qui victor clausisti lumina morti,  
 Qui jura Ausoniae tutari sanguine gaudes,  
 Te placidae capiunt sedes, et regna piorum;  
 Est data vita brevis, bene clausae at maxima vitae  
 Munera, lux jugis, pax summa, aeterna voluptas.  
 Haec pius immiscens verbis suspiria fatur  
 Dux Veturiades; tum mandat ut auctus honore  
 Tulliaes moestam patris referatur ad urbem;  
 Setinusque senex totoque ex agmine lecti  
 Mille viri moesto comitentur funera vultu,  
 Factaque magnanimi juvenis memoranda renarrent,  
 Et Veturiadis nisus, averteret omnem  
 Illius ut membris pestem; pugnasse sed atri  
 Vim fati edoceant, et fletu flentibus adsint,  
 Ingentesque levent paullum sic corde dolores.  
 Omni perfunctus pietatis munere demum  
 Victorum fessas vocat ad convivia turbas  
 In plateis mediis. At fuis artubus olli  
 Ad terram Cereris donis, et carnibus assis  
 Taurorum ventrem distendunt; munere Bacchi  
 Tum revocant vires. Sed postquam mensa remota est,  
 Amisum juvenem et socios sermone queruntur,  
 Ac demum sero dant lumina victa sopori.  
 At Veturiades moerens non attigit escam,  
 Haud stillam libavit aquae, dulcisque Lyaei,  
 Haud ullam coepit requiem, totamque gemendo  
 Traduxit noctem, secum crudelia fata  
 Deplorans juvenis, quem non virtutis egentem  
 Sors rapuit Volscis et funere mersit acerbo.  
 Titanis nondum croceo velamine fulgens  
 Mortales miseros ad taedia longa laboris  
 Excierat; pagis cum se referebat ab Aequis  
 Qui magnam capiunt gentem belloque ferocem

Legatus Tulli pulsata ad limina laetus ,  
 Moenibus et volscis sociam ducebat ovantem  
 Pubem , quae famae et praedae spe culmina linquit.  
 Silvosae Trehae , gelidis qua vitreus undis  
 Jucundos Anio pisces alit. Inde sequuntur  
 Qui colles habitant et saxa minantia caelo  
 Cliterni atque Volae , quosque armis frigida cingit  
 Carseolis tellus , odit quam Palladis arbos.  
 Vos quoque misistis fortes in bella maniplos ,  
 Simbrivii montes foecundaque fontibus arva  
 Ad resonas Anienis aquas. Formosus in armis  
 Aequicolus ducit sexcentum robora pubis ,  
 Et magno pedites animo , qui caede ferarum  
 Praestant , armatique exercent arva bidente ;  
 Hi rectum servant ; ex his fecialia jura ,  
 Pacis et armorum leges acceperat aequas  
 Quartus Romulidum rex. Fulva pelle luporum  
 Aut ursi induti villosa tegmine longa  
 Hirsuto lateri gestant venabula ; acuta  
 Hasta manus armat ; humeris stat dura bipennis.  
 Intulit ut gressus Aequorum ductor in altas  
 Volscorum patris sedes , haec libera verba  
 Militis effudit de more ; est volscus et aequus ,  
 Romulidum cordi qui semper vertitur , ensis ;  
 Namque pari fertur Romani pectus amore  
 In paupertates imas , gazasque superbas ;  
 Vexat avaritia turpi ditissima regna ,  
 Pauperiem duro imperio ; gens jugiter usta  
 Famae aurique siti , ingenio crudeliter utens  
 Destruit Ausoniae populos artesque colendi  
 Arva , gubernandique irata per aequora pinus ,  
 Destruit et mores florentes pacis ad umbram.  
 Adsumus en justas ad pugnas ; nulla laborum  
 Terrebit facies suetos. Ast agmina lecta  
 Aequorum tutis ne claudas arcibus , oro.

Deses praesidium , claro mox mitte pericli  
 Et famae in partem sub Cajo. Talibus ingens  
 Obstupuit Tullus , tum laude ad sidera tollit  
 Magnanimos sensus , luctusque ignarus acerbi  
 Infelix nato monitus , et munera mittit ,  
 Et jubet Aequorum turbas accumbere mensis ;  
 Ast avidas dexteras optatam tendere ad escam ,  
 Et crepitare olli malis ; tum laudis amore ,  
 Haud mora , succensi signis armisque levatis  
 Corripuere viam ducis ad tentoria magni ,  
 Cujus replebat nomen caelum omne latinum.

Urgendis Tullus bellis haud segnior instat ,  
 Ipsius et cura campo sese arduus infert  
 Bellator densus celsis sub moenibus Anti ;  
 Qui saepe in fictis pugnis exerceat artus ,  
 Ut si Volscorum instabilis fortuna sereno  
 Non faveat vultu , sustentet bella recentis  
 Examen pubis. Positis incudibus enses  
 Horrisonique arcus conflantur , telaque et hastae ,  
 Et pharetrae , et galeae , et clypei , saevaeque secures.  
 Aspiceres Cereris donis heic agmen equorum  
 Scandere circaeos colles , ut moenibus absit  
 Esuries , illic se attollere brachia centum ;  
 Atque fodi fossas antiqui moenia circum  
 Priverni , nitidis Amasenus qua fluit undis ,  
 Rex ubi jura dabat Metabus fortisque Camilla.  
 Pometiae muris certatim ac turribus altis  
 Aptantur pinnae ; declivis Setia firmo  
 Munitur vallo. Huc illuc , quae moenia servant ,  
 Callibus oppositis acies properare videres.  
 Vectantur plaustis immani pondere quercus  
 Tyrrhenunque abies audax visura frementem ,  
 Martia et armatur Coeni ad navalia classis ;  
 Dux alacer Tullus partes versatur in omnes ,  
 Gaudet et hortatur turbas , ut classis ad ora

Tibridis extemplo solvat, nec jussa retardet  
 Praeclari Marci. Jam laetae litora volscae  
 Linquebant pinus, turgebant carbasae vento,  
 Et molita viam pelago volat incita classis.  
 Hinc atque hinc spargunt spumas, radiosque remittunt  
 Sole reperiuncti fluctus; immurmurat unda.  
 Continuo laetus repletas navita baccho  
 Constituit pateras Superis et libat; in orbem  
 Hausta dehinc cyathis tribuit liquentia vina;  
 Festa voce sonat pontus. Stans ductor in alta  
 Puppi protendit turbis ad litora palmas,  
 Inque vicem sese sustollunt brachia mille;  
 Tum vela et mali sensim pinusque recedunt,  
 Et populi intuitu classis se subtrahit. Ecce  
 Ex oculis Volscum solem caelumque serenum  
 Eripiunt nubes, tenebris et pontus inhorret.  
 Immugit ventus; sese mare tollere credas  
 Fluctibus in caelum, in mare sese fundere caelum.  
 Turbinis incassum contra vim brachia tendunt  
 Turbatis oculis, turbatis crinibus euro  
 Nautae, pallentique Deos caelique marisque  
 Ore vocant; frustra sollers moderatur habenas  
 Navarchus; frustra, nunc nunc incumbite remis,  
 Vela negate euris, clamat. Jam puppibus altae  
 Concurrunt puppes; remi franguntur, et undis  
 Jactati feriunt naves; modo versus etrusca  
 Quassatae ventis rapiuntur litora pinus,  
 Sardonium versus modo pontum; has abripit unda  
 Cajetae ad ripas, illae jactantur ad oras  
 Corsidis. Ipse manu valida dux Sulmo rudentes  
 Laxat, vel tendit summo in discrimine, pubis  
 Erigit atque animos spe dulci laudis et auri;  
 Cum ceu mons vastus praeceps a vertice fluctus  
 Clamantemque ducem tegit, ingentemque carinam  
 Qua vehitur; parvo sed temporis intervallo

Ecce resurgit aquis exsultans naufraga puppis ,  
 Nec cessat fortis vires dux addere turbis ,  
 Quae impavidae certant praesentem evadere mortem.  
 Paulatim tandem ventorum praelia cessant ,  
 Sese componunt fluctus , disjectaque classis  
 Aequare convertit proras ad litora volsca ,  
 Atque omnis portu navis se colligit , artus  
 Ut renovans rursus ventis det vela vocatis.

Volscus at Haemonides celsas intraverat arces  
 Urbis anagninae , fulgenti et constitit aula ;  
 Tum patribus claris circumque sedentibus infit :  
 Delecti , quorum manibus sunt hernica fata ,  
 O proceres , Superi vobis natisque remotis  
 Hos miti populos dudum ditione tenere  
 Donent ! Gens orat Volscum , quorum usque fidele  
 Cor vobis , paullum mentes ad seria verba ,  
 Urbis ad ingenium vertatis. Spicula dextra  
 Hunc populum circum spargentem cernitis ipsis  
 In cunis , et vicinas submittere gentes  
 Gaudentem. Pubes insurgit volsca , priusquam  
 Ille solo gradiens caput inter nubila condat ;  
 Hinc Aequi , Ausonidae , Rutuli , populique latini  
 Foedere se jungunt , ne mox hic devoret ignis  
 Hesperiae populos , et demum forsitan orbem.  
 Arrident Superi coeptis , natu munere divum  
 Marcius armipotens , it cuius gloria caelo ,  
 Jam multas urbes prostravit , et impete martis  
 Concutit Aeneadum muros. Jam sorte vocante  
 Quae mens , quae ratio , quatenam prudentia vobis ?  
 Expectare lubet , cum moenia vestra cruentus  
 Romanus scandet ? Jungi nunc foedere tempus ,  
 Nunc quas percipiant Italum gens , tollere voces  
 Mittere nunc acies , argenti auriue talenta ,  
 Nunc Romae fastus et celsos sternere muros  
 Ignibus et jaculis. Fugiens occasio , patres ,

Ni rapiatur, equum peditumque videbitis Urbis  
 Vim dites vestros populantem frugibus agros,  
 Quamprimum septem eversas a culmine turres,  
 Repletos arcus thermasque forumque ruinis;  
 Ereptas gazas, prostratam caede juventam,  
 Virgineasque manus servitum matribus ire  
 Romam; cernetis nullas superesse salutis  
 Spes, ac Oenotriam flentem per saecula victam.  
 Sic ait, et sonuit confusis vocibus aula;  
 Tunc ostro clarus meritis senioque verendus  
 Haec Fabius reddit: proles insignis Aletri  
 Haemonides ductor, patres quos aspicias, astra  
 Sese sublimi tacturos fronte putarent,  
 Jungere si tempus forti deposceret arma  
 Cum Volscis; memori semper sub corde geremus  
 Magnanimos gentis sensus, replemus et usque  
 Ductoris Tulli mentem, clarumque per omnem  
 Ausoniam Caji gladium. Sed nolumus Urbis  
 Iras in nostros muros accendere iniquis  
 Ausis. Non bello violarunt nostra Quirites  
 Oppida, non famae, non campis damna per illos;  
 Nam cur tela manu stringemus crimine nullo  
 Vexati in populum, damni qui sumere poenas  
 Noscit, qui legum libertatisque tremendus  
 Assertor vindex post reges Urbe repulsos  
 Concipit, absolvit, variat, refugitque quietem,  
 Qui a damnis viresque novas animumque resumit?  
 Ne nos ad pugnas igitur compellite, quando  
 Non urgent belli causae, populique saluti est  
 Oppositum bellum. Sinimus tamen, emigret omnis  
 Qui cupiat contra Romam concurrere telis.  
 Nobilis haec fatus Fabius dat munera optima  
 Aeratum clypeum Haemonidi, binosque nitentes  
 Enses Marciadi magno Tulloque ferendos  
 Aurato capulo; atque ducem dimittit honore,



Qui subiens aulam non mollia dicta ferebat  
 Patribus antiacis, aliosque accepit ab illis  
 Legatos eadem populorum verba tulisse.

Ast uti rectorem populi decet usque, Senatus  
 Romae inter belli strepitus, Volscùmque triumphos  
 Immemor haud pugnae conatus dirigit almam  
 Ad pacem, secumque agitat sub corde profundo  
 Insignes pietate viros, fandique peritos  
 Legare. At tecti scrutando pectora Marci  
 Convertit primum mentem; tum mittitur acer  
 Appius ingenio venerandae ad tecta parentis  
 Marciadis. Patriae tunc perturbata severis  
 Fatis demulcens longas Veturia curas  
 Forte renarrabat virtutem et gesta Quiritum,  
 Et dulcis patriae sensim inspirabat amorem  
 Intentis Marci pueris. Cum constitit ante  
 Illam turbatis oculis, et saeva sabinus  
 Fata pater pingens longos dat pectore questus,  
 Et stimulos matri subdit, contendat ad agmen  
 Nuncius ut volscum cursu, referatque parenti  
 Verba ducis; patrum necnon exorat et instat  
 Nomine. Tentari breviter Veturia vanis  
 Nisibus haec fatur; terrae tum lumina figit.  
 At cui longa fides dat multa et libera verba,  
 Illius inflammans animos hortatur, inustam  
 Deleat ut domui labem, nimiumque saluti  
 Prospiciens patriae male cauto protulit ore:  
 O si quo fato mortis revocatus ab umbris  
 Surgeret heic ingens Numa, clara e stirpe nepotem  
 In feritate ducis nosset? Caput erigit illa  
 His accensa super; tum flammea lumina torquens,  
 Si Numa, respondet, stygiis revocatus ab umbris  
 Surgeret, iste nepos non ornaretur honore  
 Consulis; an saevas imbellis dextra secures  
 Stringeret? Iste nepos socios si fulminat armis,


Impulit anne parens? Vos vos traxistis atroci  
 Invidia; fortem patria pietate calentem,  
 Assiduo belli duratum membra labore,  
 Donantem praedas etruscas, volsca, latina,  
 Aequa trophaea suis, reverentem jura Senatus,  
 Non auri ingluvie caecaque libidine victum,  
 Nullis insidiis doctum, non jussa deorum  
 Spernentem patriae peperit Veturia, talem  
 Instituitque virum. Tunc mulcens Appius iras  
 Cincta duci memorat civili tempora quercu,  
 Donatum forti Coriollae nomen ab Urbe.  
 Acrius insurgens contendit at illa relictum  
 Plebejis odiis natum, clarumque latronis  
 More ducem tractum tarpeiae ad culmina cautis;  
 Tum demum patria pulsum, sanctissima jura  
 Polluta. Haec contra nil Appius hiscere; limen  
 Et tacito transit gressu Capitolia scandens,  
 Ut rigidae referat matris responsa, rogetque  
 Qua patrios muros haud sternat saeva procella.  
 Ast intenta sono Marci pulcherrima conjux  
 Iratas tacito versat sub pectore voces,  
 Quas contra natum Veturia jecerat ante,  
 Et cum prolatis pro nato comparat, uno  
 Haeret et obtutu; tum nequid triste lateret  
 Ambages inter trepidans sic ora resolvit;  
 Et quaerit curnam rapiatur motibus idem  
 Oppositis animus, saeva nunc ferbeat ira,  
 Acriter et Marci patronos increpet; adstans  
 Pro forti nato nunc miro flagret amore.  
 Tum tumida ex ira generosae corda residunt  
 Socrus: quae poscis, paucis adverte docebo,  
 Haec nurui reddens curas e pectore vellit;  
 Non ita, non equidem mutatur, ut axe Diana,  
 Hic animus. Natum si spectem cuspide versa  
 In patriam, mea corda fremunt, Romaeque ruenti

In ferrum plaudunt. Audax si lingua reprimat  
 Ob gnati errorem; tunc indignata notari  
 Nostras labe domos, converto dedecus omne  
 In caput incautum, gentique ostendo latinae  
 Me non plebejo concretam sanguine; semper  
 Mater ego Marci, semper Veturia. Quamquam  
 Canities requiem poscat, quassata procellis  
 Fortunae tamen haud iris mens frangitur, aequo  
 Respiciens mortem et vitam discrimine. Fata  
 Vix haec conticuit; fervens at laudis amore  
 Auditos imo volvit sub pectore sensus,  
 An si Marciadi referantur vota parentis,  
 Flectatur natus bellum componere. Tardos  
 Contra indignatur ductor se volvere soles,  
 Et nondum lucere diem, quo fulmine Martis  
 Prosternat clausos romanis moenibus hostes,  
 Ad quos orbandos sociis extrema sequestrae  
 Donec lux pacis surgat, victricibus armis  
 Murorum moles Coriollae cinxerat. Alto  
 Colle sedet latis fossis circumdata, fortis  
 Et virtute virum vetus urbs contermina ad arva  
 Ardeatina; patent spatia ampla et florida prata  
 Circum, cujus arat campos asperrima belli  
 Gens studiis. Laevam Ausoni, qui milite lecto  
 Erupit demens portis, transfixerat hasta,  
 Et jam vagina eductum surgebat in eusem  
 Aequicolus. Flexo ille genu trepidusque gemebat,  
 Tendeatque manus: oro miserere senectae  
 Patris, et infaustis orto spem redde sub astris  
 Unam; magnanimo tibi sat victoria. Volvens  
 Lumina continuit dextram, miseransque jacentem  
 Erexit ductor patri natoque benignus.  
 Marcius ut turbo gladium rotat. Ocyus hostis  
 Terribilem noscit victorem, excussaue corde est  
 Virtus; turbato tremuerunt pectore cuncti;

Nam subit illius metuendae lucis imago ,  
 Cum ferus irrumpens in portas ense cruento  
 Pro Roma pugnans implevit caede plateas  
 Cajus. At arrepto terrorum tempore victor  
 Irruit in portas , atque urbem milite complet.  
 Ocyus hinc belli nubem urget ad arva Poluscae ;  
 Illa quidem pingues pecudes armentaque lacta  
 Enntrit non magna adeo , sed divite gleba  
 Frugiferae Cereri tellus , et amica Lyaeo.  
 Gens monita at fatis Coriollae , mitis olivae  
 Cincta caput ramis accepit limine portae  
 Marciadem gazasque ferens et robora pubis.  
 Magnanimo socios dux inclytus increpat ore ,  
 Et prohibet dedita praedas avertere ab urbe ,  
 Sanguine vel ferrum foedare ; hinc corde benignos  
 Marci animos grato gentes ad sidera tollunt.  
 Nec mora ; volsca tuis adsunt sub moenibus arma ,  
 Longula , nequidquam turres firmumque tuorum  
 Opponens pectus. Pius at de more , priusquam  
 Tela volent , Volscos hortatur : parcite claro  
 Romano socii ; probitas , constantia , virtus  
 Pomponi , uxoris , nataeque hoc postulat. Infit ;  
 Et simul horrendum increpuit tuba ; protinus agmen  
 Irruit in portas. Ruptis ceu nubibus ignis  
 Undique victor ovans diffunditur. Inclytus armis  
 Marciadis voci parens ruit , increpat ultro  
 Aequicolus socios , quorum jam cuspidе fixus  
 In dextri nervis brachii Pomponius ingens  
 Hand poterat tractans ferrum defendere vitam ,  
 Solatusque ducem jubet intra tecta referri ,  
 Stringier abstersum et tolli medicamine vulnus.  
 Interea caeso custode irrupit in arces  
 Turbidus Elpenor. Medio tecti aethere aperto  
 Armisonae signum divae surgebat et ara ;  
 Haec summo copulata duci Tarpeja Minervae

Tendeat miseras voces et lumina, castas  
 Ne violent aedes Volsci, cui nata pudica  
 Juxta aderat, ceu stella micans, curisque levamen;  
 Virtutis tulerat multum generosa paternae  
 Virgo. Sed plenam tota ceu luce Dianam,  
 Ut videt Elpenor flagrans nova lumina formae,  
 Constitit attonitus; tum caeco incensus amore  
 Nititur apprehendens intra penetralia castam  
 Pertrahere; at summa vi nata, parensque resistunt;  
 Et sese major virgo sic impetit hostem:  
 Stricto, Volse, putas ferro expugnare pudorem  
 Virginis Aeneadum? Probrio praeponere mortem  
 Scit virgo Aeneadum. Quae meutem insania versat?  
 His dictis juvenis villosa in pectore fervet  
 Ira; manu rigidum ferrum jam tollit ad auras.  
 At Veturiades, qui Volscum sorte furorem  
 Lenibat dictis, accurrens: quis furor? inquit;  
 Inspice Tarquinius pulsos, in bella ruentes  
 Romulidas, Tuscos, et sparsos caedibus agros  
 Unius ob furias Sexti, qui sanguine poenas  
 Persolvit; pudeat victorem in praelia volscas  
 Ducere te turmas, vincique cupidinis armis.  
 His mentem velans juvenis caligo fugatur;  
 Ora pudor pingit; redit in praecordia virtus.  
 Ast in tecta refert romanum vulnere laesum  
 Ductorem pietas sociorum; et brachia tendens  
 Amplexus conjux, manibusque dat oscula virgo,  
 Fundentes ambo lacrimas. Sed Marcius omnes  
 Solatus tollit patrum nataeque sub astra  
 Virtutem; curru ad patrias perducier aedes  
 Tum jubet, et comites equites persolvere honores  
 Praeclaræ soboli, et patribus. Quae talia postquam  
 Conspexere acies, voces ad sidera tollunt,  
 Justitiamque ducis summi, curamque benignam  
 In miseros plausu, meritis et laudibus oruant.

Tum constans dux arma rapit victricia versus  
Muros, quos inter vitam gens algida ducit.  
Panditur interea Romae pulsata Capena,  
Ingrediturque pater clarus cum conjuge, pulchra  
Et nata; densi patres complexibus haerent  
Ductori, populus quem magna voce salutat;  
Et belli quaerit casus; fert ille Poluscae  
Et Coriollae vim fractam, viresque Lavini,  
Atque tuos frustra pinnatos, Longula, muros  
Non volscas acies frenasse. Exaestuat ira  
Multa movens animus populi; tum murmure vasto  
Ora Fori subiens vocat alta voce Senatum:  
Dele in Marciadem poenas. Ast ille colore  
Obsistit vario votis, renuitque recludi  
Cajo romanas ad vulgi murmura portas;  
Tum Veturiadem concordii voce Tribuni  
Compellant hostem patriae; non esse decorem  
Foedandum Romae, fictas subnectere causas  
Molirique moras, casses ac tendere plebi,  
In quas incurrit citius quia nescia fraudis.



## LIBER SEXTUS

## A R G U M E N T U M

*Amata ob Graji victorias vehementer laetatur. Interea caesi juvenis corpus magno luctu ingreditur Antium, et Amata doloris impatiens sese mergit in mare. Marcius Algido superato laetus agnoscit avunculum Lentulum, et ejus filium; hinc expugnat Corbionem, ubi fulget Moenae, et Aequicoli virtus. Senatus Romae componit seditionem excitam a Tribunis liberans populum ab omni vectigali solvendo belli tempore, mittitque seniores, qui eum leniant; tum legatus Agrippa egreditur ad Tiburtinos rogandos, ut irruant armis in Volscos cum hi Romam oppugnaverint. Sacerdotum legatio Marcio decernitur. Lartius fert sententiam ut Pontifices Marcio mittantur. Agrippa refert Romae patribus Tiburtinorum responsum, non dari sibi facultatem, ut arma distrahant. Noctu Thyrrus invadit castra Volscorum; sed Ufens multis caesis reliquos fugat; hinc belli machinae renovantur. Cajus turmis Umbronis juvatus Tolerium vincit; Aequicolus vero Bolam ingreditur.*

**I**nterea dulcem claudendi pectore flammam  
 Impos, et ob palmas Graji virtute relatas  
 Curva petit gaudens resonantis litora ponti,  
 Virgineosque choros pulcherrima ducit Amata,  
 Et recubans Veneri sacrae sub tegmine myrti  
 Per citharae chordas digitos deflectit eburnos,  
 Dulci concentu ripas atque aethera mulcens;  
 Namque levem dextram errores per mille volutans  
 Ad medium nervos, supra, infra pollice tentat,  
 Indice et obliquat, removet; nunc icta coire  
 Fila jubet; dextram in spiras nunc complicit; arte  
 Nunc mutas haerere fides, nunc flere trementes

Imperat, atque inter vocum discrimina mille,  
 Dulois ego Grajo, teneros dat pectore cantus,  
 Dulcis et ille mihi, quem pascit gloria. Nostri  
 Antiacae Graji palmas resonante puellae,  
 Atque deo similes vultus, et dicite pulchra  
 Arma. Redi. O niveam, poterit quae reddere nobis  
 Te, lucem! Remea; tua vox hac insonet aure;  
 Nam tua vox dulcis, facies et pulchra; redito  
 Hinnuleo similis; volucres mea vota referte  
 Dilecto venti. Sic virgo exhalat amorem,  
 Et citharae sonitus, motus, os, lumina, cantus  
 Laetitias animi referunt, atque illa beata  
 Ceu philomela modos flectit variatque; parentis  
 Atque puellarum pertentant gaudia pectus,  
 Undae auraeque silent. Hinc pulchrae surgere nimphae,  
 Et quaterne alterno pede terram; ut circulus omnes  
 Vertere nunc sese manibus per mutua nexis,  
 Nunc bene sejunctae torto dare corpore motus,  
 Ad numerosque pedes agitare manusque canendo  
 Tulliadi laudes et dulcis nomen Amatae,  
 Conjugiique deum super hos celerare vocando.

Sed jam quae nuper victrici fronde ferebat  
 Praecinctum Grajum, ingentis praenuncia luctus  
 Fama patris matrisque domos et moenia complet;  
 Evolat e tectis mater discissa capillos  
 Exululans, magnisque vias clamoribus implet:  
 Ite mei veniens comitari ac cernere nati  
 Ad tristes corpus portas; properate frequentes  
 Antiaci populi. Quo vos ardebat amore  
 Grajus! Pugnavit, vicit, fuditque cruorem  
 Pro vobis Grajus. Jactabat talia mater;  
 Turba ruit Tullusque pater, facieque tumente  
 A fletu sponsa, heu! sponso viduata! Caterva  
 Moesta ferens Grajum crudeli morte peremptum  
 Jam modicum distat muris. Longo ordine Volsci



Incedunt, truncosque duces hostilibus armis  
 Indutos referunt et equos et tela cruenta,  
 Exuvias belli, loricamque aere rigentem,  
 Quae male protexit pectus, gladiumque fidelem  
 Atque hastam. Sed membra rubro velatus amictu  
 Sublimi formosus adhuc jacet ille feretro.  
 Lucifer ut fulget, quem contegit invida nubes;  
 Ceu frater sequitur germani funus, amaris  
 Sic senior rugosa rigans it fletibus ora  
 Anthaejus. Lugent muri; procuresque gementi  
 Ore vocant Grajum splendorem spemque Senatus;  
 Extinctum versis hastis miles gemit astrum  
 Belli; ceu fratrem rebusque levamen in arctis  
 Plebs juvenem deslet; nec solum personat aura  
 Moestorum genitu, sed torvae vocibus irae,  
 Quod sit Volscorum fortunae in flore juventae  
 Ereptus. Tunsis tum vero ad sidera tollunt  
 Pectoribus gemitum, positum cum triste feretrum  
 Constitit in mediis portis, trepidusque jacentis  
 Ora super nati genitor procumbit et haeret;  
 Hinc via vix voci saevo laxata dolore est:  
 Heu! quantum columen Volscum gens inclyta perdis,  
 Quantum clara domus Tulli! Nil addere cura,  
 Nec dare fert gemitus; obtutu at fixus in uno,  
 Fulmineis tactus ceu flammis attonitus stat;  
 Tum Volscum pietas miserando subtrahit illum  
 Aspectu. At Graji hinc genitrix, hinc dulcis Amata  
 Ingentem certant lacrimis explere dolorem:  
 Nate, tuae requies et dulcis gloria matris,  
 Vulnere nate jaces! Cura et spes una parentum,  
 Atque tuae gentis potuisti relinquere solas?  
 Ne quis ne Romae referat: jacet inclytus armis  
 Grajus; Roma ferox plaudens namque ore maligno  
 Illudet Volsco. Ast imo suspiria Amata  
 Corde trahens, dederasne tuae haec promissa puellae

Grai? Ubi noster amor? Sic ergo taeda jugalis  
 Funeris in flammis versa est? Haec fata loquelam  
 Abrupit, tremnitque, et circum torva retorsit  
 Lumina, si manibus rapiens immittere ferrum,  
 Atque statim tantos possit finire dolores.  
 At canos mater vellens sic ingemit: ergo  
 Haec tibi membra dedi laceranda, o nate, latrone  
 Romuleo? Ignarum cur inter tanta pericla,  
 Cur sine te puerum? Haecne mihi promissa dedisti,  
 Cum tibi tradebam natum, hospes? Limina Tulli  
 Proh! Coriollano nunquam reserata fuissent,  
 Aequoris immensi aut nos secrevisset abyssus!  
 Heu! nimium fidens jacuisti funere acerbo,  
 Infelix fili; extremum nec dicere verbum,  
 Nec matri licuit morientia cernere nati  
 Ora? Nimis vacua importunaque gloria in armis!  
 Finere venales lauri! Vox faucibus haeret  
 Sic fanti; trepidam famulae inter brachia tollunt,  
 Et referunt tecto. Miseris at casibus acta  
 Orat Amata necem, tenditque ad sidera palmas:  
 Summe parens hominum, infandi miserere doloris,  
 Praeclarum munus mihi mors; post funera saltem  
 Aeternum jungar Grajo. Vorat intus obortas  
 Cura ferox lacrimas vocemque. Levare dolorem  
 Solando verbis certant hinc optima mater,  
 Hinc canus genitor, miseramque ad tecta reducunt.  
 Illa solo figens oculos, longumque morata,  
 Multa putat secum servatque silentia; circum  
 Adsunt sollicitae famulae, tristesque parentes,  
 Atque nova tentant evellere corde dolores  
 Arte; nec incassum: non lumina torva videntur,  
 Et lacrimae incipiunt teneris arescere malis,  
 Nec gemitu pectus turget; trepida ora quiescunt;  
 Tum placido demum vultu sic leniter illa:  
 Hinc oro veniam, genitor venerandaque mater,

Cum caelo stellas oriens aurora fugabit ,  
 Linquamus moestas sedes , murosque gementes ,  
 Atque simul campos silvestria tecta petamus.  
 Auribus accipiunt laetis frontesque serenant  
 Auditis omnes , et dantes oscula natae  
 Respondent patres : tu praecipe , nosque sequemur.  
 Tunc virgo : Superi celebrare piacula nuper  
 Hanc dederunt mentem , finemque imponere curis.  
 Quare agite , o famuli ; cras quinas ducite nobis  
 Agnas totque sues , tot nigros terga juvencos ,  
 Quidquid et hisce sacris opus est. Tum cogite coetus  
 Virgineos ripas inter procul urbe remotas ;  
 Tristia namque meo tollens altaria Grajo  
 Purpureos spargam flores , et pocula vini ,  
 Et lac effundam pateris , animamque vocabo  
 Tulliadis magni manesque Acheronte remissos.  
 Sic ait ; accipiunt omnes spem pectore curas  
 Deliciis ruris pellendas , multaque divis  
 Dona vovent , valeat si campis aegra puella ;  
 Et celeres famuli linquentes limina currunt  
 Formosae campis dominae mandata ferentes.  
 Stellata interea nigris invecta quadrigis  
 Nox placida apparet caelo curisque levamen  
 Immittit somnos , urbisque oblita serenat  
 Pectora ; sed Tulli celsas horror tenebrarum  
 Valdius exagitat sedes ; suspiria , luctus  
 Foeminei hinc rumpunt turbantque silentia noctis.  
 Concipiens animo furias at victa dolore  
 Corde feros sensus premit , et spem fronte serenat  
 Et placidis labiis ita fatur Amata : suavis  
 Geu lenis zephyrus , cari vox vestra parentes  
 Jam nostro tumidos animo componere fluctus  
 Coepit , et exoriens sol ( spes mihi certa ) videbit  
 Me penitus laetam moestas adducere pompas  
 Ad campi requiem. Jam nunc requiescere fessam

A fletu sinite, et dulci vos membra levate  
 Somno, cum medium jam nox trajecerit axem  
 Cursu. Sic dicens sese incomitata recepit  
 In penetrale domus. Verbis ac arte puellae  
 Credita res; thalamo deponunt membra parentes  
 Defessi curis, famulorum et fida caterva,  
 Et requiem capiunt. At postquam ingressa cubile est  
 Virgo amens animo, inter tetra silentia noctis  
 Acrius effervent saevae sub pectore curae.  
 Splendorem formae Graji mens vivida pingit,  
 Indomitum robur, palmas, generosaque facta,  
 Et pulchros juvenis mores sine labe, sibique  
 Laetitiâ sine fine canit, si juncta fuisset  
 Virtuti tantae; tum vox horrenda sonare:  
 Te chaos immensum disjungit semper ab illo!  
 Ingemit et palmas tendens ita fatur Amata:  
 Omnes irarum me contra effundis habenas,  
 Juppiter, inque meum curarum depluis imbres.  
 Pectus; me circum stygias lateque silentes  
 Obtendis tenebras rapti mihi lumine Graji,  
 Et sperare vetas ultra. Succumbo juventae  
 Robore succumbo, veluti radicibus arbor  
 Vulsa suis. Cur terrifico me lumine figis,  
 Dentibus atque fremitu? Cur me genitricis ab alvo  
 Traxisti vitam largitus? Nulla furori  
 Nulla tuo requies? Vitam maculavimus anne  
 Aut ego seu justî, qui me genuere parentes,  
 Flagitiis? Aris an non tibi semper honores  
 Impositi? Scelerum callem splendore rosisque  
 Eccur conspergis? . . . Sed quo me caeca furoris  
 Vis rapit? Heu! Caeli non rex, at Roma dolorum  
 Me pelago mergit. Poenas dabis, impia Roma,  
 Quae ferro insequeris volsca sine crimine gentem:  
 Vindictam Graji sanguis deposcit, et ensis  
 Marciadis vacuus vagina fulgurat; Urbis.

Disjectas video moles avulsaque saxa  
 Saxis, et commixto undantem pulvere funum.  
 Sic ait, impatiensque morae procurrit ad arcas,  
 Quae cari exuvias servabant pignus amoris,  
 Purpureisque locat thalamis; hinc denique sponsi  
 Extrahit effigiem gemitus dans corde profundo,  
 Et super incumbens et inhaerens oscula figit;  
 Paulo post surgens, pectus percussa decorum,  
 Flaventesque abscissa comas, fert lumina circum  
 Atque facis reputat nigrantem cernere lucem,  
 Semper sola sibi linqui, semperque videtur  
 Longas incomitata vias percurrere, sponsum  
 Et per speluncas imas perquirere; ponti  
 Murmure mox frenat gemitus, ac arrigit aures,  
 Atque audire putat voces, et verba gementis  
 Graji, pallentes et funere cernere vultus,  
 Nec non vulnus hians gremio. Tum pectus anhelum,  
 Atque horrens crinis, gelidusque it corpore sudor.  
 Virgo domus celsum, quo subter fluctuat aequor,  
 Ascendit culmen furiis incensa, jacitque  
 Has voces: inter tua brachia curro vocata;  
 Semper in Elysiis juncti, semperque beati,  
 Grai, ait; et gressus extremas urget ad oras  
 Tectorum, Grajum labens per inane deorsum,  
 Ah! miserum Grajum vocat os, dum mergitur alto;  
 Grajum flebiliter respondent litora circum.  
 Vocibus at genitrix notis subitoque fragore  
 Artubus intremuit totis, ac territa stratis  
 Prosilit, et gemitum novit praesaga mali mens;  
 Novit et ingemuit cum conjuge protinus Anxur:  
 Heu! tantum luctus jam corde verebar, amores  
 Cernens quos caecos lex nulla regebat! Uterque  
 In conclave ruunt, et Amatae, nomen Amatae  
 Ingeminant. Urbs excitur, plangore parentum  
 Tecta fremunt; moerens concurrit ad aequoris oras

Turba frequens taedis, ac summa prospicit unda  
 Apparere caput carum. Tum remige crebro  
 Circumeunt cymbae, atque pias fortuna coronat  
 Nautarum curas; miseros nam virginis artus  
 Ad litus referunt. Aspectu tollit acutos  
 Turba frequens gemitus: eheu! quam pallida membra!  
 Infelix quonam tua forma recessit Amata!  
 Quo mergis moerore domum! Sed dulce ferentes  
 Ulnis ancillae lacrimosae ad tecta reducunt  
 Pondus, ubi saevit delapsus ad ima parentum  
 Ossa dolor, veluti boreas cum perfurit alto,  
 Miscentur fluctus, nigrae attolluntur arenae.  
 Ast oriens Phoebus spargebat luce dolentem  
 Urbem; mandarat generosae cura Senatus,  
 Divite supremi pompa ferrentur honores  
 Virginis ingrato cineri, belloque potentis  
 Sponsi. Jam subeunt vicino limina portae  
 E saltu muli celeri pede robora dorso  
 Et juvenes humeris ingenti mole gerentes  
 Truncos quisque suum, media jaciuntque platea.  
 Tristis fama volat; vicinis currit et agmen  
 E pagis, Anti subiens quod moenia celsa  
 Laetitiam secum confert urbisque recentes  
 Plausus cum vultu moesto sonituque doloris,  
 Et plorat miserasque vices hominumque labores.  
 Surgit ad astra rogos taedis ac ilice secta  
 Contextus. Funus cyparissi fronde coronant,  
 Intenduntque locum sertis. Fit plangor, inuncta  
 Cum tollunt oleis et flumine lota tepenti  
 Frigida membra toris, pretiosaque tegmina supra  
 Injiciunt, flammis miserandi et funeris arae  
 Aversi subdunt; fuso crateres olivo,  
 Thurea dona, dapes crepitante vorantur ab igne.  
 At gemitum reprimens, ut fortem condecet, astris  
 Fert oculos Tullus, funditque novissima verba:

Salvete aeternum virtutis sede beata  
 Vitae immortales, iterumque iterumque valete !  
 Omnibus ex oculis lacrimarum largior imber  
 Depluit his dictis. Cineres et candida demum  
 Ossa legunt, rubeoque prius conspersa lyaeo  
 Aere cavo condunt. Non longe a littore collis  
 Surgebat campos et late caerula spectans ;  
 Hunc super extollunt ingenti mole sepulchrum  
 Imposito fido gladio galeaque nitenti ,  
 Et super insculpunt candenti marmore verba ,  
 Quae legat attonitus Thyrrenum navita findens ,  
 Ac italas urbes perlustrans advena : Grajus  
 Lavini caesus victor , qui morte hymenaeos  
 Mutavit, saevo mersae moerore sub undis  
 Heic inter lacrimas Volscum conjunctus Amatae.  
 Et jam surgebat tristi caligine Phoebus ,  
 Agminis et ductor linquebat moenia moesta  
 Anthaejus remeans ad pugnas. Inclytus armis  
 Marcius instabat conjunctas foedere Romae  
 Sternendo gentes , et jam deleverat arma  
 Quae tibi suppetias, gens algida, turbine belli  
 Corbio mittebat. Vasti medio aequore campi  
 Se tollit muris turritis algida tellus ,  
 Agricolas cujus delectat in horrea messis  
 Foecundo devecta solo, generosaque Bacchi  
 Munera, et errantes nivei per prata juvenci ;  
 Ipsi ad vicinas agrorum dona ferendo  
 Urbes, aere gravem referunt ad limina dextram,  
 Et toti incumbunt opibus. Vix concutit ergo  
 Armorum turbo muros, dux Mutius ortus  
 Sanguine romuleo socios hortatur, et hastas  
 Fulmineae nubi par vibrans moenia circum  
 Currit, quo irrumpit major vis hostis, et ardet  
 Aut urbem sociam servare, aut fundere vitam.  
 Ast illi, quorum franguntur pectora turpi

Cura aeris, rapiat ne gazas miles avarus,  
 Se hortantur trepidi, ponunt et spicula dextris  
 Linquentes muros, et portas hostibus ultro  
 Pandunt. Indigna haec torvo dux lumine cernit  
 Et clamat: segnes! oculos ad sidera tollens,  
 Horrendumque fremens: rotat attamen acrius ense  
 Nominis Aeneadum memor, et virtutis avitae  
 In densos hostes ingressos moenia; septus  
 Ceu leo venantum turba, quem conscia virtus  
 Terga dare haud patitur, rigidis huic unguibus alvum  
 Dilaniat, jugulum discerpit dentibus illi,  
 Vulnera dant animos. Celerans at Marcus ingens  
 Opportunus adest, prohibetque a caede phalanges,  
 Agnoscitque virum, duris qui rebus amicus  
 Manserat, atque ducem incolumem ad sua tecta remittit.  
 Jam patrium carmen modulans epulisque resecta  
 Algida tecta cohors clypeata reliquerat inter  
 Silvas Corbionis tendens ad moenia. Magno  
 Ecce autem ante ducem Volsci clamore trahebant  
 Captivum claro Fabiae cognomine gentis  
 Gestantem dorso defessum aetate parentem,  
 Quorum majestas sine fastu, atque aspera fata  
 Obsequium mandant animis hostilibus. Acer  
 Cum dulci fuerat juvenis genitore secutus  
 Fratrem, quem pugnis suetum sapientia patrum,  
 Celsa tuis tectis inimica ut pelleret arma,  
 Corbio, praemisit. Vix algida moenia supra  
 Volscorum ille videt signum, victricia tela  
 Versa in Corbionem, saevus circumstetit horror,  
 Obstupet; occurrit cari genitoris imago;  
 Incanum, genibus titubantem, terga recurvum  
 Impositum dorso patrem moenibus effert  
 (Annuat armipotens frater); sed pondera sacra  
 Dum silvis condit, densos incurrit in hostes;  
 Nec sibi, sed patri pavitat. Cum lumina dextramque



Hinc procul intendens : agnosco , Lentulus inquit ,  
 Romanos vultus , optata atque ora nepotis  
 Cernere fas iterum , fas pectore fundere dudum  
 Conceptos sensus ; Erebi nunc laetus ad umbras  
 Descendam. Dictis acies mirantur et haerent ,  
 Et modo defigunt captis , modo lumina Cajo.  
 At Veturiadis pectus pietate repletur ,  
 Et ducis ore gravi jucundum lumen amoris  
 Erumpit ; dextram tendit fitque obviis illis :  
 Non equidem vultus hostiles cernitis , inquit ;  
 Nosco , et complector junctum mihi sanguine utrumque ,  
 Namque , senex generose , tibi Veturia magna  
 Est germana soror. Sed nil his tendere contra  
 Illi ; jamque senex flammantia lumina Romae  
 Vertebat , moestae ceu matri filius. Acer  
 Illius intuitus cito voces audiit imo  
 Pectore dux Volscum , et pietas corda ussit ; at ira  
 Sub specie recti libertatisque latinae  
 Nascentem pressit. Grandaevi hinc ante loquelam  
 Consulto effatur : quo ducunt fata sequamur ,  
 Praecipitate moras. Illis tum munera mandat  
 Arma et equos ferri celerans ad bella cruenta ,  
 Atque sui juris , non laetos corde relinquit.  
 Tum scandit rupes , in quarum vertice surgit  
 Corbio , terra quidem rapidis haud apta quadrigis ,  
 Nec sterilis tamen est ; quamvis ingentia plano  
 Haud pateat per prata solo , cum foenore semen  
 Reddit ; fert Bacchi latices , atque educat altas  
 Silvas et virides dumos , et bobus alendis  
 Aptaque caprigeno pecori est. Gens aspera bello  
 Acriter in Volscum pugnat. Dux doctus in armis  
 Aequicolo et fido Moenae jubet ocyus ire  
 Obscurum silvae per iter , mox moenia celsa  
 Agminibus quater ad boream , postquam ipse manipulis  
 Coepit ad australes oras evertere muros.

Illi alacres properant; hinc fit simul impetus atque hinc;  
 Urbs subito correpta metu jacet horrida Martis  
 Arma manu; portae panduntur; Cajus ovantes  
 Arce acies cogit media, praeclara trophaea,  
 Et gazae ingentes volscas mittuntur ad urbes.  
 Hinc alacer sociis os vertens: fortis adurge  
 Agmen, Frento, tuum, et Volsco Vitellia pandat  
 Portas. Arma Pedum contra fer protinus, acer  
 Silvi, cum reliquis muros pulsabo Labyci.  
 Sic ait; inque suum callem jam quisque volabat.

Ast in lata Fori Cossus, mens truxque tribuni  
 Agmen, cui sociam sese plebs addidit ima  
 E turbis lucrum captans, adduxerat; arma  
 Sublatis manibus poscuntur, limen apertum,  
 Incursus contra Volscos, et praelia campis.  
 Tum vero resonant patrum generosa per Urbem  
 Verba, premat nullum bello flagrante tributum  
 Mavortis populum; patriae nam grande rependit  
 Vectigal natos educens, mente manuque  
 Tecturos olim patriam. Quoque spargitur agmen  
 Ardentes inter turbas aetate verendum,  
 Jucundum plebi placido sic ore locutum:  
 Quae mens, quis furor est, Latii spes una decusque?  
 Vos temere densi patrum, ceu nimbus, in aulam  
 Tollentesque minas? An non est cura Senatus,  
 Quae vos muneribus magnis splendoreque vestit?  
 Amplius haud estis populi flos ille latini,  
 Cujus mira sonat cunctis patientia et altum  
 Consilium terris? Jam saevam ponite mentem,  
 Sit sacra nobilitas, ingentis corporis Urbis  
 Grande caput, commenta rogo memoretis Agrippae;  
 Vos artus patriae; scindit discordia et armat  
 In caput immeritum; felix concordia jungat  
 Artus praeclaro capiti, per saeculaque vivet  
 Patria. Sic senior pars interfusa frementes

Turbas ore refert ; et qua ratione procellam  
 Aethere conglomerat nigranti turbidus auster ,  
 Undique jam tonitru mugit , fulmenque coruscat ,  
 At molli pluma aura volans et flamine leni  
 Pellit aquosam hyemem sensim , et cava nubila caelo ;  
 Haud aliter populos mulcet vultusque serenat  
 Seditione atros constans sapientia patrum ;  
 Tum gressus vertunt tarpeja ad templa Tonantis.  
 Implerant sedes vario sermone serentes  
 Multa inter sese patres ; tum conticet aula ,  
 Nautiacaeque sonant voces , quae pluribus instant  
 Ut citius Romam latialia tela vocentur  
 Quae pellant muris hostem ; primumque catervae  
 Tiburtes , steterunt quae sumptis saepius armis  
 Pro Roma. Clari contra panduntur at ora  
 Posthumii , et patrum quorum cor gloria tangit  
 Urbis ; tum generosa sonant responsa per auras ,  
 Communem matrem sola virtute tuendam  
 Prolis , et ad muros gladios satis esse Quiritum ;  
 In melius dictum convertens Consulis aula  
 Tiburtinorum legatum mittit ad urbem  
 Agrippam clarum bellis ac annulo equestri ,  
 Hortantem , cogant aciem , Volscùmque repente  
 Distractas vires ( si quando turbine belli  
 Invadant Romam ) duplici certamine frangant.  
 Has inter voces incerto lumina corde  
 Circum volvebat Furius , num panderet ora ,  
 Pectore seu tegeret sensus ; at dicere demum  
 Est alternanti potior sententia visa :  
 Quisque oculis lustrat , trepidet quo turbine pulsa  
 Sors Urbis ; quatenam clades foeda ingruat ; instant  
 Moenibus ut Volsci victores. Pellere pestem  
 Non impar populi robur , constantia , qui rex  
 Terrarum nasci legum latorque videtur ;  
 Ast sicut cautes stat contra , propositoque

Haeret, conflictus refugit, voce instat et urget  
 (Has arces clamor circumsonat), lege revisat  
 Clarus ut hos exul muros; vis nulla moveret  
 Hoc animo populum. Sed pars ita murmurat aulae:  
 Pulcher mos veterum nil cedier hoste premente  
 Mandat. Non probro dignos hos ultro fatemur  
 Mores, si pariant iugentia commoda genti,  
 Aut spem non vacuum. Si vero valdius istis  
 Moribus haeremus, multos dominata per annos  
 Urbs antiqua ruet. Gentis jubet illa salutem  
 Lex innata viris, imoque in pectore scripta,  
 Quae regis fastus nocturnaque crimina Sexti  
 Et Metii fraudes damnabat, Roma priusquam  
 Ad poenam raperet; lex a qua jussa Senatus  
 Aut populi nos non solvunt, quae dispare saeclo  
 Sive loco minime mutatur, nescia finis,  
 Sancta, regens hominum genus omne, et filia legis  
 Aeternae, cui non parens se sponte lacescit,  
 Torquebitque suum fraudis mens conscia pectus.  
 Una salus ergo populi spectetur, et aurem  
 Huic legi, excelsi patres, aperite; vetustas  
 Delete exilii leges, et lege recenti  
 Incolumes, fortes, laetos servate Quirites.  
 Ast in patronos populi lethalibus iris,  
 Ac in Marciadem constanti exustus amore  
 Appius: ut saevos noscatis pellere nimbos  
 A Latio, fatur, patres inquirere belli  
 Semina debetis. Jam mentibus ordine facta  
 Si revocare lubet, cunctas cernetis oriri  
 Fraude tribunorum clades. Manavit ab illa  
 Contra Marciadem populi gravis ira tumultus,  
 Insontem patrem rapiens ad limina mortis  
 Tarpejo in saxo; rursus defluxit iisdem  
 Fontibus expellens. Latii lex finibus acrem  
 Ductorem Roma dignum; modo prodit ab illis

Quotidie juvenum crescens audacia, fastus  
 Indociles, animi livor, turbaeque frequentes,  
 Omne nefas demum, ut semper discordia regnet  
 Romae, et pars poscat pacem, pars bella. Profecto  
 Turba tribunorum civilis machina belli  
 Funeribus Latium incestans et luctibus Urbem,  
 Legum contemptrix et patrum; sanguine foedum,  
 Eruptum saevo monstrum furiarum ex antro  
 Incautam sternet quamprimum a culmine Romam.  
 Nam vestrae, patres, mentis sapientia cernit,  
 Non vulgo, at summum donatum a patre deorum  
 Imperium nobis, virtuti praemia praebens  
 Et scelus excrucians poenis et morte coercens;  
 Ex aegris jus non manans mortalibus, alium  
 Qui vitae lumen nequeunt asferre cuiquam;  
 Ast oriens caeli supremo a rege, tributum  
 Principibus patribus, qui mundi fata gubernant,  
 Ad commune bonum; summo quo jure cadente  
 Haud equidem stabunt nec res romana, nec ulla  
 Regna. Tribunatum primo spectastis ab ortu  
 Non ceu tutorem populorum jura tuentem,  
 Non jam versantem curas sub pectore, puri  
 Florescant mores, et pax, ac aurea pacis  
 Munera; perpetuo sed nisu tendere ad unum,  
 In patrum leges ut suscitaret usque tumultus,  
 Non assentantes ut cives funere mergat,  
 Saepius et plateas civili sanguine foedet;  
 Ut demum patribus rapiatur summa potestas,  
 Cum patribusque ruat subito gens romula. Namque  
 Conditor, assertor legum, bellicae magister,  
 Imperiique caput vis est et vita Senatus,  
 Quo jacet extincto corpus civile, resolvit  
 Semet et in partes. Labenti nulla salutis  
 Nulla super patria spes est, nisi munere legis,  
 Quam Romae decus a vobis et vita salusque

Expetit, infandi exilii decreta, tribuni  
 Munus et infaustum tollatis. Lumina figit  
 Ausonia in vobis, austeraque nuncia veri  
 Historia, ut noscat, num vestrum lumine spargat,  
 Umbra seu probri nomen per saecula. Sanctae  
 Eja cito legis resonent oracla per orbem,  
 Insoni patriamque suosque et munera reddant,  
 Infandosque premant hostes, Romanque reservent.  
 Personuit vario sermone his vocibus aula;  
 Talia reddebant hinc ora benigna Minuci,  
 Qui populum patris complectebatur amore:  
 Indignum facinus, patres, auferre tributum  
 Romulidis nuper munus, pacisque recentis  
 Pignus, plebs postquam in montes irata recessit.  
 Insuper Aeneadis haec esset taeda nefasta  
 Funestos pariens ignes. Civilia bella  
 Fors inflammaret: vulgi iracundia forsan,  
 Cum densas poscit patriae defensio turbas,  
 Auderet sacros iterum conscendere colles,  
 Forsan Marciadis, quem reddi clamat in Urbem,  
 Armis romanas auderet pandere portas.  
 Nunc demulcendus, non irritandus ad iram  
 Trojugenum populus. Nec quisquam mente volutet,  
 Armorum volsca ne tempestate ruente  
 Ignavis casus oculis patriaeque ruinam  
 Aspectet. Quando pro Regibus arma superbis  
 Triginta populi sumpserunt, bella refugit  
 Sic pariter vulgus. Sed firmus ad arma rebelles  
 Dictator flexit mentes; concussit et hastam  
 Vix Urbs, omnis eo terrore Etruria primum,  
 Hinc omnes trepidi vertebant terga Sabini.  
 Quidve dies memorem, quando simul omne tumultu  
 Infremuit nuper Latium; vibrare sed arma  
 Malebat populus media sceleratus in Urbe  
 In cives pugnans, quam deturbare Latinos

Ferro ? Dictator graviter vix ora resolvit ,  
 Conticuere omnes , mox erupere cohortes  
 Portis , et Latium caesum ; rubet unda Regilli  
 Sanguine adhuc , ripaeque inhumatis ossibus alben-  
 Plura quid ? Aeternam Romanus proteget urbem :  
 Ungue leo tectum , rostro speciosa columba  
 Servat ; naturae generosas fortius audit  
 Trojugena has voces , praeclaraque facta loquuntur ,  
 Ipse colit patriam et patres , nec deseret unquam ,  
 Si volscus jugulis ipsorum impendeat ensis.  
 Hinc semper constans praeponet curia justas  
 Pugnas dedecori ; nec leges turpiter armis  
 Territa delebit. Jam bello multa talenta ,  
 Arma , duces , pubes sunt praesto. Pacis apertus  
 At superest aditus ; nam quis tentare vetabit ,  
 Ut belli horrendae longe pellantur ab Urbe  
 Clades , ne in praeceps romano sanguine cretus ,  
 Atque aulae patrum splendor ruat inclytus exul ?  
 Ad Cajum gressus , quorum caput infula cingit ,  
 Vertant , et pacem , sed sospite gentis honore ,  
 Facundis tractent linguis , sermoque per aures  
 Attentas ibit fors Marcì. Hinc Lartius addit :  
 Immemor haud donum , quae accepit ab exule , Roma  
 Jam summos mittat patres , Superumque ministros ;  
 Sit cor sitque manus sed prompta repellere vim vi ,  
 Si non exorata premit violentia fati.  
 Posthumius dubias mentes splendore serenat  
 Consilii , ut generosa senum consulta sequantur :  
 Quis Veturiadem studiis non censeat aulae  
 Dignum , qui vestris pro natis , aedibus , Urbe  
 Arripuit gladium toties , et sanguine multo  
 Artus perfudit ? Qui semper tempora serto  
 Ornatus rediit , sibi nec quid sumpsit opimae  
 Prædae , sed patriae dono dedit ? Impiger , audax  
 Hac patria dignus dux et pater ; extulit illum .

Laudibus in castris mea vox , nunc tollit et aula ;  
 Arguet an quisquam me, quod ferat exul in Urbem  
 Arma ? Quid erroris delet benefacta ? Quis omni  
 Labe carens ? Et nunc resonant dum praelia pagis,  
 An non victoris parcit clementia caedi ,  
 Ad lunae cursum non differt arma movere  
 In Romam , multumque ducum circaeque turba  
 Donantur patriae , multumque refertur honoris  
 Legatis ? Larti dignus sic clamat amicus ;  
 Atque statim Julius , Pinarius , Aulus et agmen  
 Assensu assequitur ; solemni hinc mittere pompa  
 Sacrorum statuunt cultores tegmine picto  
 Ornatos , patriae ut curent decus atque salutem.  
 Interea claros celerans Agrippa subihat  
 Muros , quos inter trebanis montibus ortus  
 It praeceps Anio spumans et personat urbem ,  
 Ac super undarum lapsus Thauniantidos arcus  
 Pinguntur. Postquam Tiburtum fatus in aula est  
 Nuncius Aeneadam , meritis annisque verendus  
 Dux ita Catillus : Volscùm vix arma sonare  
 Coeperunt , an funesto jacuisse veterno  
 Hanc reputas urbem ? Firmantur moenia , cives  
 Tela manu rapiunt , portas subit effera pubes ,  
 Quam mons Èreti mittunt , campique Fidenae ,  
 Saxula , Corniculum , rugosus frigore pagus  
 Mandela , et plures vici. Circumspice ; saevum  
 Undique martis opus fervet. Praeclara secutus  
 Romulidum semper Tibur vexilla , libenter  
 Mitteret e muris armatae robora pubis  
 Ad votum patrum. Si vero verteret iras  
 Volscus in has arces , junctis tegeremur ab hoste  
 Vix armis ; vires disjungas , victor utrasque  
 Confringet Volscus. Quare non urgeat urbem  
 Hanc Roma ad vanos nisus , servetque fidelem  
 Usque sibi. Martis non Urbs his indiget armis ;



More suo pugnet ; certa est victoria ; Roma  
 Seu vi fatorum , ignoto sen numine nullis  
 Victa cadet bellis ; nam Romam gloria ducit ,  
 Orbem Roma reget. Fantem miratus Agrippa ,  
 Catilli sensus referebat patribus altis ,  
 Qui celsam mentem ducis et cor ad astra ferebat.

Jam tardo medium curru confecerat orbem  
 Nox autumnalis. Non longe a moenibus altis  
 Volscum castra silent ; acies interque jacentes  
 Dux Ufens somnum proflat de pectore. Torvo  
 Improvisus adest ad vallum lumine Thyrrus  
 Arma manu flammisque gerens ; atque agmen agreste  
 Falcibus et duris sudibus saevaue securi  
 Armatum , tacitum vallos conscendit , et ignes  
 Conjicit in belli moles. Thyrrusque trucidat  
 Depressos animis vigiles immane bipennem  
 Vibrans : falce premunt socii sudibusque praeustis  
 E vulgo multos ; foedantur tela cerebro  
 Sanguine commixto ; trunci dispersaque terra  
 Membra jacent ; ulnatis augetur morientium  
 Horror nocturnus. Fidentes jamque ruebant  
 In penetrabile ducis. Strepitu commotus at Ufens  
 Egressus tolli flammis , sociosque cubantes  
 Caedi , atque armatos in castris cernit agrestes :  
 Hostis adest , inquit , vagina et diripit ensem  
 Intrepidus ductor ; sed clamans primus in illum  
 Intorquet jaculum Thyrrus , quod transiit aera  
 Scuti et loricae , summos et vulnerat armos  
 Ductoris. Gladio tum fervidus irruit Ufens ,  
 Dilaceratque ferens lethum intus condita cuspis  
 Spiramenta animae. Propere coit omnis in unum  
 Volscus ; at agrestes duri vestigia retro  
 Improperata ferunt ; vitam pars sanguine fundit ,  
 Pars aperire fores celso et descendere vallo ,  
 Pars ruere in fossas fractis cervicibus. Acer

Tum vertit ductor curas , ut flamma dometur ,  
 Et gelidas undas manibus prior injicit , agmen  
 Certatim hinc terrae corbes fontemque liquentem  
 Advehit ; increpitant ignes ; it teter ad auras  
 Fumus ; pars trabium nondum combusta securi  
 Dividitur ; mediis a prunis robora vellunt ;  
 Nec mora nec requies , donec Pallantidos ortu  
 Indomitas ponunt flammae atque incendia vires ;  
 Hinc se certatim hortantes dant gutture cantus ,  
 Stridentique secant serra , clavoque trabali  
 Illiceos truncos , et robora dura cupressus  
 Jungunt , belligeras ut tollant denuo moles.  
 Marcius at famae immenso combustus amore  
 In tolerinas rapiebat strenuus arces  
 Agmen ; et Umbronis turmis gladioque juvatus  
 Intrabat victor muros. Exurgit in altis  
 Collibus urbs fossa et solido circumdata muro  
 A forti populo , cujus cor flagrat amore  
 Bellisonae famae ; sed dulcis tempore pacis  
 Pauperiem dapibus jejunam pascere gaudet ;  
 Huic Bolae nomen , quae non procul arva videbat  
 Romulidum , imparibusque retro speraverat armis  
 Vertendam Volscum fortunam : immitte maniplos  
 Ocyus in muros bolanos , Marcius ac :  
 Aequicolo fatur ; ventis ruit ocyor ille  
 Cum lectis sociis. Magno concurritur aestu ;  
 Sed frustra bolana manus : nam vulnere plures  
 Aut vitam linquunt , aut sese ad tecta reducunt.  
 Hinc intrat laeto Volscus pede limina ; forti  
 Aequicolo donat , cuncta spectante cohorte ,  
 Aurato capulo generosus Marcius ense ;  
 Agmina dant plausum ; succenditur aemula virtus.



## LIBER SEPTIMUS

## A R G U M E N T U M

*Priscus dux Vitelliae Romam remeans refert eam urbem et alia oppida victa esse. Quare Cossus majori exardens ira disponit conjuratos ad egrediendum Roma noctu, vix Coriolanus pervenerit in tentoria. Marcius autem sacro facto in monte albano portas ingreditur castrorum, et belli machinas spectat, et laudat. Volsci mirantur agri romani culturam; tum injuriarum memores valde irascuntur. Romani sacerdotes sacris peractis ad Coriolanum veniunt, ubi Virginius Cajum alloquitur; sed hic proposito haerens nihil concedit, et Pontifices muneribus auctos dimittit. Eorum reditu oppositis Roma studiis dividitur. Nocte surgente Cajus comitante Voluso adit suum pastorem Faustum, qui herum tandem agnoscens singularem ei benevolentiam testatur; tum Marcius cum Voluso redit ad socios.*

**T**u quoque nequidquam obsistis, Vitellia, Volsco,  
 Ejectusque tuis muris victore Dolone  
 Regreditur Romam Priscus, tua tristia narrans  
 Fata, et Frentonis domitum virtute Labycum  
 Magnanimum, gnavum, camporum ac ubere laetum.  
 Tuum dira ductor transfixus pectora cura  
 Prosequitur Priscus: straverunt Italus asper  
 Elpenorque Pedum, celsas Sulmonis et arces,  
 Romuleique duces caesi; perterrita multa  
 Oppida victori recludunt limina; saevo  
 Marciades vultu Latii per castra per agros  
 Errat; ductoris vallos Ufentis et intra  
 Multa caede solum contectum, et sanguine Thyrrii  
 Ac turbae agrestis. Concussam fama per Urbem  
 Insuper ut tonitru resonat remeare superbum

Marciadem palmis. Populus jam fervet ut aequor,  
 Et pars deterior vulgi, levitasque catervae  
 Foemineae voces tollunt, durumque Senatus  
 Insimulant animum, quod nondum debeat acre  
 Decretum, reddatque petitos Urbis honores  
 Extorri Cajo. Sed constans curia plebis  
 Cum flore insanis haud praebet vocibus aurem,  
 Et bellis instat, sociorum funera quamvis  
 Ejus cor vexent ira, et pietate; virilem  
 Nec morem ponit quaerendi tempus et artes,  
 Unde domet gentes, victo dominetur et orbi.  
 At Veturiadis reditu mentemque superbam  
 Auribus accipiens Cossus, jam tempus adesse  
 Consiliis aptum reputans exultat, et intrat  
 Aemilii limen fratris; jubet arte ciere  
 Muneris et linguae tractabile vulgus in hostes.  
 Non minus ille furens tota cum fratre vagatur  
 Urbe; inter noctis tenebras prope Tibridis undas  
 Secretis turbas ripis, ubi multa latebant  
 Arma parata, truces cogunt; tum voce tonanti  
 Conceptas iras depromit Cossus, et Urbem  
 Jam jam lapsuram pingit patribusque relictam;  
 Orat succurrant, et contra turpe Senatus  
 Decretum portis erumpant; praesto tribuni  
 Adfore subsidium generosum; tempus oriri  
 Hostem vincendi multo certamine lapsum;  
 Hortatur, vix intravit tentoria Volscus,  
 Protecti gladiis et dono noctis opacae  
 Diripiant, feriant, invadant castra sepulta  
 Somno. Sic ardens ait, immisitque furorem  
 Cunctis pectoribus, certatim tela frementes  
 Tela manu rapiunt turbae; tacitusque recedit,  
 Et densa noctis coetus se miscuit umbra.  
 At ceu nativo scopulo digressus apertis  
 Eridanus campis errans rex magnus aquarum

Ausoniae ad fluctus Adriae volat aequoris instar,  
 Sic peragrat Latium populorum viribus auctus  
 Marciades. Nondum spargebat lumine terras  
 Orta dies, socios cum victor ducit ovantes  
 Albaui montis celsa ad fastigia. Flamma  
 Fulminis atque frequens fragor omnia corda latina  
 Caeco replebat dudum terrore; superbus  
 Rex Romanorum celso sacraverat illic  
 Caelicolum regi vastis sublime columnis  
 Delubrum, Latii quo junctae foedere gentes  
 Se se cogebant hilares ad festa; togatus  
 Culmina scandeat, cum munus consul inibat,  
 Hostibus et domitis praecinctus tempora lauro  
 Ductor. Volscorum postquam tetigere cohortes  
 Sacratum limen, summo votiva deorum  
 Patri dona ferunt clypeos, galeasque comantes,  
 Et gladios auro nitidos. Stans ante calentes  
 Marcius armipotens aras insigne trophaeum  
 Consecrat, ac tendens palmas et lumina vanis  
 Divis, immensas memori de pectore grates  
 Reddit, et ut belli resplendeat exitus orat,  
 Principium veluti fulsit. Tum corde profundo  
 Multa putans effert e sacro limine gressus;  
 Mille statim voces resonant et mille salutant  
 Ora ducem, tumulto qui stans haec pectore fundit:  
 Maxima res effecta, viri; namque orbe dierum  
 Exiguo Romae sociorum robur opesque  
 Ereptae. Superest belli caput. Arma movendi,  
 Quod fuit in votis, vobis modo tempus in Urbem,  
 Quae frustra solidos muros opponet et arces.  
 Utque supra reliquos colles se tollit ad astra  
 Hic mons, ad caelum sic ibit gloria Volscum;  
 Hocque brevi limen scandemus denuo, laetum  
 Infractoque jugo Latium nos omne sequetur,  
 Et centum tauros memorando sole feremus.

Clamorem tollunt acies, vocemque remittunt  
 Vicini colles. Invadunt protinus olli  
 Declives montis calles, variisque teguntur  
 Arboribus, longis circum juga flexibus errant,  
 Ac inter ramos hastae galeaeque coruscant;  
 Quadrupedum, peditum pulsu, bellique superbo  
 Carmine mons ingens circumsonat. Agmen adurget  
 Marcius, ac Urbem praeter nil corde volutat;  
 Sed memor armorum, quae Roma per abdita campi  
 Condens incautum Porsennam oppresserat, agri  
 Per latum tectos equites levioribus armis  
 Mittebat celerans, quibus explorare Togatum  
 Insidias labor. E tenebris ceu Lucifer ortus,  
 Agmine stipatus remeabat Marcius, unde  
 Exierat probris laceratus, solus, iniqua  
 Pulsus ab Urbe procul; Volscumque afflata supremi  
 Ductoris virtute cohors intrabat in arces  
 Victrix, quas liquit bellorum turbine pulsa.  
 Sic sapiens orbis rector vel plausibus implet,  
 Tristibus aut curis humanae tempora vitae,  
 Aut sua dona ferens virtuti, aut crimina plectens.  
 Jamque per ausonias urbes resonare triumphi  
 Volscorum; sepire vias Rutuli ordine longo  
 Spectaturi acies victrices; hernica turba  
 Egrediens muris romana ad rura volare;  
 Se Praenestini pagis effundere; in alto  
 Colle avide Albani speculari; gensque sabina  
 Pro consanguinea Roma procurrare pallens.  
 At Divis laetas tuscus rex tendere palmas,  
 Et piugues tauros, et thurea munera ferre,  
 Ut reges invisa fugans belloque superba  
 Urbs ruat, atque solo fumantia moenia linquat,  
 Eluat et poenis infandae crimina caedis,  
 Tarquinium pulsum cum Romam Tuscia ferret.  
 Festa manus celerat; non illam rauca fluenta,

Non scopuli immanes, non horrida silva retardant;  
 Ceu quando exsuperans ripas pluvialibus auctum  
 Flumen aquis properat, nil audet sistere cursus.  
 Unus habet cunctos adeundi pulchra pericla,  
 Unus amor scalis superandi moenia Romae.  
 Molli dux freno cursus regit. Aureus orbem  
 Lustrabat medium radiis sol; ecce repente  
 Celsa super colles exurgens Roma videri,  
 Roma invisa manu monstrari, Roma vocari  
 Horrisono fremitu. Cum primum prospicit Urbem  
 Et notas auras adspirat quatuor annis  
 Marciades lapsis, patriae pietatis imago  
 Pectora perstrinxit, lacrimaeque per ora volutae,  
 Atque dedit gemitum. Verum indignatus, apertis  
 Quod nullus campis hostilis fulserit ensis,  
 Multa movens animo cursum ad tentoria vertit.  
 Jamque acies tollit laetas ad sidera voces,  
 Et ruit e castris, nec non plaudentia jungit  
 Agmina cum sociis victorum luce coruscis.  
 Impiger at circum convertens lumina ductor  
 Terribiles moles ad belli commoda quaerit;  
 Tunc alacer in medio demonstrat in aequore campi  
 Erectas ductor nursinus; singula doctis  
 Luminibus Cajus cristatus lustrat, et acre  
 Ufentis laudat studium. Tum fessa caterva  
 Quadrupedes largo abjungunt sudore inadentes,  
 Dehinc celsos juxta currus allata revinctis  
 Fabula subjiciunt. Secti jam roboris ingens  
 Copia congesta; it vento sublatus ad auras  
 Nidor; pars jugulat pecudes raptosque Latinis  
 Cornigera pingues surgentes fronte juvencos;  
 Subjiciunt alii prunas, torrentque trementes  
 Artus, et cereale solum campestribus augment  
 Pomis laeti animis, et parta laude superbi.  
 Discreti ordinibus tum spargunt membra per herbam,

Consumunt mensas , et vina liquentia fundunt ,  
 Ad caelumque ferunt resonanti carmine Marci  
 Laudes , quod virtus invicta , scientia in armis ,  
 Ac magnum nomen , nec non fortuna secunda  
 Ornent praeclarum. Postquam compressus edendi  
 Ardor , fusa solo jacuerunt membra , relectae  
 Agminis et vires ; tumulos hinc acta videndi  
 Pars studio ascendit , praesepia sparsa per agros  
 Ad medium conversa diem miratur ; in arvis  
 Mille greges pingues ovium , prope Tibridis undas  
 Et liquidos fontes simas errare capellas  
 Duros carpentes dumos , et amara salicta ,  
 Innumeros mugire boves validosque juvencos ,  
 Armenta in pastus acri contendere equorum  
 Hinnitu , atque pedum pulsu procul arva sonare.  
 Vomere prospectat sulcatos undique campos ,  
 Et patulas pomos , positas atque ordine vites ,  
 Et super apricos ornatas surgere colles  
 Purpureis oleas baccis. Miratur et ipsos  
 Intrepidus cives agresti instare labore  
 In volscas acies vertentes lumina torva ,  
 Victricique manu validum vibrare bidentem ,  
 Sive boves stimulo tardas agitare , vel agros  
 Effoetos satiare fimo , atque incumbere tutos  
 Immensi ad cultum campi , quem temporis ira  
 Horrentem nunc obducunt spineta. Sed alto  
 Constitit hostilis percussa stupore juvenus .  
 Ante Urbem , cuius nomen pervaserat omnem  
 Ausoniam. Solido surgentia moenia saxo ,  
 Undarum vasti ductus , et culmina Divis  
 Sacra , et Janiculi turres , arcusque columnaeque  
 Ingentes , tarpeiae arces , ac templa Tonantis ,  
 Agger Tarquinii roseum mirandus ad ortum ,  
 Productae in longum moles , et circulus ingens  
 Romanis limes caelis , ingentia cuncta



Extra se rapiunt Volscum : superadditur ipsa  
 In luce atque aura species mollissima , quaedam  
 Tibridis in fluxu gravitas , in collibus alma  
 Majestas ; oculis circum undique signa micare  
 Imperii attoniti prospectant. Urbis imago  
 Turbatas autem factorum dira reducit  
 In mentes. Torvus sociis ita Silvius : atrox  
 Heic genus illorum , qui nostrum caede parentum  
 Foedavere manus. Iram quis comprimet Appi  
 Horrendas memorans clades ? Sic Frento fremebat ;  
 In volsco pueros tercentum voce ferocis  
 Tollebat ferrum lictor , miserique gemebant :  
 Caedimur innocui. Heic illi cecidere rosarum  
 Ceu flores pueri ; vivit tamen ille superbus ,  
 Vivit et insultat. Refricat dehinc Umbro recentes  
 Plagas : opprobrium nam quid memorare vetustum ?  
 Insidias haud longinquas et crimen abunde est ,  
 Quo Volscum ad pompam ludorum Roma vocabat.  
 Aure sonant voces praeconis. Luce cadente  
 Perfidus e portis excedat Volscus ad unum.  
 A festis ludis , a coetu hominumque deumque  
 Pellier innocuos , ceu foedos crimine ? Pubis  
 Tollit pars voces : en arcus et illa Capena  
 Volsci dedecoris testis , quae protegit hostem !  
 Armis exuti vi pellehamur ; at armis  
 Adsumus horrentes. Fremittit pars altera mittit :  
 Corde resultat adhuc riguas auditus ad undas  
 Atque Ferentini nemus altum clamor , ab Urbe  
 Cum nos depulsos afflatus numine certe  
 Collegit Tullus , nostris atque addidit ignes  
 Pectoribus clamans oculis ardentibus : arma  
 Arma velint , poscant , rapiant modo semper in Urbem  
 Volscorum gentes. Certatim talibus iras  
 Exacuunt acies , jejuna ut turba luporum  
 Dentibus infrendens pleno minitatur ovili ,

Personat et late saevis ululatibus agros.

Lecta manus patrum interea Superùmque ministri  
 Templum tarpeji super ardua collis adibant  
 Mussantes trepidi ; puraque in veste sacerdos  
 Maximus ingentem taurum statuebat ad aras  
 Caelicolum regi ; ac primum inter cornua vinum  
 Libatum fundit ; carpens dehinc vertice setas  
 Imponit flammis , aurataque tempora ferro  
 Summa notat ; demum tollit vibratque securim ,  
 Mugitumque ferens ad sidera procumbit bos ,  
 Et flagrans sacro perfunditur ara cruore ;  
 Tolluntur palmae , votum sonat omnibus unum.  
 In tereti Vestae templo , quam transtulit Alba  
 Rex Numa , multa rogans Superos quoque maxima virgo  
 Aeternos agnam candentem caedit ad ignes ,  
 Quamque praeesse putat bellis , Divae immolat agnam ,  
 Atque vetus signum ventosa per aequora vectum  
 A Troja imperii pignus venerabile adorat.  
 Virginei votis et dulci carmine coetus  
 Interea resonant aedes , fons , proxima silva ;  
 Thurea dona focis crepitant , ac templa vaporant ;  
 Caeca superstitio falsis haec vana ferebat  
 Divis. Fama volans totam repleverat Urbem  
 Sacros ire viros qui firment foedus ; ubique  
 Gens fluit , atque Fori vix continet area turbas  
 Spemque metumque inter ; descendens agmen ab arce  
 Jamque vident. Praeant qui Panos numen adorant  
 Instructi scuticis : e collo fistula pendet.  
 Post hos incedunt , qui forti sacra Quirino  
 Conficiunt ancile manu virgamque gerentes  
 Et pictas tunicas , aerisque in pectore tegmen ,  
 Romulidumque ferunt laudes et vota parenti.  
 Pone Jovis sequitur Flamen , cui vertice sacro  
 Flammeus ardet apex , digito micat annulus auro.  
 Hinc Rex sacrorum trabea cinctuque gabino ,

Maximus et Curio vittis pendentibus albis  
 It comes, et magnus lituo traheaue magister  
 Augurii ornatus, quorum vestigia calcat  
 Vertice velato senior fecialis et hasta  
 Sustentans gressus, fumumque probare peritus  
 Fatidicumque focum, et volucrum sacra viscera haruspex.  
 Arvalis sequitur redimitus tempora aristis  
 Frater, Pinarius juxta Tatiique sodalis,  
 Vestibus ornati sacrisque insignibus omnes.  
 At praetextatus multo spectabilis ostro  
 Majestate gravis, doctrina annisque verendus  
 Inter Pontifices effertur maximus alto  
 Curru, ignes inter vadit ceu luua minores;  
 Hinc atque hinc gradiens oculos demissa micantes  
 Vestalis niveis vittis pallaue decora  
 Lactea colla, comas crispas, et mollia cingit  
 Pectora; sed laeva talos descendit ad imos  
 Purpura, virgineusque rubor virtutis amicus  
 Ora notat; Veneres italus ceu pinxit Apelles;  
 Heic decor, at Romae majestas fulget in illis;  
 Quos densum populi, patres, equitesque frequenti  
 Ad portas voto comitantur. Jamque colendus  
 A muris ordo longe processerat, ore  
 Qui tristi calle egressus portaque triumphi  
 Jam descendebat qua pons supereminet anini,  
 Almonisque sonans liquido pede labitur unda.  
 Undique septa jugis apricis longa virensque  
 Vallis erat, lucusque sacer, templumque Camoenis,  
 Et specus et rivus Fideique sacraria culta  
 Relligione Numae, qui se sub nocte silenti  
 Aegeriae responsa petens in sola ferebat  
 Antra. Atque heic steterunt currus; tum maximus ore  
 Sic Praesul: Proles Jovis alti Mnemosynesque  
 O faciles Musae, quibus haec Urbs sacra quotannis  
 Offert, et veteres lucos templumque dicavit,

Eloquii Divae nobis hac luce sonantes  
 Afflando voces vestrae miserescite Romae.  
 Nostra saepe manu festo cadet hostia templo,  
 Ac thure halabunt sertisque recentibus arae.  
 Sic memorat supplex palmas et lumina sacris  
 Protendens silvis; unum omnia pectora votum  
 Concipiunt; iterum currus et turba moventur.  
 Nuntius at tardum antevolans praecesserat agmen,  
 Magnanimusque, licet dura inter bella, ministris  
 Sacrorum dederat dux fundere libera corde  
 Vota. Duas volscent in partes se dividit agmen,  
 Vestes admirans insuetas, lumina formae  
 Virgineae, frontes et majestate micantes.  
 Antè ducum coetum postquam sacer adstitit ordo,  
 Nullaque vox sonat, ad terram cervice parumper  
 Constitit inflexa summus Virginius inter  
 Pontifices; graviter tum tollens ora profatur:  
 Quae te prima ferens aluit, dux inclyte, Roma  
 Desolata licet sociis, licet undique septa  
 Armis, in memori spes omnes corde reponit  
 Nati. Jam primum non longe a mente repellas,  
 Quam crebro crines cinxit tibi patria serto,  
 Quam crebro manibus portans suffragia plenis  
 Invidiae textit jaculis, quam saepe Senatus  
 Irae te vulgi eripuit; quam saepe Deorum  
 Numina servarint pugnae te vulnera. Magnis  
 Muneribus patriae sic reddis praemia? Divum  
 Sic recolis numen? Sic respondetur amorì  
 Patrum? Num memori non sufficit insuper irae  
 Crimine paucorum patriis a Tibridis oris  
 Ad magicas rupes circaeas cuncta ruinis  
 Caedibus et luctu replese? Pelasga cruorem  
 Semper gens sitit, ut tigris; sapientia patris  
 Romulei videt ignaras actasque furore  
 Turbas, ceu surgens aequor nunc mergere quosdam,

Nunc alios refluens secura linquere arena ;  
 Nec prodire putat studiorum a turbine lucem  
 Consilii. Marcì pietatem numina amica ,  
 Justitiam Romae pars ingens , pulcherrima facta  
 Magnanimam celebrent mentem. Jam currit ab altis  
 Alpibus ad siculas undas virtutis in armis ,  
 Inclyte , fama tuae , quam dividit arbitra rerum  
 Sors tecum et miles ; potior quae pertinet uni  
 Gloria parcendi superest , qua gravior ulla  
 Non fulget virtus , homines ad sidera tollens.  
 Incipe venturae non lene pavere tribunal  
 Aetatis , clarum vincendi robore quae te ,  
 Non jam parcendi dicet. Non ardua certe  
 Roma petit. Facile tua mens summoque decore  
 Vagina gladium condens a limine lethi  
 Eripiet populos. At contra caedere gentes ,  
 Et vastare domos , latronis munera , magno  
 Quam durum , quam turpe viro ! Protecta latinis  
 Atque suis armis , victrix ( jam praeterit aetas  
 Octava ) Urbs quotnam absinthi tibi pocula forsan  
 Inesperata dabit ! Jam parce , et pace fruatur  
 Ausonia , et fructu palmarum maximus armis  
 Cajus ; respiciasque pias nos tendere dextras  
 Ad te , numinibus quas suemus tendere pro te.  
 Vosque , duces fortes , famae sociique laborum  
 Marcì , ne pigeat meminisse haud prospera fata  
 Volscùm , cum toto tyriae vos aequore gentes  
 Insectabantur , primaque insistere terra  
 Et ripae hospitium prohibentes spicula plenis  
 Vibrabant manibus. Sed cursu solis eodem ,  
 Quo pulsi reges , jungens Carthaginis altae  
 Cum populo foedus Volscùm commercia texit  
 Roma parens , vestris ut puppibus aequor apertum ,  
 Et siculum litus , sardum lybicumque pateret.  
 Non hae labantur maternae pectore curae ,

Neu sors vos capiat ridens, quae tollit in altum  
 Victores, foliis levior mox ponere gaudet.  
 Pingitur ore ducum fervens ob verba minarum  
 Ira simulque stupor Virgini sensibus altis  
 Et grandi eloquio; hinc murmur. Circumtulit ingens  
 Dux oculos, vultu tacitas interprete mentes  
 Agminis et novit; magno tum lumina figens  
 Pontifici, tales fudit de pectore voces:  
 Inclyte Virgini, patrum virtute verendum  
 Agmen, quos Volscis cum fortibus usque colemus,  
 Plus aequo verbis clades bellicae ruinae  
 Auctae, quaevis martis vis, haud mea perculit ira  
 Amissam turbam. Testes qui patria Romae  
 Exuti vinclis viderunt moenia; testes  
 Tot gentes et castra, quibus clementia parcat  
 Victoris. Veterum non hos immittit in Urbem  
 Ultio probrorum gladios; at pulchra cupido  
 Frangendi vincla Ausoniae; namque ussit ab ortu  
 Ambitio Romam, quae perculit oppida bellis,  
 Ac italis animis nil praeter caedis amorem  
 Liquit. Sed Volscus capit arma, et signa sequentes  
 Ausonidae currunt; non paucas pandier urbes  
 Nobis aspicitis. Faustis imponere finem  
 At praestat bellis, licet Urbis moenia forsan  
 Haud his obstarent armis, ceu Troja Pelasgis,  
 Ut vos falsa tenet fiducia. Divite gleba  
 Reddat Roma prius Volscis, quos abstulit agros  
 Non jus, sed martis vis; gentis et oppida tandem  
 Ornet honore Urbis, quo castra latina refulgent.  
 An genus acre virum, quod libera tollere colla  
 Nititur arma tenens, equidem non inmemor Urbis,  
 Divitias ponti plenis cui puppibus affert;  
 An populus sollers, artes, commercia opima  
 Exercens dudum, cordi cui nautica res est,  
 Pomptinas cogens flavescere messe paludes,

Antiquus, constans, dives, non nomine dignus  
 Romulei civis? Patrum sapientia jura  
 Volscæ perpendat gentis; paucique sequestræ  
 Pacis adhuc superant soles. Nunc jungite foedus,  
 Nunc sinite a bellis lassos requiescere muros  
 Ausoniae. Votis si contra clauditis aurem,  
 Si ferro et flammis cunctam prosternere fixum est  
 Italiam, quaeso num frangere sacra jubebunt  
 Jura mihi hospitii, Ausoniae spem fallere patres  
 Romani? Fatur graviter, tum pandier a se  
 Undique dona patrum, dignas nec pendere grates  
 Posse ait, et fratris promit de pectore sensus;  
 Hinc sessam recipit turbam in penetræ, manuque  
 Captos purpureos supra locat ipse tapetas,  
 Atferrique jubet bacchi et cerealia dona,  
 Ac tostos igni pecudis pinguisque capellæ  
 Armos; ipse clapes partitur, pocula miscet;  
 Plura et de matre et pueris, de conjuge plura  
 Audit; tum sacras multo dimittit honore  
 Turbas, et quarum votum non audiit, auget  
 Muneribus; volsca dat cunctis arte micantes  
 Enses et galeas auratas cristisque decoras  
 Purpureis. Pateras argento auroque nitenti  
 Artibus insignes tuscis sparsasque figuris,  
 Quadrupedemque citum summo cervicibus altis  
 Addit Pontifici, fulgentem et purpura amictum.  
 Virginibus peplum et cinctum velamen acantho,  
 Quo pingebatur Pici mutatio formæ  
 Per magicas Circes herbas, et carmina donat.  
 Ceu frustra magnas nisus componere lites  
 Vir, celsis animis haud mollia dicta reportans  
 Pontificum coetus claram remeabat ad Urbem.  
 Undique fit murmur; nam bella gerenda Senatus  
 Vociferat muros intra; non parva sed extra  
 Linina turba sequens Cossum conclamat; at agmen

Fraude Tribunorum deceptum valdius instat ,  
 Exul ne ductor revocetur ; maxima vulgi  
 Pars contra ingeminat revocandum : cordibus irae  
 Oppositis ardent studiis. Caligine tectus  
 Vergit ad occiduas thyrreni marmoris undas  
 Sol ; tarde incedens humerosque ligone gravatus  
 Ad tuguri remeat congestum cespite culmen  
 Fossor , fumantisque bovis juga solvit arator ;  
 Jam circum spargunt villarum culmina fumum ,  
 Casta viro conjux parcae dum munera coenae  
 Comparat , atque cibus intenti lumina circum  
 Ignem stant nati. Sed sacrum Marcius agmen  
 Dimittens , terris vix incubuere tenebrae ,  
 E castris efferre pedes , et quaerere Romae  
 Constituit motus ; hinc atro tegmine vultum  
 Tectus , ne posset quis noscere , bina coruscans  
 Tela manu , forti Voluso comitante , reductum  
 Carpit iter collem versus , qui nomen habere  
 Dicitur a vanis ibi fata canentibus olim  
 Vatibus , unde tamen resonant modo sancta per orbem  
 Immensasque regunt gentes oracula. Lento  
 Incedens gressu , vigil an custodia servet  
 Turres ; an multi scintillent moenia circum  
 Ignes , intentis oculis dux cernit , et aures  
 Tendit , num populi clarae referantur ab euris  
 Voces ; at strepitus confusaque verba per auras  
 Nocturnas volitant. Tunc nota ad jugera campi  
 Pergit , ubi pecudes medio suus aequore servans  
 Antiquus noctis frigus pellebat ad ignem  
 Faustus. Vix tecto angusto videt arma micare ,  
 Multa loqui aggreditur ; coeptus frustratur hiantem  
 Clamor. Privernas , cujus non viderat unquam  
 Os pastor , vellit multis e corde timorem ,  
 Non illis ferri vim , sed servarier armis  
 Innocuos pecudum custodes ; dulce loquendo



Tum monet, ut referat sibi pectore candidus omnia,  
 Quae, teneros ovium foetus cum ferret in Urbem,  
 Aspexit, patrum quae mens; num gnava juvenus  
 Moenibus advigilet, dederit seu membra sopori,  
 An pubem Consul muris educere, denso  
 Reddere seu potius securam milite Romam;  
 Ardeat an populi cor belli aut pacis amore.  
 Tum quae luminibus vidit, quaeque auribus hausit,  
 Vera refert posita Fausti formidine pectus;  
 Certatim plebem patresque instare parando  
 Vallatas portas et propugnacula bello;  
 Patrum decretis contra prohiberier, arma  
 Ne celsis abeant muris; et murmure magno  
 Hinc atque hinc multum vulgi clamare per Urbem,  
 Pellendum Volscum clausis e moenibus; extra  
 Muros bellandum; jungendam in foedera dextram,  
 Crescere discordes iras. At plura, benigni  
 O quicumque duces, qui huc successistis amici,  
 Sunt obscura mihi, pastor sic acrius urget;  
 Nam mens aegra novas refugit res quaerere; postquam  
 Pulsus ob invidiam ingrata decessit ab Urbe  
 (Pro Roma et mores inversi!) crimine purus  
 Nobis dulcis herus, pater optimus, inclytus armis,  
 Pro quo cum pueris et conjuge saepe solemus  
 Caelo ferre manns, dum nostra altaria fumant  
 Agnis; me miserum dolor exurit, neque dulcem  
 Carpere me requiem, dum somnos umbra suadet,  
 Nec fessum gaudere cibo sinit; horrida namque  
 Romulidum nullum rerum discrimina pectus  
 Pertulit, infelix quot passus Cajus ab Urbe,  
 Cui tot bellorum praedas palmasque dicavit,  
 Pro qua tot plagas, tot pertulit ille labores.  
 Et quater auratas secuit jam messor aristas;  
 Ille tamen requiem nondum finemque laborum  
 Invenit; haud ullam requiem Veturia mater,

Haud ullam requiem lacrimosa Volumnia ... Dulce  
 Conjugis et matris nomen vix auribus hausit  
 Marcius, ex imo traxit suspiria corde;  
 Tum chlamyde os nudat (perstringit namque suorum  
 Cor pietas), senis et fletus et tristia verba  
 Rumpens: en quem fidus amas; en Marcius, infit;  
 Brachia et injiciens collo tenet, oscula figit.  
 Agnovit faciem longo post tempore visam,  
 Erigit inque pedes senior se, tendit et ambas  
 Palmas, uberius lacrimas et fundit, et omnem  
 Implet voce dominum. Remeas tandemque revisis  
 O moestos famulos! Marci datur ora videre  
 Et rursus notas audire et reddere voces!  
 Tanta cor haud unquam concepit gaudia, nostrae  
 Quae vitae, o Marci, producent tempora. Luci  
 Te Romae, colles, campi, miserique coloni,  
 Te pecudes, caprae, tauri, tristesque molossi,  
 Te queruli fontes, et Tibridis unda vocabant.  
 Sic multum gemitus verba inter singula fundens  
 Advocat uxorem, natos, parvosque nepotes,  
 Et fidos famulos; ac rustica turba repente  
 Circumfusa ruit; pedibus pars oscula figit,  
 Pars chlamydi et manibus; parcae pars munera coenae  
 Profert castaneas molles, et initia poma,  
 Lac tepidum, cererem, ceris et condita mella,  
 Vinaque, romanis passas et collibus uvas.  
 At reditum properans dat ductor pignus amoris,  
 Namque humeros Fausti cingens sua pallia donat;  
 Fido dulce loquens famulo tum limina linquit,  
 Multorumque vale sonitus comitatur euntes.  
 Ibant hostiles securo corde sub umbris  
 Per campos laeti pastorum voce, quod Urbem  
 Civiles quassent motus. At mente volutans  
 Anthæjus ductoris iter formidine plenum,  
 Venerat, atque suum olli duxerat obvius agmen.

Jamque propinquabant ; tenui cum noctis in umbra  
 Armatos jaculis galeisque micantibus ire  
 Marcius aspiciens , vagina diripit ensem ,  
 Nam qui vos ? clamans ; senior cui : siste moveri ,  
 Anthaejum fidum socios et cerne maniplos ,  
 Qui properant ultro , ducis ut sit sospes ab hoste  
 Vita sui. Palmas caelo pius extulit heros  
 Talia miratus ; lethi discrimina deinceps  
 Spernentem laudat Setinum. Protinus omnes  
 Castrorum portis taciti vallisque propinquant ,  
 Quae circum ductor fossas effoderat altas  
 Claelius , invictam cum bella moveret in Urbem  
 Alba. Repellebant tardae tum frigora noctis  
 Ad flammās acies fessae ; procul aequore campi  
 Ignibus effulgent variis , ut sidera caelo  
 Nocte micant ; circa ductores agmina somnum  
 Carpunt. At taedam manibus fert hernicus Umbro ,  
 Est cui nocturni custodia credita campi ,  
 Et celeri gressu occurrit venientibus ultro  
 Sospite dans plausus ductore , quod agminis ipse est  
 Mens et vita sui ; multam tacitique per umbram  
 Quisque suum tandem subeunt tentoria fessi.  
 Consulīs aure sonant molimina saeva tribuni  
 Et Cossi haec inter , pellant ut robora pubis  
 Et mediis rapiant pugnae in discrimina campis ,  
 Impia nam profert Arcens arcana perhorrens  
 Consilii ; patres taciti per flexa viarum  
 Vadere , belligeras huc illuc mittere turmas ,  
 Augere excubias portis et turribus altis ,  
 Hortari , vigilant ut contra immania coepta  
 Praestantes virtute viri : praesaga malorum  
 Urbs perturbari , veluti cum caerulea caeli  
 Eripit obscurum nubis , nimbosque minatur.



## LIBER OCTAVUS



## A R G U M E N T U M

*Divina Providentia poena tandem afficit Romanos, ob violatas justitiae leges in damnando Coriolano; hinc permittit Cossum non videre praesens caedis periculum, nec audire hortationes patrum, et audacter ferre arma extra muros cum acie conjurata. Toto libro describitur ferox pugna nocturna, virtus ducum, et militum tam romanorum, quam volscūm, caedes primorum, mors Palmi, Cossi, Largii, ejusque funus, tum demum Juliae questus ob mortem Cossi.*

**P**anditur interea caelum, lateque rubentes  
 Apparent intus flammae. Se fundit ab illis  
 Et micat horrendo triplex cum murmure fulgur;  
 Tum sese scindit tenuesque recedit in auras  
 Ignitum velum, celsaque in sede refulget  
 Saeclorum Rector, poenas ut poscat ab Urbe,  
 Exemploque gravi a noxis deterreat orbem.  
 Majestas in fronte sedet, qua cuncta creabat;  
 It justae e labiis, ut fumus, spiritus irae,  
 Fulmine ceu quando terras delere minatur.  
 Ordine fulgenti dextra laevaue sedentes  
 Aligeri juvenes intentis oribus adstant.  
 Tum convertibat frontis decus ille ministro  
 Irae; ac terribili micuerunt lumina flamma.  
 Haud molles hausit jussus, tremuitque supernum  
 Imperium; caput atque genu flexere ministri  
 Aulae, fulgentesque auro posuere coronas  
 Ante thronum, dulcique melos cecinere salubrem  
 Justitiam; thuris fumus circumvolat aras  
 Aeternas. Caeli sublimibus alta columnis

Spiritus hinc ultor linquit pernicious alis  
 Limina ; splendorem tegit ; induit ora severa ;  
 Cingit utrumque latus nebulis , sermoneque terris  
 Haud noto docet aligeros in nube sedentes  
 Aera per Latii nutus mentemque supernam ;  
 Numinis ad laudes iterandas caelica regna  
 Tum repetit , radius ceu lucis. Protinus olli  
 Convertunt circum radiantia lumina , et atrae  
 Se cogunt irae nebulae caecique furoris ,  
 Romulidumque ruunt supra caput , horrescoque  
 Circumdant animos velo. Jam vesper olympo  
 Astrifero surgit ; solis lux alma recedit  
 Paulatim terris. Exspirans ore furorem  
 Arma rapit manibus , tenditque ad limina gressus  
 Exsultans animis Cossus ; cui Julia conjux ,  
 Quae puerum , Veneris ceu florem , gestat in ulnis,  
 Moesta viri dextram dextra complexa locuta est :  
 Quo ruis infelix , majoraque viribus audes  
 Victorem contra Volscum ? Cur jura Senatus  
 Conculcas ? Quonam tibi cura tuique domusque  
 Cessit ? Me miseram ! tibi nox infausta propinquat  
 Et caro capiti pueri matrique relictæ !  
 Elapsa caperem dum somnos nocte ( capilli  
 Fronte mihi memoranti horrent , gelidusque per artus  
 It sudor ) , feriunt aures lamenta repente ,  
 Teque supra clypeum caesum te , Cosse , ferentes  
 Ploratu socios haec intra limina cerno.  
 Hei mihi ! qualis eras ! Pallentes funere vultus ,  
 Oclusos oculos , concretos sanguine crines ,  
 Vulnere multa gerens , vitaque animaque solutos  
 Artus. Ista boni misere insomnia manes ,  
 Ne violenta premat te sors , convulsa ruina  
 Ne tua tecta cadant ; etenim te morte perempto  
 Quid superest domui ? Quare discedere muris  
 Parce ; caput certis parce objectare periclis ;

Si pugnare paras, tutis a moenibus arce  
 Hostiles iras, neu frangas jussa Senatus.  
 Da miserae hanc veniam junctae tibi foedere lecti,  
 Quae pro te caderet; nostris ne vocibus aures  
 Claudas; aut si non audis, me confice primum;  
 Tum limen superes infaustaue praelia tentes.  
 Julia sic plorat, cū conjux: omnia cordi  
 Haec mihi sunt equidem; verum Romanus abhorret  
 Hostili coram gladio requiescere muris,  
 Et pavidos ridens lemures et somnia noctis,  
 Obvius exardet memorandis ire periclis.  
 Sic statuam Cocles, sic Scaevola milleque fortes  
 Promeruere viri famam, quae terminat astris.  
 Praeclaram memora patriam; nec cede dolori  
 Me propter, conjux; etenim si fata juvabunt,  
 Cras Romam repetam praecinctus tempora lauro;  
 Quod si fata premant, immensas vincere fati  
 Quis valuit vires? Tum vero nostra latinae  
 Coepta canent semper gentes et nobile lethum.  
 Ergo domum, conjux, et nostro sanguine cretum  
 Hunc puerum cura; nos jussa sequemur honoris,  
 Non monitus patrum, nocturnaue bella feremus  
 Hostibus oppressis somno longoque labore.  
 Sic ait, atque manus tendens a conjuge natum  
 Accipit, et roseis dat malis oscula, reddit  
 Tum celerans matri; quiddam lacrimabile risit  
 Illa doleus, natus cum matris colla lacertis  
 Strinxit, et inclinans materna ad pectora vultum  
 Exultansque patri fulgentia lumina vertit;  
 Salve ait arridens, et gnatum blanda tuetur  
 Cossus; tum socios quaerens e limine gressus  
 Effert. At lacrimans os olli Julia figit,  
 Nec linquit valvas, oculis quoad cara recedat  
 Forma viri. Interea lucenti casside tectum  
 In mediis plateis agmen se cogit equestre

Tercentum juvenum. Exquiliis hinc turba rebellis,  
 Collis Aventini sedes, clivumque Palati,  
 Janiculique domos audaci pectore linquit,  
 Vultque Forum complens ingenti murmure portas  
 Pandi. Vectus equo Cossus dux agminis auget  
 Circum discurrens iras, jugique tribuni  
 In patres odio accensi. Sine lege capillis  
 Fusis pallentes, similes amentibus errant  
 Huc illuc, lacrimas necnon ardentia vota  
 Uxores adhibent frustra; Deus obstruit aures  
 Turbarum. Linquunt Capitoli immobile saxum  
 In tanto patres discrimine; maximus inter  
 Pontifices turbae audaci Virginius ora  
 Sic solvit: dicam vos cives? Agmen amicum  
 Vos patriae dicam? Paci favet Urbis amator,  
 Jura magistratumque colit, sanctumque Senatum.  
 Frangitis at leges, parentem patribus Urbem  
 Spernitis ut timidam, sclerataque sumitis arma;  
 An non jure vocem vos hostes Urbis? At ante  
 Coeptum immane satis versastis pectore? Forsan  
 Praeclaris orbi ducibus, numeroque minores,  
 Tot fortes acies, quas mens agit inclyta bello,  
 Sternetis? Tutis victorem pellier hostem  
 Moenibus haud praestat? Sic Urbs servanda Deorum  
 Condita consiliis; non portae limine pubes,  
 Non rapienda foras, non: si Deus ipse moneret  
 Mavors, erraret Mavors. Heic sistere promptis  
 Ad pugnam praestat telis. Aut proteget omnes  
 Urbs dilecta Deum generi; commune sepulchrum  
 Aut dabit haec nobis. His dictis tollitur ingens  
 Murmur; nam vario plaudit pars rectior Urbis  
 Assensu; contra Cossus dux talia reddit:  
 Qui late circum nos straverit oppida nimbus,  
 Ante oculos interque manus est; undique muros  
 Circumdant hostes. Qui Romae nisus, ut olim?

Quid magni patres? Cum tempus stringere ferrum,  
 Consilium coeptum; Latio cum pellere bella  
 Fas erat (et primo vis ortu haud magna latinis  
 Finibus arcebat bellum), requiestis in Urbe;  
 Hinc volscum ferrum replevit caede latinos  
 Muros, haecque parat rescindere moenia. Turpi  
 Vultis adhuc somno indulgere? Quousque jubetis  
 Claudier Aeneadas veluti pecuaria septis?  
 Haec electa cohors, cui Romae gloria cordi est,  
 Hostes in castris invadere nocte repente  
 Ardet. Num Volscus genus iusuperabile bello,  
 Aut non consequitur nostro de vulnere sanguis,  
 Vel non audaci sors est numenque Deorum  
 Praesto? Vel ad mortem si nos fera fata vocabunt,  
 Fortiter haud campis praestat, quam segniter intra  
 Muros ad manes imos descendere? Fatur,  
 Et conjuratae concordii murmurare voces  
 Tolluntur. Melior populi majorque caterva  
 Infremit at contra; patribus devincta juvenus  
 Aestuat ut pontus, nimbosque ut ab Urbe repellat,  
 Arma vocat; flagrant jam jam civilia bella.  
 Tum sapiens patrum coetus, cui nulla potestas  
 Contra consilium superest caecumque furorem,  
 Cedendo fati turbarum damna repelli  
 Cernit; et hinc cessat frustra cohibere ferocem  
 Pubem, sed clamat moerens: incurrite in hostes  
 Quos fortuna juvat, quos longa scientia belli  
 Et dux armipotens moderatur; linquite muros,  
 Cum sic insanire libet. Liquisse pigebit  
 At nimium sero; pendetis caede furoris  
 Poenas. Atque utinam misera erupisset ab Urbe  
 Omne scelus! Vetitas at sese proripit extra  
 Portas arma fremens elata fronte juvenus,  
 Sopitosque ferit spe Volscos. Ducit ovantes  
 Altus equo turbas generoso Cossus, et audax



It comes Aemilius juvenis, flammisque recentes  
 Adjiciunt Decii germanus Varro tribuni,  
 Magniloquus rigidusque Cato, cui filia casta  
 Bruti nupta fuit, Belluti et strenua proles  
 Maulius, ac equitum pars quorum felle tumescit  
 In Cajum pectus. Patrum sapientia, prolis  
 Incautae veluti genitor non abjicit unquam  
 Ex animo curam, Numitori fatur, et agmen  
 Colligit ad portam, Volscos si fracta recedat  
 Erumpens acies, ut dux occurrat, et intra  
 Valvas excipiat miseros. Dumque ante Capenam  
 Densi laetitiam populi spectantis et iram  
 Seditio pietasque crient, flagrat ecce tumultus  
 Tarpejum circa (sic digerit omnia Cossus).  
 Nam mamertini Marcellus carceris ante  
 Terribiles facies exultat tela coruscans;  
 Una dux acer jaculo Rugaeque sodalis  
 Umbrenus, Cossi Vibiusque agitator equorum,  
 Una pars pubis. Stant contra limine primo  
 Densi custodes, in quos jactit impia turba  
 Tela manu crebra, flammisque ad culmina. Noctis  
 Contecti tenebris animos dant verba tribuni;  
 Hinc libertatem promittit lingua rebellis  
 Carcere detentis: illinc reboantibus antris  
 Irarum rauco fremitu tractisque catenis  
 Horrendum vincti jurant, incendia, patrum  
 Funus, et incursum pubis contra agmina Volscum.  
 Vestibulum ante ipsum vitam cum sanguine fundit  
 Non unus custos; major sed turba superba  
 Fixa jacet telis; Umbrenus concidit, una  
 Marcellus Vibiusque super procumbit acervum  
 Caedis. Nec mora; tarpeja descendit ab arce  
 Agmen in audaces, trepidi qui vulnera pauci  
 Effugio vitant, et caeca nocte teguntur.  
 Custodum pariter frangunt vigilantia tela

Audacem nisum gravidas nidore ferentem  
 Taedas, ut variis spargat regionibus ignes;  
 Undique se fortis plebs cogit amica Senatus,  
 Crimen et Urbe cadit. Socii sed nocte silente  
 Ignari casus, intenti ad grandia coepta  
 Audaces, taciti, ceu saevis plena procellis  
 Nubes, accelerant gressus; Almonis et undas  
 Post se linquentes, sistunt procul aggere mille  
 Passus, quo tendit Volscus, dapibusque meroque  
 Instaurant vires. Tum dura ad praelia Cossus  
 Hortatur: socii praeclari fortibus ausis,  
 Non procul a nobis en hostis castra superba  
 Fama, non virtute virum metuenda; latronis  
 Quae virtus etenim volsci? Pro Juppiter! ille  
 Armis, sive dolo potius, vix nota Latinis  
 Oppida romanis toties subjecta triumphis  
 Edomuit, Roma non obnitente. Videtis  
 Quadrupedes, currus, clypeos, tentoria, praedas  
 Ingentes? Forti tenebris his omnia dat sors  
 Convectare domum. Quae cernitis, illa putatis  
 Agmina, quae portis audaci corde ruebant  
 Antiacis? Animis ast excidit, illa priora  
 Triginta soles numquam posuisse pharetram?  
 Hinc ferro pars magna jacet transfixa; supersit  
 Aut si quid reliqui, somno vinoque sepultum est;  
 Et si consurgat, non certe numina surgent,  
 Mortales in mortales; animaeque manusque  
 Sunt totidem nobis; Urbemque videbitis omnem  
 Quamprimum campis miscentem praelia. Nunc nunc  
 Pro more audendum dextra, delendaque victa  
 Gens toties; vobis primus signabo cruentum  
 Corpora fusa super callem intra septa. Priusquam  
 Nox fugiat, dirum Cajum Volcosque videbit  
 Caesos, victricem patriam, vos lumine cinctos  
 Et spoliis auctos. His vocibus infremit agmen

Assensu ; ductor minitantem concutit hastam ,  
 Invaditque viam primus , sociique silentes  
 Corde truci accelerant. Noctis sub luce maligna  
 Volscorum vigiles Cossus prius aspicit ; illi  
 Convertunt retro gressus , hostilia tela  
 Cernentes , simul et voces ad sidera jactant.  
 Prima cohors excita sono consurgit , et arma  
 Perturbata rapit manibus. Procurrit in ipsam  
 Cossus et Aemilius sociique. Vibrare sagittas  
 Illa manu trepida , et vagina educere ferrum ;  
 Nititur at parum contra ; correpta timore  
 Convertit dorsum , multoque relinquit arenam  
 Sanguine contectam. Primo clamore vocatus  
 Marcius armisonans terra surrexerat. Hostem  
 Praecipit explorent ; aptas hinc urget in ipsum  
 Vires , et properans : serva tentoria , fatur ,  
 O vigil Anthaei ; nos recta petemus ; at , Ufens ,  
 Tu non conspectus per devia perge ; reposto  
 In clivo , musis quo surgit silva , reconde  
 Agmen. Si portis acies irrumpat in arma  
 ( Dummodo par hosti sis ) , irrue , disjice , ne se  
 Cum sociis jungat. Tibi si vis obvia major ,  
 Mitte statim nobis , et gressus verte retrorsum  
 Ad volscas acies. Ait haec ; tum mente sub una  
 Ambo duces diversa petunt ; secura triumphi  
 Ardens pugnandi magnum sectata caterva  
 Marciadem ruit e castris. Quatit aera caecum  
 Buccina , voxque ducum ; tum pulsu terra tremiscit  
 Quassa pedum turbae confertim in bella ruentis.  
 Principio ductor praecurrens Silvius arma  
 Primus in adversos jactat , ferroque secantur  
 Varroni fauces , dum replet vocibus auras ;  
 Cumque paras resono ex arcu torquere sagittam ,  
 Transadigit , Servi , tibi costas hasta cruenta  
 Viribus a Voluso magnis contorta , cadensque ,

Odi, inquis, Volscos. Nec dextris irrita vibrant  
 Tela Cato sociumque cohors, et corpora Volscum  
 Procumbunt. Lateri Marci fidissimus haeret  
 Et domini a membris hostilia damna repellens  
 Nunc pinum emittit Moenas, modo surgit in ensem,  
 Horrisono rapidos calamos modo torquet ab arcu.  
 Hinc atque hinc animas exhalant vulnere multi  
 Romulidum; contra Cajum dum conjicis hastam,  
 In pulmone tepet, Manli, tibi missile Moenae;  
 Tu cadis; in Cajum morienti ast infremis ore.  
 Haec inter turmas immittit Marcius, hostis  
 Ut latus oppugnent. Advertit Cossus, et acer  
 Occurrit rapiens equites, ac eninus hastas  
 Conjiciunt primo incursu; tum cominus urgent  
 Pectora pectoribus, rumpunt et pectus equorum  
 Qui magno terram strepitu cum milite plangunt.  
 Pluribus at stratis flammantia lumina vertit  
 Orphitus in Cossus, qui magnis vocibus agmen  
 In Volscos urget. Plagarum multa gerebat  
 Hic gremio signa; impubes a patre feroci  
 Nam fuit in fortes Romanos raptus ad arma;  
 Acriter et subiit pugnas, odiumque paternum  
 Exercebat atrox; tum vero Umbrone magistro  
 Turmae ducebat partem. Jam protinus hasta  
 Pertingit Cossi laevam, calcaribus armos  
 Caedit equi, insultatque solo, convertit et hosti  
 Terga; retro capitis rediens et perforat arma,  
 Infigitque leves plagas. Tum conjicit hastam  
 Dentibus infrendens Cossus; revolutus ab alto  
 In terram procumbit equo, moriensque precatur  
 Orphitus excidium Romae. Dux acrius urget  
 Impellitque manu Rhoeteum, sub pectore lapsi  
 Et super incumbens telum defigit; at ille  
 Ingemit extremum moriens. In tempora Cossi  
 Tarquitus haec inter spirans immane securim

Vibrat ; lethali at ferro se subtrahit ille ,  
 Atque simul validis contorquet viribus hastam ,  
 Et Volsci defigit in inguen ; calcibus atram  
 Tundit humum ille cadens, foedatque cruore bipennem.  
 Longius impulerat caedis vesana cupido  
 Aemilium juvenem inter pulchra pericula. Cossus ,  
 Qui miro fratrem complectebatur amore ,  
 Pectore turbato procurrit , et obvius illum  
 Leniter objurgat , prohibetque recedere , rursus  
 Et pugnam instaurat , propius simul arma movente  
 Aemilio ; hinc equites , Volscorum robora pubis  
 Procumbunt fratrum ferro. Non distat ab illis  
 Umbro inter pugnas ardens , quem provocat acer  
 Ventidius jaculis ulturus funera patris  
 A duce demersi letho. Sed conjicit Umbro  
 Admorso telum labio , frontemque superbam  
 Caedit equi ; quadrupes se tollens hinnit acutum ;  
 Ast effusus eques confestim surgit , et ense  
 Irruit in Volscum , qui ferrum in gutture condens  
 Ventidium sternit. Conversus tela ferentem  
 Corvinum cernit , contorquet et illico pinum ,  
 Quae costas frangens cor figit , et illius artus  
 Ferreus in terram lapsos pes calcatur equorum.  
 Surgentem Vari valido dux amputat ictu  
 Dextram, quae ferrum linquit, delapsaque terra est,  
 Semianimesque micant digiti , Varusque secutus  
 Extremos tollit gemitus cum sanguine fundens  
 Vitam. Procedit caedisque relinquit acervum  
 Umbro celsus equo , et socii inclinata gerentes  
 Spicula ; pugnantum strepitus gemitusque cadentum  
 Tollitur atque pedum sonus ac hinnitus equorum.  
 Aequicolus pariter stipatus fortibus Aequis ,  
 Venatu nemorum suetis et caede ferarum ,  
 Non procul aggreditur pedites ; et primus in hostes  
 Procurrens medios tanta vi fulminat ense ,

Perforet ut gremium lethalis mucro Metello ,  
 Et tibi , Corneli , qui vibras tela propinquus  
 Olli , transadigat latus , et prosternat arena  
 Ambos. Inde Procae capiti demittit ab alto  
 Ictus , et frontem scindit cerebrumque cruentum  
 In binas partes ; aliis et munera vitae  
 Aufert ; et quamvis non uno vulnere laesus ,  
 Non remoratur iter ; generosum gloria ducit ,  
 Impellitque furor , similique ardore sequuntur  
 Atque solo socii prosternunt fortia multa  
 Corpora ; et in totis vulgus sine nomine campis  
 Concidit , ac terram palmis et pectore plangit  
 Aut latere aut humeris. O nox fatalis , ab alto  
 Quae conspexisti velasque silentibus umbris  
 Tot Romanorum casus miserandaque facta ,  
 Sit fas in lucem proferre et pandere cantu ,  
 Incautae monitum publi persaepe neganti  
 Illis obsequium , quibus est suprema potestas  
 Rerum. Marciadis confestim voce verenda  
 In cuneos se nunc constringunt agmina , nunc sese  
 Effundunt late ; gladio nunc turba repente  
 Impetit ; haec punctim , caesim ferit illa caterva ;  
 Aut propius ferro , procul aut infligitur arcu  
 Vulnus ; et his Volscus pugnas init artibus. Urbis  
 Ast acies tenuis ductorum ars dirigit , ingens  
 Et virtus prohibet , saevo ne turpiter hosti  
 Convertant humeros ; hinc Volscos fortiter ora  
 Ostendunt , retrahuntque pedem , vitamque tuentur  
 Fasibus et clypeis. Volsci sed pressius urgent  
 ( Marciadis magni vox plusquam buccina noctis  
 Per tenebras resonans ipsos inflamat , et auget  
 Vires ) , et pedibus conculcant mortua , viva  
 Corpora , quadrupedes , currus , vexilla , sagittas.  
 Per medias equitans it nudo Marcius ense  
 Impavidus caedes ; nec ferrum vibrat in agmen

Romulidum, propriae nisi cum tutela reposit  
 Vitae; tela sibi tinxisse cruore latino  
 Esse satis censet; nunc Romae sternere natos  
 Vi mentis multo praeclarius esse tuetur;  
 Tum nunc magnanimum clypeum, nunc ictibus arma  
 Opponens animo, vigilantî lumine, cursu,  
 Et miro imperio jam Volscum sueta triumphis  
 Arma movet. Celerans ut prorsus deleat agmen  
 Moenibus egressum, tum fatur: curre per arva,  
 Gressibus hinc versis, Umbro, improvisus in hostis  
 Terga ruas, reditum praecludas. Dixit; at ille  
 Quadrupedem stimulo pungit, sociique sequuntur.  
 Et jam Romulidum numero tenuata caterva,  
 Non virtute virum, parvas Almonis ad undas  
 Venerat. Aeneadum cladem Volcosque ruentes  
 In muros pallens Urbi cum nuncius affert,  
 Et vario vulgi turbantur corda tumultu.  
 Ast imperturbata patrum praesaga malorum  
 Mens lectos laudans juvenes hortatur ad arma,  
 Ocyus ut retrahant socios a limine lethi,  
 Et portas pandit Numitori; cumque cohorte  
 Ille pedes effert, juvenis ceu currit ad aras  
 Connubii; celerat, sed tardius ire videtur  
 Damna morae pavitans; en audit ad arma vocare,  
 Protinus arma simul jaculari callis ab altis  
 Rapis; et casum cernit funusque suorum,  
 Atque repente vias clausas hostilibus armis.  
 Dentibus infrendet Numitor, sociisque vocatis  
 Irruit in pedites, ductor quos urget ad arma  
 Nursinus; primo nec Volscum concidit unus  
 Incursu. Verum te Volscum tela, Vopisce,  
 Sternunt, cui dilecta parens e stirpe creata  
 Lartî, nam magnis juvenis dum viribus ictus  
 Ingeminat praeceps, Ufens sub gutture ferrum  
 Abscondit; moriens reminiscitur ille parentem.

Dux volsens plures haud claro sanguine cretos  
 Huic addit comites. Summa nituntur opum vi  
 Agmina, scuta sonant, fulgent ensesque per umbras;  
 Non se Romanus retrahit, non Volscus, et aequat  
 Alternos Mavors ictus et funera; quando  
 Turbida fama ruit, Volscūm resonatque per aures  
 (Incertum, unde prius vox vana eruperit), arma  
 E Romae portis effusa volare ferendo  
 Auxilium sociis, claudendum protinus hoste  
 Volscūm, ni fugiat. Mentēs formidinis umbrae  
 Tum vero obducunt; errat sine lege per agros  
 Volscā manus dextris incassum missile gestans.  
 Nomine quemque vocans iratus vocibus urget  
 Ufens incassum; cū quando timore quadriga  
 Corripitur, frustra vocem moderator equorum  
 Tollit lora trahens; non audit currus habenas.  
 Almonis circa ripas exarserat inter  
 Haec certamen atrox; rauco jam corpora multa  
 Aut volvebantur fluvio, vel caesa jacebant;  
 Hostis ubique premit Romanum, Marcius ante os,  
 Dux Umbro a tergo. Progressus straverat hasta  
 Quadrupedem Cossi Moenas, et fixerat olli  
 Crus ferro; quamquam sed tardus vulnere ductor  
 Non cedit pugna, telumque immane coruscat.  
 Interea fortis discrimen nuncius affert  
 Aenilio, caedis quem dira cupido ferebat  
 Inter tela procul; suspirans fratris amore  
 Ille dedit lacrimas, gladioque cucurrit in hostem:  
 Cede loco; vulnus non fert, ut, Cosse, retractes  
 Telum; sic fatur, seseque immiscuit armis,  
 Surgentique subit dextrae, gladiumque ferentem  
 Plagam sustinuit ferro, dum tectus abiret  
 Germanus. Pius incautum desistere pugna  
 Hortatur Moenas. At non minus igneus ille  
 Exultat. Marci comitem tum ferrea belli



Lex urget ; valido nam ductor candida rumpit  
 Pectora mucrone ; ille cadit resupinus in arvis ,  
 Et fratrem vita decedens advocat. Hasta  
 Sustentans gressus tum , qui prope cuncta videbat ,  
 Sic fatur Cossus : quid me , saevissime , fratre  
 Erepto servas ? Venio moriturus , et ista  
 Dona tibi primum porto. Celeresque sagittas  
 Dentibus infrendens mittit ; tum diripit ense  
 Vagina , et quamvis alto vis vulnere tardet ,  
 Invadit Moenam , crebros et dirigit ictus  
 In gremium , in jugulum : pietate retentus at ille  
 Se clypeo gladioque tegens haud impetit aegrum ,  
 Et verbis lenit. Verum asper et improbus ira  
 Dux in perniciem incumbit nobilis hostis ,  
 Ac odit lucem ; tum demum concidit ipsa  
 Exanimem supra confossus cuspidem fratrem ;  
 Et reliqui torvo Romani lumine primum  
 Ex ducibus Cossum cernunt mucrone cadentem ,  
 Ac volunt animis unam superesse salutis  
 Spem , nullam sperare salutem. Turbinis instar  
 Ecce autem Numitor procurrens fulgurat armis  
 Instaurans pugnas , et vividus agmine cinctus  
 Euse ferit , sternit. Voces ad sidera jactant  
 Auxilium socii cernentes ; undique septi  
 Nam volscis armis jam caedebantur ad unum.  
 Tum Cato cum reliquis laetus se jungit amicis  
 Agminibus , semper versis ac oribus aspros  
 Ad Volscos retrahunt gressus , et tela retundunt.  
 Jam septem propius colles aeternaeque Romae  
 Moenia surgebant humeris obversa cohortis  
 Quae remeat pugnas ; densa intra limina portae  
 Expectat pubes , audit bellicae propinquos  
 Mugitus , pugnae generosum ac sentit anorem  
 Pectore ; jamque foras clausis erumpere muris.  
 Et sueta cuperet virtute domare superbos ,

Ulciscique necem sociorum. Consonat aure  
 Sed legis jussus, sancti monitumque Senatus,  
 Et magnos animi nisus gressumque refrenat;  
 Ceu signum sonitumque tubae cum sperat equorum  
 Agmen decertans cursu; pede pulsat arenam,  
 Impatiensque morae fumum de naribus efflat;  
 Jam volucres vellet saltus iterare per arva,  
 Cursibus et metam transire; at tensa catena  
 Ad pectus remoratur iter. Jam currere Volscum  
 In Romam, caesos plures e prole Quirini,  
 Vix haec accepit generosus Lartius aure,  
 Stare domi renuit, membrisque trementibus aevo  
 Loricam cingit, laterique accommodat ensem,  
 Atque tegit galea canos. E patribus ingens  
 Agmen, Posthumius primus revocare ruentem  
 Contendunt patrem; non audit; jamque Capenae  
 Evadit limen; sequitur quem turba clientum;  
 Nec tanto linquit discrimine fidus amicus.  
 Vix lapidis jactu muris secesserat, umbra  
 Sublustri ductor cernit romana per auras  
 Signa volare, feros audit clamore sequentes  
 Volscos. Nudato ferro tunc anteit omnes  
 Lartius, atque alte sublatum surgit in ensem  
 Contra ductorem Palmum; sed protinus ille  
 Opponens gladium devitat funera; rursus  
 Cuspide longaevis ferit, at se subtrahit ensi  
 Volscus; multa viri inter sese vulnera jactant  
 Nequidquam; Lartii sed vires conscia virtus  
 Et pudor incendunt, vincat quia serius hostem  
 Romanus; validum tum tandem conjicit ensem  
 In fortem juvenem, totumque in pectore condit,  
 Armigerumque ducis lethali vulnere, multas  
 Et non obscuras vitas extinguit; adurgent  
 Praeclari comites Volscorum tela, verendi  
 Artus ne patris ferro tangantur; at inter

Tot caedes subito confosso pectore ab hasta  
 (Qua contorta manu latuit) resupinus in arvis  
 Inclytus ille ruit, sonitum super arma dedere.  
 Magnanimi casum patris gemuere cohortes :  
 Qui cadis o Romae custos o gloria, Larti !  
 Ira, dolor, caritas certant et patria virtus  
 Pectore Romulidum ; tum crebris ictibus urgent  
 Hostes, ne corpus rapiant insigne trophaeum.

Ast ubi Posthumius generosum vidit amicum  
 Pectora transfixum ferro campoque jacentem,  
 Corde trahit gemitum lacrimis ac irrigat ora.  
 Tum volat ante aciem primam, gelidumque cadaver  
 It circum ; clypeumque ingentem opponit, et hastam  
 Quassat, morte parans dejectum sternere, quisquis  
 Obvius arma ferat. Majora at viribus audens  
 Antiacus praedae spoliolum et fervet amore,  
 Magnanimumque ducem Quercens sic increpat : isthinc  
 Cede procul ; bellum nemo tulit acrius urbes  
 In volskas, caesus quam Lartius. Anne repelles  
 Agmen, quo jacuit victus, ne praemia tollat  
 Pugnae ? Cede ; cadas et tu ne cuspide volsca.  
 Cervicem quassans Romanus torva tuetur ;  
 Ille tamen primus clypeum ferit incitus hasta  
 Adducta ; solido sed cuspis in aere reflexa est ;  
 Tum ruit in Volscum ductor mucrone secundus,  
 Nec non transfixit guttur, ferrumque cruentum  
 Parte alia exegit molli e cervice. Sed urgent  
 Hinc Volsci, hinc telis Romae generosa juvenus ;  
 Caesa solo calcant bellantes corpora ; clarum  
 Exanimemque virum spes illis limen ad Anti  
 Pertrahere, his Romae intra moenia ; durus utrinque  
 Exoritur fervetque labor sine fine. Sodalis  
 Inclytus extincti tum forti dicta Catoni  
 Et Numitori convertit, carumque tuetur  
 Ense simul corpus : vos ambo subite cadaver,

Ac humeris medio sublatum efferte tumultu ;  
 Ne telis autem transfigi terga ferentum  
 Possint , nos hostem contra pugnabimus. Olli  
 Ast ulnis amplexi alte a tellure cruentos  
 Sustulerunt artus , et quamvis ingruat imber  
 Telorum , media e turba mediaque ferebant  
 Laeti animis caede ad portas sine sanguine corpus.  
 Ecce autem celsis cives a turribus hostem  
 Proturbant telis , magno clamore vocantes  
 Volscorum terrorem inter bellicae ruinas  
 Elapsos cives. Hi magnis nisibus iras  
 Victorum reprimunt ; ceu nautae fortius urgent  
 Iratos fluctus , cum portus ora patere  
 Cernunt ; sed tandem multo sudore madentes ,  
 Vulneribus laceri , laceri crudeliter arma  
 Et vestes , animis non fractis limina scandunt ;  
 Et socii multa converso cardine portas  
 Vi torquent humeris obnixa , hostemque ruentem  
 Rejiciunt. Et jam stellis aurora fugatis  
 Almam ducebat lucem mortalibus aegris ,  
 Ac irrumpentem Cajum vidisset in Urbem  
 Illa dies. Magno sed pugnant murmure venti ;  
 Nigrautes actae vix nubes turbine colles  
 Tangunt , hinc atque hinc rutilans electricus alto  
 Praecipitat caelo torrens , ac aethere rupto  
 Collis Aventini , Tarpeji , Tiberidis undae ,  
 Et lati tonitru crebro tremuere sub Urbe  
 Campi ; tum densus stridente aquilone procella  
 In Romanorum vultus immittitur imber ,  
 Contegitur belli facies caligine tetra ,  
 Immensique lacus species urbana videntur  
 Arva : cadunt flammae , densusque it fumus ad auras ,  
 Volscorumque fremunt acies in castra ruentes  
 Saeva praereptis a tempestate triumphis.  
 Romulidum reliqui elapsi de caedibus intrant

Tecta, fiventque suos amplexu, talia corde  
Fundentes: equidem nimia certavimus ira  
Contra Marciadem, contra praecepta Senatus,  
Et jacet in campis sociorum magna caterva;  
Vix nos servarunt Superi. Pomoeria circum  
Bellutus, Decius, Brutus caesisque propinquis  
Aegra manus, lentis, taciturnis passibus errant;  
Et saepe ad tristes campos, ubi funera prostant,  
Sanguineas vertunt acies, maculaeque trementes  
Suffundunt malas, exanguis tingit et ora  
Pallor. Sic arva immiti populata videmus  
Grandine: convulsis calami spoliantur aristis:  
Stant sine fronde rosae, stat secto caule papaver.

At non in patres placabilis ira tribuni  
Refrenat gemitus, lacrimas et sorbet obortas.  
Vix tempestatis paulum violentia cessit;  
Ingens fit circa muros portamque Capenam  
Concursus; noscunt comites carosque propinquos,  
Atque vocant vita functos, atque oscula figunt.  
Praecipue moesto venerandi lumine patres  
Imponunt humeris ductoris triste feretrum  
Lati iucedentes lenti per flexa viarum,  
Quae longum lugent. Media sustollitur ingens  
Luce Fori rogos è piceis atraque cupresso;  
Hunc super imponunt, et pictis vestibibus ornant  
Corpus. Posthumius postremos solvit honores,  
Atque ducis laudes memorat devictaque bella  
Multa gemens; late fletu resonatque platea;  
Supponunt tandem taedas et tollitur ignis.  
Tardo volvuntur passu telumque tenentes  
Ter circum flammās acies, funusque ululando  
Lustrant; ad caelum fumus, moestusque tubarum  
It clangor, clamorque virum, saevique dolores  
Faeminei. Infelix ast circum Julia muros,  
Armatas acies inter famulasque gementes,

Scissa comas errat, moestos ac tendit ad agros  
 Palmas, Cosse, gemens, mea spes quo, Cosse, ruebas?  
 Eccur uxoris lacrimis monitisque Senatus  
 Claudebas aures? Uxorem ubi, Cosse, relinquis  
 Et miserum puerum? Pereat nox horrida, quando  
 His acies muris erupit; dissipet illam  
 Turbo, nec in partes eat anni! Summe Deorum,  
 Cur non me telo sternebas, saeva priusquam  
 Funera vidissem? Quid vanos pectore ducō  
 Questus, et corvis linquo canibusque latinis  
 Cossi reliquias? Inhumatum squallida circum  
 Litora Cocyti tendentem brachia frustra  
 Terribili cerno nautae. Reserate Capenam;  
 Quaerere stat caros artus avulsaque membra.  
 Ipsa humeris lacerum portabo funus, et Urbi  
 Ostendam caesum Volscorum cuspide civem;  
 Subjiciam vestris, equites, quos Cossus amabat  
 Ceu fratres, oculis ductorem funere mersum;  
 Ostendam puero patrem, lacrimasque ciebo  
 Et defleta tegam monumento membra, paludes  
 Ut detur stygias innare, domosque piorum  
 Endogredi. His animi concussi, pectore longos  
 Dant cuncti gemitus, ad praelia deficit ardor.  
 Corripiunt juvenes tum patrum nutibus illam  
 Quae incendit luctus, saevumque levare dolorem  
 Nituntur, manibusque piis ad tecta reportant.



## LIBER NONUS

## A R G U M E N T U M

*Dum Roma turbatur, Antium exsultat et decernit munera Marcio, et Tullus parat ire, et gratulari victori. Patres noctu mittunt, qui vires et mentem hostium explorent. Hortationibus Posthumii omnes majori studio sese parant ad bellum. Matrum concursus ad templa, eorumque consilium adeundi Marcium cum ejus conjuge et parente. Volumniae fuga in aedes Castoris, reditusque domum ad monitus Consulis Furii. Ob auroram borealem vulgus valde turbatur, et auctoritate librorum sibyllinorum monetur, ut hostem repellat a muris. Volunnia rursus parata fugae cum filiis a socru retinetur domi. Marcius ne distraheretur a subito Tiburtinorum incursu, sistit agmen in tumulo qui tiburtinam viam respicit, et mittit ad eos Anthaejum, prohibetque ne pubem educant e muris in Romae oppugnatione.*

**A**t Veturiadis nomen palmaeque recentes  
 Festivas Volscum late resonare per urbes;  
 Instat et Antiacus populus monumenta decoris,  
 Et memoris cordis ductori ferrier, altum  
 Cujus consilium et robur miratur in armis  
 In primis Tullus. Magis omni sole nitentem,  
 Atque suae noctem genti vocat ille beatam,  
 Qua volscos jacuit ferro romana juvenus.  
 Multa super Cajo rogitans et multa renarrans  
 Facta viri, nequit expleri rursumque videndi  
 Flagrat amore ducem; parat ire palamque profari,  
 Cujus proposito plaudit mens celsa Senatus,  
 Legatosque, novasque acies, et maxima summo  
 Mittere dona viro statuit. Sed murmura falsae

Famae concutiunt Urbem, tentoria Volscum  
 Agmine plena novo, totis descendere campis  
 Conversis Urbi telis tot millia, saevis  
 Quot nunquam portis misere in praelia Romae  
 Arces infensae. Romana at pectora flammis  
 Valdius uruntur patriis, instare periculum  
 Cum gravius patriae cernunt, ac pacis adempta est.  
 Spes omnis. Proavique senesque trementibus aevo  
 Membris heroas priscos et robora gentis.  
 Laude celebrantes accendunt corda suorum.  
 At densis turbis stipatus fronte severa  
 Nautius et Furius stridenti cardine Jani  
 Impellens pandit portas ac intonat ore  
 Bellum; voce simul bellum vocat effera pubes,  
 Atque tubae geminant bellum, caelumque remugit.  
 Jamque viri et juvenes sagulis latera ardua cingunt,  
 Obducunt galea crines, hastilibus armant  
 Dextras, lorice pectus. Jamque ore vocante  
 Consulis extemplo tarpejas agmina linquunt,  
 Et Jani reliquasque arces, seque ordine ponunt  
 Sub duce quisque suo Capitolii colle sub alto,  
 Constringunt qui gaesa manu, qui missile ab arcu,  
 Aut lapidem jaciunt funda, qui pila coruscant,  
 Quique gerunt hastas fulgenti cuspide, quique  
 Terga premunt spumantis equi, capita ardua cristis  
 Purpurei. Magni circumstant centuriones  
 Stringentes manibus virgas. Se continet omne  
 Agmen sub veli signis pendennis ab hasta,  
 Aut aquilae fulvae pandennis ad aethera pennas,  
 Infixaeque manus telo quo scutula pendent;  
 Estque locuturo legionibus ore tribunos  
 Cernere quos radians discernit pugio. Plena  
 Milite lata Fori productaque strata viarum;  
 Et densis circum seges undique ferrea telis  
 Horret. Non paucos longa experientia belli



Artes edocuit ; membra indefessa labori  
 Ac robur cunctis , generosus fulget et ore  
 Mortis contemptus. Mediis tum millibus armis  
 Clarus Posthumius procedit ; Cassius acer  
 In bellis dextra , laeva legatus euntem  
 Claelius insequitur lato conspectus in ostro.  
 Ocyus ante ducis vultus hinc inde catervae  
 Se retrahunt panduntque vias , et classica caelum  
 Laetifico replent sonitu , veteremque salutant  
 Victorem Volscum. Patres sanctusque Senatus  
 Tarpejo in clivo septi lictoribus adstant ;  
 Quos prope praetores hastam gladiumque ferentes ,  
 Atque magistratus queis nomen ab aede , vocati  
 Et qui quaerendis noxis ; et cogitur omnis  
 Ordo ministrorum fulgens insignibus. Urbis  
 Sollicitae cura matres plebejaque turba ,  
 Et pueri studio circum funduntur , et arces  
 Celsaque tectorum pallescens ora senecta  
 Obsidet. Altus equo ductor patriaeque Senator  
 Intentis tacitis sic omnibus ora resolvit :  
 Quo pacis studio patres Urbs miserit hosti ,  
 Quo fuerint fastu Romae ter vota repulsa ,  
 Qua nuper Divum sacri impietate ministri  
 Rejecti castris , cives infanda frementes ,  
 Spectastis. Romae natos jam summa salutis  
 Lex urget ; superest magnas decernere ferro  
 Lites. Nec diris equidem dstringimus arma  
 Ominibus. Testes sunt conscia Numina veri ,  
 Testes Ausoniae populi ; non crimine laesa  
 Gens Volscum Romae socias prior obruit armis  
 Urbes ; nunc refugit foedus , patriaeque minatur  
 Excidium. Romae sub signis ergo Deorum  
 Numina pugnabunt , quae vim cultoribus addunt  
 Pacis , et oppressos tollunt. Nunc robur avorum  
 Spectandi tempus ; nunc Romae cuspe fusa

Corpora tot Volscum, tot rapta ex hoste trophaea.  
 Haec super anne feret Romanus funus inultum  
 Larti, tot ferro cives equitesque jacentes,  
 Totque duces Urbis, latiae tot lumina gentis  
 Extincta? Haud ita; nos primi capita alta feremus  
 In muris; primos stat Volscum sumere poenas,  
 Et durum virtutis opus perferre. Recedat  
 Qui non romanum deses pulchrumque putabit  
 Dura pati; socium se Volscis addat, et hostis  
 Turpe jugum subeat. Dum vitae luce fruemur,  
 Nos ferro Volscum, nos insectabimur igne.  
 His animos magis accendit virtute calentes  
 Posthumius. Pontes et propugnacula jungit  
 Pars Jani in clivo; pars anxia ligna molaresque  
 Et belli moles supra pomoeria torto  
 Fune trahit; totam puerique senesque per Urbem  
 Hastarum gestant fascēs contosque trabales  
 Ac saevos ignes. Concordi mente Senator,  
 Austerus praetor, Consul sonat ipse flagello,  
 Atque graves armis tarpejam vectat ad arcem  
 Currus; it circum mixtus cum plebe Sacerdos,  
 Pondera fertque manu, qua Divis thura solebat.  
 Nobilitatis abest invisā superbia; livor,  
 Civilesque tacent rixae, vacuumque tribunal  
 Omne silet. Longis remeant in corpora vires  
 Debilitata malis, et mens tot millibus una.  
 Nec cinctae tantum vallis et milite et armis  
 Repletae turres apparent, moenia, colles;  
 Ast humiles inopum sedes, ac tecta superba  
 Ultima bella parant; cumulantur culmina celsa  
 Dejiciendis supremo discrimine saxis  
 Et tignis; fodiuntque fenestras pariete, tutas  
 Hastas utque faces jaciant. Fodientia scalpra,  
 Malleus impactus, cuneus, crepitantia plaustra,  
 Et serrae stridor, rupes, et robora tracta,

Impetus atque virum clamor, strepitusque viarum,  
 Et varii motus animorum foedere amico  
 Ad Romae auxilium tendunt patriaeque salutem.  
 Hyblaeum veluti vario concorditer agmen  
 Indulgens operi fucos praesepibus arcet,  
 Purpureosque metit flores et flumina libat,  
 Spiramenta linit tectorum, et glutine complet,  
 Progeniem nidosque fovet, miroque labore  
 Excudit ceras et mella tenacia fingit.  
 Roma, vocabaris quam pulchre martia proles!  
 Non minus atque virum pectus, discrimine summo  
 Faemineus patriae sacro comburitur igne  
 Coetus, cui pietas insignis pectore flagrat,  
 Atque superbus adest exquisitusque doloris  
 Sensus; et assumit curas operumque labores  
 Pars conjuncta viris; pars culmina celsa Palati  
 Scandit; Aventino descendit turba solutis  
 Crinibus; ast aliae Exquiliis in montibus errant,  
 Aut in Vimineis obductae vestibibus atris  
 Gestantes ulnis pueros, hinc templa Cybeles  
 Structa palatinis ultoris munere Bruti  
 Clivis turba petit plebejo sanguine creta.  
 Ast aliae lacrimis rorantes lumina sanum  
 Eductum pietate Numae Vestaeque dicatum,  
 Aut sacra Junoni, cypriae seu limina Divae,  
 Aut quas erexit Latonae Servius aedes  
 Intran implorantque Deos, arasque lacertis  
 Nunc complectuntur, nunc signis oscula figunt;  
 Et tollunt manibus natos, et fletibus ora  
 Rorantes Superos orant, pia lumina saltem  
 Convertant nulla foedatis labe puellis.  
 Haud tantus forsán turbavit pectora terror,  
 Quando sabina manus tarpejas ceperat arces,  
 Aut cum Janiculo Porsenna tonabat ab alto.  
 Praeclarus matrum coetus Capitolia summa.

Incessum lentus, pallens os, pectora moerens  
 Scandit, marmorea persolvens thuris honores  
 Aede patris Divum; tum summi nobilis uxor  
 Virgini aequa viro facundo pectore fatur:  
 Summe parens hominum, facinus qui fulmine terres,  
 Virtutisque caput cingis splendore, quousque  
 Hostilis Romam premet ira? Quousque rebellis  
 Tot socias urbes sternet, tot mittet ad orcum  
 Illustres animas? Armarum conspice nubem  
 In nostras arces properantem; cerne latinos  
 Sanguine respersos campos, suspiria, fletus  
 Exaudi; fastum tua dextera conterat; ora  
 Ostende, et facinus nebulam ceu disjice. Per te  
 Non Urbis muros evertit turbo sabinus,  
 Non aequus, non etruscus, nec volsca procella,  
 Jugiter irrumpens. Jam funera prisca noventur;  
 Volscorum dele nomen; nam saevus ut olim  
 Hostis, nos aequae fidi, tua dextera semper  
 Omnipotens; duce te surgunt teque auspice turres  
 Urbis, te late victrix haec auspice stravit  
 Gentes. Sacra ruent ergo tibi moenia, et ingens  
 Gloria Romulidum? Septenis collibus ergo  
 Barbarus iusultans regnabit? Dissipet eurus  
 Omen funestum; pietas tibi pectore summa  
 Flagrat; Roma vocat patrem, neque corde paterno  
 Excidium versas Urbis. Sic illa rogabat.  
 Ingenio has inter praeclara Valeria flebat;  
 Illa gemit, illa caput flectens et lumine clauso,  
 Consertis manibus fundebat vota precesque;  
 Nunc se prosternit, tundit nunc pectora palmis;  
 Ecce repente, latens veluti si pectora Numen  
 Afflaret, vultum tollens stetit abside templi,  
 Atque manum tendens, loquitur mihi Juppiter, inquit;  
 Me Deus incendit; Deus est, qui verba ministrat.  
 Audite, illustres matres, quibus astra decoris

Aeternum servant. Pro nobis Numina ; nostris  
 In manibus pacis spes omnis ; libera Roma est ,  
 Si mox quaeque pedem moveat quocumque vocarim.  
 Faemina num praestet , quod vir molitus inani est  
 Cura ? Pauca refert tum tollens ora Sabina  
 Consilio pollens , Appi lectissima conjux ;  
 Ad quam non paucis sic ore Valeria : verbis  
 Et lacrimis opus est ; non vis ferrumque cruentum ,  
 Sed pugnabit amor ; nil sancto obstat amor.  
 O quarum pectus patrio succenditur igne ,  
 Haeredes matrum , quae restinxere sabina  
 Bella , procul gemitus ; ingentes namque Deorum  
 Concilio victae causae ; pax alma redibit.  
 Pontificum patrumque sibi non arroget agmen  
 Incoepti tanti partem. Veturia Cajo  
 Quae vitam tribuit , patriaeque incendit amore ,  
 Haec in corde ducis sopitos una ciebit  
 Ignes ; haec matri servatur gloria. Sicut  
 Delapsum numen caelis , in castra repente  
 Nobiscum mater descendet , et omnia versa  
 In melius ; pulsas tenebris aurora micabit  
 Pulchrior. En Volscum legio stupefacta ; furoris  
 Extinctae flammae Marci virtute. Frementes  
 Antiacos plausu muros et littora , laude  
 Divorum magnae Romae resonantia templa ,  
 Cunctaque saecula decus nostrum geminantia cerno.  
 Ergo quid ancipites ? Matris properemus ad aedes ,  
 Et Divum mentes pandamus ; callis apertus ,  
 Aeternaeque salus Urbis segura. Loquenti . . .  
 Exardent vultus , turget cor. Laeta caterva  
 Hos clamat sensus altae tibi Numina Romae  
 Inspirant. Alacres , prior illa e limine gressus  
 Extulit , hinc reliquae vertentes pectore plura.  
 Ast inter strepitum armorum populique labores  
 Infelix moestis inclusa Volumnia tectis

Ingenti cura jactatur ; namque tribuni ,  
 Atque timet vulgi ne denuo conflagret ira ;  
 Nec sua , sed prolis quatiunt discrimina pectus ,  
 Pro cujus vita maternum laeta cruorem  
 Funderet. Illa timet , populi violentia natos  
 Ne ruat in miseros non lenis patris ; et omni  
 Consistens vocum sonitu , nunc arrigit aures ,  
 Nunc vertit caris lacrimantia lumina , caelo  
 Nunc tollens exposcit opem , nunc anxia flagrat  
 Clam fugere , et natos et se mox sistere Cajo ;  
 Innocuis caecas nunc circum tecta latebras  
 Sollicito quaerit gressu ; ceu septa corona  
 Venantum trepidans nemorosa cerva caverna ,  
 In qua lac sugunt catuli sua cura tenelli ,  
 Nunc natis trepidat , nunc turbis lumina figit ,  
 Nunc stat , nunc errat replens plangoribus auras ,  
 Passim et poscit opem. Prolis tunc anxia templis  
 Tyndaridum Veturiadis se condere conjux  
 Constituit ; miserae menti spes namque salutis  
 Illac effulget. Quare comitata ministris  
 Nutrice et pueris properat , tacitumque penetrat  
 Antiquae conclave socrus prior ora resolvens :  
 Cernis ut in cunctos ultoris dextera Marci  
 Se immittat ; contra cunctorum dextera in ipsum  
 Inque suos ; secura domus non amplius haec est.  
 Non procul hinc aedes Marci monumenta , Regilli  
 Ad litus fractis Tuscis ; ad Castoris ergo  
 Migremus ; vulgi cum nunc deferbeat ira.  
 Hos miseros pueros votiva tuebitur ara  
 Tyndaridum. Mortem speruens excedere sede  
 Antiqua renuit mater ; sed valdius illa  
 Vultu et lamentis miserandis instat et urget ,  
 Et parvi tendunt oculos palmasque nepotes ,  
 Et famuli et nutrix , ne cuncta evertere secum  
 Vellet ; proposito illa tenax at inhaeret eodem.

Tum natis mater formidans damna morarum  
 Implorat veniam, socrus curamque ministris  
 Credit; tecta caput lino candente, decoros  
 Uda oculos lacrimis, manibus trahit ipsa puellōs,  
 Et gressus effert e limine; pone secutae  
 Sunt dominam miserans nutrix, ac Tullia pulchros  
 Ampla oculos. Gradiens natis sic illa profatur:  
 Si minus arderent vos matris corda, vererer  
 Nunc minus; at matris pectus minor ureret ignis,  
 Ni vester sine fine parens haud dignus amore;  
 Vita nec in votis mihi; sed vos reddere patri  
 Incolumes, pueri; vicinam properemus in aedem,  
 Quam meminit victis erectam Roma superbis  
 Regibus ob Marcī robur. Clarissima summi  
 O patris Soboles, quae nobis lumen amicum  
 Funditis, hos pueros vestro sub numine sisto  
 Conspicuos vestra, si fas est dicere, forma;  
 Hos festino parens sacras adducere ad aedes,  
 Iras ut contra vulgi sint ferrea turris.  
 Vix vestra attonitis candentia sidera nautis  
 Effulgent, saxis agitatus defluit humor,  
 Stant venti, fugiunt nubes, pontoque recumbunt  
 Fluctus; fortunae sic o sic, astra benigna,  
 Immeritas mulcete iras, et numine vestro  
 Asservate domum Marcī! Memori ipsa quotannis  
 Pectore candentes jugulabo pinguibus agnos  
 Aris. Haec orat; fida et nutrice secuta  
 Passibus incertis errat, natisque paventem  
 Vox omnis, pulsusque pedum, levis excitat aura.  
 Jamque Forum propius tendit; tunc obviis illis  
 Fit Furius Cajo longo conjunctus amore,  
 Et prior aggreditur: quo, moesta Volumnia, tanto  
 In sonitu belli, pueros quo proripis anceps?  
 Fare age; dixit, opem cupiens ita ferre relictæ:  
 Quid petis? Unde furor? Tunc amens illa timore;

Si mactare suos ardes, cum sternere Cajum  
 Non valeas, miseris ignosce, effunde cruorem  
 Matris; foedati nullo isti crimine crescunt  
 Ad patriae columen. Tum Consul: siste moveri;  
 Non odium ducit, solandi at pulchra voluptas  
 Quam dederunt homini Di praemia grata laborum.  
 Illius ad mentem revocat, se foedere prisco  
 Marciadis junctum domui, Romaeque decoros  
 Mores in miseros pueros haud vertere tela.  
 Turbato sensim componit pectore fluctus  
 Talibus, atque animum reddit; fandique peritus  
 Hortatur remeare domum, magnamque parentem  
 Solari; illa minus trepidans ad tecta recurrit,  
 Imperturbatae socrus atque ora revisit.  
 At lentos vertens turbato pectore ad arces  
 Tarpejas gressus haec secum Consul: acerba  
 Invidia quotnam rumpuntur castra, quod Urbi  
 Arridet dudum vultu fortuna sereno!  
 Quot cupiunt animi hoc vitam traducere caelo!  
 O si spectarent haec propter moenia! Pulchro  
 Heic libertatis delusum nomine vulgus  
 Illorum saevis qui praebent foenore nummos  
 Arbitriis premitur, misero qui libera linquunt  
 Vix verba et lacrimas; heic inopia porrigit ensem  
 Lex in progeniem patri, dominoque feroci  
 In famulos; jugi heic vulgus succenditur ira  
 In patres, patres in vulgus; surgere numquam  
 Cernitur heic pleno phoebaeus lumine vultus;  
 Assidue hoc caelum nebulae sonitusque procellae  
 Turbant. Summe parens Urbis, qui pace beata  
 Caelorum resides, da se componere Romam,  
 Ut non tam belli quam pacis luce coruscans,  
 Unius imperio patris sub lege quiescat!  
 Nox longa autumnus interea caligine terras  
 Abdit; flat boreas; gelidas velatur ad Arctos.



Nube repente polus ; surgens haec curva superne  
 Incumbensque orbi , qui caelo terminus , acta  
 Ventis ad zonas aequantes lucibus umbram  
 Tollitur. Hanc radians circumdat desuper arcus ,  
 E cujus gyro nigraque e nube columnae ,  
 Pyramides , fornix aurata , argentea scena ,  
 Vestibuli , facies flammaram mille coruscae  
 Aeris in campis se attollunt deficiuntque.  
 Est a mirandis interdum cernere nimbis  
 Scintillanti orbes immittier undique cauda  
 Fulgoresque citos ; atque increbescere murmur  
 Auditur ; festi ceu quos ars excitat ignes  
 Hinc atque hinc saliuntque ruuntque sonantque per au-  
 Inde plagas boreae rutilantibus ignibus uri ras ;  
 Attonitis se offert oculis , ut lumine primo  
 Aurorae rubrum nubes ardere videntur ;  
 Aetas haec monstrum borealis nomine signat  
 Aurorae , sapiens nec damna veretur ab illa ,  
 Quam condit naturae non penetrabile velum ,  
 Quamque movet forsán radians electricus ignis.  
 Vana superstitio tremefactam concutit Urbem ,  
 Instat et , ut vates poscant oracula libri ,  
 Qui servabatur veluti delapsus ab astris.  
 Obtulerat non nota manus , multoque redemit  
 Auro Tarquinius chartas sublimeque carmen ,  
 Numine quod spirante sacro cecinere Sibyllae  
 Euboicis olim Cumis , Delphisque , Samoque ,  
 Ac in erythraeis oris. Haec Roma colebat ,  
 Cumanam quae fama volat scripsisse Sibyllam ,  
 Selectisque viris servanda incluserat arca  
 Marmorea ; cuiquam nec fas oracula sancta  
 Poscere , sacrilegaque manu reserare volumen ,  
 Ni quando luctus instant caecique tumultus ,  
 Aut armis resonans agmen contendit ad Urbem.  
 Tristia reddebant autem tum verba rogatae

Chartae, non multo post reges urbe repulsos.  
 Finitimos populos fortes ductore rebelli  
 In patriam late stratueros arma Quiritum,  
 Si temere campis signa inferrentur apertis;  
 Hinc multo sacram tutandam milite Romam  
 Sternendosque truces celsis a turribus hostes;  
 His Divum monitis patrum mens docta regendi  
 Ad pugnas tutis e muris pectora cogit.  
 At mutabilior ventis plebs conflagrât ima  
 Iris, atque ciet strepitus, vocesque minaces  
 Nocturnis Marci sub tectis; turba sed ingens  
 Nobilium sacrum miserorum servat asyllum.  
 Surgit ad ora Fori regis fundata sabini  
 Aere, nepos ingens quam parvam Cajus habebat,  
 Arboribus sedes tecta, et secreta recessu.  
 Tota pervigilans heic nocte Volumnia mater  
 Natorum circa stratum, qui pectore toto  
 Proflabant somnum, errabat; pulsare videtur  
 Sanguineo gladio vis vulgi saepe paventes  
 Portas; dat gemitus, et saevo pulsa timore  
 Corda micant; puerosque vocat, taedetque vocasse,  
 Et sese retrahit, mediaque in voce resistit,  
 Ac tenebras odit; longa ceu nocte tenellis  
 Incumbens natis, e nido colla frequenter  
 Protendit caelo vestigans lumina passer,  
 Ut dulces parvis escas inquirat in arvo;  
 Sic manet infelix, lumen scintillet ut Eos,  
 Qua fugiens intra pastorum tecta quietem  
 Inveniat. Tandem cervicem humerosque silentem  
 Natorum in lectum curis somnoque gravata  
 Forte reclinabat; cum turbant somnia mentem;  
 Undique namque videt torvos irrumpere vultus;  
 Ceu pavidam tumidus Romam resonantibus undis  
 Excurrit Tiberis, sic turbas currere ovantes  
 Vulgi, jamque suae frangentes linina sedis

Cernit, et immanem Brutum mucrone petentem  
 Dilectos pueros, et supra pectora ferrum  
 Tollentem. Crines horrent, tremor occupat artus :  
 Verte in me ferrum, clamat, me confice, non hos  
 Innocuos. Fatur vix haec exterrita mater,  
 Somnus abit tenues clamore fugatus in auras;  
 Ipsa tamen gelidis manans sudoribus amens  
 Vix oculis credit non laesos vulnere natos,  
 Sollicitaque manu puerorum corpora tangit;  
 Tum sic illacrimans : heu conjugis aspera fata,  
 Cui nullam donent dulcem bona Numina prolem !  
 Asperiora, ferant haec cum Di munera ! Quonam  
 Abscondam natos infelix mater ab ense  
 Plebejo ? Effusus sic rorat fletibus ora.  
 Et jam luce nova Phoebus repleverat orbem,  
 Atque alacres lectum linquebant frater uterque ;  
 At Quintus puer exsultans penetralibus effert  
 Purpureis galeam pennis atque aere decoram,  
 Quam genitor tulerat primo in certamine victor,  
 Et stans ante genu maternum : quomodo nutant  
 Atque rubent cristae ! Quam lucem curva remittunt  
 Aera ! Caput grandi fatus puerile tegebat  
 Casside, cervicem quassans et laetus in orbem  
 Incedens ; sequitur frater, galeaeque micanti  
 Saepe manus jacet, ut cingat sua tempora. Cernens  
 Conjugis exuvias mater mage fixa dolore est,  
 Et longis pulsat singultibus ilia. Quintus  
 Tunc annis major sermone silentia rumpit :  
 Da veniam, mater, puero, qui pectore toto  
 Te colit ; aeternum heic clausi lugebimus ? Eccur  
 Nos non accipiunt patris tentoria ? Fortis  
 Si dux pro nobis, cujus trepidabimus iram ?  
 Jam tempus lacrimas abstergere, currere apricos  
 In campos, stimulis et equos agitare frementes,  
 Imperiumque ducum strepitumque audire tubarum,

Et claros atavos imitaries. Inquit at illa,  
 Audacis gladios turbæ duosque tribunos  
 Sistere se densos contra, ne limine portæ  
 Marciadis mater, conjux, natiq̃ue rebellis  
 Evadant civis; tum fudit pectore vocem:  
 O si tranquillæ duxissem tempora vitæ  
 Vestales inter, vel nunquam luminis auras  
 Vidissent oculi, nunc anxia pectora curis  
 Pro sorte innocuæ non essent prolis! Acerbum  
 Heu nimium fatum! sapiens clamore vocata  
 Os graviter Marci mater penetralibus effert;  
 Illa sed a cura vexata haud verba refrenat:  
 Horrendam cernis qua mergor mater abyssum;  
 Ante ducis magni conjux, et maxima patrum  
 Cura, decus Latii, Divum majora putabam  
 Gaudia vix caelo. Contempta, invisæ rebellis  
 Nunc Marci conjux, nec conjux, tempora vitæ  
 (Horis jam quartus venit labentibus annus)  
 In tenebris luctuque traho; sed damna silendo  
 Ferrem; nunc caedes horum cervicibus atrox  
 Imminet; hoc animus non suffert matris. Adoro  
 Hinc te, te solam, cujus sapientia ferre  
 His valet auxilium, sive intra rustica tecta  
 Sive aliter servans injusta a cuspide plebis,  
 Audis quam nostras ad sedes dira frementem.  
 Immemor o patriæ pectus! Te dextera Marci  
 Servavit toties; ingratis et ruis armis  
 Innocuam Marci in gentem; te fulmina Divum  
 Dira manent. Tales lacrimosa Volumnia questus  
 Mittit, cui veneranda socrus: mens aegra timore est,  
 Qui patriæ suadet convertere terga. Furente  
 Turbine non animus cecidit sic noster; et olim  
 Romuleas pressit non hæc ignavia matres.  
 Cum sis e multis a me selecta puellis  
 Uxor Marciadi, contende, ut Roma legenti

Plaudat, ne duplex mea vexet pectora moeror,  
 Quod Cajus patrios in muros verterit arma,  
 Et quod fracta malis tanti cadat exulis uxor.  
 Mollibus haud Divis solemnes reddit honores  
 Martia Roma, velut gens barbara; fortia Romae  
 Numina convertunt in segnem lumina torva,  
 Et plectunt sponsam, cui sunt sua limina cordi  
 Prae patriis tectis; hinc dextram fortis Horati  
 Moverunt, jacuitque soror, quae flebat amarum  
 Posthabita sponsum patria. Tunc illa severas  
 Romulidum leges, quas a majoribus hausit,  
 Commemorat, patriam vastum velut esse gigantem,  
 Cujus sunt artus cives; virtutis honorem  
 Esse sacrae patriae vitamque suosque vovere:  
 Sic agmen densum, rigidi et constantia Bruti  
 Immortale decus meruit, nomenque pereune.  
 At formosa nurus succensa a prolis amore:  
 Vis ita si fati, si Romae ferrea jura,  
 Funditus ut ruat invicti domus inclityta Marci,  
 Praecipiant, fugiam curnam irreparabile fatum?  
 Est heic, est animus, qui vitae munera spernit.  
 At si vis populi puerorum frangit asyllum,  
 Naturae tunc jussa sequar, latebrisque domorum  
 Abscondam prolem, proque ipsa pectora nuda  
 Exponam ferro; morti sic lumina claudens  
 Non miseras cernam caedes, tantoque dolore  
 Non premar. Haec dicens tollebat lumina caelo  
 Ceu qui vota facit, praecoci ut morte peremptus  
 Non tristes videat casus cladesque futuras.  
 At Marci genitrix mentem conversa saluti  
 Romae, flebilibus verbis non porrigit aurem,  
 Auxiliiq; genus varium sub corde revolvit,  
 Et non dimittit summo in discrimine mentem.  
 At Veturiadis monitu pars agminis ingens  
 A Tullo lecti festivis gressibus Urbem

Contendit versus. Firmatos membra labore  
 Horum non paucos donat fulgentibus armis  
 Pontia, quae surgit mediis in fluctibus inter  
 Oenotrides contra Circaeï culmina, campis  
 Et populo dives, studiis atque aspera belli:  
 Succedens acies castris invadit ovantes  
 Complexu socios. Cajus nam mente sagaci  
 Incursus versans et proxima bella sub Urbis  
 Moenibus, a tergo consurgere posse tuetur  
 Tiburis hastatam pubem, quae distrahat arma,  
 Atque vocet volscas lethi in discrimina turmas.  
 Hinc exhortatur vino epulisque relectam:  
 Vicinos ite ad tumulos, qui strata viarum  
 Ad tiburtinos longo ducentia tractu  
 Muros prospectant; illic attendite belli  
 Fortunam, poscat si tempus, vester ut ensis  
 Nos juvet, herculeamque simul perterreat urbem.  
 Sic ait; ast olli pinus longeque coruscos  
 Quassantes clypeos voces ad sidera jactant,  
 Invaduntque viam pulsu tellure tremente  
 Quadrupedum peditumque; regit dux Fulvius agmen  
 Acri vectus equo, pulchris quem Vulcia muris  
 Eduxit; collis jam scandit culmina jussa  
 Volscæ cohors, spectatque hostilia moenia contra.  
 Cornua tum resonant et buccina. Fulvius, artes  
 Augurii miras docuit quem Tuscia, cernens  
 Murorum pinnas, moles, pugnamque parantes  
 Aeneadas, aperit fatis sic ora: sinistro  
 Stringis tela, furens Urbs, omine. Quantus equorum,  
 Quantus adest pubis sudor! Quot funera genti  
 Trojugenae impendent! Clypeum galeamque Gradivus  
 Et currus rabiemque parat. Protecta superbis  
 Moenibus haud saevas hastas et spicula Volscum  
 Effugies; sero foedabis pulvere crines.  
 Non fortis Lartî, non Cossi exanguè cadaver,

Non equitum stratas turmas, luctuque latinas  
 Consedissee urbes cernis? Non dira frementes  
 Ausonios audis? Metuendus mente manuque  
 En Veturiades te ferro invadere flagrat;  
 Cui quas oppones acies, murosve, ducesve  
 Belligerare pares? Aut quos in vota vocabis  
 Divos? Marciadi mentem viresque secundas  
 Sufficit ipse pater Divorum; suscitatur ipse  
 Contra te Superos. Ni poscas foedera, Volscis  
 Juppiter ipse dabit belli vocem, aegida saeva  
 Horrendum quatiens dextra, male percitus ira;  
 Et muros ascendet ovans, jaculabitur ignes  
 Terribilis Cajus. Sic fatur; concutit hastas  
 Agmen, et inspiciens irato lumine Romam  
 Dentibus infrendet. Tum mandat maximus armis  
 Marcius, ut vigilant equites prope Tiburis agros,  
 Et celeri moneant cursu, si moenia linquat  
 Tiburtina cohors. Forti quin mittitur urbi  
 Nuncius Anthaejus, ne portae limine pubem  
 Educat, contra Romam cum pugna flagrabat,  
 Testeturque Deos; alias Aniene rigatos  
 Vastabit volscus campos, et diruet arces  
 Ensis. At in Marci non pectore deficit ardor;  
 Huc illuc sese vertit, sociosque fatigat  
 Bella parans; multam ad noctem non castra quiescunt.



## LIBER DECIMUS

## A R G U M E N T U M

*Marcus et Lucilius Romam noctu redeuntes referunt navale praelium et expugnationem Ostiae, et dum Tribuni nituntur excitare turbas, Senatus pandit ingentes cellas frumento et sale refertus. Nuncius a Sulmone missus breviter exponit Marcio eandem navalem victoriam, ex qua vehementer gaudent agmina. Acies Antii, et urbium volskarum indignatae quod muris claudantur, commigrare parant ad Marcium. Matres vi precum in suam sententiam Veturium pertrahunt, et omnes simul egressae Consulibus exponunt propositum adeundi Marcium; illi Senatui referunt, et patres permittunt earum egressum. Multi bellatores conflunt ad castra Marcii, qui mente versat quomodo novam in Urbe excitet seditionem. Antharcus in castra reversus refert Tiburtinos jurasse se non educturos acies e muris in oppugnatione Romae. Tullus castra ingreditur, et offert Marcio pretiosa munera, novas acies, et pacis bellicae arbitrium. Cohortes admirantur volsca praelia caelata in clypeo; sed Cajsus eas hortatur ad novos belli labores ineundos.*

**N**ondum lucebat; turbato pectore vulgus  
 Lumina demittit sero defessa sopori.  
 Prospiciens supra Capitoli immobile saxum  
 Insomnem noctem traducit. Curia, sicut  
 Navita, cum inugit boreas pelagusque tumescit.  
 Conjunctas populi vires et brachia prompta,  
 Quae simul accurrunt ad patria tecta tuenda,  
 Non tristi patres aspectant lumine, caelo  
 Et palmas tollunt, jugis concordia regnet.  
 Porta sed ecce sonat, qua se via pandit ad urbem,  
 Ad cujus muros fluvio Tiberinus amoeno



In mare prorumpit. Custos : ad limina quisnam ?  
 Clamat ; et obscuras sese vox reddit ad auras :  
 Magnanimi Marci Lucilius. Ocyus arci  
 Dicta refert miles ; dum Consul fluctuat anceps ,  
 Magnanimi mandant patres ut limina forti  
 Pandantur civi. Resonat jam fama per Urbem ,  
 Ac taedas manibus stringens e limine cedit  
 Anxia turba citis gradibus , clausasque morata  
 Ad valvas vario curarum fluctuat aestu.  
 Tum resonae trepidi converso cardine portae  
 Consulis ad nutum panduntur. Amore videndi  
 Sese urgent turbae , ceu vento agitantur aristae ,  
 Erigit inque pedes se quisquis , collaque tendit ,  
 Cum celsi surgunt in equis Lucilius , acer  
 Et Marcus genitor , qui protinus ante verendos  
 Patres desiliunt ad terram. Martia vero  
 Mater , quae caros fert fixos pectore vultus ,  
 Impellens turbas manibus vi tendit ad illos ;  
 Nunc Marci collo nunc nati brachia circum ,  
 Et dat laetitiae lacrimas pro sospite vita  
 Amborum. Stringunt reduces ad pectora patres  
 Turbaque amicorum ; famuli dant oscula palmis.  
 Jam subeunt portas , et circumfusa ruebat  
 Turba Foro mirata duces stimulansque , rogansque  
 Plura. Maunum tendit , mandatque silentia linguis ,  
 Oreque non laeto fatur pater inclytus : urbem  
 Contra spem cernens nondum recludere portus ,  
 Impellit furiis agitato remige classem ,  
 Suscitatur ad magnos ausus , sociisque suam vim  
 Difficiles aditus afflando fervidus hostis  
 Tentat ; sed romana ruit vasto impete classis  
 Spicula more nivis fundens , hostemque repellit.  
 Anceps pugna diu ; volscas miranda sed urget  
 Remigis ars naves , et Sulmo primus in ora  
 Irrumpit portus pinu , Volscique sequuntur

Vocibus horrissonis. Miseranda caede carinae  
 Romuleae implentur; gemit urbs. Ferus arripit hostis  
 Scalas, descensumque parat. Nos agmine toto  
 Irruimus, primasque acies procurrimus ante;  
 Atque illi plangunt fixi tabulata sagittis,  
 Hi ponte in praeceps volvi, mergique profundo  
 Cernuntur. Scalis ter descendere; volucres  
 Conversis humeris ter conscendere biremes.  
 Turbida circumfert incertus lumina Salmo,  
 Armigerumque videt, praestantem robore, vultu  
 Formoso juvenem, fidumque, cruore rigatum  
 Ante pedes auras extremas ore trahentem,  
 Et pietate gemit. Flagranti percitus ira  
 Desilit in terras scalis, versusque cohorti:  
 Linqvitis an tanto vestrum discrimine, fatur,  
 Ductorem? Dictis ardent, et puppibus olli  
 Nimbi more ruunt. Nostrae non terga phalanges  
 Dant; at in attonitas subito mors, vulnera, luctus  
 Vertuntur; fatis eheu! jactamur acerbis!  
 Caesorum testor manes, et conscia ponti  
 Numina, me natumque meum nec tela nec ullas  
 Volscum vitavisse vices. Aequare dolorem  
 Quis valeat verbis, cum vidi funere mersam  
 Et lacrimis urbem, florentem munere nostro  
 Atque opibus ponti, Romae tot dona ferentem?  
 Quis referat, quantum patriae nos fata premebant  
 Viribus amissis sociorum? Munere Volscum  
 Missi, quadrupedes urgemus moenia versus  
 Ad patriae columen; medio cum tramite: state  
 Heus! equites, clamant armorum luce vocati  
 Marciadis vigiles; et nobis milite septis  
 Haud spes ulla fugae; sed cum virtute cadendum est.  
 Irruimus jaculis; nostro nec concidit unus  
 Ictu. Volscus equi frenum, cui terga premebam,  
 Arripit interea laeva. Dum pectus in hujus

Extollo ferrum , telum librabat ab aure  
 In nostros humeros alter. Cum sanguine vitam  
 Fudissem revolutus equo , ni filius hasta  
 Fodisset Volscum , cui defluxere repente  
 Tela manu ; patrem pius hic a morte reduxit  
 Et Roma et proavis dignus. Nunc pectore forti  
 Ad casus alios subeundos adsumus ambo ,  
 Et gremio ferimus pugnarum vulnera testes.  
 Haec fatus nudat gnati et sua pectora ductor ,  
 Et digito monstrat plagarum signa cruenta ,  
 Quae spectans populus voces ad sidera tollit ,  
 Et Marci et prolis virtutem laudibus ornat.  
 Magnanimas celebrat tum lecta caterva juventae  
 In patrem nati curas , cui flagrat amicus  
 Virtutis rubor in malis ; circum undique fusi  
 Carminibus tollunt juvenem , quernisque coronis ,  
 Quod patri vitam dederit , pia tempora cingunt ,  
 Atque domum stipant , ubi laeto lumine mater  
 Sobria sub resonis celebrat convivia tectis ,  
 Sanguine conjunctosque vocat fidosque sodales.

Densa Foro interea populi vis aequore clauso  
 Aeneadis clamat famis impendere flagellum ,  
 Litore lecta maris portas non amplius Urbis  
 Dona subire salis. Vigilans sapientia patrum ,  
 Quae longe hos motus prospexerat , horrea pandit  
 Cumarum , Latii , et spicis repleta sabinis ,  
 Et vastas cellas , capiunt quae multa salini  
 Ponderis. Ut populant ingentem farris acervum  
 Formicae ; properant acies nil ore trahentes ,  
 Frumentum tardo gressu pars ore reportat ;  
 Sic vadit remeatque gravatis pondere grato  
 Turba humeris , siccisque studet supponere saxo  
 Et tostas flammis fruges condire salina ;  
 Hinc plebs donorum dulcedine capta Senatum  
 Laudibus ad caelum tollit , paulumque futuri

Provida, bellorum a curis avertere mentem  
 Gaudet. At obscurum sub noctis cursus ad Urbem  
 Lucili et Marci, Volscùm victoria, fracta  
 Romulidum classis vigiles resonarat ad aures  
 Marciadis, laetis oculis qui coepta juvari  
 Spectat; nam clauso cerealia munera ponto,  
 Aequareisque salis removentur ab Urbe gravati  
 Currus. Ad Tiberis fauces tum multa volutans  
 Dux equitem mittit, qui protinus excitet agmen,  
 Sulmonemque vocet sub moenibus Urbis ad acres  
 Nisus; Romulidas etenim molitur ubique  
 Armis obsepire, ruant ne limine portae,  
 Aut sociis Romam pandant; hinc pectore versat,  
 Ut si fata vocent, succedat vivida pubes  
 Instaurans pugnam, et victa dominetur in Urbe.  
 Ast acies Anti servantes moenia in urbes  
 Volscùm, Marciadis capientes aure triumphos  
 Unum animo spectant, bellicue ut numen adorant;  
 Crescit amor famae juvenili in pectore, muris  
 Seque fremunt clausos, gladios ac tela ferentes  
 Ponderus iners lateri; sine luce hinc linquere tecta  
 Saepe animo volvunt, vitam et pro laude pacisci.

Jam sera autumnii nitido patefecerat ortu

Purpureas aurora fores, rebusque colorem  
 Sol dabat, aethereos campos terrasque jacentes  
 Vitali radio spargens et saecula ducens.  
 Ecce autem matres fidenti protinus ore  
 Angustum subeunt tectum, quo maxima degit  
 Virtus. At visu perculsa Volumnia surgit  
 In manibus puerum gestans, et pallida vultum,  
 Quis novus in miseras aedes concursus? An instant  
 Innocuis pueris nova fata immitia? Dndum  
 O dulces aegra matres nil mente revolve  
 Terrores praeter gelidos. Absiste moveri;  
 Spēs non temnendas ferimus. Tum corde vocatis

Numinibus palmas utrasque Valeria tendens ,  
 Gratia facundo cujus non deficit ori ,  
 Haec Marcì matri : nosis , clarissima , nosis  
 Insignem pietate virum , cui munera vitae  
 Donasti. Dudum non vultus ille suorum  
 Cernit , nec voces audit ; tum fomite nullo  
 Antiquus defervet amor. Nunc ocyus ergo  
 Os comitata tuis demonstra , orato , reprende ,  
 Errorisque vias mox deseret ille. Severus  
 An cani temnet capitis sanctissima verba ,  
 Quae a noxa revocant , contemnet verba parentis  
 Marcus ? Indecores sane vis franget amoris  
 Illius somnos ; matris dabit ille querelis ,  
 Quod patribus renuit ; nuper mihi Juppiter ipse  
 Haec aure insonuit , dum Numen voce vocabam  
 Tarpejo in templo. Quod te per Numina Romae ,  
 Per patriae sacrum , nati per fulgida facta  
 O generosa subi Volscùm tentoria mater  
 Nohiscum ; Romae sis quaeso certa salutis  
 Anchora , dum saevit sine more procella. Manebit  
 Immortale tibi nomen , licet obstruat aures  
 Non mollis ductor votis. Doctissima fandi  
 Sic ait , atque preces exornat laudibus. Instant  
 Illustres fletu matres ; at conticet illa  
 Componens secum non pauca , atque haeret in uno  
 Obtutu ; et Superùm mentes incerta legebat  
 In matrum precibus. Clari tunc pulchra resolvit  
 Ora ducis conjux : nostris ne fidite Cajum  
 Inflecti votis. Postquam fera moenia liquit ,  
 Non idem Cajus ; pietas antiqua refugit  
 Ex animo. Horrendum postras quoque personat aures  
 Vox evadentis tecto : sine conjuge conjux ,  
 Stas sine prole parens , pueri sine patre ; repellit  
 Vis , scelus a patria raptat me saeva procella  
 Immeritum ; te , Roma ferox , te triste manebit

Supplicium ! Fatus natos retro inpulit, almam  
 Matrem, me fletem; jam quartus volvitur annus,  
 Nec mihi nec misit matri: salvet: videtis  
 Num precibus dueros animos mollire queamus.  
 Esto, sed ad Cajum properemus; pectore quasnam  
 Fundemus voces? Extinctas corde tribuni  
 Irarum flammis narrabimus? Acrius ardent;  
 Aut populi clausas dictis atrocibus aures?  
 Quaeque dies contra clamat; vel pacis amorem  
 Flagrantem Romae? Bellum sed cernitis ipsae  
 Jugiter accensum. Dicemus: brachia tende,  
 O Veturiade, patriae, quae saeva noverca  
 Nil praeter vitam tibi liquit; desere volskam  
 Gentem, quae pulsum excepit te more parentis?  
 Sed Volsci horrendum fremierent et Marcius ingens.  
 Ne dulces ergo, matres, turbetis amaram  
 Pacem, quam fletus inter reperire datum; quin  
 Imo rogate Deos, ut nos premat ocyus angor.  
 E niveo tollens suspiria pectore tales  
 Ediebat questus formosa Volumnia. Moesto  
 At manuum sonitu penitus fletuque penates  
 Faemineo reboant, atque illaetabile murmur  
 E muris prodit; vici plangore resultant.  
 Acrius hiuc urget, solamque Valeria matrem  
 Aggreditur dictis, solaque in matre moratur:  
 Te nihil ergo movent lacrimae fatumque tuorum,  
 Divorum cultus, Romaeque ruentis imago?  
 Sic amor in patriam friget tuus? Ergo feretis,  
 Humanae omnipotens gentis Saturnie custos,  
 Romulidum Superi ingentes, Divique latini,  
 Praesidiis vestram nullis procumbere Romam?  
 Pandite jam portas, cives, solaeque feroci  
 Victori ardentes patrio occurremus amore;  
 Jam solas tentare juvat metuenda pericla  
 Pro patria; e tutis nostrum Veturia fatum

Moenibus aspiciat. Stat flere, instare, precari,  
 Donec vel precibus pellemus ab Urbe procellam,  
 Aut longo fessus fletu nos opprimet hostis,  
 Nec dulcem ferro patriam flammisque ruentem  
 Cernemus. Sapiens haec ore Valeria fatur  
 Magnanimo; ast aliae studio, vel sanguine junctae,  
 Amplexaeque genu geminant ardentia matri  
 Vota. Puer Quintus, quem torquet cura parentis,  
 Est visus claras a vertice fundere flammas,  
 Quas a solerti praesens excirier aetas  
 Natura reperit, magno cum pectora flagrant  
 Affectus aestu; censebat monstra vetustas.  
 Natos et matrem subito trepidare timore,  
 Faemineas turbas plorare, horrere, moveri,  
 Lucentisque comae restinguere fontibus ignes.  
 At palmas aunosa parens cum voce tetendit  
 Exsultans caelo: visum, o! Gradive, secunda,  
 Si puris votis pater Urbis flecteris ullis,  
 Da, sicut flammae, quae circa tempora Tulli  
 Hostili errabant, monuerunt omnia laeta,  
 Sic hae portendant patriae Latioque salutem!  
 Haec ait, atque alios versat sub pectore sensus,  
 Et flentes miserans turbas se tollit ad auras,  
 Nobilis et famae repleta cupidine: dudum  
 Eventus, loquitur, tacito sub corde pependi;  
 Dudum verba noto. Generosa Valeria, Divum  
 Dicta refers; agnosco Deos. Me conjugis umbra,  
 Cum nox involvit tenebris humentibus orbem,  
 Hortatur dudum: patriae succurre relictæ!  
 Amplius haud pendet mens anceps; Juppiter hac stat,  
 Juppiter hos animis sensus suggestit; eundum  
 Quo nos fata vocant; emitur bene sanguine fama.  
 Tum vertens oculos nurni, quae moesta salutis  
 Spes ex turbatis animis abjecerat: eja  
 Quid ploras, fatur, gemebunda Volumnia? Restat

Spes numquam fallax firmæ data munere Divûm  
 Virtuti ; cujus si fervet numine pectus ,  
 Spes floret semper. Septam cum vidimus Urbem  
 Tyrrhenis armis , sine robore Virginis actum  
 Romanis de rebus erat ; terrore replebat  
 Cocles Porsennam , victricia Clælia tela  
 De manibus rapiebat : io ! Succurrite , matres ,  
 Labenti patriæ , clamat , succurrite , virgo  
 Cujus per sacrum callem sublimis imago  
 Fertur equo volucris. Meritos miremur honores ,  
 At quoque spectemus graviora pericula. Grandi  
 Eloquio arrectæ mentes stupefactaque corda  
 Faeminea ; hinc clamans tollensque Valeria palmas ,  
 Non est hæc ingens , fudit quæ ad luminis auras  
 Cajum , sed vates , quam numine Juppiter implens  
 Ut stet Roma , vocat ; divini signa decoris  
 Ardentesque notate oculos ; qui spiritus olli ,  
 Qui vultus vocisque sonus ! Contra illa : sileto ;  
 Quaerendus Consul ; gravis instat pugna ; salutis ,  
 Qua minime sperat , forsân via panditur Urbi.  
 Sic ait , atque moræ inpatiens prior extulit aede  
 Magnanimos gressus ; sequitur formosa caterva ;  
 Illæ igitur mirum lætæ Divisque vocatis  
 Concussos inter muros populosque feroces  
 Vadunt , cum spectant oculis in limine patrum  
 Os Furii Spuriique simul , qui voce manuque  
 Migrantem retrahunt turbam. Vix agmine crevit  
 In medio Furius venerandam incedere matrem  
 Marci , sollicitas palmas utrasque tetendit ,  
 Attonitæ steterunt turbæ , voxque excidit ore  
 Consulis : in tanto si fas moerore rogare  
 Marciadis matrem , summo in discrimine Romæ  
 Quo tendunt gressus , quæ mens , quid læta caterva ?  
 Auspicio Divûm tibi panditur ulla salutis  
 Num via ? Facundo sed pulchræ laudis amore ,



Faemineas cernis turbas ; ne despice ; pectus  
 Non jam faemineum. Dudum me concitat ardor ,  
 Quem latet an magni nostris Dì cordibus addant ,  
 Ipse sit aut ardor numen me nocte dieque  
 Exstimulans. Fortes dum tractant arma parantes  
 Devoti Romae , natum stat adire , videre ,  
 Affari , surget cum Lucifer axe. Senatus  
 Ad Veturiadem pueros vult mittier ? Ibo  
 Ipsa ego ; siqua sui merito fiducia forti est ,  
 Aut ardore precum cives a morte reducam ,  
 Aut ego sola ruam ad mortem ( si fata jubebunt ) ,  
 Roma stet ut sospes. Generosis Consul uterque  
 Constitit obtutu dictis defixus in uno  
 Admirans ; tandem Furius sic ora resolvit :  
 O sidus pacis surgens vim turbinis inter ,  
 Si caelo pietas degit , quae talia curet ,  
 Digna tibi Superi , quoniam non possumus ipsi ,  
 Praemia persolvant ! Nunc quando est omnia supra  
 Iste animus , curram , et tantam mirabitur aula  
 Virtutem. Fatus , propere Capitolia scandit.  
 Perculit at turbam mirae pietatis imago ,  
 Ex animoque levi divellit turpe migrandi  
 Consilium , et servata legens vestigia retro  
 Undique laeta ruit , trepidam vulgatque per Urbem  
 Afflatas Superis ad Volscum pergere matrum  
 Turbas , quas ducit Veturia ; lumen ab illa  
 Effulgere spei , quam dux ceu numen adorat.  
 Excipit haec magno plausu mutabile vulgus ,  
 Atque ruit circum matres , gaudetque videre  
 Spirantes pacis tranquillo lumen ab ore.  
 Laudibus interea meritaram consonat aula ,  
 Quae saevo patriae dextras in turbine tendunt.  
 At qui de parvis non spectat maxima gigni  
 Rebus in humanis , ceu vasto in corpore mundi ,  
 Nil vanos praeter nisus , et dedecus ingens

Cernit in egressu ; putat a victore superbo  
 Temnîer imbelles lacrimas. Pars ora resolvens  
 Contendit famam votis , pacemque parandam.  
 Pontifices celsi reduces stationibus hostis  
 Marciadis referunt de cana verba parente ,  
 De teneris pueris , dulci de conjugè ; sese  
 Affectus memorant vidisse micare favillas  
 Ex oculis vultuque ducis ; tum matribus instant  
 Pandendum limen , placidoque Valerius ore :  
 Terribilem quassat celsis e turribus hastam  
 Roma minax ; sapiens at numquam foedus honestum  
 Rejicit. Haud linquat rectrix patientia patres ,  
 Unde sonant atavî ; vitentur crimina belli  
 Et caedes ; pateat Volscis ad munera pacis ,  
 Quem non mortales , ast ultro Numina pandunt ,  
 Qui superest aditus ; patres nitantur ut atro  
 Crimine romuleos quassandi turbine martis  
 Muros se civis non foedet , cujus in omnem  
 Ingens Ausoniam nomen mansuraque in aevum  
 Virtutis laus , mirandam qua volsca repente  
 In lucem verti ex umbris res cernitur. Instat  
 Pars vestrum clausas ut servent moenia matres ?  
 Omnibus at facilis , quae poscant , janua cedat ,  
 Ut vis addatur votis , quae fervida fundet  
 Gens Veturiadis. Primum virtute colendas  
 Custodit caelum turbas , tum Marcius ingens ,  
 Cujus se tanto foedavit crimine vita  
 Numquam , sublimesque animos sub pectore versat  
 Praeclari patris sermonem Curia concors  
 Audit , et aeterno se cingit lumine ; namque  
 Vicini belli minime formidine tacta  
 Marciadi meritos , licet hosti , reddit honores ,  
 Illius arbitrio tradens vitamque decusque  
 Matrum. Jamque ferens Consul decreta Senatus  
 Nuncius it populis , primo Pallintidos ortu

Faemineis portas converso cardine turbis  
 Pandendas; vigiles patres, dum sidera caelo  
 Lucent, haud laetam pompam currusque parare;  
 Extollit voces vulgus, speque ora serenat,  
 Volvens quid nati possint in corde dolores  
 Matris, faemineis quae vis in fletibus insit.

Interea erumpit pubes ex urbibus instar

Undarum, Martique parem solumque celebrat  
 Ductorem Volscum Cajum; indignata morarum  
 Tum celerat gressus campis, ut martia magni  
 Ora colat; magnoque hortante in moenia currat  
 Romulidum; septis clausum velut agmen equorum  
 Audito fremitu pugnarum exsultat et hinnit,  
 Impatiensque morae micat extra carceris antrum,  
 Et uotos equites, ut currat ad arma, requirit.  
 Non minus Ausoniae variis regionibus agmen  
 Castrorum portas, nunc quos in montibus altis  
 Nursia, bellator Frusino, Verulaeque, Velitraeque  
 Eduxere, intrant; nunc quos Atina nivali  
 Colle, amphitrites tyrrhenae splendidus Anxur,  
 Atque Ferentinum, et cerealis Anagnin pavit,  
 Et solidum muris et campis dives Alatrum.  
 Multi ubi Fibrenus cum Liri flumina miscet,  
 Arpinos campos, quod Melphim potat, Aquinum,  
 Et muros Sorae, nebulosi et rura Casini,  
 Ausoniaeque plagas alias ac oppida relinquunt,  
 Quae tepefacta vident australia sidera, saevi  
 Et quae vis boreae quassat; nam grande sonabat  
 A siculo fluctu ductoris nomen ad Alpes.  
 Ille oculis lustrans gentes tacitusque recensens,  
 Majores cernit turbas sua signa secutas,  
 Quam quae caesa jacet campis; proprioque serenus  
 Robore tum gaudet numero et virtute suorum.  
 Hinc agros circum cuneis nitidaque bipenni  
 Agmen, quod silvam referat, jubet ocyus ire,

Ut protendatur vallum, capiatque recentis  
 Examen pubis, quam Marcius impiger armis  
 Instruit assignatque duces, et conficit agmen,  
 Resque docet belli campisque exercet apertis,  
 Et simulacra ciet pugnae. Tunc auribus hausit  
 Extinctas iras Romae, viresque coactas  
 Ut Volscum pellant. Hinc artes pectore versat,  
 Quomodo civilis jaciens incendia belli  
 In Romam, populos divisos opprimat armis.  
 Interea senior setinus moenia linquit,  
 Praecipitis quae foecundas Anienis ad oras  
 Fluctisono vecti pelago fundasse feruntur  
 Argivi fratres, urbi nomenque dedisse  
 Tiburis a forti Tiburto. In castra receptus  
 Hasti Marciadi innixo ducibusque comanti  
 Contectis galea senior sic ora resolvit :  
 Tiburtinorum gentem fortemque Senatum  
 Vidimus, o Marci. Postquam data copia fandi,  
 Tiburis herculei ad muros quae causa coegit  
 Narramus; nomenque tuum Volscùmque docemus  
 Mentis : auditis his maximus ore Catillus :  
 Marciadis fama plena est Saturnia tellus,  
 Ductoremque stupet summum Volscùmque triumphos;  
 Novimus et longum bellum; Superosque precamur,  
 Ocyus ut volscos animos pax jungat et Urbem.  
 Has nuper Romae legatus ad arma vocabat  
 Gentes, ut rueret muris generosa juvenus,  
 Urbem si premeret Volscus. Ni fallimur, aequa  
 Haec tiburtini patres responsa dederunt :  
 A gladiis pacem dudum quaesivimus, empta  
 Et pax a nobis bello longoque labore;  
 His vigiles populis servamus munera pacis,  
 Et fidei memores necnon virtutis avorum  
 Inclusi tectis naturae jussa sequemur  
 Armis tutantes patriam. Quae justa spondit

( A patriis muris hostes depellere ferro )  
 Haec urbs Romulidis , Volscis spondetque , Deosque  
 In testes vocat. Illius promissa Senatus ,  
 Inclyte dux , audis , nostri quae summa caputque  
 Sunt desiderii. Setinus talia ductor  
 Concilio Volscum fatur ; cunctique repente  
 Tiburis esse satis promissa fidemque vocatis  
 Numinibus clamant : jam tandem tempus oriri  
 Sternendi urbanas telis ac molibus arces.

En autem celerans Tullus patresque verendi  
 Insignes auro lecta stipante caterva  
 Per campos equitare , pedemque advertere castris.  
 Marcius exultans animo ruit obvius illis ,  
 Et premit amplexu generosum ad pectora Tullum ;  
 Alterne patres collo dant brachia circum ,  
 Cum ducibusque cohors ; multa et sermone serentes  
 Marciadis subeunt tentoria. Lumina figens  
 Tum Cajo Tullus laudes et gesta celebrat ,  
 Auxerit ut nomen , volscae et commercia gentis ,  
 Ut sanctae Cajo latae sint auspice leges ,  
 Ut belli ad miras artes , studiumque cohortes  
 Finxerit. Etruscas tu flore , invicte , juventae  
 Prosternis turbas ; tu fracto limine victor  
 Ingredieris pavidas urbes arcesque latinas.  
 Te tremit ardeatina palus ; te moenibus altis  
 Laurentum , turres Lavini , Setia luco  
 Horrendo insidiis ; nec te rationis egentem  
 Nocturnis audax Cossus circumdabat armis.  
 Salve cui similem Latium vel Graecia nullum  
 Ductorem jactat ! Belli pacisque remittunt  
 Arbitrium volsci tibi patres ; tanta Senatus  
 In te spes uno ! Pretiosa en insuper arma  
 Et non spernendum munus monumenta decoris.  
 Sic ait ; accenso voces at pectore Cajus  
 Reddit : nulla dies me Volscis arguet unquam

Immemorem ; dubias res inter candidus ore  
 Consilium promam ; subeam si saeva pericla ,  
 Non animus deerit mihi ; non industria , cogar  
 Si rigidos tolerare labores. Tulle sed ingens ,  
 Quas referam grates tibi , qui me faucibus Orci  
 Ferme demersum , depulsum moenibus Urbis  
 Urbe , domo socias , semperque recentibus ultro  
 Muneribus cumulas ? Etenim te Numina sola  
 Promeritis ornare valent ; et protinus ornent !  
 Marcius armipotens memori sic pectore fatur ;  
 Discessumque parans volscas ut temperet urbes  
 Vir princeps vertit legionibus ora benigna ,  
 Et Cereris tribuit laetis et munera Bacchi ,  
 Tum sic hortatur : Latium vos invidet omne ,  
 Quod duce sub tanto bellum moveatis in Urbem.  
 Hujus ad imperium pes omnis sistat eatve ;  
 Huic omnes pateant aures ; hunc diligit omne  
 Pectus ; et attollet se quantis gloria rebus  
 Vestra ! Nec exiguam partem quoque laudis haberes ,  
 Grai , ni patri niniuin matrique dolendum  
 Te fatum rapuisset ! Et has dans pectore voces  
 Turbatus conscendit equum , lacrimaeque rigabant  
 Ora senis ; Cajus genitum pius extulit , omnes  
 Ingemuere acies , et circum triste sonabat  
 Praeclari nomen Graji. Sed nobilis omni  
 Dum Veturiades Tullum deducit honore ,  
 Accipiunt versantque manu pretiosa catervae  
 Munera mirantes , longe fulgentia squamis  
 Tegmina loricae , galeamque ex aere corusco ,  
 Et gladium cujus capulus fulgore nitescit  
 Gemmarum vario ; et non enarrabile textum  
 Aurati clypei , quem circum flexile splendet  
 In lori faciem argentum ; caelantur et aere  
 Inclyta facta ducis miris variata figuris.  
 Ductores circum densantur et agmen acuto

Lumine spectantes ; gaudent et imagine rerum ,  
 Praelia cum cernant , quorum pars magna fuerunt ,  
 Et monstrant digito : en ajunt , en agmina Volscùm  
 Quae scandunt scalis Lavini moenia ; fundunt  
 Ecce Bolanorum turbas ; en limina frangunt  
 Ardeatina ; foros Circaeï en milite complent ;  
 En medio clypei moerens caelatur in auro  
 Ante pedes magni deflexo poplite Roma.  
 Marcius haec inter celerans in castra reversus  
 Vix leviter figit mirando lumina scuto ,  
 Ut qui majores versat sub pectore curas ;  
 Tum , non ista sibi tempus spectacula poscit ,  
 Fatur , et his animos succendit ad arma paranda.  
 Ecce autem clarus Sulmo splendore triumphï  
 Ingreditur Volscùm tentoria ; pone sequuntur  
 Fulgentes armis , fidentes corde catervae ,  
 Ceu nova quas revocat victoria. Pectore toto  
 Marciades fortem complectitur ; aurea cassis  
 Vaginaque viro donatur clausus eburna  
 Aurato gladius capulo. Tum bella moventis  
 Consilium Marcï tollunt ad sidera castra ;  
 Et Sulmo hortatur socios , ob bella secunda  
 Tibridis ad fauces ut lauris tempora magno  
 Marciadi cingant. Ingrata silentia mandat  
 Plausibus ille ; movens gressus tum jussa caterva  
 Cum Sulmone tenet tumulum , Romaeque minatur ,  
 Quae portae ac celsae conversae ad caerula turres ,  
 Seque viae jungunt quae Tiberis ad ostia tendit ,  
 Quae ad muros ducit Laurenti stagna nemusque.



## A R G U M E N T U M

*Roma nuncio rerum adversarum valde concutitur. Umbro cum equitibus plebejas urit villas, at servat patricias, quod acrem excitat iram vulgi, et omnes ad arma currunt. Patricii benigne excipiunt agricolas fugientes a campis, juvant opibus, armant juventutem. Descriptio Volscorum in castris dormientium praeter Cajum, qui Moenae pandit animi sui cruciatus; at hic prudenter hortatur ad pacem patriae donandam, sed ejus preces rejiciuntur. Cajo vix sopito apparet umbra Graji, qui ad expugnandam Urbem eum incitat. Veturiae sacrificium sub Romae portis, egressusque matronarum. Mane novo Umbro similiter Cajum ad pugnam incendit. Coriolani concio ad Volscos, motusque castrorum; matronarum discessus, et mira earum modestia.*

① domus Aeneadum, scandit tua limina fama  
 Enarrans arces quas Volscum tela replebant  
 Milite jam vacuas, Aut clamasse cohortes  
 Horrisono fremitu: Volscorum spicula deinceps  
 Uni parebunt Cajo; cunctamque juventam  
 Belligeram pagis excitam nomine fortis  
 Commigrasse ducis, quam multae frigore primo  
 Labuntur frondes silvis, laudesque canentem  
 Marci confertim tentoria volsca subire,  
 Castra calore novo fervere, exposcere pubem  
 Scalas et moles, et proxima praelia. Saevae  
 Ast inter voces Romae non brachia, non cor  
 Torpent, mens concors nullis est fracta querelis,  
 Addunt et patres factis ad praelia vires.  
 Jam tacitis labiis atro circumdata velo



Expandens furvas pennas surgebat ab ortu  
 Nox , cui lethaeo perfusa papavera somno  
 Praecingunt caput. Haud sinitur requiescere Volscum;  
 Terribili Cajo mora nulla ; sed acrius urget ,  
 Opprimat ut Romam collecto milite. Multis  
 Et jam suppetiis hostem spoliaverat , urbes  
 Sternendo socias ; at pectore plura movebat ,  
 Rursus ut arderet fax seditionis in umbra  
 Noctis. Per tacitos hinc fundi jusserat agros  
 Improvisum equitem , ut ferret magalibus ignem  
 ( Qua posset caedi parcens ) ; haud tangeret armis  
 Celsas nobilium villas ; tenditque fovetque  
 In patres turbae sic corda cienda , vovendo  
 Quos Erebi Divis conjunctos hoste vocabunt ,  
 Rustica cum fugiens campo fumante caterva  
 Has referet Romae flammis. Neque crimen inultum  
 Incensi valli et caedis memor ira relinquit  
 Marciadis. Jam scandit equum celer Umbro frementem,  
 Ac equites socios inflammat laudis amore  
 Et praedae ; trucibus respondens vocibus agmen  
 Funditur in latos campos ; ceu turba luporum  
 Ad valles inter nebulas e montibus atris  
 Irruit acta fame balantum voce vocata.  
 At portas linquit castrorum hastilia Cajus  
 Bina manu crispans , cujus vestigia ductor  
 Aequorum , fidus Moenas , nursinus et Ufens  
 Subsequitur ; pectus virtute , manusque sagittis  
 Accincti properant omnes , Urbique propinquant,  
 Spectatum , campi flammis an moenia bello  
 Civili flagrent. Herbis et lacte tepenti  
 Custodes ovium pasti jam candida vota  
 Extulerant Superis dulcis pro moenibus Urbis  
 Exiguaque domo ; et fessi per membra soporem ,  
 Quem lecto invitat nequidquam dives ab aureo ,  
 Exuto curis carpebant corde ; tacebat

Illorum lateri imparibus compacta cicutis  
 Fistula; non longe saturae mntaeque capellae  
 Lanigeraeque jacent pecudes. Sub paupere tecto  
 Arentes supra frondes dant membra quieti  
 Agricolae; falces, rastri, curvique ligoues,  
 Et fumans focus, extremus quo deficit ignis,  
 Casta secus conjux; pueri stant ubera circum,  
 Undique pax cordis, requies dulcissima regnat.  
 Acriter ecce canes latrare, hinnire feroces  
 Quadrupedes, clamore equites atque arma sonare;  
 Ad terram portae fractis procumbere claustris,  
 Undique faemineus questus, fremitusque, fragorque.  
 At duri agrestes, quorum sub pectore fervet  
 Aeneadum virtus, caeco in discrimine pellunt  
 Improvisum hostem, qua possunt; tigna molaresque  
 A summis jaciunt hi tectis; ille bidentem,  
 Hic falcem, ille sudem, hic furcam rapit, ille securim;  
 Quod se inter tenebras manibus rimantibus offert,  
 Ira facit telum. Vultu vel pectore fracto  
 Labuntur Volsci; contusus tempora saxo  
 Ipse ruit revolutus equo, dum Lugacus acer  
 Umbronis frater socios hortatur ad arma.  
 Obruit at numerus paucos; rus forte reversi  
 Ingenuo multi nati patre, fidaque servum  
 Turba tegens armis dominos, transfigitur hastis,  
 Proterit aut miseros lapsos gravis ungula equorum.  
 Extremos tollunt gemitus super arva vel intra  
 Angustum tuguri confossi cuspide pectus  
 Agricolae. Pavidae pecudes rapiuntur ovili,  
 A stabulisque boves, ac abducuntur equorum  
 Armenta, et rastri dentati, ruris et arma:  
 Frumenti innumeros modios, ingentia ferri  
 Pondera diripiunt, jaciuntque incendia tectis.  
 Ceu sonitu accipitris fugiunt cava saxa columbae,  
 Limina transiliunt resoluto crine puellae

Pectore anhelantes ; vulnus pro conjuge passae  
 Uxores palmis tundentes pectora clamant :  
 Tantorum pereat scelerum nox testis ! Ad Urbem  
 Tendimus ejectae laribus , quam protinus arma  
 Invadent Volscùm. Lux o magis atra tenebris ,  
 Quot nobis referes luctus , quot funera ! Nudi  
 Artus infantes jactant ad sidera acutos  
 Questus , dum matres captant vix aera hiantes ,  
 Et gremio stringunt carorum corpora ; nati  
 Discincti trepidis fessos aetate parentes  
 Sustentant humeris , illisque sibi que timentes :  
 Aegra pius fratris frater fert corpora , matres  
 Longaevae pietas natorum. Cynthia caelo  
 Resplendet ; miseri fugientes tecta videbant  
 Romulidum , sicut uocturnis icta procellis  
 Pinus quae portum cernit , cum nascitur Eos ;  
 At subiti feriunt crepitus sonitusque ruinae  
 Aures ; et dulces converso lumine cernunt  
 Involvi fumo flammisque voracibus aedes ,  
 Dispersos campis lapides , ardentia tigna.  
 Matres et pueri exululant ; at turba virorum  
 Infremit ad portas ; et nota voce patescunt  
 Limina ; confertim cernendi currit amore  
 Turba ; vident miseros , laceros crudeliter ora ,  
 Et trepidos artus , nudos atque omnium egentes ,  
 Qui sic vociferant : romanos ecce colonos ,  
 Volsci reliquias gladii Marcique furoris !  
 Estne super telum , quod non conjecerit in nos  
 Ira Deum ? Direptae , incensae , a culmine stratae  
 ( Noster amor ) villae ; respersi sanguine nostro  
 Campi , quos largo sudore rigavimus ; aegri ,  
 Uxorum , puerorum cum misero comitatu ,  
 Vix pauci effugio gladios vitavimus ; ecquis  
 Temperet a lacrimis haec cerneus ? Arbore laeti  
 Nobilium contra campi ; pastore quieto

Armenta in stabulis somnum capientia ; celsa  
 Villarum duris tecta insultantia vulgi  
 Damnis. Quis feret haec indigna ? Videte superbas,  
 O miseri cives , altis a moenibus aedes  
 Nobilium ; nostros at sparsos igne ruinisque  
 Agros. His ardet pietas clamoribus ; ira  
 Sed tamen huc illuc auditur , ludier astu  
 Ignarum vulgus , solos caput esse malorum  
 Patres. Dum clamant , en apparere repente  
 Hastae , sanguineae cristae , clypeique micantes ;  
 Terribiles oculos et membra immania noscunt  
 Adstantis Marci ; pueri imbellisque caterva  
 Plena metu palmas et vocem tollere caelo ,  
 In limen multi ruere , ac tundi pedibus pes.  
 Praecipites alii campis procurrere , volscos  
 Incassum gladios a tergo instare timentes ,  
 Cardinibus trepidi conversis claudere portas  
 Custodes , ferro munire ; evulgat adesse  
 Nam Cajum fama ante fores , volscasque phalanges  
 Urbem invasuras somno curisque sepultam.  
 Nec mora ; flammato populus diffunditur ore  
 Per muros , rapidis ut spicula jactet in hostem  
 Dextris ; ast umbrae Volscum sub moenibus altis  
 Errantem velant. Luctus apparet imago  
 At campis ; caelo funum volitare favillamque ,  
 Exsultare ignes , diuturnos nocte labores  
 Hauriri. Lunae facies caligine tecta ,  
 Funeris atque atris flammis Urbs cincta videtur.  
 Prospicit haec vallo moestis e moenibus agmen ,  
 Ceu resona moerens frater prospectat ab ora  
 Fraternas pinus violentis fluctibus actas ;  
 Hinc ait ad caelum sublato lumine : Diva  
 Justitiae fontes ultrix accincta flagello  
 Nos quatit ; immeritum luimus crudelia facta  
 In Cajum ; justi leges non frangere discant

Gentes. Pars oculos aliis defigere ; fossas  
 Pars contemplari , et turres et moenia firma  
 Hostiles contra incursus ; pars volvere secum  
 Indomitam Romae virtutem , et robur in armis.  
 Tum Valerus pius , et Pinarius , atque benigno  
 Corde patres agris pulsos ad tecta colonos  
 Adducunt , famulosque vocant , solantur et aegros  
 Eloquio ; nudos obducunt vestibus artus ,  
 Et medicas adhibent herbas ut vulnera curent ,  
 Restaurantque cibus vires , artusque rigentes  
 Igne foveant. Matres gremio castaeque puellae  
 Exciunt miseros pueros , et limina pandunt  
 Faemineis turbis plorantibus. Acer in armis  
 Posthumius sagulum largitur et arma juventae.  
 Ad pietatis opus cuncti , quos copia laetos  
 Reddit , concurrunt alacres , studioque levamen  
 Majori praebent miseris , ut luceat Urbi  
 Integritas patrum , se clam non arma vocasse  
 Marci , sed taedis hunc inflammari irae.  
 Nititur hinc agmen celsis erumpere portis ,  
 Et ferro ulcisci villarum incendia ; gressus  
 At sistunt , oculos victoribus atque tremendo  
 Vertentes Cajo , et sancti mandata Senatus  
 Atque sibyllinos afflatos numine libros  
 Versantes , acie structa ne credere campo  
 Auderent ; vario fervent ita corda tumultu ,  
 Turbanturque malis , partesque trahuntur in omnes.  
 Objice tum retro veluti fluit unda repulsa ,  
 Sic populus mediam sese referebat in Urbem ;  
 Huc illuc vulgi rapiuntur fluctibus aegri  
 Nautius et Furius stipatis undique tristi  
 Concursu templis ; non luctus verba sonare ,  
 Non irae fremitus , aures sed ad omnia versae ,  
 Attoniti vultus ; nato velut ore trahenti  
 Extremos gemitus pater adstat ; cuncta silere ,

Non requiem capere, ut silet ingens ira metusque.  
 At quo pagnarum et caedis magis ingruit horror,  
 Exerit hoc mage virtutem mens firma Senatus,  
 Et mediis numquam se pacis amore quiesse  
 E turbis, refugi sed pacis munera clamat  
 A Volscis odium immortale gerentibus; ergo  
 Tela manu valida stringenda, vibranda; benignos  
 Romulidis sat adesse Deos, sat robur in armis.  
 Hinc magis audaces inflammans laudis amore,  
 Et patrum memorans virtutem claraque facta,  
 Ut clausas portas et celso vertice turres  
 Servantes hostem propellant robora pubis  
 Ocyus ire jubet; sed bellis milite duro  
 Et firmis senibus circumdat moenia; multa  
 Tela geri mandat, clamori parcere; et acer  
 Ipse praeit cunctis; plebemque laboribus urget.  
 Dextera jam servi jaculis armatur acutis,  
 Aspera quam cohibet lex, ne vexilla sequatur;  
 Martis opus suffert inbellis faenina, nondum  
 Et firmis pueri membris: labor ultimus omnes  
 Convocat; et muros cum hostis circumsonet armis,  
 Rejicit Urbs artes ac turpia verba tribuni,  
 Explicat et robur, quod cuncta obstantia pellit.  
 Haec animis opera urgebat certantibus instans  
 Romulidum jusso confertim turba labori.

Interea turinas plaudens excepit equestres  
 Janua castrorum; praedae non parvus acervus  
 Surgebat mediis vallis et pulchra trophaea;  
 Atque veliternus victor dux ora serenus  
 Monstrarat reduci Cajo; tunc omnibus ille  
 Collectis voti compos narraverat ingens  
 Camporum flammis excitum murmur in Urbe,  
 Os ut plebejum patribus sit dira precatum;  
 Hinc animis hilares acies, altaque repletae  
 Spe Romain secum pugnantem sternere bello,

Circumfundebant se, somno ut membra levarent.  
 Et jam praecipitans stellato pallida caelo  
 Nox medios superat cursus, labuntur et astra,  
 Jamque super vallum Volscorum rara coruscat  
 Flamma; silens caelum conscendit funea nubes;  
 Haeret defixus telluri calceus hastae,  
 Lunari radio sed cuspis fulgurat alta;  
 Omne solum telis tegitur; vexilla levantur  
 Martia principiis, nocturno et crispa susurrant  
 Vento. Tum statio callem, qui ducit ad Urbem,  
 Occupat; hinc statio dextro statioque sinistro  
 Assidet in tumulo; circumstant agmina turmae;  
 Excubiae tantum vigilant; pars caetera somno  
 Indulgent scuta inter, lora, rotasque jacentes.  
 Quisque suae medio turbae dat membra quieti  
 Ductor, quasque prius vigilans in mente revolvit  
 Ardenti studio, pugnas sub pectore versat.  
 Volscum castra silent, et fessa labore quiescunt;  
 At non infelix animi dat membra quieti  
 Marcius, aut oculis recipit, seu pectore noctem;  
 Saepe jacet dexter, laevus, pronusque, supinusque;  
 Exsurgit tandem stratis, et concitus errat  
 Tranquillos inter vallos; tentoria cernit  
 Non procul Anthaeji, qui toto pectore somnum  
 Proflabat squamis thoraca indutus ahenis,  
 Promptus ad arma super villosi pellibus ursi  
 Fusus; circumstant caput inter scuta cubantes  
 Turbae. Defixo subsistit lumine Cajus:  
 Et felix! fatur, placido cui corpora somno  
 Di dare permittunt! Lentis tum passibus errans  
 Frentonem reperit requie quoque membra levantem,  
 Et gemitum mittit; turmas ac inter equestres  
 Non procul Umbronem, Salium, fortemque Dolonem,  
 Et multos, quibus haud rumpit fera cura soporem.  
 Iratam dextram tunc tollens: ergo quiete

Quisque levat curas ; haud ergo Marcius unus ? . . .  
 His medium dictis sermonem abrumpit , et aeger  
 Accelerans retro gressus tentoria muta  
 Irrumpit nusquam consistens ; namque propinquae  
 Horrorem pugnae memori sub pectore versans  
 Conflictabatur secum. Genus omne suorum,  
 Et puri scelerum patres , et Numina magna ,  
 Omnia sunt oculis. Ast alta mente repostum  
 Judicium suberat Decii , saevique dolores ,  
 Improbus atque labor pugnarum , victaque bella ,  
 Quae Romae exciderant ingrato pectore ; saevis  
 Hinc odiis amor in patriam cedebat. Amica  
 Solliciti pietas Moenae , qui cuncta videbat ,  
 Ingemuit ; vocem tollens tam talia fido  
 Ultrô ait armigero turbatus Marcius : ergo  
 Cras ruet in patriam Volscus , saevaue meorum  
 Caede cruentus erit ! Quo lux pulcherrima abivit ,  
 Cum pro Romulidis discrimina mortis adibam ,  
 Cum laetis oculis populus vestigia pugnae  
 Censebat plagas , quas pectore per tria lustra  
 Pro Roma accepi superato ex hoste reversus ?  
 O bona pax , inter mortalia commoda summum ,  
 Pax cordis , recti quam dat mens conscia facti ,  
 Nam qua replebas pectus dulcedine durum  
 Inter opus belli ! Nunc fervens ceu mare fluctuo  
 Huc illuc. Primum vix Anti buccina muris  
 Horrendum sonuit , rapior noctuque diuque  
 Caeca contra hostes ira , contraque sodales ;  
 Me , me ipsum fugio ; si pax est , expeto pugnas ;  
 Si bellum , pacem sitio. Quid plura ? Soporae  
 In medio noctis venit aspera matris imago ,  
 Heu ! quam terribiles oculi ! quam dispar ab illa ,  
 Quae me post pugnas toties accepit ovantem ;  
 Gloria tu matris clamans , requiesque senectae es ?  
 Hocne refers munus matri ? . . . Quae terra dehiscet



Heu mihi ! Tu potius domino succurre , piumque  
Moerori tanto per costas exige ferrum.

At diram Moenas hortatus ponere mentem ,  
Ire jube centum me inter discrimina , fatur ,  
Pugnantem , cautes inter foveasque ferarum  
Hanc animam tibi devoveo. Sed dextera nostra  
In domini nunquam cor vertet spicula ; namque  
Flagitium letho pejus mens horret ; et almae  
Non ita me docuit puerum sapientia Romae ,  
Nec Moenae saevos monitus hos ipse dedisti.  
Cur mors in votis ? Refugis quia mittere tela  
In patriam ; patriae quare fer munera pacis.  
Ingens laetitiae superest spes. Verba fidelis  
Lex tibi sint Moenae , ac tellus et numina plaudent.  
Quae spes , qui divi , quae pax , quae gaudia ? Rumpit  
Dux vocem ; tetras me coram pandit abyssus  
Fauces ; jamque feror furiis. A culmine celso  
Roma ruat , saevos quae belli suscitât ignes  
Infandis ausis ; consevit turgida ventos  
( Lux properat metuenda ) , metet de turbine. Cajus  
Oppositos inter motus ita fluctuat anceps ;  
Nunc animo radius fulget virtutis et aequi ,  
Indomita tenuis nunc lux extinguitur ira ;  
Ceu lux et tenebrae nimibosa nocte vicissim  
Succedunt celeres , ceu se rotat impetus atri  
Turbinis. At demum defessus , tempora nitens  
Fascibus hastarum , dat lumina victa sopori.

En autem aegra cava notam sub imagine spectat  
Mens formam , os , humeros , quae vivo gestat amictus  
Tulliadi similes ; tristi circumvolat umbra  
Sed nox atra caput , creber singultus et artus  
Concutit ; hinc visus moestas effundere voces :  
Dormis , Marciade , nostri securus amoris ,  
Dormis ? Curabas equidem , dum vita manebat ,  
Heu ! functum memorare piget ! Sinis ergo cruorem

Sic impune meum romana cuspide fusum ?  
 Sic mihi juratae toties Volscisque patrique  
 Stas fidei, et durae sic ultor caedis amici es ?  
 Sic belli nubem circumfers longius Urbe ?  
 Surge age ; terribilem vagina diripe ferrum ;  
 Surge age, coge acies, disjectos dirue muros,  
 Romulidumque caput vastis confringe ruinis ;  
 Ultrix irarum tecum ferrique ministra  
 Omnibus umbra locis adero. Sic fatus ; et atros  
 Ex oculis ignes misit, stridensque sub altam  
 Ille abiit terram. Tum somnus membra relinquit ;  
 Visa tamen facies oculis et pectore inhaeret ;  
 In mediis audita sonat vox auribus, asper  
 Marcius hinc surgens rapit hastam, solis et astrum  
 Ore vocat ; furor olli atra caligine mentem  
 Intus agit, funditque oculis ardentibus ignem.

At matrum teneris cum natis agmen in ulnis  
 Magnanimas aderat celerans Veturiae ad aedes,  
 Flammarumque viae moestae longo ordine lucent.  
 Jamque illae patrio succensae pectus amore  
 Ad portas Urbis properant, ubi cogitur ordo  
 Carpentum, pulsatque solum crebra ungula equorum.  
 Pallida marimoreo maternam limine mentem  
 Tum subito turbata metu, stetit ante parentem  
 Marciadis nitidam pateram plenamque lyaeo  
 Ipsa manu gestans libanda Volumnia summo  
 Dona Jovi, placidaeque dedit sic anxia voces :  
 Sume, Deumque patri liba, supplexque rogato  
 ( Ad Volscas animo quando sedet ire cohortes ),  
 Hostibus e mediis ut saltem ad tecta reducat  
 Incolumes pueros, et nobis omina fausta  
 Offerat ante abitum. Cui mater : ferre supinas  
 Haud piget axe manus ; pro Roma fundere vota  
 Est decus. Hinc puros formosa liquentis aquai  
 Humores dextra tollens dat Tullia, laeva

Supponit pelvim ; et postquam Veturia lavit  
 Rite manus , patera accepta libavit lacchi  
 Dona , levans alto voces ac lumina caelo :  
 Juppiter aërio tarpeji e vertice saxi ,  
 In terris qui cuncta moves nutu , optime Divum ,  
 Da veniam grata ad nati minitantiæ castra ,  
 Et nostra eripiat pietas a faucibus Orci  
 Nutantem patriam. Longæva hæc pectore vota  
 Fundebat mater , cum cernit in æthere fulvam  
 Lustrantem prædas aquilam : quo certior ales  
 Augurio nullus ; sic illa ætate docebat  
 Vana superstitio ; pennis ingentibus Urbem  
 Supra agili dexter lapsu ille volabat. Amicum  
 Accipiunt omen , lætasque ad sidera voces  
 Extollunt omnes. Tum autem Veturia currum  
 Festinans agilem cursu , pulchrumque recentemque,  
 Inde aliæ ascendunt , subitoque auriga flagello  
 Insonat ; at manibus non omnes fundit habenas ,  
 Et portas gressu moerentum plaustra relinquunt,  
 Ac tardis longo celatur semita tractu  
 Bigis ; hinc atque hinc equitum populique caterva  
 ( Matronale decus sic poscit ). Dulce sed agmen ,  
 Quod steterat moerens magnæ sub turribus Urbis ,  
 Canæ prospiciens matris , dulcisque sororis ,  
 Conjugis et natae currus , suspiria ducit  
 Pectore deplorans matrum crudelia fata ,  
 Ceu miserae certo properent se opponere letho ;  
 Nam mentes agitat Marci violentia , pectus  
 Cujus non turbæ moverunt vota togatae ,  
 Non sacris patres redimiti tempora vittis.  
 Hinc tacito remeant moestoque ad limina gressu ,  
 Dum ramos inter borealis murmura ventus  
 Miscet , et egreditur Phoebus caligine tectus.  
 Jamque fugat castris Volscorum rauca soporem  
 Buccina , et armorum caelum tonat omne fragore ;


Sollicitique duces subeunt tentoria Marci,  
 Et belli de more ferunt bona verba salutis.  
 Dum tectum complent cristis auroque decori  
 Rectores Volscùm, longa stetit arduus hasta  
 Comiter adnitens, et claro horrendus in aere  
 Marcius; ingentes artus, magna ossa lacertosque,  
 Intuitusque feros radiantes luce cruenta  
 Mirantur; memorant quo turbine torqueat hastam,  
 Quo vultu educat juvenes in bella ruentes,  
 Haereat ut lateri illius victoria. Fronte  
 Magnanima volscae tunc Umbro vota cohortis  
 Vocibus expromens, saevas magis excitat iras  
 Marciadis: palmas merito, tua fortia facta  
 Itala miratur tellus, dux inclyte. Roma  
 Jam vincenda tibi, quam si non obruis armis,  
 Tot domitae frustra gentes, frustra que latini  
 Expectant populi pacem: Nunc exere vires;  
 Urbis contemptus memora moremque superbum  
 Quo te non revocat (quartus jam volvitur annus);  
 Nec te proscissum probris, ad culmina tractum  
 Tarpejae rupis ferme benefacta piasse  
 Morte loquar. Devota tibi jam dirige Volscùm  
 Agmina; non segnes scandemus moenia; nostroque  
 Aeternum, ductor, tibi sanguine nomen emenius.  
 Acrius his dictis memori sub pectore Marci  
 Assurgunt irae; sed celat corde profundo,  
 Atque gravi spondet vultu, quod gloria poscit  
 Volscùm. Tum Voluso, Anthaejo stipatus et acri  
 Umbrone, egressus tumulo, quo caetera Volscùm  
 Aequorumque manus concurrat, talia reddit:  
 En fastu tumidam sibi jura haud nata putantem  
 Urbem, quae rapuit jam per tria saecula pacem  
 Felici Ausoniae! Latii gentisque sabinæ  
 Immensae, o Volsci, Aequicolae, emulantur opes heic,  
 Heic enses rigidi, qui caede et sanguine vestros

Foedarunt campos. Quod valde, saepe, diuque  
 Expectastis, adest; Roma, infensissima Roma  
 Aut excindenda est hodie; aut jam victa suescet  
 Jussa pati Volscum. Vocat irremeabile tempus;  
 Vincendo socios populos properastis ad altas  
 Portas; discordes trepidique os tollere cives  
 Non audent muros extra. Quae moenia firma,  
 Quae validae nostris acies legionibus auctis  
 Obsistent? Alacres postremos hosce labores  
 Suscipite, o fortes: vos pax diuturna manebit,  
 Gloria, divitiae; Romanos vincula, lethum.  
 Praeterea raptas gazas, lariumque ruinas,  
 Et longos Volscum luctus, caedesque, fugasque,  
 Virgineasque manus nexas memorate catenis  
 Et Romam tractas. Cocyti stagna severa  
 Linquentis Graji, quem vidi noctis in umbra  
 Vulnere contactum, voces saevosque dolores  
 Audite, et scelerum tantorum sumite poenas,  
 Ut sit ei tandem requies Acheronte sub imo.  
 Nunc nunc este viri validasque expromite vires;  
 Ite animis alacres, armis circumdate Romam,  
 Expugnate, solo prosternite moenia, gazas  
 Dividite, atque animos explete; aliquando superba  
 Sentiât ultores divos. Dux inclytus armis  
 Dixerat, atque oculos suffectos sanguine et igne  
 Torquebat Romae, veluti leo; tollitur astris  
 Immensus turbae clamor. Certantibus omnes  
 Incumbunt animis operi, pariterque laborem  
 Sorte trahunt; cuncti sub signa erecta vocantur;  
 Agmen digreditur; via tuscula clauditur armis;  
 Turrifragis trahit arietes pars cornibus; affert  
 Pars curvis humeris tollendas moenibus altis  
 Scalas; ad taedas alii vastosque molares  
 Fundendos aptant balistas; plaustra gravata  
 Undique missilibus stridunt, equitesque superbi

Undique discurrunt ; certatim instare phalanges  
 Duro operi Martis , laetasque attollere voces ;  
 Intentis , tacitis , effusis undique circum  
 Marciades ducibus longe fulgentibus auro  
 Mandat , ut obliquum pedites radiantibus hastis  
 In binas partes disponant moenia contra ,  
 In medioque locent directum robore textas  
 Balistas , inventa truci tormentaque Martis ,  
 Quae jaciant muris saxorum pondera , tela ;  
 Edocet ut peditum dextrum laevumque tegatur  
 Cristatis cornu turmis ; quae copia spectet  
 Pugnas , auxiliumque ferat certetque vocata ;  
 Quae manus advigilans a castris arma repellat ,  
 Qui circum excurrant equites mandata ferentes ;  
 Innuit , admotis superentur moenia scalis ,  
 Coelius et collis primum frons celsior Urbis ,  
 Tum reliquum Romae quatiatur turbine belli ;  
 Cuncta movet Cajus ; sic quando procreat atram  
 Providus omnipotens hyemem , cito nubila vasto  
 Fusa volant caelo , deusantur in agmina nigra ,  
 Parentes properant dictis eurusque , notusque ,  
 Africus , et boreas ; et fulmen , turbo , tonitru ,  
 Graudo , imber , terror nimbos immurmurat inter .  
 Atque ea dum celerant acies , digressus ab Urbe  
 Carpentum procul apparet longissimus ordo  
 Tarde progrediens , et circumfusa caterva ,  
 Quae fidens animi Volscum ferventia bello  
 Castra petit . Cajus stupet ; obstupere silenti  
 Ore duces ; doctus sed quot tendantur in armis  
 Insidiae , juvenes in equis dux mittit anhelis ,  
 Qui videant , lateat num quis dolus , hostis an horrens  
 Telis , quodve virum genus aut quae causa coegit .  
 Nec mora , cuncta patent ; remeans nam laeta juvenus  
 Nunciat insidias nullas , haud arma timenda ;  
 Imbellem matrum generoso sanguine cetaui

Cum famulis gressus castris advertere turbam  
 Quae rogat illacrimans, liceat ducis ire benignos  
 Ante oculos. Vario replentur murmure castra;  
 Namque duces aliqui, matres ut funera vident  
 Urbis ab excidio sese subducere cernunt,  
 At melior clarum pars sanguine pellier Urbe  
 Incensis villis vulgi contendit ab ira  
 Agmen. Tunc Umbro generoso pectore fatur:  
 Imbelles quidquid moveat, vestigia Romae  
 Haud servat Volscus, turpi seponere honestum  
 Noscens. At pulchram belli nunc jure daretur  
 Praedari turbam, et raptas sine more Sabinas  
 Ulcisci; cultos doceat sed barbarus hostis  
 Aeneadas, sancti nunquam violare pudoris  
 Jura, licet sileant saeva inter praelia leges.  
 Cui paucis ductor setinus; temnere fas est  
 Imbelles; inter conflictus ultio digna  
 Magnanimis audenda viris; Urbs marte domanda,  
 Pax danda Ausoniae, quae nobis brachia tendit.  
 Haec inter longa subnixus Marcius hasta  
 Adventus causas tacito sub corde volutat;  
 Ac secreta ferum pertentant gaudia pectus;  
 Nam videt Urbe magis civiles fervere fluctus,  
 Trojugenas lapsos a summo laudis ad imum  
 Faemineis precibus gentis committere fata;  
 At miseret matrum, nullo quae crimine foedae  
 Oratum veniam sceleri mittantur ad hostem,  
 Cum jam pugna vocet. Tento tunc indice dextrae  
 Fas nulli jubet esse imbelles pellier. Ergo  
 Inter equos agmen graditur currusque gementes  
 Dissectum, cujus partem pulcherrima ducit  
 Marciadis conjux, aliam sapientia matris,  
 Quae sic admonuit. Demisso lumine, passis  
 Crinibus accedunt, tegitur frons candida tristi  
 Nube, sed invicto latitat sub pectore constans

Mens , quae pro patria, pro pulchro temnit honore  
Vitam ; labra tacent ; ast illa silentia cultum  
Virtutis mandant , obscuro palla colore  
Artus , sed mentes obducit candor ; et inter  
Lucet majestas quamquam velata ; refulget  
In teneris membris , oculis , malisque venustas ;  
Gestus at , intuitus , gressus , speciesque pudica ,  
Quae non succendunt turpes sub pectore flammæ.  
Casta replet pietas , stupor , et reverentia Volscum  
Belligeros animos ; sancti lux tanta pudoris  
Et virtutis odor spirabat corpore matrum !





## LIBER DUODECIMUS



## A R G U M E N T U M

*Divina Providentia semper dives in misericordia imponit bello finem, et Volscorum animos ad pacem inclinat. Oratio Volumniae, matrumque lacrimae, ut flectant Marcium; ejus tamen animus adhuc durus resistit. Adduntur preces et objurigationes Veturiae. Coriolanus diu secum luctatur et haeret; tandem seipsum superat, admirantibus Volscis, et patriae ignoscit.*



**A**t Rex saeculorum, qui supra sidera degit,  
 Unde per immensum caeli terrasque jacentes  
 Justitia et bonitas diffunditur aequoris instar,  
 Aeternis fixam imperiis exurgere lucem  
 Jussit, qua longe romanis praelia muris  
 Et dolor et lethum, atque atrae formidinis ora  
 Pellantur. Concors nam ceu discordia vocum  
 Dulce sonat; ceu parrhasia cum spargitur arte  
 Obscurus niveusque color, tum forma refulget,  
 Et rapiunt oculos tabulae; sic nascitur ordo,  
 Saeculorumque nitor, quando contraria mira  
 Junguntur lege, ut virtus et forma micantes  
 His mage reddantur, summae miraculaque dextrae  
 Attonitus recolat mundus. Sed saepe supernae  
 Mens hominum cum obstet voci, sapientia caeli  
 Perficit, aeternis quae jam decrevit ab annis,  
 Ludit et humanum nisum omnipotentia; namque  
 Dum remorariet et sanctis obsistere gaudet  
 Arbitriis, hominum paret vesania; praeceps  
 Ceu quadrupes freno, voci, stimuloque reluctans  
 Fert equitem dorso, et paret, dum calcibus auras

Verberat. Arcanis et pulchris artibus ergo  
 E vitii tenebris virtus, pacisque serenum  
 Horrendi erumpit belli de faucibus. Inde  
 Omnipotens genitor, cujus conspectibus aula  
 Caelestis, tellus, horrens curvatur abyssus,  
 Annuit, et nutu caeli tremuere columnae.  
 Nam postquam exegit violati juris ab Urbe  
 Terribilem populis poenam, circumdare septem  
 Luce parat colles, vult Romam Solis ab ortu  
 Litus ad hesperium saeculis labentibus olim  
 Ferre orbi leges virtute armisque subacto;  
 Tum sanctum Fidei diffundere lumen ubique,  
 Et certas monstrare vias, quibus itur ad astra;  
 Sobrietas etenim, duris patientia rebus,  
 Urbem quae decorant generosam, praemia ab illo,  
 Cujus justitiae summae est par gratia, poscunt.  
 Hinc qui non raro miracula promere gaudet  
 Ex levibus causis, tanquam si luderet orbe,  
 Effundit tenebrosa citas per nubila flammæ,  
 Atque repentino tonitru, cui terra Latinorum,  
 Et Volscum regio, superum infernumque profundum  
 Contremuit, fugere ferae, nova jussa cohorti  
 Spirituum tradit, Latii quae praesidet arvis.  
 Hi levibus celerant adnantes aethera pennis,  
 Celsa ubi se tollunt fortis tentoria Marcæ,  
 Et super altivolis invisi nubibus errant,  
 Illius ut flectant animos ad jussa parentis.  
 Jamque propinquabat gemebunda Volumnia castris  
 Formosae sobolis mater, formosior ipsa.  
 Ora viri madidis vix autem oculis aspexit,  
 Ora nimis nota, et longo post tempore visa,  
 Artibus intremuit, totoque expalluit ore,  
 Atque ruens curru passis sine lege capillis  
 Aequalem nitidae stellae gestabat in uluis  
 Natum; sed major vadentem haud passibus aequis

Pone sequebatur matrem. Dux inclytus aure  
 Tum procul accepit gemitus, agnovit et ora  
 Conjugis et puerum; subitoque flagravat iu imo  
 Pectore dulcis amor pietasque antiqua. Calenti  
 Sese offert animo uxoris reverentia, candor,  
 Et vigiles curae, dum stratis ipse jaceret  
 Vi fractus morbi; videt aurea tempora, quando  
 Fas erat in laribus patriis explorare beatos  
 Annos; mens pingit, quonam succensus amore,  
 Cum premeret tecti superato limen ab hoste,  
 Stringeret amplexens saepe inter brachia natos  
 Majorum narrans virtutem, atque oscula miscens,  
 Cresceret ut parvis in cordibus aemulus ardor;  
 Ipse videt dulces molli constringere dura  
 Tela manu pueros, undanti et ludere crista,  
 Atque hilares nitido clypei se cernere in aere;  
 Et laetae matri non una in pectore patris  
 Vulneris inflictis digitis ostendere signa.  
 Haec cernens odii languere incendia sentit,  
 Ceu qui post longos cursus in sede quiescit;  
 Explicat et frontem placidam volvitque serena  
 Lumina. Sed veluti rutili qui solis in ortu  
 Evigilat recipitque diem, mox lumina somno  
 Dans in nigrantes iterum prolabitur umbras,  
 Sic animus vigilans in pulchra pace moratur,  
 Tum caecas subito in tenebras prolabitur irae;  
 Igne micant oculi, rabie fera corda tumescunt;  
 Sed tectus claudit dux os, ne lingua revelet,  
 Quas virtus ac ira cient sub pectore pugnās.  
 Tum vero lacrimis oculos madefacta decoros,  
 Impellensque acies formosa Volunna conjux:  
 Ecquis me miseram, fatur, teque optime perdit  
 Marci? Quis furor? Heu! quantum mutatus ab illo es,  
 Qui pro majorum tectis, pro conjuge fida  
 Pulchrum ducebas caput objectare periclis!

Qua clari soles fugerunt praepete penna ,  
 Quando fulgebam gaudeus splendore beato ,  
 Quo tu cinctus eras ? Mihi tu lux , gaudia , numen.  
 Nunc ab amicorum malefida spreta caterva ,  
 Quae fugiente fugit fortuna , torqueor usque ,  
 Infaustasque domos lamentis compleo. De te  
 Quaero , cum videam nostros intrare penates  
 Raros , horrissona in nimbo ceu sidus , amicos ,  
 Meque statim quaesisse fugit. Mens me rapit aegra  
 Huc illuc ; fari incipio ; suspiria voces  
 Incoeptas rumpunt. Foveo complexibus hosce  
 Natos , mox amens pello ; sic horrida lucis  
 Tempora decurrunt miserae mihi. Post ubi terras  
 Umbris , quae curas augment , taciturna tegit nox ,  
 Sola domo vacua versor , defessa relictis  
 Incumbo stratis plorans ; nam tristibus umbris  
 Occubueri mihi patres fratresque ; Deorum  
 Munere tu , Marci , pater es , tu mater , et idem  
 Tu frater , thalami tu vir mihi foedere junctus ;  
 Te video absentem , teque absens audio , sed tu  
 Non audis miseram ; non audis ? Sic amor ergo  
 Praemia tantus habet , qui te te deperit unum ?  
 Oro per has lacrimas , quae quondam saepe movebant ,  
 Perque hunc ( si nostrum fuit unquam quid tibi dulce )  
 Vultum , magnanimam pietatem redde , salutem  
 Redde , precor , patriae , quae me tibi , teque creavit.  
 Quod si te nostri ceperunt taedia , si vis  
 Interitum nostrum , placeat me occumbere solam.  
 Per dextram supplex oro fortemque piamque ,  
 Quae domuit tumidos fastu , erexitque jacentes ,  
 Per qui te in lucem clari fudere parentes ,  
 Per Superos , quorum cumulas altaria donis ,  
 Ad pueros specta , quos ad vitale vocasti  
 Lumen , ad hos pueros noctesque diesque rogantes  
 Ut dulce os patris reddam ! Quid reddere possim

Infelix ? His parce , tibi qui brachia tendunt  
 Orantes veniam ; primus nam nuncius horum  
 Perstringens aures clari fuit angor acerbus ,  
 Patris et exilium ; indumenta fuere priora  
 Fasciolis positis velamina nigra doloris ,  
 Blandaue verba , quibus prius est complexa relictâ  
 Hos mater , juges lacrimae gemitusque fuere .  
 Nunc tua si tandem ratio non subjicit iras ,  
 An pietate tegi patris pietate carentis  
 Natos a populo credis ? Post terga revinctis  
 Heu ! cerno inanibus pueros et verbera saeva ,  
 Et miserum gemitum , et lacrimas plagasque cruentas .  
 Parce tuo , genitor , saltem de sanguine cretis ,  
 Quique tuos vultus referunt animosque viriles ;  
 Respice . . . At oranti vocem dolor intercludit ,  
 Et fortis genibus luctu formosior haeret  
 Marci ; purpureas malas , et mollia labra ,  
 Et mortis pallor tegit albae frontis honorem ,  
 Et lacrimae velant rutilantia lumina ; fusa  
 Illa solo languet ; veluti rosa solis ob aestum  
 Demittit collum , nec ut ante suave rubescit ,  
 At quamquam pallens campo formosa recumbit .  
 Circumstant Volscùm tacitae denso agmine turbae ,  
 Et matris miserae pietas indigna ferentis  
 Natorumque dolor pertentant pectora . Ductor  
 Anceps , irato similis similisque gementi ,  
 Nunc spectat natos et pallida dulciter ora  
 Conjugis , ingratae nunc moenia turbidus Urhis ,  
 Et silet . At multo gemebunda Valeria fletu ,  
 Ut carae sobolis castaeque uxoris amore  
 Tandem ganderet , poscebat poplite flexo ,  
 Et sic instabat : tantae pietatis imago  
 Flecteret et saevos populos animosque ferinos ;  
 Quo mage magnanimos ! Pedibus manibusque severi  
 Patris certatim figentes oscula nati

Sic complorabant : hanc nobis eripè vitam ,  
 Quae tua tota est , aut dulcis miserere parentis ;  
 Nonne mori pueros praestat , quam cernere matrem  
 Jam jam lapsuram fatis a patre relictam ?  
 At moestae sociae tundentes pectora palmis ,  
 Scindentesque comas , ardentia lumina Cajo  
 Et voces tendunt ; omnis pietate resultat  
 Campus ; quid ductor ? Memores e pectore vellit ,  
 Aut iras refovet ? Veluti percussa sagittis  
 Inclusa in lustrò cum natis torva leaena  
 Ingeati frendens pietate movetur et ira ;  
 Namque hic fulmineos dentes unguisque recurvos  
 In densam turbam venantium concutit ira ,  
 Hinc amor haud patitur miserandos linquere natos ;  
 Sic Veturiades ingenti fluctuat aestu  
 Curarum ; circum nunc volvit sanguine tincta  
 Lumina , nunc vultum demittit. Fixus in uno  
 Cajo voce caret campus. Certamine tandem  
 Ira caput tollit victrix ; non parcere fixum est ;  
 Attamen uxori , quae mentem animumque recepit ,  
 Convertens oculos , saevum lenire dolorem  
 Aggreditur dictis ; erga te pectore nostro  
 Non restinctus amor ; mihi namque incommoda vitae  
 Constanti cura minuebas. Insuper hosce  
 Fudisti nobis pueros ad lumina vitae  
 Spem curamque patrum ; tu sicut numen adoras  
 Praeclaram matrem , supremamque munera nobis  
 Confers. Pone modum lacrimis ; num fletibus instas  
 Ut gladium ponam , nostros victoria currus  
 Cum ducit ? Marci conjux adversa decori  
 Vota feret ? Romam fatorum linque rigori ,  
 Nostram cum natis fortunam pone sequendo  
 Gaude ; sed demum nos teque incendere questu  
 Desine : fata obstant : nostras Deus obstruit aures.  
 Sic ait , et valido nisu sub corde profundo

Comprimit ingentes curas, quae erumpere tentant,  
 Nec lacrimae immitem flectunt, nec vota suorum.  
 Ecce autem densas urget matresque virosque,  
 Atque petit fidens animo Veturia natum.  
 Ibat acerba tuens, ac Romae induta severam  
 Virtutem genitrix, reliquisque gementibus ira  
 Infrenit aspiciens nulla pietate moveri  
 Cor nati. Fidus sed densa per agmina Moenas  
 Prospicit antiquae cognoscens ora parentis;  
 Mater adest, Marci: properat Veturia, Marci!  
 Nec mora; sollicitam nati reverentia mentem  
 Complet, et illius, dederat quae munera vitae,  
 Ante pedem fascēs submittit Marcius ingens,  
 Cui sese Latium subjecerat; inclyta Romae  
 Progenies tanto servavit honore parentes!  
 Ille statim, veluti si lapsū numen Olympo  
 Cerneret, ad matrem palmas et lumina tendit;  
 Ast vultum torva avertit, retroque repellens  
 Dextra cunctantem natum, dum multa parabat:  
 Quis tu, Marte ferox ductor? (sic increpat ultro)  
 Fare age romanae proles Veturiae, an hostis?  
 Nostros ore refers vultus, ast impia facta  
 Hostiles referunt animos... E mente putabis  
 A me deletam matrem? Cur excidit ingens  
 Ore nefas? Memini, meminisse et summa voluptas  
 Quod mihi sit genitrix Romae Veturia sidus;  
 Materna de carne caro nostra induit ossa,  
 His fluit in venis matris de sanguine sanguis;  
 Me pulchris potius factis quam voce docebas  
 Aeternas Divūm leges cultusque parentum,  
 Ac virtutis iter, Veneris non currere callem,  
 Pauperiem angustam longos et ferre labores,  
 Et velut abjectam pro pulchra spernere laude  
 Vitam. Mens primos, ut par est, solvit honores  
 Numinibus magnis, tum Matri... Facta reclamant.

Qui novit reddi par nunquam posse parenti ,  
 Abstinet a donis nunquam ; tu tela ferendo  
 In patriam , meritos genitrici reddis honores . . .  
 Orbis ad imperium primaevo tendit ab ortu  
 Roma ferox bello , et vulgi mens credula sperat  
 Divos imperium Romae sine fine duros ;  
 Nec latet , hanc fraudem primis a Regibus ortam  
 Fallaci patres plebejis vendere lingua.  
 Horrida flagitiis en tertia volvitur aetas ,  
 Ex qua vis Urbis sceleratis obruit armis  
 Ausoniam placidam , Saturni jam aurea regna.  
 Oppressae gentis clamores audit aequus  
 Juppiter. Heic scelerum finis , jam fatur ab alto ;  
 Et movet hanc dextram victricem . . . Nate , dolosa  
 Sub specie recti incautum te decipit ira ;  
 Hinc ferri a Superis credis. Sit crimine foeda  
 Roma : licet civi patrios evertere bello  
 Muros ? Inflammans magis iras auctor id esses  
 Civi pro patria potius sed ut arma moveret  
 Immemor accepti damni. Firmissimus ira  
 Ad patriae excidium contra tu spicula vibras ,  
 Atque putas victor multum te laudis adeptum ?  
 Infandae laudes ! Meritae fastigia famae  
 Pauper , egens , exul tetigisses , fata ferendo  
 Robore magnanimo mentis. Patientia forsitan  
 Non sacrat heroas plusquam vis bellica ? Ductor  
 Hostes cum superet , patiens se subjicit ipsum.  
 Praeterea mira mortales lege gubernat  
 Juppiter advigilans , ne virtus usque prematur  
 A scelere audaci , quod serius ocyus aequis  
 Conteritur poenis. Surgebat lumen amicum ,  
 Mater ad amplexum quando te Roma vocabat ;  
 Hinc quos paullatim multoque labore parasti ,  
 Laetitia ingenti cunctos complexus honores  
 Esses , et meritas infensae crimine purus



Spectasses turbae poenas ; patientia summa  
 Laus, tibi munus erat. Dices ; injuria plebis  
 Anne merebatur praeclarum pignus amoris ?  
 Ergo animus Marci generoso sanguine creti  
 Tetrior est vulgo ? Si plebs indigna favore ,  
 Digni atavi ingentes et Curia , Numina digna ,  
 Digna parens. Igitur pietas ubi denique, vel quae est,  
 Cui feritas etiam populorum , brutaque parent ,  
 Qua Romanorum genitor sonat ille per orbem  
 Tros Anchisiades ? Pietatis jura verenda  
 Tu prior heic violas . . . At si peccata remittat  
 Dux Veturiades , formidinis arguet illum  
 Ausonia , et clarum foedabit crimine nomen ;  
 Jam plusquam lethi faciem mens dedecus horret . . .  
 Tunc putas animi vecordis parcere , semet  
 Vincere ? Num caeco tracti domitique furore  
 Dicentur fortes ; segnes qui pectore delent  
 Offensas , fatui qui ponunt fulminis ignes  
 Divi ? Tun' Volscum gentem sine nomine dices ,  
 Quod , quamvis hostem , tectis te cepit amicis ,  
 Imperiumque dedit belli , patrumque sedere  
 Concilio ? Has imo gentes Oenotria laudat ;  
 Et te , si patriae parcas , ad sidera tollet.  
 Magnanimus nimium Volscus ! Persolvere dignas  
 Si grates nequeam , aeterno venerabor honore ;  
 Et prius hanc animam telo sub tartara trudet  
 Juppiter hospitii custos , quam jura resolvam ,  
 Et socios foede versem ! Versare sodales  
 Turpe nefas ; numquam docuit , Veturia nunquam  
 Turpe nefas ; numquam docuit Veturia , nunquam  
 Hos animo sensus aluit. Sed num furor iste ,  
 Quo ruis in patriam , virtus ? Non jura , Senatus ,  
 Unda , lares , tellus , non sacra heic omnia ? Ferrum  
 Jam male nudatum vagina conde ; tuoque  
 Urbs dono sospes laetetur. Non Numa , non est

Ancus avus, mater nec ei Veturia, segne  
 Quem mors perterret; sed multo segnior ille,  
 Qui se non subigit. Flammarum et caedis abunde est.  
 Hinc arce Volscum, conflentur foedera donec,  
 Quis ambae plaudant gentes. Usura rogatur  
 Temporis, laud crimen; quis temporis intervallo  
 Non melius statuatur, quam belli turbine pacem  
 Caelorum munus? Ne clandas vocibus aurem,  
 Quas hoste effundo coram. Fors crimine purum  
 Ter non tangebant patrum te vota; sed orat  
 Orat te mater. Luctum scis fataque patris  
 Perturbasse domum paulo post saeva dolorum,  
 Quos subii fundens te in lucem. Flore juventae  
 Deserta ignotos debebam findere fluctus,  
 Desidium famulū studio replere, malignas  
 Illorum mentes, parvum gentisque propinquae  
 Cavisse ingenium, fraudes quaestoris avaras,  
 Linguarum vulgi convicia damna necesse  
 Ferre fuit. Mittam plenas formidine curas,  
 Cum per virtutes animum patriasque colebas  
 Artes; quid dicam consumptos aeris acervos  
 Dotali ex fructu, non patris divite censu?  
 Tot tempestatum non cessi, gaudia spernens  
 Conjugii alterius; nobis solatia tantum  
 Crescere te patriae, nos contemplarier ora  
 Conjugis extincti rursus spirantia gnati  
 In vultu. Nosti rursus mea saucia corda,  
 A me cum avulsus linquebas moenia; cum nec  
 Defunctus conjux, exul nec tecta subibat  
 Gnatus; cum luctum solari cogeret aedis  
 Ipsa rogans Superos solamen. Parier haecne  
 Ad tua probra putas? Ast ut mea vota benignis  
 Auribus accipias, remeans ut tempora vitae  
 Mecum traducas, ut nolis esse parentem  
 Bis viduum; aut, potius si vis parere furori,

Excidium differ patriae, cum lumina morti  
 Clansero (nec distant Parcae). Si ad turpe vocarem  
 Te studium, haud matris, naturae haud vocibus aurem  
 Pandas; obsequium, neque taedia longa laborum  
 Respicias. Studeam si vero, gloria claris  
 Ut tua se factis tollat; si nullus in orbe est  
 Me magis exardens, ut laeto pectore vivas,  
 Non exorabunt patriae mea verba salutem?  
 Alma Venus Latium Trojano classe petenti  
 Conciliare Jovem valuit; placare Quirinum  
 Hersilia Antennae populis; extinguere belli  
 Irarumque faces lacrimis potuere Sabinæ  
 Cognatas inter gentes; Veturia nati  
 Non odium restinguet? Quid petis amplius? en Urbs  
 Te revocat; patres sacraque in veste sacerdos  
 Saepius orarunt Divorum nomine; deum  
 Cum teneris pueris, moesta cum conjuge mater  
 Ante pedes adstat. Memorem si volsca rogarent  
 Ora, dares pacis munus; num dignior alter  
 Matre, cui patriae haud renuas donare salutem?  
 Sic ait. Ora duces mirantes mutua vertunt;  
 Hosce referre juvat, lateque sonare per agmen  
 Moerentis matris sensus generosaque dicta.  
 Mollibus horrissonae pelago sedantur ut euris  
 Undarum moles; leni sic voce parentis  
 Bellorum fluctus sub corde quiescere Volscum  
 Incipiunt, sensusque beatæ pacis oriri.  
 Aspectus matrum, puerum comitumque, doloris  
 Ac sonitus tangunt et bellis pectora sueta;  
 Praecipue vero curarum turbine ferri  
 Clarum ductorem cernunt, mollisque medullas  
 Ingreditur pietas; hinc ardet pulchra cupido  
 Turbatis animis reddendi gaudia, nullos  
 Ast aegris cernunt oculis se pandere calles;  
 Dux vero armipotens anceps, quae quomodo reddat,

Aut quae non reddat, non repperit. Ora quietus,  
 Ast imo magnos versat sub pectore fluctus;  
 Laetitiam pacis nunc Romam mittere, nunc vult  
 Irruere in patrios Martis toto impete muros:  
 Corde sonant alto maternae murmura vocis,  
 Acribus et stimulis urgent ad splendida facta;  
 Ast olli tetro pingit mens aegra colore,  
 Quae Volscus tormenta paret, si cesset ab armis.  
 Non durae terror mortis, sed dedecus olli  
 Magnanimum laniat pectus. Spectacula saeva  
 Illius apparent animo; se milite cinctum,  
 Turpibus et nexum vinclis, tractumque per urbes  
 Volscorum cernit; plebejae sibila linguae  
 Et voces audit, medioque in crimine torvus  
 Tullus adest, dirumque probrum aggerat, et vocat illum  
 Perfidia saevum praedonei jura sacrata  
 Hospitii violare ausum; nunc semet, et iras,  
 Nunc odit pacem, nunc Urbem; ebullit et alget,  
 Subrubet, expallet, refugit pugnam, et cupit anceps;  
 Valdius in patriam dulci pietate moveri  
 Sentit; at indomiti affectus cordisque tumores  
 Magnorum dirae pestes, contemptor et usus,  
 Ingeniumque ferox compellit ad impia bella.  
 Oppositos inter motus hinc ille tacebat  
 Defigens oculos matri, qua saepe rogatus,  
 Rumperet ut tandem male grata silentia: fatis,  
 Incipit incerto sonitu, maledicta relinque  
 Tecta, ubi fas versum atque nefas, ubi plurima turba  
 Bacchatur scelerum; sine nos inferre cohortes  
 Protectas Superis, ut corruat impia Roma.  
 Cum vero tulerint ad me te fata benigna,  
 Per quae conjungunt genitrici vincula natum,  
 Perque nurum miseram, parvorum spemque nepotum,  
 Ne libeat saevis caput objectare periclis,  
 Et nati fatis, quem Volscum dextra jacentem

Extulit ad patrum sedes, ad culmen honorum,  
 Utere; me nimium laetum, si degere sit mens  
 Diva tibi mecum! Sapiens discernere sueta  
 Occultos nati sensus Veturia, vidit  
 Illum turbatis oculis et voce locutum,  
 Altius et patriae pietatem intrasse per imum  
 Pectoris; esse satis votorum; cuncta novanda,  
 Sermonem, vultum, dubius dum filius haeret,  
 Quaeque doment iras, materni tela furoris  
 Immittenda, sagax ceu dux in montibus urbem.  
 Oppugnans, omnes aditus, omni que pererrat  
 Clausos arte locos, variisque assultibus urget...  
 Degere me tecum? Me consecrarier hostem  
 Urbis? Me nato sternenti a culmine Romam  
 Jungi? Mene jubes similem tibi? Libera Romae  
 Immaculata cadam, sedes et laeta piorum  
 Invisam; facinus tantum narrabo sub imis  
 Umbris, te scelere amentem jactare tuorum  
 Grandia per campos effossis ossa sepulcris,  
 Te capitolas arces, simulacraque Divum  
 Sternere, nec natis, viduae nec parcere matri;  
 Quid pius Aeneas referet, quid Romulus ingens,  
 Pompiliique nepos atavus tibi Marcius Ancus?  
 Quid genitor summo erga te succensus amore,  
 Quidve tot illustres animae, quae sanguine nobis  
 Hanc patriam peperere suo? Torvasque frementesque  
 Auribus accipiam; infandum! Te vendere Volscis  
 Te, quem gens Latii clarum virtute colebat,  
 Ob non magnanimas iras patriamque decusque?  
 Quid? Scelus an tantum speras sine vindice poena  
 Ire? Ferum tecum, quod te noctuque diuque  
 Damnat, jam portas sub corde tribunal apertum.  
 At si cum volscis patrios ascenderis armis  
 Muros, insueto trepidabunt corda pavore;  
 Undique civiles umbrae manesque tuorum

Sanguinei occurrent ; metuens te Volscus et hostis  
 Ad mortem rapiet ; frustra et cum Rege superbo  
 Sub Phlegetonte gemes. Verum quid demoror ultra  
 Te verbis , dum bella tonant ? Impelle phalanges ,  
 Fortunam sequere. At pharetras deplebimus , hastas  
 Stat plena vibrare manu , devolvere saxa ,  
 Tecta , trabes , taedas ; et cum sperare salutem  
 Non dabitur nobis , constans Romanus ad unum  
 Occumbet , muros desertos victor habeto  
 Cum Volseo attonito ; tibi sunt exempla novanda  
 Horrendae regum natae , matrisque cadaver  
 Calcandum pedibus sub portis. Pectore fudit  
 Haec mater. Fortis tum vires colligit omnes  
 Marcius , et vastis tremuerunt nisibus artus ;  
 Dumque dabat fortuna severas sumere poenas ,  
 Evellit penitus generoso e corde cruentas  
 Iras , atque odii confringit vincula liber ;  
 Hinc patria tacitum pietate accensus ad agmen  
 Convertens oculos insueta luce micantes ,  
 Non mortale sonans : pacem bellumque Senatus  
 Hac volscus posuit dextra ; sed linquo supremo  
 Agminis arbitrio ; clausistis classibus hosti  
 Tyrrheum ; paucis vicistis solibus urbes ,  
 Martia quas multis vix annis Roma subegit ,  
 Laetaque direptis gazis ornata redundant  
 Oppida Volscorum ; villaeque hac nocte voratae  
 Flammis , non laedi Volscos impune loquuntur ;  
 Gentem , qua coram siluerunt itala regna ,  
 Clausistis muris. Venerandi quidquid in Urbe est  
 Ante oculos vestros ter pacis munera frustra  
 Adfuit implorans. Imbelles ecce catervas  
 Et flentes puerum turbas miseramque senectam ,  
 Hostiles inter dextras en Roma reponit  
 ( Mira fides ! ) Matrum vitam generosa decusque :  
 Audistis gemitus , audistis quomodo constans

Addiderit votis Veturia verba minarum ;  
 Immisit summus maternae fulmina linguae  
 Juppiter, aut aliquis certe Deus. Itala tellus  
 Hactenus aspexit Volscorum robur in armis ;  
 Jam cor magnanimum miretur. Dextera victrix  
 Fert pacis donum victis ; hinc volsca videntur  
 Arma domare Urbem, si multis mitia votis  
 In pharetram redeant, Jampridem exspectat, ut addat  
 Historia aeternis chartis praeconia cordis  
 Magnanimi Volscum ; nam saevum ponere fulmen  
 Fletibus et votis, supremo numine dignum est.  
 Primus ego ( testis sol esto, et volsca vocanti  
 Terra mihi, multis quam ornat mea dextera lauris,  
 Et tu, summe Parens, tuque, Anti litore culta  
 Diva potens, volscaeque iugentia Numina gentis,  
 Et vos, romuleae quae curam sumitis Urbis ),  
 Primus ego veniae ductus splendore recedo  
 A memori cura opprobrii, noxamque remitto ;  
 Romanum Volscumque pari complector amore,  
 Nilque magis cupio, quam pax aeterna beatos  
 Hos faciens populos saturnia regna reducat.  
 Sanguine sique meo placanda est ira Deorum,  
 Hoc ego devoveo caput, haec ego spondeo Cajus,  
 Atque sequor laetus generosae dicta parentis ;  
 Anne quis haeret iners, quando a ductore triumphi  
 Splendidius reseratur iter ? Sic fervidus igne  
 Ardoris patrii clamabat Marcius Ingens ;  
 Et volscae acies afflabat fulmine linguae,  
 Vocibus, adspectu, radianti lumine, mira  
 Vi mentis, contra quam certat nulla voluntas,  
 Insuper omnipotens hominum rerumque Creator,  
 Qui semper gignit residens in pace beata  
 Astrorum motus immensos absque tumultu,  
 Harmoniamque regit legum, quibus orbis obedit,  
 Est visus radios demittere lucis ab alto,

Aetherae pacis radios , et dulcis amoris ,  
 Et clara pectus tot millibus urere flamma.  
 Improvisus adest ventus , qui nubila pellit ,  
 Et nitidus medio Phoebus resplendet Olympo.  
 Tunc Veturiadis mater sic ora serenans :  
 Nunc vere sanguis meus Aeneadumque propago !  
 Hinc prolem exsultans formosa Volumnia linquit ,  
 Laetitiaque amens sponsi inter brachia currit ;  
 Et pueri lacrimis immiscent oscula , verba ,  
 Complexique genu placati patris inhaerent.  
 At matrum turbae , sapiensque Valeria primum ,  
 Et dulci vultum fletu conspersa senectus  
 Magnanimo gratos tendunt oculosque manusque ,  
 Et patriae patrem geminata voce salutant.  
 Tantae virtutis radiis , ceu caerulea vento ,  
 Aere renidentes acies agitantur et ardent ,  
 Tam potis est facinus generosum corda movere !  
 Quisque ducum roseus cristis auroque coruscus  
 Magnanimo mites Marci pede subjicit enses ;  
 Festinas fortis bellator concutit hastas ,  
 Signifer et tollens agitat vexilla per auras ;  
 Martia laetitiâ resonis clangoribus auget  
 Buccina , et excussis ardens equus artubus hinnit.  
 Non tot festivis unquam celebrare cruentos  
 Certarunt signis Volscorum castra triumphos ;  
 Undique tolluntur geminatae ad sidera voces ,  
 Et Coriollanum non tam ceu numen adorant  
 Terribile armorum , quam pacis amabile sidus.

F I N I S.



HAG 2007512



*Errata**Corrige*

Pag.	26 v. 10	Atque sopire . . . .	Et sopire
•	67 v. 35	fontibus . . . . .	frontibus
•	69 v. 4	exaudit . . . . .	exaudiit.
•	96 v. 35	oro . . . . .	oro,
•	104 v. 14	dedita . . . . .	victa
•	137 v. 4	Justitiam Romae etc. .	Justitiam pars Romae ingens,
•	139 v. 22	auratas . . . . .	aureas
•	151 v. 11	parum . . . . .	paulum
•	171 v. 12	properemus . . . . .	intremus
•	190 v. 28	versat . . . . .	versat.
•	192 v. 30	ompta . . . . .	empta
•	219 v. 19	cunctantem . . . . .	cunctantem

**NIHIL OBSTAT**

**J. B. Rosani Episc. Erythr,**

---

**IMPRIMATUR**

**F. D. Buttaoni S. P. A. M.**

---

**IMPRIMATUR**

**Fr. A. Ligi Arch. Icon. Vicesg.**







